



BIBL. NAZ.
Vitt. Emanuele III.

RACCOLTA
VILLAROSA

B(1

784

206





604 617 Race. Vell. B.
JURIS ROMANI 781

INSTITUTIONES


AB U. J. D. NICOLAO VALLETTA

IN REGIO NEAP. ARCHIGYMNASIO

JURIS CIVILIS ORDIN. ANTECESS. ET ACADEM.

Brevi planaue methodo concinnate,

T O M U S I.



N E A P O L I

MDCCLXXXII.

EXCUDEBAT MICHAËL MORELLI

Superiorum permissu.

51/800

Sit Jurisperitus in consilio, cautus; in patrocinio fidelis; in judicio justus.

Bernard. Circa in Præfat. ad suam Collect. i. Decretal.

Leges sacratissimæ, quæ constringunt hominum vitas, intelligi ab omnibus debent, Et universi, præscripto earum manifestius cognito, vel inhibita declinent, vel permissa sectentur.

L. 9. C. de LL.

PETRO PATRITIO

VIRO JURISCONSULTISSIMO

A C

REGIO CONSILIARIO

Nicolaus Valletta

S.



Tu juvenile, ac festinatam hoc
opus patrono suo, quem si-
bi ambit, in lucem prodiens lætetur, &
decoretur, nonnisi Tibi, Vir Clarissime,
ornatissimeque; inscribere; ac nuncupa-
re constitui, qui jam ex primo Advocata-
torum ordine, ingenio fertilissimo, li-
matissimo judicio, & flexanima eloquen-
tiæ vi in foro, judiciisque regnare con-
suevisti; tum in M. C. V. assidui labo-
ris, atque industriæ non levia edidisti

*

2

spe

*specimina; nunc in S. R. C. & gravi-
tate in civium juribus sartis rectis ser-
vandis, & incredibili comitate, qua ne-
mo nisi cum animi sui oblectatione a te
discedit, omnibus commendaris. Quare &
etas profecto nostra Te in majoribus con-
stitutum honoribus intuebitur, & postera
ob mores tuos, ad sapientiam æque, atque
ad benignitatem harmonice temperatos,
tamquam integerrimi Judicis exemplum,
admirabitur. Elucent hinc rationum mo-
menta, quibus adactus hæc Civiliis Juris
Institutiones, duobus tomis comprehensas,
Tibi offero, in Juris arte doctissimo; spe-
tus futurum, ut labores mei, quantuli ii
fuerint, cari Tibi sint, & accepti; meque
in tui patrocinium, quod unum exopto,
libenti animo suscipias. Vale.*

M. J. B. P. 1711

M. J. B. P. 1711

M. J. B. P. 1711

M. J. B. P. 1711

M. J. B. P. 1711

M. J. B. P. 1711

Juris artem præ ceteris disciplinis & jucundam, & necessariam esse, non solum ad honores, dignitatesque comparandas, ad cumulandas opes, divitiasque, & uno verbo ad privatam felicitatem; verum etiam, quod præcipuum esse debet ingenuo & liberali viro, ad Rempublicam sustinendam, & ad procurandam aliorum beatitudinem, adeo in perspicuis est, ut demonstratione non egeat. Usu quidem compertum est, homines, si jus quisque suum utilitate propria metirentur, perpetuo se se conflictaturos. Hinc ratio ipsa adulta, quæ sapientia dicitur, civile bonum communis utilitate definivit; hominesque in medium proprias voluntates eodem confluentes posuere, ut publica voluntas, & summa potestas sociaretur. Inde profecta lex est, sive communis, armata, & imperiosa ratio, ad eos coercendos, qui suamet ratione nequeunt in officio contineri. Quum autem ea potestas ex consensu omnium extiterit voluntatibus; hominum ideo libertas nec ullatenus premitur, nec præceditur. Hanc publicæ tranquillitatis rationem ad suos cujusque regionis, temporisque mores flexerunt, ut populorum natura ferebat, prudentissimi legumiatore. Proinde Jus Civile, quod *πολιτικόν* Theophilus dicitur, constituere prima semper in floridissimis Imperiis cura fuit; illudque callere semper officium Primorum Civitatis nobilissimum.

Præsertim victoris Gentium populi leges, in quibus Romanæ virtutis, fortunæque maximum elucet argumentum, cum ipsa natura consentientes, & humanitati omni ex parte accommodatas; Gentes omnes non invite exceperunt: quin eæ, quæ Romanam dominationem vel horruerunt imminuentem, vel excusserunt impositam, Romanas leges non modo importatas amplexæ fuerunt; sed & absentes, remotaque ultro advocaverunt: adeo quidem, ut quævis dissipta, delætaque latina majestate, latini nihilominus juris regnet auctoritas. Sane enatum hoc Jus videtur ad barbariem diluendam, atque omnium ferme Populorum voluntates uno veluti vinculo consociandas. Romanos ideo Consultos in Civitate honoribus dignitateque quammaxime excelluisse, omnibus constat.

Verum quo Jæti nomen? decusque præ aliis fulget, eo pauci olim, hodie paucissimi numeris omnibus absoluti Jurisperiti inveniuntur; multi semidocti, & sapientia

civi-

civili vix leviter tincti præsertim, qui in Foro per symplegadas litium solent navigare Colchos ad vellus aureum; uti non sine querimoniâ scripsit Justus Lipsius in *monitis*, & *exemplis politicis* II. 10. Ut autem alias omit- tam tantæ causæ socordia, pudendæque ignorantia, præcipuam esse teor Elementorum Juris studium festinantes, ac parum accurate peractum. Quare licet inter innumeras versetur Civilis Juris Institutiones, has meas publici quoque juris facere minime veritus sum. Omnibus plane patet veritas, nec dum usquequaque occupata est. Quin multi nimis jejune; alii grammaticæ potius, quam Jurisconsulti, consule nimis, insulseque prælectiones in Justiniani libros scripsere. Adolescentes ideo in obscuro palantes meas hæc exoptarunt, quæ clara saltem sunt, atque ad meam docendi rationem accommodatæ. Non dicam igitur cum Aulo Persio, *sat. 1.*, quis leget hæc? Auditoribus enim meis, iisque petentibus hoc tumultuarium opus exhibeo: in quo vestigia persequutus sum Antecessoris mei, Josephi Paschalis Cyrilli, cujus Institutiones Henrico Contelmanno in *notis ad Bibliothec. Juris Struvii*, maximopere commendantur: atque dilucidum rebus ordinem dare, legum philosophiam, rationesque per generalia præcepta exponere, & germanæ Jurisprudentiæ sacra cum Fori nostri praxi copulare, meæ præcipue partes fuisse; ut per vultum Jurisprudentiæ campum nullo negotio possent exinde adolescentes spatium.

Proinde neque operis commendationem, neque excusationem facti, quæ duo operibus præmitti solent, æ nobis, lector, speres. Arrogantiæ alterum, alterum dissimulationis, aut ironiæ notam æstimare possis. Tam enim reprehensione digna nimia Socratis humilitas, qui vel ab omnibus nota ignorare se dicebat, quam Hippiae Elei aperta superbia, qui cum Olympiam venisset (Tullii verbis utar *III. de Orat.*) maxima illa quinquennali celebritate ludorum, gloriatus est, cuncta pene audiente Græcia, nihil esse in ulla arte rerum omnium, quod ipse nesciret. Quid igitur a me expectas? Tantum ut cum eodem Cicerone *de Orat. I. 8.* ad senescentis Jurisprudentiæ repARATIONEM; adolescentibus, qui publicæ spei pignora sunt, inculcem; pergite, ut facitis; atque in id studium, in quo estis, incumbite; ut vobis honori, & amicis utilitati, & Reipublicæ emolumento esse possitis.

INDEX LIBRI I. ET II.

<i>Prologomena de ortu, & progressu Romani Juris</i>	pag. 1
Lib. I. Tit. I. <i>De Fastis & Jure</i>	73
II. <i>De Jure Naturali, Gentium, & Ci-</i>	86
III. <i>De Jure personarum</i>	94
IV. <i>De Ingentis</i>	101
V. <i>De Libertinis</i>	104
VI. <i>Qui, & quibus et- causa manumittere non possunt</i>	111
VII. <i>De Lege Fustia Cantina tollenda</i>	118
VIII. <i>De his, qui sui, vel alieni juris sunt</i>	120
IX. <i>De patria potestate</i>	124
X. <i>De nuptiis</i>	131
XI. <i>De adoptionibus</i>	152
XII. <i>Quibus modis jus patria potestatis sol- vitur</i>	160
XIII. <i>De tutela</i>	170
XIV. <i>Qui testamento tutores dari possunt</i>	175
XV. <i>De legitima agnatorum tutela</i>	178
XVI. <i>De Capitis diminutione</i>	183
XVII. <i>De legitima Patronorum tutela</i>	188
XVIII. <i>De legitima Parentum tutela</i>	189
XIX. <i>De fiduciaria tutela</i>	190
XX. <i>De Atiliano tutore, & eo, qui Lege Ju- lia, & Titia dabatur</i>	192
XXI. <i>De auctoritate tutorum</i>	199
XXII. <i>Quibus modis tutela finitur</i>	205
XXIII. <i>De Curatoribus</i>	209
XXIV. <i>De satisfactione tutorum, vel curatorum</i>	220
XXV. <i>De excusationibus tutorum, vel curatorum</i>	226
XXVI. <i>De suspectis tutoribus, vel curatoribus</i>	239
Lib. II. Tit. I. <i>De rerum divisione, & acquirendo ip- sarum dominio</i>	224
II. <i>De rebus incorporalibus</i>	283
III. <i>De servitutibus</i>	285
IV. <i>De usufructu</i>	295
V. <i>De usu, & habitatione</i>	300
	VI.

VI.	De Usurpationibus, & longi temporis praescriptionibus	302
VII.	De donationibus	313
VIII.	Quibus alienare licet, vel non	318
IX.	Per quas personas cuique acquiritur	322
X.	De testamentis ordinandis	326
XI.	De militari testamento	338
XII.	Quibus non est permixtum facere testamentum	342
XIII.	De exheredatione liberorum	347
XIV.	De heredibus instituendis	358
XV.	De vulgari substitutione	365
XVI.	De pupillari substitutione	379
XVII.	Quibus modis testamentis infirmantur	379
XVIII.	De inofficioso testamento	385
XIX.	De heredum qualitate, & differentia	390
XX.	De legatis	396
XXI.	De ademptione, & translatione legatorum	404
XXII.	De lege Falcidia	412
XXIII.	De fideicommissariis hereditatibus	416
XXIV.	De singulis rebus per fideicommissum relictis	422
XXV.	De codicillis	425



INSTITUTIONUM
JURIS CIVILIS ROMANI

PROLEGOMENA

DE ORTU, ET PROGRESSU ROMANI JURIS

§. I.



UI antiquitatum præsidio destitutus ad Jurisprudentiæ studium accedit, ac veluti ejus sacra illotis, ut ajunt, manibus tractare audet, Jurisprudentiam, tamquam simulacrum quoddam, & cadaver contemplatur, non mentem, non vim, ac potestatem illius adsequitur. Proinde historiæ Romanæ cognitio politioris Romani Juris cultori adeo necessaria est, ut. qui ab hoc illam divelli posse existimat, idem mihi videatur petere, ut navis cum socio dividatur. *V. Jo. Salom. Brunquelli, Dissertat. prælim. hist. Jur., & Balduin. de Inst. Hist. Lib. II., ubi ita effatur, cum historia conjungenda est Jurisprudentia, quæ conjunctio tam est necessaria, quam unius corporis indivisæ partes, aut membra divelli neque possunt, neque debent. Et alibi, Nondum satis sta-*

A

tue-

tuere potui, plusne Juris historia ex Jurisprudentiæ libris, an Jurisprudencia ex historicis monumentis accipiat. Sexcenta Glossographorum errata ab antiquitatis ignorance profluxisse, jam satis constat. Quin apud veteres nemo gravissimo Jurisconsulti nomine dignus dijudicabatur, qui historiæ præsidio expers erat, *Cic. de Orat. I. 43.* Cajus ipse XII. Tabulas interpretaturus, rem ab Urbis initiis petiit in *L. 1. ff. de O. J.* Ejus exemplo nos antequam illius Juris sapientissime conditi, atque a Gentibus ferme omnibus recepti, Institutiones, Deo bene juvante interpretandas aggrediamur, hoc historico-legale specimen præponere omnino necessarium duco; ut partes, ex quibus, veluti ex pluribus rivis flumen, Romana Jurisprudencia & coaluit, & ad magnitudinem excrevit suam, nullo negotio inde dignosci queant.

§.2. *Urbs Roma*, ait in *L. 2. §. 1. de O. J.* Pomponius, *initio sine lege certa, sine jure certo egit*: nimirum patriis Albanorum, quorum colonia erat, moribus vivebat (apposite Livius ait, *cre- scit interea Roma Albæ ruinis*, *V. Nic. Macchiav. in Tit. Liv. II. 3.*); caruit jure

jure scripto . Ita interpretantur locum illum Bynkerſoëkſius in *Prætermiſſ.* ad L. 2. , & Heineccius in *Hiſt. Jur.* Quoties vero nova aliqua inciderent , Reges ipſi erant *romos quæſores* , *viva ac ſpirans lex* , ut inquit Philo *de vita Moſis* L. II. Proinde ſequitur Pomponius , *omnia initio manu a Regibus gubernata eſſe* : unde *edictorum* atque *Albi Regii* apud Veteres mentio non infrequens . Tacitus quoque *Annal.* III. 26. , *Romulum* , ait , *ut libitum* , *imperitaſſe* .

§. 3. Ea autem Jurisconſulti verba , quicquid dicat Scipio Gentilis in *Diſp. Illuſt. de Jur. pub. Rom. diſp.* 1. §. 2. , recte ſtare poſſunt cum Reipublicæ forma imperioque , quod Romulus cum Patribus , ac Populo communicaverat . Summum enim antiquitus Romæ imperium , quoad Reip. formam , tam penes Regem fuiſſe , quam Senatum Populumque ; ac ſub Servio Tullio , quia plures fuerunt Patriciorum Centuriæ , & unaquæque unum ſuffragium conſtituebat , Ariſtocraticam quodammodo formam induiſſe Rempublicam , doctiores putant . Allata autem Pomponii verba tantum de controverſiis ad Jus privatum pertinenti-

bus in Judiciis a Rege finiendis, accipiunt, *V. Beaufort. de Rep. Rom. præfat. §. 3.* Regum potestatem supremam fuisse, Scipio Gentilis autumat in *Disp. de Princip. Rom. thes. 3.* Verum recto potius, firmoque talo stat ei adversa auctoritas Livii *VIII. 28.*, & Valerii Maximi *VIII. 1.*, qui ait, *M. Horatius interfectæ sororis crimine a Tullo Rege damnatus, ad Populum provocato iudicio, absolutus est.*

§. 4. At Populus cupidissimus libertatis (quæ viget, si *leges imperent*, Aristot. *Polit. III. 11.*, & 16.), aucta Civitate, leges flagitavit, quas ipsemet scivisset, Hinc Romulus primum quasdam in Curia-
tis Comitibus, Populi ipsius suffragio, leges tulit, præsertim maritales, ac de juribus patronorum, deque patria potestate, *Dion. Halicarn. L. 2. Aurelius Victor de viris illustr. Vide & §. 2. I. de patr. potest.* Nec mirum, si Vlpianus patriam potestatem moribus receptam dicat in *L. 8. de his, qui sunt sui &c.*: nam novum non est, quæ veteribus legibus introducta sunt, moribus adscribi, *Ant. Schulting. ad tit. 4. §. 8. Collat. LL. mosaic., & Rom.* Non omnes vero leges, quæ Romulo tribuuntur, præsertim a
Franc.

Franc. Balduino, antiquitatis sanctitatem habent.

§.5. Numa etiam, Mosaicæ fere innixus doctrinæ, *Euseb. Præp. VIII. 6.* (non item Pythagoricæ), leges tulit, præsertim sacras, ac Pontificem Maximum sacris præposuit, de quo vide *Ezechiel. Spanhem. de usu numismatum, Montfauconium, Antiqu. schemat. illustr. tom. 2., Norisium in cenotaph. Pisan.* Tulere quoque, sed paucas, subsequuti Reges Tullus Hostilius, Ancus Martius, & Tarquinius Priscus. Utrum Ancus Martius juris fecialium primus auctor fuerit, vide Jo. Jensem in *ferculo litterar.* Servius Tullius autem præcipuus sanctorum legum fuit, quæ etiam Reges obtemperarent, teste Tacito, *Annal. III. 26.* Omnes vero sustulit leges Tarquinius Superbus, & ob vim Lucretiæ illatam A. U. C. 244. Roma ejectus, ac regium nomen proscriptum fuit, *Livius I. 57. ad 60.*

§.6. Hæ leges Regiæ, quæ & *curiatae*, & *centuriatae* dictæ sunt, utpote quas jussit Populus a Romulo in Curias, a Servio in Centurias descriptus, licet ad universum Populum latæ fuerint, Patricii tamen a Romuli usque imperio, eas uti

myſteria cuſtodiebant, & clientibus explicabant. Earum collectio a Publio Papirio, five mavis, Papirio facta, *Jus civile Papirianum* a Pomponio nuncupatur d. L. 2. §. 2., ad quod commentarium ſcripſit, teſte Paulo in L. 144. de V. S. Granius Flaccus; Julio Cæſari æqualis, V. Duker. de latin. Jurisc., cujus fragmentum extat apud Macrobiū Satur. L. 3. At poſt renatas litteras earum fragmenta legum collegerunt præ cæteris Antonius Auguſtinus, Juſtus Lipſius, Pardulphus Prærejus, Paulus Merula, Fr. Balduinus, Ant. Contius, Guil. Forſterus, A. Auguſtinus, P. Manutius, Car. Sigonius, Janus Vincentius Gravina, & noviffime Terraffonius, qui Papirianas leges juxta rerum ordinem digeffit.

§. 7. Quemadmodum vero aſperum, & grave poſtremum evaſit Regum imperium, ita gratior libertas, atque inde Romani ſapientiores. Profecto, ut verbis Livii II. 1. utar, *imperia legum potentiora, quam hominum*. Dignus, qui hic referatur, eſt Ciceronis locus Tuſc. Quæſt. IV. n. 1., Cum a primo Urbis ortu, regiis inſtitutis, partim etiam legibus, auſpicia, Cæremoniæ, Comitia, provocationes, Patrum

trum consilium , Equitum , peditumque descriptio , tota res militaris divinitus esset constituta ; tum progressio admirabilis incredibilisque cursus ad omnem excellentiam factus est , dominatu Regio Republica liberata .

§.8. Deinceps Lege Tribunicia , nimirum Junia de imperio Consulari lata a Junio Bruto , adhuc Tribuno Celerum , & duo Consules ad annum constituti , ne potestas mora , vel solitudine corrumpetur , *Florus Hist. I. 9. , & , quod facile fuit belligeranti Populo , simulque leges jubenti , pulsi Reges fuere anno V.C. 244. , atque ex legibus Regiis illæ abrogatæ , quæ Regium respiciebant imperium : cæteras de divinis , humanisque aliis rebus , potius ut mores , quam ut jus scriptum Populus retinuit . Vel hæc mens Pomponii fuit , cum inquit in §.3. d. L.2. Enactis Regibus Lege Tribunicia (heic comma appingendum) omnes leges Regias exolevisse , vel certe erravit . Nam dubio procul quædam leges Regiæ fuere in XII. Tabulis translatae . Ad hæc Servii leges de contractibus , quas uno omnes edicto Tarquinius Superbus aboleverat , retentas fuisse a Romanis post Reges , ait Halicarnassæus VI.2.*

§. 9. Ubi autem satis non erant veteres Leges, Consulium edicta, & arbitria jus constituebant in novo regimine, quod aristocraticum fuit; nomine tenus populare. Nam, uti mox dictum est, in Comitiiis Centuriatis, in quibus majora expediebantur negotia, majora quoque erant Patriciorum, divitumque suffragia. Temporarium proinde, incertumque privatum jus fuit, quo Roma usque ad annum 304. gubernata fuit; nimirum a pulsibus Regibus per annos 60. Hic Pomponii locus in *d. L. 2. §. 3.*, ubi legitur *viginti annis*, mendosus quidem dicendus est. Enimvero quædam in hac periodo latæ leges; at ex publicum magis Romanorum statum respiciebant.

§. 10. Jam post Tarquinii Superbi obitum, omni excusso hostis timore, Patres plebi infestissimi fuere. Plebs post varias secessiones privilegiorum Patrum particeps evasit; æs alienum ei remissum; denique anno V. C. 263. Tributa Comititia, frustra renitentibus Patriciis, instituta fuere: quæ cum inauspicato, & sine Senatus auctoritate haberi potuissent, cumque ex majori Civium numero suffragia per Tribus ferri debuissent,

po-

populare magis regimen coepit. Quid, quod, Tribunis etiam creatis, Patres inter & plebeos non levia dissidia? ut tandem Senatusconsulto, quod suavit T. Romilius, a Plebiscito confirmato anno 300. conventum fuerit de Legibus scribendis, deque peregrinis legibus Romam inferendis: quod consilium perperam nonnulli rident; uti Thomafius in *Nevis .V. Rad. Forner. Rer. quat. I. 15.*

§. 11. Quamobrem tres legati, ait Livius III. 31. (aliud Pomponius), Athenas missi, jussique *inclitas leges Solonis describere, & aliarum Græciæ Civitatum instituta, mores, juraque noscere*; nimirum Civitatum Magnæ Græciæ, quæ tunc temporis civili florebat sapientia. Ita Halicarnass. ait *ad Græcas Italiæ civitates*. Romanos autem laudat Augustinus *de Civ. Dei II. 16*, quod Lycurgi, seu Lacedæmoniorum leges minime acceperint: at tutela agnatorum legitima fortasse ab antiquis Patriæ moribus in XII. tab. descripta fuit. Otto in *præfat. tom. 3. Thesaur.* Biennio post rediisse Legatos cum Atticis legibus, scripsit Livius idem, sed plus cogitavit. Diligentior, ut in aliis, in hac re Livio Ha-

Halicarnasseus : atque etiam explicatius ait Tacitus *Annal.* III. 27., Leges XII. Tabularum scriptas accitis, quæ usquam egregia. V. Merrill. *obs.* II. 10. Miror hæc, in re facti Vicum nostrum omnem fidem antiquitati denegasse, cum inter fabulas recenset historiam Græcarum legum Romam accitarum, de *Const. Philologia* c. 35. & in *Princ. nov. scient.*

§.12. Reversis Triumviris illis e Græcia post biennium, anno V.C.302. septem additi fuere Patricii summa præditi potestate, qui industria usi Hermodori Ephesii, ostracismo a patria ejecti, decem primo tabulas composuerunt, populoque proposuerunt emendandas. Sed populus haud animadvertisse videtur sua ex iis tabulis iura maximopere imminui. Tum Centuriatis Comitibus anno 303. eas pertulere Decemviri : ac posteriore anno duas alias attexuere. Hæ sunt duodecim Tabulæ, roboreæ pro Rostris propositæ, ut sciri a Civibus possent; quin a pueris veluti *carmen necessarium*, inquit Tullius de *LL.* II. 23. Everso autem Decemviratu in æs incisæ Livius III.57. Unde Ovidius canit, *Nec verba minantia fixo Aere ligabantur*; *Metam.* L. I. v.19. V. *Forn.*

per. I. select. 24. At anno V. C. 365. in Gallico incendio cum urbe perierunt. Postea restitutæ, *Liv. VI. 1.* in Foro permanserunt ad III. Ecclesiæ Sæculum, *Cyprian. de gratia Dei ad Donat.* Tum ex Barbarorum incursione interciderunt: ac Justiniani ævo earum leges extabant in sex libris Gaij *Δωδεκάβιβλος*, seu XII. tab., qui postea etiam deperditi ob temporis injuriam.

§. 13. Maximis eas leges laudibus prosecuti fuerunt Romani. Fuerunt, teste Livio III. 34, fons omnis subsequenti publici, privatiq; Juris Romani. Ita *Flumina magna vides parvis de fontibus orta.* Unde Cicero omnium Philosophorum bibliothecis, omniumque aliarum Civitatum legibus illas anteponendas fore, censuit *L. 1. de orat. V. Petr. Petit. Miscell. IV. 5.* Hinc *legitimum* in Jure dicitur, quod ex XII. tab. sive verbis, sive mente descendit, *Merill. Obs. V. 10.*; tametsi non defuerint, qui veluti iniquas traduxerint; maxime Phavorinus Philosophus apud Gellium XX. 1. e veteribus; & e recentioribus Thomasius *de Novis Jurispr. I. 2.*; præsertim quod aristocratiam redolerent; nam vetita connubia inter Patricios, & plebeos; poe-
na

na malorum carminum mors ; & debitores in partes secari permissum est . Interim tantum fragmenta earum habemus a viris eruditis digesta , & illustrata : qua in re palmam omnibus præripuit Jacobus Gothofredus , quem vide in Tomo III. Thesauri Ottonis . Quare Jus Romanum in multis cum Jure Græco conspirat . Ad veteris autem Juris Græci peritiam parandam egregie faciunt Meursius , Pratejus , Rittershusius , Petitus , Salmasius , Heraldus . *V. Struv. in prol. ad Hist. Jur. , Jacob. Gronov. Th. Græc. Antiq. , & Fabric. Bibliogr. Antiqu.* At præter Jus Græcum multa ex legum Regiarum reliquiis , & institutis patriis in XII. tab. migrarunt ; *V. Cujac. Obs. III. 40. , & Jurispr. Rom. & Attic.*

§. 14. Post XII. Tabulas variæ Juris Romani partes invaluerunt ; nimirum Jætorum Responso , Leges , Plebiscita , Magistratum Edicta , Senatusconsulta , ac Principum Constitutiones , de quibus omnibus figillatim ex historiæ ordine videntum est . Et I. ipsas Decemvirales leges , quæ & breves erant , & rationem negotiorum expediendorum tacebant , Prudentum interpretatio , ac disputatio fori sequu-

quata est, *d. L. 2. §. 3.* Jurisconsulti a Romulo usque, nimirum ab Juris patronatus institutione, Patricii fuere (quo jure desueto, & e plebe ii veniebant, & honorarium pro eorum munere deinceps receperunt). Ipsi itaque Patricii, suam ita potentiam adstruentes, adhucdum de jure consulentibus respondebant voce, scriptove, sive forum obambulantes, sive confidentes domi, tam litigatoribus, quam Judicibus ipsis. Sed ut plurimum voce in libera Republica; adeo quidem, ut consultores sæpenumero testibus adhibitis Jētos interrogarent, *Menag. Amœn. Jur. cap. 20.*; eorumque discipuli *Auditores* dicerentur, *Cujac. obs. XXVII. 4.*: tametsi hoc nomen in Porcii Latronis schola ex eo enatum, quia ejus auditores semper audiebant, scripserit Seneca *Controv. Lib. IV.* Quod vero de folio Jētorum proprio scribit in *Historia Juris* Heineccius, id Bachio haud arridet. Leges autem alii ex verbis stricte; æque alii ex mente interpretabantur. Proinde non videtur integra Jēti definitio, quam ita exhibet Tullius *de prat. Lib. I.*, qui legum, & consuetudinis ejus, qua privati in civitate utuntur, & ad respondendum, & ad agen-

agendum, & *ad cavendum peritus est*, comprehendit enim tantum officia ex certo Jure manantia. Verum & secundum æquitatem ii respondebant. Jctus ideo a Manilio dicitur *Perpetuus Populi privato in limine Prætor. V. Hotoman. in lib. Jctus*, sive de optimo genere Juris interpretandi, & in *Comm. verb. Jur. v. Jctus*.

§. 15. Si vero perplexa incideret quæstio, in forum Jcti convenire solebant (& quandoque juxta Apollinis templum tractare; *Juven. sat. 1. v. 128. h. e. disputare, L. Divi. 17. de J. Patron.*) eam quæstionem ex Jure explicaturi. Id valet *Fori disputatio* apud Pomponium. Bachius autem in *hist. Jur.* hanc putat esse usum fori ex rebus similiter judicatis. Quod autem post disputationem placebat, *Juris regula, Fori sententia*, ac *definitio* dicebatur. Idque valent *decreta Jctorum* apud Tullium *pro Muren. c. 13.* Atque ita accipiendus Paulus, qui ait in *L. quum quidam 19. de lib. & post.*, Scævola in disputando responsi sui rationem adjecisse. Augustus quoque ob quæstionem, an Codicillorum usus introducendus esset, Jctos, interque eos Trebatium convocavit,

vit, §. 1. *Inst. de codicill.* Disputationum libros a Jctis scriptos vide in indice Jacobi Labitti. In iis sæpe verba *dixi, dicebam, placuit, putarunt, post magnas varietates obtinuit, & similia* occurrunt.

§. 16. Jurisconsultorum interpretationi tribuenda etiam est heurematica, seu inventrix Jurisprudentia. Ii enim nunc Juris rigorem indirecte ad æquitatem flectebant, invento colore quodam, fictione, formula, consilio (ex. gr. ob querelam inofficiosi testamenti, postliminium, stipulationem Aquilianam, postumorum institutionem, & consilium *ex L. 25. ff. ad S.C. Vellej.*, nimirum ut potius quis servo credat jussu dominæ, quam cum eo contrahat, domina fidejubente): nunc cautiones clientibus præbebant. Eurenata Modestinus olim exposuit peculiari libro, cujus in Pandectis fragmenta legimus. *V. Heinecc, in præfat. ad Stryk. de cautelis contractuum; Ant. Dad, Alteserra de fictionib. Juris: & Hertium de Jurisprudentia cavente.*

§. 17. Illa sive singulorum *Responsa* Jurisconsultorum, sive conventus *Decreta* in Reipublicæ libertate jus non faciebant (evertique ab ipsis oratoribus poterant, *Cic. pro Mur. c. 13., & pro Cæcin. c. 24.*), nisi rece-

pta:

pra : ex populi autem tacito consensu
jus sine scripto veniens, receptæ regulæ ,
 seu *sententiæ* , & *Jus civile* audiebant ;
 pr. *Inst. de adquis. per adrog.* , V. *Rævard.*
de auct. Prud. c. 14. , & in *L. 1. de*
R. J. ; nec non *auctores* (h. e. *Juris*)
 dicuntur *Jurisconsulti* a Pomponio §. 13.
 Jam vero per interpretationem *Prudentum* ,
 ac fori *disputationem* ; seu per *tor*
corum sententias inter sese *pugnantes* ;
 (nam secundum *Persium*

Mille hominum species, & rerum discolor usus;
Velle cuique suum est, nec voto vivitur uno),
inficiari nequit, *magnam Juris incertitudinem* ,
 ac *subtilitatem* *introducì* cœpisse.

§. 18. *Jurisconsultis quoque debetur*
formularia Jurisprudentia ; & in *primis*
actiones legis , hoc est *certaine* , ac *sollem-*
nes formulæ , quibus *inter se homines dis-*
ceptarent , d. *L. 2. §. 6.* : eæque sunt ,
 uti *Pomponius* ait, *ex legibus composita* ,
 nimirum ex *legum sententia* . At *Jctus*
 ipse minus proprie eas definit . *Ritus* e-
 nim *dandi a Magistratu tutoris* , itemque
servum vindicta manumittendi , *legis actiones*
 erant , nec tamen in iis *disceptatio*
 occurrebat . *Actio legis* verius dicebatur ,
 quæ apud *Magistratum* *certis formulis* ,
 fol-

sollemnique ritu expediebatur, uti adoptio, emancipatio, cessio in jure: *actus* vero *legitimus*, qui sollemniter, sed non apud Magistratum, peragebatur; uti olim mancipatio, acceptilatio, hereditatis aditio, servi optio, *L. 77. ff. de R. J.* Sola tutoris datio præsente fiebat magistratu, & inter legitimos actus quoque refertur *in d. L.* Cæterum omnis legis actio erat actus legitimus, non viceversa. *V. Schubart. Exercit. II. §. 6., Marc. Lyclama in Juris studiosorum libro, & Hotom. Obs. II. 21.* Actiones legis, atque actus legitimi uno actu fieri debebant, nec iterari poterant: & præterea nec diem, nec conditionem, nec procuratorem admittebant. *Gravin. de XII. tab. c. 80. Briffon. Ant. R. III. 20. Pet. Fab. Semest. II. 23. & Rævar. de auct. Prud. Tot,* tantisque tricis Prudentes plebi difficiliorem juris usum reddiderunt, sibi que legislatoriam quodammodo potestatem vindicarunt. De ipsarum vero Responsis mox sermo redibit; nimirum cum Jurisprudentiam sub Imperatoribus consideravimus, *infra §. 29. & seqq.*

§. 19. *Apud Collegium Pontificum* diu formulas fuisse, ait Pomp. *in §. 6. d. L. 2.* At quænam Pomponio fides, si Ponti-

fices tantum de Jure sacro actiones adfer-
 vasse constat? Quod si eos *omnibus in rebus*
interfuisse, ait Tullius *de LL. II. 19.*, non
 de actionibus loquitur, verum de diebus si-
 ve fastis, siue nefastis, siue intercisis; qui
 sane dies in omnibus rebus a Pontificibus
 petendi erant. *V. Pollex. For. Rom. I.*
8. Actiones autem, diesque fastos in or-
 dinem redactos ab Appio Claudio, non
 Decemviro, uti putat Pancirolus *Var. Lect.*
II. 2., sed Cæco, uti constat ex Plinio *Hist.*
XXXIII. 1., ejus scriba Gn. Flavius evul-
 gavit anno V.C. 449., maximis propterea de-
 coratus honoribus. Appellatur ea collectio
Jus Flavianum. Novas deinceps formulas
 notis obscurioribus exaratas Patricii, ne
 iterum profanis eorum mysteria paterent,
 composuerunt. Eas itidem plebi patefecit
 anno 552. S. Ælius Pætus Catus, summus
 Juris peritus; quod *Jus Ælianum* dicitur.
 Num hoc *Jus* aliud sit a Sex. Ælii Tri-
 partitis, dubium est. Certe in his præter
 XII. tab. erant *legis actiones*; *d. L. 2. §.*
38. Romanorum formulas stupenda plane
 industria collegerunt Barnabas Brissonius,
 & Car. Sigonius *de Judic. I. 9.* : Notas
 vero juridicas vide apud Valerium Probum,
 Petrum Diaconum, & Mangonem; nec non
 apud

apud Joannem Nicolaum *de Siglis veterum*,
& Stephanum *de Tachygraphia*, *ejusque*
in Jure usu.

§. 20. II. Insuper plures latæ fuerunt
leges. Lex erat, quod constituebat *Pop.*
R., *Senatorio Magistratu interrogante*, *ve-*
luti Consule, §. 4. *J. de Jur. Nat.*, *Prætorē*,
Dictatōrē, necnon *Magistratibus majoribus*
extraordinariis, *veluti Decemviris*, *Tri-*
bunis militum Cos. potestate: non item
Censore, quicquid dicat *Heineccius An-*
tiqu. I. 2. 1. *V. Josef. Averanium Interpr.*
Jur. I. 6., & *Gundlingium in Gundlin-*
gianis par. 16. §. 26. Scripta a *Senatorio*
Magistratu lex, auctore *Senatu*, publice
per *trinundinum* proponebatur; quod a
lege Cæcilia, & *Didia cautum* fuit, *Cic.*
pro dom. c. 16. *Stato die sollemnis Po-*
pulo rogatio fiebat; tum *suffragia ex le-*
gibus Tabellariis *Gabinia*, *Cassia*, *Papi-*
ria, ac *Cælia*, in *tabellis scripta* vel ita
V. R., h.e. *uti rogās*, vel *A.*, h.e. *anti-*
quo, a *Custodibus* per *puncta adnotabantur*.
Cum vero *Custodes tabellas numerabant*,
suffragia dirimere dicebantur. Quod si plu-
res erant *tabellæ*, quæ *legem probarent*,
ea *scita*, & *perlata* *audiebat*; si plures
improbarent, *antiquata*. Proinde *leges*

non erant, quæ tantum *latæ*, sed non *perlatæ*, & *jussæ*: uti nec eæ, quæ pro peculiaribus hominibus, vel causis ferebantur: ex. gr. *Manilia*, ut Pompejus Imperator Mithridatici belli constitueretur; *Lex Menandri* in *L. 5. §. 3. ff. de captiv. & postlimin.*, *Lex Hostilii Mancini*, *L. 17. de legation. V. Bachium in Hist. Jur.* Leges autem nomen & a rogatoribus, & a re ipsa interdum sumebant. Earum plures a veteribus, ac recentioribus Interpretibus illustratas recenset Brunquellius in *Hist. Jur. p. 1. cap. 6. V. Otton. in præfat. Tom. I. Thesaur. Jur. Civ.* Sollemnitates vero omnes in legum latione adhibitæ, plenius a Merula in *lib. de LL.*, & Heineccio in *Ant. Rom. tit. de J. N.*, explicantur. Hoc loco obiter observandum est, quod ait Modestinus in *L. 102. de V. S.*, & Ulpianus in *Fragm.*, *Lex rogatur, cum fit; abrogatur legi, cum prior tollitur; derogatur, cum pars tollitur; subrogatur, cum adjicitur; obrogatur, cum mutatur aliquid.*

§. 21. III. Plebiscita nunc videamus. Plebisciti nomine veniebat, quod plebs, plebejo Magistratu interrogante, veluti Tribuno (nimirum e Tribuniis uno, in Tributis

buris Comitibus, etiam sine Patrum auctoritate), *constituebat*, d. §. 4. Populus omnes Civitatis ordines denotat; plebs vero partem illam, a qua absunt Patricii, & Senatores. *V. A. Augustin. & Manut. de leg., Brisson. de form., P. Merul., & Gruchium de Comit.* Plebiscita initio unam plebem obligabant. Deinceps, ut universum adstringerent Populum, cavere leges *Horatia*, lata a L. Valerio, & M. Horatio Coss. ann. 306., *Pubilia*, a Publilio Dictatore ann. 416., ac *Hortensia* a Q. Hortensio Dictatore ann. 466., cum plebs tertio in Janiculum secessisset. Quare & Plebiscita *leges* dici consueverunt. Sub Augusto, demum, cum Tribunicia in eum potestas translata fuisset, condi. desierunt. Veteres, recentioresque Jctos, qui Plebiscita illustrarunt, habes apud laudatum Brunquellium *Hist. Jur. p. 1. c. 7.*

§. 22. IV. In Reip. libertate Magistratus tam Urbani, uti Dictatores, Consules, Prætores, Censores, Ædiles Curules, Tribuni Pl., quam Provinciales, uti Consules, Prætores, Proconsules, Proprætores, pro sua quisque jurisdictione, Edicta proponebant; quæ tamen nonnisi Populi consensu, usuque stabant; & vel *prout res incideret*, vel ju-

viditionis perpetuæ causa proponebantur, *L. si quis 7. de jurisd.*: tum vel *tralatitia* erant, h. e. a Magistratu in sua ex edictis suorum decessorum translata; vel *nova*, h. e. primum excogitata. Pauca nos de Prætorum, Ædiliumque edictis, quia de iis agit in §. 7. de *Jur. Nat.* Tribonianus.

§. 23. Jus Consules dixere ad annum 387., circa quem Plebei Consularis dignitatis facti fuerunt participes, *Liv. Lib. VI. in fin.* Patricii tunc novum excogitarunt Magistratus officium, ut Consularem plebis potestatem enervarent; atque a plebe ipsa impetrarunt, ut ex Patribus Prætor ad jus dicendum crearetur. Neque hæc ratio rationem Pomponii excludit, qui ob Consulum absentiam, bellorum causa, præturam institutam fuisse scribit in §. 27. d. *L. 2.* Generale etiam *Prætoris* nomen fuisse, constat ex latinis scriptoribus; *Horat. II. epist. v. 34.*, *Propert. III. Elg. 2. v. 41. L. 13. §. 1. de Jurisd. L. 35. de injur. & alibi.* Tum Præturæ honor cum plebeis communicatus est anno 418., *Liv. VIII. 15.* Deinceps anno circiter 510., cum ob primum bellum Punicum magna peregrinorum turba in Civitatem

. ve-

veniret, duo creati Prætores fuere, h. e. *Urbanus* inter Cives, & *Peregrinus* inter peregrinos, ac Cives jus dicturus, ex proprio quisque edicto, *Theoph. in §. 7. de J. N. G. & Civ.* Prætor autem edicta sua in albo, h. e. in tabula dealbata, proponebat. Apud Urbanum Prætorem lege agi poterat, non item apud Peregrinum, *Cic. pro Flacco cap. 21.* Hunc vero, qui dignitate minor censebatur, Edictoꝝ vsum fuisse Prætoris Urbani, quod placet *Hottomano de Magistr. Pop. R.*, aut ex *Jure Gentium* jus peregrinis dixisse, quod videtur *Schubarto Exercit. II. 84.*, solidis argumentis demonstrari non potest. Deinceps, latius patefcente Imperio Romano, quatuor additi sunt Prætores provinciales, §. 32. d. L. 2., qui majorem, quam *Urbanus*, jurisdictionem habuerunt, L. 6. §. 8. ff. de off. Præs. Mox etiam specialibus causis dati sunt Prætores. In *Coloniis* autem, ac *Municipiis* *Consulum*, Prætorumque loco *Duumviri* fuerunt; qui tamen & Prætorum nomine quandoque indignantur, *Cic. II. Agraria* 34.

§. 24. Omnis autem Prætoris jurisdictionis tribus continebatur verbis, *do, dico,*

addico; *Quid. Fast. I. 47. Dabat* is actiones, exceptiones, bonorum possessiones; iudices, tutores &c.: *dicebat* vindicias, h. e. jus de possessione, aliisque privatis causis: *addicebat* in cessionibus in jure, mancipationibus, aliisque. Quoties vero pro tribunali Prætor cognoscebat, assessorum consilio expediebat omnia. Hi Romæ erant quinque Senatores, & quinque Equites, quorum collegium *consilium*, sive *συμβολιον*, *uti in Act. XXV. v. 12., & in §. 5. Inst. qui*, & *ex quib. caus.* dicitur: ac iidem erant Decemviri stlitibus judicandis, §. 29. *id. L. 2.* In Provinciis vero viginti Recuperatores, cives Romani. Insuper Prætor, si causæ gravitas id poscebat, etiam Centumviros adhibebat; præcipue si de inofficioso testamento, & hereditatis petitione ageretur. Magna quoque erat Prætoris in extrajudicialibus negotiis auctoritas: sed pleraque eorum munera postea ad Præfectos Urbis transiere, *uti ex tit. C. Tb. de Prætorib. V. Spanhem. in Orb. Rom. c. 8.*

§. 25. Licet autem Prætor nonnisi interpres, ac *viva vox* esset Juris civilis *L. 8. de J. & J.*; adeo quidem, ut initio Magistratus sui in leges juraret,

Cic.

Cic. de fin. II. 22.; nihilominus adjuvandi, vel supplendi, vel corrigendi *Juris Civilis gratia*, ei illudebat novis vocabulis, fictionibus, exceptionibus, aut in integrum restitutionibus; quod Populus propter publicam utilitatem non ægre ferebat, *L. 7. eod.* Et tamen Kortius in *Vindiciis Prætoris Romani* ostendere adversus manifestissima antiquitatis monumenta adnuitur, id nusquam a Prætore factum fuisse. Prætor, ex.gr., Civile jus *juvabat*, decernendo bonorum possessionem scriptis in testamento heredibus; *supplebat*, dando utilem actionem, ubi nulla Jure civili prodita erat, *L. 2. ff. de præscript. verb.*, & *corrigebat*, emendabatque, dando exceptionem contra negotia de Jure Civili valida.

§. 26. Quum vero Prætores quidam proposita initio Edicta intra annum, gratia, vel odio corrupti, mutare solerent, hinc edictum, quod quisque novi juris in aliquem statuisset, ut ipse eodem uteretur, *L. 1. §. 1. ff. quod quisque jur.*; & Scitum anno V. 585., ut Prætores ex suis perpetuis (nimirum intra annum) Edictis jus dicerent. Quum vero certum ita esse cœperit Prætorium jus; Jæti certatim comment-

mentarios in illud scripsere : & Jurisprudentia non a XII. Tab. amplius, sed ab Edicto deducebatur, *Cic. d. LL. I. 6.* Jus autem ex edictis Magistratum, *honorarium* dicitur; sicuti Magistratus *honor*, *L. 7. C. de Ep. & Cler.*, *L. ult. C. de Judæis*. Sed & Prætor κατ' ἐξοχήν *honoratus*, *Verbaque honoratus libera Prætor habet*, ait Ovidius *Fast. I. v. 12.* *V. Joseph. Neri-um, Anal. I. 32.*, & *Ostion. in Papinian- no*; ac Jus Prætoris *honorarium* proprie dictum est, *L. 7. §. 1. ff. de J. & J.*

§. 27. *Honorarii* Juris *portionem* esse edictum Ædilium Curulium, ait Tribon. *d. §. 7. & in §. 2. de div. stip.* Et vel, *portionem* intelligere debes *speciem*: vel in Perpetuum Prætoris Edictum sub Hadriano concinnatum, translatum esse Ædilitium. Ædiles alii Plebei, alii Curules, alii Cereales dicebantur. Plebei anno V. C. 310. creati, ædium, ac locorum publicorum curam habebant, *Cic. de LL. lib. III.*, *L. un. de via pub.*, ac Seta custodiebant, *Liv. III. 55.* Curules an V. C. 387. lecti, præter ludorum, atque operum publicorum, privatorumque curam, de rebus venalibus cognoscebant, edicebantque: necnon apud eos feminae copiam

piam sui facientes nomen profitebantur, simulque meretricium vectigal solvebant, *L. 5. §. 3. de cond. ob turp. caus. Otto in Papin.* Ex *Ædilitio* *Edicto* nonnulla in *Juris Romani* corpus inserta sunt. His demum a *Julio Cæsare* alios duos *Ædiles* additos esse, refert *Pomponius §. 32, Cereales* ex eo dictos, quod rei frumentariæ, & annonæ præessent. Verum non in *Urbe* solum, sed & in *Coloniis*, *Municipiisque* *Ædiles* fuisse constitutos, egregie demonstrat *Otto de Ædilib. Coloniar. & Municipior., ac de tut. viar.*

§. 28. Ex his mirum non est, si *Julii Cæsaris* ætate non immensa solum, sed & diffusa fuerit legum copia, *Sueton. in Jul. c. 44.* Sane post *Punica* bella corrupta jam erat vitiis res *Romanorum* publica. Proinde summi quidam viri de *Jure Civili* in artem redigendo cogitarunt, *Schubart. exercit. III. 6., præcipue Julius Cæsar., Suet. d. loc., & Cicero,* qui an fuerit in *Jurisprudentia* hospes, vide apud *Schultingium orat. de Jurisp. Cic. & Bynk. in d. L. 2. §. 38.* Nos interim ad *Augustum* pervenimus, sub cujus imperio *Prædientum* *Responsa* primum se se rursus offerunt consideranda; tum *Sæta.*

§. 29.

§. 29. Octavianus Augustus, relictis Populo veteris imaginibus liberatis, revera Magistratum munia sensim subiit solus. Leges in Comitibus ferre pergit, sed ea ratione, ut imperium, quod is Mæcenatis consilio cœperat, Populus minime persentisceret. Legem vero Regiam, qua Pop. R. summum in Augustum transtulisse imperium, dicitur in *L. 1. ff. de Const. Princip.*, & in §. 6. *Inst. de J. Nat.*, doctiores tenent, fuisse Triboniani inventum, cui forte causam dedere Sæta fieri solita, ut cuique Imperatori summa particulatim potestas tribueretur: quæ sane Sæta *leges Imperii* vocavit Alexander Severus in *L. 3. C. de testam.* V. nostrum Joseph. Paschal. Cyrillum in *hist. Rom. Jur. Inst. repet. prælect. præmis.*, & Orationes *de lege Regia* Scipionis Gentilis, Joh. Frid. Gronovii, & Noortdii: quicquid dicat Ulr. Huberus *Obs. I. 16.* Profecto de ea lege silent veteres. Tum Augusti, ac Tiberii artes ad amovendam unius imperii suspensionem, norunt omnes. Quod si *omne Populi, Senatusque imperium* in Augustum translatum esse, scribit Cassius *Lib. 53.*, id non sine yperbole ab aulico illo homine dictum est.

§. 30.

§. 30. Augusto etiam, ad veteres leges novo aptandas regimini, statuere placuit, ut non amplius quicumque, qui studiorum suorum fiduciam haberet, liberum esset de jure respondere; sed tantum ex Imperatoria auctoritate possent Prudentes Responſa dare, *d. L. 2. §. 47.*: ex eoque tempore coepit id *pro beneficio peti*. Tribonianus vero *constitutum*, scribit §. 8. *eod.*, ut a *responsis eorum, quibus a Cæsare jus respondendi fuerat datum, Judici recedere non liceret*. Id de Augusto Cujacius, aliique intelligunt. Contra de Valentiniani Constitutione in *L. un. C. Tb. de Resp. Prud.* intelligunt Jac. Gothofredus in *d. L. un.*, & Noodtius in *tit. ff. de O. J.* Certe Valentinianus de scriptis defunctorum quorundam Iſtorum edixit. Augusti autem instituti rationem Pomponius refert, ut ex eo quod paucis Iſtis liceret respondere, *major juris auctoritas haberetur*. Vera potius ratio fuit, ut is facili negotio in foro dominari potuisset, ac Jus novo regimini adplicare. Illud, in perspicuis est, ex Augusti tempore Responſa Iſtorum ad scriptum Jus pertinuisse: inde Valentiniani III. Constitutione in *d. L. un.* certis eorum libris tributam fuisse au-

auctoritatem; adeo quidem, ut etiam non expenderentur, sed maximo Jurisprudentiæ malo, in diffentionibus sententiæ numerarentur. Jætorum tandem fragmenta Justiniani jussu Pandectis inserta, & probata, Juris civilis partem constituunt.

§. 31. Jæti autem & vitæ ratione, & doctrina plane inter se se dissimiles erant. Hinc diversæ eorum familiæ Jurisprudentiam mirifice turbarunt. Primi scholarum diversarum auctores sub Augusto floruerunt, Artejus Capito, & Antistius Labeo: ille Sabinianæ, seu Cassianæ, hic Proculianæ, seu Pegasianæ scholæ princeps. *V. Jacob. Gothofred. in manuale Jur.* Et Labeo quidem cum stoicam affectaret severitatem, strenuus fuit pristinæ libertatis defensor. Capito e contrario aulæ deditus, lubenter a veterum sententia recedebat, uti de patria, ac dominica potestate observare est. Hic vili obsequio placuit Augusto, atque ad Consulatam pervenit: ille displicuit *incurrupta libertate*, & *Præturam intra stetit*, teste Tacito *Annal. III. 75.* In reliquo autem Jure controverso, quod statum Reip. haud spectabat, Capito *in his, quæ ei tradita fuerunt, perseveravit*; ideoque summum
jus

ius præferebat: Labeo ingenii qualitate, & fiducia doctrinæ, plurima instituit innovare; ideoque præferebat æquitatem, d. §. 47.

§. 32. Diversitas isthæc doctrinæ, ingeniorumque, ad eorum quoque sectatores inde profluxit. Quare Sabiniani summum jus, Proculiani sectabantur æquitatem. Illi non magni faciebant Stoicos: hi vero eos sequebantur, ex quo Philosophia e Græcia Romam advecta fuit. E quatuor sectis, Stoica, Platonica, Epicurea, & Peripatetica, primæ se Jætos adstrinxisse (præsertim, ut mihi videtur, quoad Dialecticam, & Grammaticam), probant in primis Cujacius *Observ.* XXVI. 40., Gravina *de ortu, & progressu Jur.* cap. 44. Merillius *Obs.* I. 8., atque Otto *orat. de stoic. Jætorum Philosophia*, Aliud sentiunt Gottfridus Mascovius *not. ad d. loc. Gravina.*, Paganinus Gaudentius *de Philosophia apud Romanos* cap. 43., & Jo. Godeus *in comm. ad L. 49. ff. de V.S.*

§. 33. Sabiniani nomen habuerunt a Massurio Sabino, qui sub Tiberio floruit, *Ducker. de Latin. vet. Jurisc.*; ejusque discipulus fuit C. Cassius Longinus, cujus nomine eadem schola Cassiana dicta

Sta fuit; ac frequenter in Jure dicitur, Sabinum, & Cassium idem sentire. Post Cassium fuere Coelius Sabinus tempore Vespasiani; Javolenus Priscus; Aburnius Valens, qui fuit in consilio Antonini Pii; Tuscianus, quem tamquam ignotum quidam e choro Juratorum expellunt. Javoleni discipulus fuit Salvius Julianus. Tum inter Sabinianos recensentur Sex. Cæcilius Africanus, Terentius Clemens, Minucius Natalis, Lucius Volusius Mæcianus, & Vinidius Verus.

§. 34. Inter Labeonis sectatores primus sub Tiberio claruit M. Coccejus Nerva, quem excepit Sempronius Proculus, a quo nomen inditum sectæ Proculianæ. Tum Coccejus Nerva filius, qui annos septendecim natus de jure responsitasse, refert Ulpianus in *L. 1. §. 3. de postul. V. Menag. Amoen. c.2.*; & Longinus (alius a Cassio Longino). Successit Pegasus, a quo Pegasiani dicti sunt; quem exceperunt Juventius Celsus pater, & filius. Agmen claudit apud Pomponium §. 47. Neratius Priscus, qui sub Trajano & Hadriano floruit. Sed his recte adduntur Attilicinus, Titus Aristo Ulpius Marcellus (qui notas ad Julianum scripsit, eum.

eumque reprehendit: sed idipsum passus fuit ab Ulpiano, *Pancir. Var. Lect. II. 131. l.*), Ursejus Ferox, & Junius Mauricianus.

§. 35. Diffensionum, quæ in Jure occurrunt, vestigia, videre est apud Merillium in *Obs. libris*, & Mascovium de *sect. cap. 8.* Sub Hadriano, Ediçto perpetuo condito, sectarum diffidia refrixere. Ubi autem diversæ erant sententiæ, Princeps consulebatur, *Merill. Obs. I. 5., & VII. 11.*, uti in §. *Inst. de emt. & vend. & L. pen. C. de rer. permut.* Jam vero cæteri Jcti, qui sub Antonino Pio, Divis Fratribus, & subsequentibus Impp. vixerunt, quia media inceserunt via, *erciscundi, & miscelliones* sunt vocati; *Otto in Papin. & in orat. de Phil. Jct. stoic.*: iique sunt S. Pomponius, T. Gajus, Tertullianus, Cerbidius Scævola, Marcianus, Venulejus Saturninus, Æmilius Papinianus, Claudius Tryphoninus, Julius Paullus (ab cujus obscuritate Paullinum scribendi genus in proverbium abiit), Domitius Ulpianus, Æmilius Macer, & Herennius Modestinus Ulpiani discipulus. Sed & post Modestinum fuere quamplurimi Jcti in tribus scholis, Romana, CPolitana, &

Berytensi; quorum tamen Responsa vim juris minime obtinebant. Jſtorum vi-
tas delinearunt Bernardus Rutilius, Jo.
Bertrandus, Guil. Grotius, Aymarus Ri-
vallius, Franc. Hotomanus, Valentinus
Forſterus, Nic. Henelius, & Jo. Strauchius.

§. 36. V. Ad Tiberii tempora ventum
eſt. Is *Comitia e campo tranſtulit ad Pa-
tres*, inquit Tacitus *Annal. I. 15.*, ut
ſecurius in Senatu, ad ſervitium, atque
adulationem adſueto, dominaretur; non
quia difficile eſet, aucto tunc Populo,
Comitia haberi, uti Pomponius §. 9.,
& Tribonianus §. 5. *cod.* ſcripſere. Uni-
verſa enim ferme Italia ſub Reip. finem
in Comitiiis conſluebat. Libera Rep., Scta
erant *decreta* Senatus, quæ nonniſi Popu-
li ſuffragiis probata jus conſtituebant. At
ſub Tiberio erat Sctum, quod Senatus
jubebat, d. §. 5. Senſim ita Populi defece-
re leges. Antequam vero Patres juberent,
libelli, aut Orationes Imperatorum le-
gebantur; adeo quidem, ut frequentissi-
me in Jure Orationes Principum ſint ipſa
Scta. *Chriſt. Otto a Boëkeln. de orationib.
Princ. in Senat.* Adnotandum eſt, non-
nulla in Juris corpore Scta reperiri, de
quorum origine, atque auctore plane non
con-

constat. Ita Sctum de usufructu quantitatatum, & jurium, & illud, cujus mentio fit in *L. 70.*, & *71. ff. de her. inst. V. Bynck. de capt. inst. princ. Gravinam, & Hoffmannum in Hist. Jur.* At ipsa Seta rarefcere sub Hadriano coepere, qui diu absens consulere Senaturn haud poterat. Post Caracallam demum nulla occurrunt. Postremum Sctum refert Ulpianus in *L. 3. de donat. int. vir. & ux.*

§. 37. In eorum imperio, qui Tiberium inter, atque Hadrianum regnarunt, nihil ad rem nostram quod attinet, occurrit. Deinceps Hadriani jussu *an. U. 884.*, non Didius Julianus Imp., sicut ex male intellecto Aurelii Victoris loco Grotius in *Flor. spars.*; sed Salvius Julianus, Didii proavus, summus Jctus, teste Spart. in *vit. Julian. I., V. Menag. Am. t. 34.*, composuit Edictum perpetuum, a quo futuri Prætores amplius non recederent. Antea siquidem ex Lege Cornelia perpetuum erat, sed intra Præturæ annum. Augusto imperante jam Prætorum Edicta collegit, & interpretatus fuit C. Aulus Ofilius Jctus, *d. L. 2. §. 44.*, & *L. 1. §. 2. ff. ne quis eum, qui in ius voc.*, sed non ex publica auctoritate. Immo

ante C. Ofilium nonnulla commentari
cœperat ad Edictum Ser. Sulpicius, cujus
fragmentum exstat in *L. 5. §. 1. de in-
stit. act.* Julianus vero & Edicta Præto-
rum, Ædiliumque, & plurimas Sabinia-
norum sententias, *Const. tanta, §. 5. de
confir. ff. L. 1. §. 1. de iur. fisc.*, in E-
dictum suum coniecit; plurima tempori
aptavit, *L. 1. §. 1. ff. commod. L. 1. ff.
quod met. caus.*: quin & nova addidit,
uti Edictum de conjungendis cum emancipa-
to liberis ejus, de quo in *L. 3. de conj.
cum emanc.*, atque ipsiusmet Hadriani E-
pistola de beneficio divisionis inter confi-
dejussores, *L. inter 26. de fidejuf. Paul.
sent. l. 20.* Neque ideo Julianum fuisse
eo anno Prætozem cum Heineccio in *Hist.
Jur.* æstimare necesse est: namque ex Ha-
driani jussu Julianus rem omnem ordinavit.

§. 38. Hadriano quoque multi tri-
buunt Edictum Provinciale; alii sub Mar-
co prodiisse putant, *Ez. Spanhem. Orb.
Rom. II. 12.* Magna similitudo est hu-
jus Edicti cum Edicto perpetuo Prætoris.
Sane olim Proconsules Urbana edicta
plerumque sequebantur. *Cic. Ver. I. 46.,
& ad Attic. ep. 6.* Utriusque Edicti pau-
ca fragmenta hinc inde in Pandectis reli-
cta,

ita, uti fractas e naufragio tabulas, collegerunt Eguinarius Baro, Guil. Ranchinus; Gothofredus vero in *quatuor fontibus Juris Civilis*, concinnare, & restituere præ aliis adlaboravit.

§. 39. VI. Hadriano successit Antoninus Pius; huic Marcus Aurelius Philosophus, & Lucius Verus, qui *Divi Fratres* ut plurimum appellantur. *V. Hotoman. in Hist. Jur.* Post Hadrianum ipsum Imperialium Constitutionum copia jam laborabat Jurisprudentia. Imperatores non amplius legibus, Senatufve consultis, sed constituere jus cœperant Edictis, Rescriptis, ac Decretis. §. 6. *Inst. de J. N. G. & C.*, Opilius Macrinus, teste Capitolino in ejus vita c. 13., de tollendis Rescriptis cogitavit: quod consilium multis præstantissimis viris impense placuit: verum de Rescriptorum æquitate peculiari Dissertatione egit Antonius Schultingius.

§. 40. Jam vero proprie erant *Edicta* generales Constitutiones, quibus Impp. sponte sua quid publico bono statuebant, iisque Provinciæ omnes obligabantur. *Mandata* sponte etiam dabantur; sed ad Magistratus, aliasve personas scripto dirigebantur, ut recte Resp. administraretur, aliud-

ve negotium expediatur, *Gothofred. ad L. unic. C. Tb. de mandat. Principum. Rescriptis* de jure consulentibus ii respondebant; vel privatis, & *adnotationes*, ac *subnotationes* dici solebant, *L. 6. C. de diversis rescript.*; vel magistratibus, & *epistola*, seu *littera*, *L. 3. §. 1. ff. de testib. L. 31. ff. de re jud.*; vel universitatibus, & *pragmatica sanctiones*, *d. L. 7. §. 1.* Demum *Decreta* erant sententiæ, quas Imppp., adfidentibus Jctis, in causarum cognitionibus ferebant; *L. 1. §. 1. ff. de Constitutionib. Princip.*

§. 41. Sola Edicta jus generale constituunt. Rescripta, origine sua inspecta, jus faciunt in proposita specie; si tamen subscriptio, dies, & consul adsint, *L. 3. C. de divers. Princip. Rescript.* ac veræ sint preces, *L. ult. C. eod.*, nihilque habeant adversus Reip. utilitatem, vel jura tertio quæsitæ, *L. 3. C. de precib. Imp. off. L. 6. C. si contra jus, vel util. public.* Decreta tantum jus sunt inter partes, *L. 2. C. de LL.*, nisi tamen Princeps iis vel obscuram, ac ambiguum legem interpretetur, vel ad similes species ea jubeat aptari, *L. 12. C. eod.* Cæterum Rescripta, ac Decreta, si in Juris cor-

corpus conjecta fuerint, pro lege generali valere dicuntur: tamen si species ipsas, quibus innituntur, ut ea recte interpretemur, quoad ejus fieri potest, dignoscamus oportet. Justinianum vero Rescriptorum, Decretorumque naturam minime immutasse, cum ea in suo Codice inseruit, putat Noodtius in *Diocletiano*.

§. 42. Constitutionibus quoque *privilegia* conceduntur; eaque sunt *privæ leges* in singulos latæ, ut vel præter jus major pœna infligatur, quam legibus definita; vel ob meritum aliquid indulgeatur. Odiosa *privilegia* irrogari vetarunt Decemviri, *Cic. pro dom. sua cap. 17. V. Noodt. in tit. ff. de LL.*: quæ vero in favorem conceduntur, ob Reip. utilem navatam operam, Romæ recepta fuere, *L. 5. ff. de captivis*. Ea autem privilegia, quæ cujusdam meritis conceduntur, si personæ tribuantur, cum ea expirant; si causæ, seu rei; huic perpetuo adhærescunt, *L. 68. C. 169. ff. de R. J.* Observandum est, quosdam DD. distinguere privilegia a *beneficiis legis*, quæ sunt quidem *jura singularia*, non ob singulas personas, sed ita dicta, quia a regulis Juris aberrant. Ita sunt generalia beneficia divisionis, or-

dinis, inventarii, competentiae, cedendarum actionum; necnon particularia propter quaedam hominum genera constituta, puta, mulieres, minores, collegia, corpora, Fiscum. *Cujac. obs. XV. 8.*, & *Guther. de Offic. Dom. Aug. I. 37.* Sed redeamus in viam.

§. 43. Colligendis Constitutionibus Jsi Papirius Justus, ac Julius Paulus operam navarunt. Ille sub Antonino, & Vero (non Commodus, uti scribit in *Hist. Jur.* Heineccius) *Liros 20. Constitutionum* scripsit. Hic *Libros 3. Decretorum V. Ant. Schultingium Jurispr. vet. Antejustinian. inscript. sent. Pauli.* Observandum est hoc loco, III. Ecclesiae Sac. institutam fuisse Romanarum legum scholam Beryti in celeberrima Phœnices Urbe; de qua multa habet Heineccius idem *Hist. Jur. I. 5. 269.*, quem adiisse non poenitebit.

§. 44. Hucusque de veteri Jurisprudencia. Nova & sanctior, & simplicior incipit sub Constantino M. *Euseb., & Balduin. de vit. Constantin.* De hujus Imp. ævo scribit Nazarius in *Panegy. c. 38.* *Novæ leges regendis moribus, & frangendis vitiis constitutæ: Veterum calumniosæ ambages recisæ.* Illustre exemplum est in *L.*
9. C.

9. *C. de testib.*, & in *L. 3. C. Tb. de fid. test.* & *Inst.*, in quem locum vide Van de Water *obs. J. III. 1.*, ut alia omittam.

§. 45. At Jēti tunc temporis utplurimum pagani, veterem Jurisprudentiam restituere, ac servare conabantur. Hinc duo Codices, Gregorianus, & Hermogenianus prodire. Quantum ex conjecturis hariolari licet, Gregorius sub Constantino M. Præfētus Prætorio, Constitutiones collegit Impp. ab Hadriano usque ad Diocletianum, & Maximianum: Hermogenianus vero sub Constantini filiis quasdam eorundem Diocletiani, & Maximiani, aliorumque Imperatorum usque ad *ann. Cb. 312.*, unde incipit Codex Theodosianus. *V. Jac. Gothofred. Prolegom. ad C. Tb.*, & *Schulding. in Jurispr. vet. antejustinian.*, qui utriusque codicis fragmenta adnotationibus illustravit.

§. 46. Constantini filii Constantinus, Constantius, & Constans ad simplicitatem quoque Jus composuerunt. Hinc formulæ, & imaginarii ritus penitus sublatis, *Ravard. de auct. Prud. c. 2.*, adeo ut Justinianus *Proëm. Inst. §. 3.* dixerit, sua ætate ab Imperatoriis Constitutionibus,

bus, ad solam utilitatem compositis; legum initia capi, non *ab antiquis fabulis*, nempe imaginariis ritibus dramati simillimis, *Ulric. Hyb. Observ. I. 4.* Non sic *Rævardus Conject. III. 3.*, & *Bynkershoëkius Præterm. ad d. L. 2. §. 38.*

§. 47. Quoniam vero Codices Gregorianus, atque Hermogenianus & privatim concinnati erant, & Gentilium Impp. rescripta complectebantur, Theodosius Junior per octo viros, inter quos eminebat Antiochus Expræfectus, & Consul, Constitutiones a Constantini ævo in sexdecim libros Codicis, qui *Theodosianus* dicitur, conjectas edidit anno Ch. 438., ut probat *Jac. Gotofredus Prol. ad Cod. Tb. c. 1.*, qui de hoc Codice optime meritus est; ejusque Commentarius, curante *Ant. Maruillio*, postumus prodiit *Lugd. 1668.*, & *Lipsiæ 1743.* Ritteri cura. In eo Codice contineri *omnes leges legitimorum Principum*, ait *Prosper Aquinaticus in Chron. par. 1.*; seu Christianorum ex interpretatione *Gothofredi Prolegom. d. loc.*, seu non tyrannorum, uti placuit *Heineccio, Hist. Jur. L. 1. c. 5. §. 379.* Præterea in eo multa compositores peccarunt: quinimmo ne integer quidem ad nos perve-

venit. Antonius Maruilius quidem in *supplemento Codicis Theodosiani* indicem fecit circiter 320. Constitutionum, quæ in Codice Justiniano adfunt, non in Theodosiano. Huic quoque Codici accefferunt Constitutiones *novellæ* Theodosii, Valentini III., Marciani, Majorani, Severi, & Anthemii, a Petro Pithoeo an. 1571. editæ, & a laudato Gothofredo suo Commentario additæ. Accefferunt quoque veteres legum interpretationes, de quibus vide Gothofredum ipsum *c. 6. d. loc.* Obiter adnotandum est, anno Ch. 415. Theodosium Juniores Berytensi scholæ addidisse Romanam, & CPolitanam, uti Heineccius scribit *Hist. I. 5. 313.* ob *L. un. C. de studiis liberalibus Urbis Romæ, & CPolitane*: tamen si Theodosiana lex solummodo de CPolitana concepta fuisset.

§. 48. In Orientalis Imperii terris jussu Theodosii publicatus Codex Th., summam nactus fuit auctoritatem, etiam sub Theodosii successoribus Martino, Leone, Zenone, Anastasio, ac Justino, per 90. ferme annos, usque ad Justinianum, hoc est ad Sæc. post N. C. sextum. Id colligi potest vel ab ipso Legum Romanarum, & Mosaicarum, quisquis ille fuerit, patriato-

riato-

riatore; quippe qui ad Codicem Th., quem integrum in oculis habebat, frequenter provocat. Licet enim de hujus collationis auctore inter doctos haud constet, *V. Menag. Amoen. c. 2., & Schulting. in hanc collat.* certe is post Theodosium & ante Justinianum, sc. circa decursum V. Sæculi floruit.

§. 49. In Occidentali Imperio pariter receptus fuit Codex Th. a Valentiniano III. Theodosii collega, & genero, cujus etiam 30. Constitutiones in laudato Codice extant. *Gothofred. c. 3. d. Prolegom.* necnon sub insecutis Principibus Majoriano, Severo, & Anthemio in Gallia, Italia, aliisque provinciis viguit. Gothi quoque, subjugatis Romanis, eorum leges non excusserunt, sed qua lege vivere vellet, permiserunt; testibus Gregorio Turonensi, *Hist. Franc. II. 33.*, & M. Aurelio Cassiodoro, *Var. I. 1., & III. 4.* Alarici Wisigothorum in Gallia Regis jussu, Codex concinnatus fuit, seu *Breviarium*, non quidem ab Aniano, uti multi, ipseque Schultingius, putant, decepti ex verbis, *Anianus . . . edidi, & subscripsi* (nam *edere* erat annulo Principis confirmare; quod Referendarii tunc temporis facie-

faciebant, *Justinian. Nov. 10., 113., & 124. Fresn. d. voc.)*; sed a Goiarico, aliisque doctis viris, *Sirmond. quæstio triplex.* Breviarium illud mox sub legis Romanæ, mox *Theodosiani Codicis* appellatione venit apud ejus ætatis scriptores; *V. Gothofred. c. 3. d. Prolegom., & Fresn. v. lex Romana.* Id liquet etiam ex *Papiani Responsorum* libro, qui illius Breviarii exemplo, ex iisdem Romanarum legum fontibus, pro iis, qui Romana lege vivere vellent, compositus fuit jussu Gundobardi Burgundionum Regis. Eodemque Alariciano Breviario usus est mediæ ætatis auctor *Consultationis de pactis*, quam Schultingius Jurisprudentiæ Antejustinianæ inseruit. Formulæ pariter ea tempestate in judiciis usitatæ, ferme omnes secundum legem Romanam, *Codicem* scilicet *Theodosianum*, conceptæ fuere: ita illæ Marculphi editæ a Baluzio, & Bignonio. Tandem plura ex lege Romana in *Capitularia* Regum Francorum sunt translata: necnon in Concilia Ecclesiastica: cum præsertim liber 16. *Codicis Th. Clericis* impense faveat, *V. Brunquell. Hist. Jur. par. 1. c. 15.*

§. 50. Ad Justinianum veniamus, cujus æta-

ætæ

etate præter Codices Gregorianum, Hermogenianum, ac Theodosianum plurimasque Novellas, supererant Istorum volumina, quæ ad duo librorum millia, ac triecies centena millia versuum excreverant; *Præfat. omnem* §. 1. Versus, qui describebantur in libris, saltem bonis, lineas fuisse, sentio cum Bynk. *Obs. V. 15.* & Contio *Lect. I. 8.*; non sententias, uti Duareno placuit. *Disp. II. 6.*

§. 51. Justinianus bono Jurisprudentiæ natus, per Decemviros, quorum caput erat Tribonianus, ex tribus illis Codicibus, & quibusdam suis Constitutionibus *Codicem* concinnavit, cui suum indidit nomen. Quæ olim fuerit forma codicis, quæque voluminis (nam *liber* veluti generis nomen erat), explicat Schulting. in *Paul. Sent. III. 6. 87. V. L. librorum* §2. de leg. 3. Juxta chronologiam Contii *Lect. I. 7.* & Fabricii *Bibl. Græc. XII.*, editus, & confirmatus hic Codex fuit anno Christi 529.

§. 52. Tribonianus ipse in *Proemio Inst.* §. 3. dicitur *Vir magnificus*, qui titulus tantum supremis magistratibus dabatur, *Magister*, h. e. officiorum, ut in *L. ult. C. de delat. V. Pancirol. in Notit. Dignit. Imp. orient.*

orient. c. 63. , *Gutber. de offic. Dom. Aug. II. 20.*, & ex *Quæstor Sacri Palatii*. Multa in eum simul, & in Justinianeam compilationem crepant Interpretes; præsertim *Wissenbachius in Emblematis. Tribon.* & passim *A. Faber, Rævardus, Bachovius, & Hotomanus*, qui in *Antitriboniano* idem fere in Justiniani libris tentare videtur, quod in aliis scientiis, artibusque *Cornelius Agrippa* fecit. Sunt etiam, qui afflictam Tribonianæ existimationem a tot imputationibus pro virili liberare studuerunt: in primis *Chiffletius in Diff. Apologet. de Jur. architect. c. 2. & seq.*, *Huberus in Eunomia, & in Digress. III. 16.*, *Ant. Schultingius peculiari oratione*, *Rodolph. Forner. Rer. Quor. I. 17.*, *Guilel. Maranus de recta Jur. doc. rat.*, & *de antecessorum delectu*, & *Gravina de or. Jur.*. Certe admirandum id esset, si nihil Tribonianus peccasset. Injuste autem ut plurimum, ceu interpolator, traducitur: multa siquidem ad sui temporis rationes inflecti debebantur.

§. 53. De ipsius Justiniani moribus, ingenioque, nec una opinio est. *Procopius Cæsariensis*, qui ejus ætate vixit, octo libros de rebus, quarum spectator fuit,

ab

ab Imp. nostro gestis, eidem legendos tradidit: hisce vero libris novum supplementi loco addidit, eumque ἀνιδωτον inscripsit, in quo multa de Justiniani, necnon Theodoræ uxoris vitiis, enarrat. Triboniano quoque vitia adpingit; quod & Suidas facit. *V. Burchard. Struv. in Hist. Jur. & Everard. Otton. in proëm. Inst.* Certe Imperator noster ἀναλογιστης non fuit, uti quidam volunt, decepti loco Suidæ, qui de Justino, non de Justiniano loquitur. Judicia enim ipse frequentavit, & sententias tulit, uti patet ex Nov. 88., & ex L. 12. C. qui pot. in pign., ac multas novas leges concepit, veteresque ad imperii sui statum accommodavit. Unde Procopius in anecd. p. 63., quæ sibi rescripto respondenda forent, hæc non, uti mos est, Quæstori committebat, sed ut plurimum sumebat sibi pronuncianda &c.

§. 54. In proëmio Institutionum tria occurrunt Justiniani prænomena; Imperator, Cæsar, Flavius; non quia is devicerit Flavios, aut fuerit de familia Flaviorum, uti Accursius, & Ferretus; sed quia sicuti Impp. Romani a C. Cæsare Cæsares, ita Cpolitani a Flavio Constantino, h. e. Flaviæ gentis, Flavii dicti sunt.

sunt . Occurrunt etiam octo agnomina ,
Alemannicus , Gothicus , Francicus , Ger-
manicus , Anticus , Alanicus , Vandalicus ,
& Africanus , a devictis gentibus petita .
 In Novella 43. est etiam *Lazici* titulus ,
 quia Lazos domuit Justinianus . Verum A-
 gathias *Lib.1.* quid de hac re Theodiber-
 tus , Francorum Rex , tunc temporis senserit ,
 ita describit : *neque tolerandum esse censebat ,*
quod Imp. Justinianus , in Edictis Imperatoriis ,
Francici , & Alemanici , necnon Gepidici ,
& Longobardici , aliosque hujusmodi titulos
 sibi vindicaret , perinde ac si omnes hasce
 gentes subjugasset . Quocirca & ipse gra-
 viter hanc injuriam ferebat , & alios , ut
 communi secum injuria contumeliaque af-
 fectos , ad indignationis societatem sollici-
 tabat . Denique sex ibi occurrunt hono-
 ris epitheta , *Pius , Felix , Inclitus , Vi-*
ctor , ac Triumphator , semper Augustus ;
 de quibus vide Ottonem .

§. 55. Jam vero post priorem illum
 Codicem , ex veterum Jstorum , qui ab
 Hadriani tempore floruerunt , libris , se-
 ptem aliis additis viris , *Digesta* , seu *Pan-*
docta , Imperatore anno 530. jubente , com-
 positi fuere anno 532. ; ita dicti , quasi
 universi Juris libri . *A. Aug. de nom. prop.*

D

Pan-

Pandect. Præfat. Constant autem *Pandectæ* 50. libris in septem partes tributis. De illis vero, quæ a DD. in iis libris reprehenduntur, accurate pertractat sæpe laudatus Brunquellius *Hist. Jur. par.* 2. cap. 4.

§. 56. Nondum editis *Pandectis*, a Triboniano, Theophilo, & Dorotheo, qui *illustres*, atque *Antecessores* appellantur in d. §. 3., anno 533. compositæ fuere *Institutiones*; quæ & *Instituta* dictæ, quum multæ latinæ voces ad Græcam terminationem inflecti cœperunt. Coactæ autem fuere, ex *Institutionibus* veterum *Jætorum*, in primis Caji, quem *suum* Justinianus vocat §. 6. *Proem.*, & *passim*. Primum *Institutiones* evulgatæ fuere eodem anno 533., tum *Pandectæ*. Theophilus ille forte ipse fuit, cujus nobilis paraphrasis extat: nam in §. ult. *Inst. de usucap.* ait, *Extat & Principis nostri Constitutio, quam nuper emisit. V. Ott. in Proem. Inst.* §. 3. tametsi a Justiniano *Juris versiones* *nata* *moda* tantum permissæ fuerint, L. 2. §. 21. C. *de vet. jur. enucl.*

§. 57. Postmodum Imp. eundem *Codicem* retextum, auctumque 50. *Decisionibus*, ad *Sectarum controversias* *finiendas*

das latis, edidit anno Ch. 534., ac dicitur *Codex repetitæ prælectionis*, seu alterius editionis. Quare in Institutionibus sæpenu-
mero Constitutiones laudantur, quas frustra in Codice quæſiveris; ex. gr. in §. 20., & 27. de *legat.* §. 7. de *leg. agnat. success. pr. de bon. possess.* §. 24. & 33. de *act.* . In 50. illas Decisiones Commentarium habemus Merillii perquam elegantem.

§. 58. Codicis hujus confectores Principum Constitutiones non raro interpolaverunt; plures in alium sensum detorserunt; falsique genus non unum admiſerunt, V. Jac. Gothofred. in *Comm. ad singulas leges Cod. Th.* & in *prolegom.* c. 4. Merito igitur Juris Justiniani cultoribus veteres Codices commendamus, qui ad Constitutionum interpolatarum intelligentiam maximopere faciunt. Continet autem Codex Constitutiones Principum singulares, idest ad propositam facti speciem emissæ: & singulæ ejus leges suas inscriptiones habent, h. e. nomina Impp., ac Magistratum, ad quos ex datæ sunt: nonnumquam & subscriptiones, h. e. nomina Consulorum, non suffectorum, sed ordinariorum, quorum Consulatu emissæ

sunt. A Constantini M. tempore invaluit etiam formula *post Consularum*. Scilicet si annus sine ordinariis Css. labebatur, forte ob bella, Consules, qui superiori anno Consularum gesserunt, fastis nomen dabant, *Onuphr. Panuin. Fastor. lib. 1. Ant. Pagi diff. hypat. Mabill. de re diplom. II. 25.* Inscriptiones vero, ac subscriptiones, a mendis, quibus scatent, purgare studuerunt *d. Gothof. in Chronologia C. Th., Petrus Relandus in Fastis Consularibus Trajecti 1715., & Vinc. Vidania, Inscriptiones, & subscript. Just. Codicis a Typogr. injuriis vindicatae.* Anni quoque in Codice Justiniano nominibus Css. distinguuntur, *Rad. Forner. Rer. quot. II. 18.* Hinc accurata temporum distinctio ad Juris scientiam capessendam confert, *Schulting. in orat. de Jurisprud. historica;* & Fastorum Consularium scriptores terere, praesertim Petri Relandi *Fastas Consulares ad illustrationem Codicum &c.*, quos ejus frater Hadrianus Relandus *Trajecti Batav. 1715. in 8. edidit.* Pulcherrimam Codicis repetitæ prælectionis editio prodiit opera Antonii Contii *Parisiis an 1562. in fol.*

§. 59. Denique suas novissimas Constitutiones, maximam partem Græce scriptas, Justinianus collegit, & *Codicem Novellarum* confecit; *Paul. Diacon. Hist. Longob. l. 25.* Earum epitomen latinam fecit Julianus, CPolitanus Antecessor; de cujus ætate vide *Ant. Aug. in Præfat. d. Epist.*, *Menag. Amoen. c. 24.*, & *Rittherhus. in Novell. Proem. c. 4.*: quæ versio laudatur sub titulo *Novellarum Juliani*: non enim facta fuit ad verbum, sicuti Justinianus caverat in *L. 2. §. 21. C. de ver. jur. enucl.* Novellas vero ad verbum vertit *Anonymus*; quem fuisse Berguntionem Pisanum, qui Græca Pandectarum verba latina reddidit, opinatur *A. Augustinus Parat. in Juliani Nov. 90.* Versio isthæc in foro auctoritatem habet, quatenus a Græco textu non discrepat, *Mascov. in Gravin. de ort. & progr. J. Civ. cap. 135.*: non habent politiores Gregorii Haloandri, Henrici Agylæi, A. Contii, Henrici Scrimgeri, & Friderici Hombergk versiones. Sunt tamen qui putant, si a Græco textu discrepet, eam versionem, tanquam usu receptam, sectari oportere, *Alberic. Gentil. de libris Jur. Civ. c. 7. Arthur. Duck de auct. J. Civ.*

L. 4. Ad historicam Novellarum cognitionem faciunt Franc. Balduinus in *Justiniāno*, & Petr. Gudelinus in *Jure Novis. Commentariis* eas illustrarunt præ aliis Cujacius, & Contr. Rittershusius. Ad summaria Novellarum, seu Authenticas Codici insertas, mox oratio recurret, *infra* §. 74.

§. 60. Superfunt adhuc aliæ Imp. Justiniani Constitutiones: nimirum *XIII. Edicta*; & *Pragmatica* sanctio capitibus 27. constans; necnon Constitutio *de adscriptitiis, & colonis*. Alias ex Basilicis restituit Cujacius *Obs. XX. 31. & 34. XIII. 38. XVI. 16.*; quæ omnes legali in Foris auctoritate destituuntur. Præterea Justiniani mularum Const., atque epistolæ ecclesiasticæ apud scriptores passim reperiuntur; quarum quædam Jo. Leunclavius inseruit *Tomo I. Juris Romano-Græci*; alias Jo. Albert. Fabricius in *Biblioth. Græca vol. 9., & 12.* recensuit.

§. 61. Observandum est hoc loco, Jus Justinianeum hodie, quia communiter receptum, obligare: maxima enim Europæ pars, in qua hodie Jus Romanum obtinet, Justiniano, qui Orienti præfuit, minime suberat: non item obligare No-
vel-

Uellas Leonis Philosophi, quæ cum Jure Justiniano edi solent; neque *Edicta Justiniani XIII.*, neque, uti dictum est, Constitutiones, quas viri quidam docti restituere, *Cujac. Obs. XVII. 30. Duckius I. 4. Bynkers. Obs. IV. 1.* Semper tamen prævalere debent patriæ leges, atque instituta. Insuper quia lex posterior priori derogat, *L. ult. ff. de const. Princip.*, Novellæ libris omnibus; Codex præferendus est Institutionibus, ac Pandectis. Nec audiendi sunt Giphanius, Struvius, & plerique alii, qui negant, Codicem Pandectis derogare: nec Merillius, aliique, qui tantum per 50. Decisiones Pandectarum jus abrogari statuunt. Porro Institutiones, & Pandectæ eodem tempore vim habuerunt. Si vero inter se quadam in re pugnent, quod in ff. est, præfertur; ita Lex 7. §. 7. *de adquir. rer. dom.* paragrapho 25. *J. de rer. divis.* : prævalet vero quod in Institutionibus est, quoties in his novi Juris mentio fiat: ita paragraphus 7. *J. ex quib. caus. manum.* legi 9., & 11. ff. *de manum. vind.* *V. Hinec., & Huber. Prælect. ad Inst. proëm. §. 10.* Antinomias negat Imperator extare in libris suis, utique iisdem, *L. 1. §. 8. L. 2. C. de ver. Jur. enucl. V. Ho-*

roman. in Jurisconsulto. Utinam & non extarent ! e re id quidem foret Jurisprudentiæ .

§. 62. Justinianus suas leges explicandas esse voluit *tam in regiis urbibus, quam in Berytiensium pulcherrima civitate, Const. omnem Reip.* §. 7. *ad antecess.* Ex Jacobo Gothofredo in *L. 3. C. Tb. de studiis liberalib.* sunt, qui scribunt, Justinianum *urbes Regias* pro Roma, & CPoli posuisse, licet, quum eam edidit Constitutionem, Roma paruisset Gothis. At Don. Ant. Astenfis *de usu, & auct. J. Civ. II. 7.* Provinciârum metropoles fuisse *regias* illas *urbes* putat. Tum ante Justinianum quadriennio absolvi debebat studii legalis curriculum: is tamen quinquennium statuit: ac quoquo anno proprio nomine adolescentibus insigniebantur, *uti ex d. Const. §. 1. & 2. ad Antecess.*

§. 62. Ut vero scholarum Juris origo inspiciatur, recondendum est, quod olim Romæ *summo semper in honore fuit Juris cognitio, & interpretatio, Cic. de off. II. 19.*; sed quia legum usus populo minime patebat, Jēti, seu Patricii, consulentibus se se præbebant, non item iis; qui eorum mysteria discere volebant.

Pri-

Primum Tiberius Coruncanius anno U. C. 500. se discipulis præbuit, L. 2. §. 35. de O. J.; tum alii Jcti, etiam ii, qui sub Imp. maximis erant honoribus decorati, uti Papinianus, Ulpianus, alique. Primus Servius Sulpicius ad regulas quasdam Jus redegit, artemque concinnavit. *Cic. in Bruto cap. 41.* Prælectiones Juris olim vix habebantur, sed in negotiorum expeditione Responsa, quæ clientibus Jcti dabant, adolescentes Juris studiosi audiendo discebant, *Cic. d. loc.* Postmodum Sæc. II., cum leges numero jam excrevissent, coeperunt per prælectiones tradi. Hinc scholæ Juris Romæ, Beryti, & Cpoli eo privilegio donatæ, ut non liceret alibi cuiquam Jus docere, *Hein. Ant. Rom. lib. I. tit. 25. n. 20.* Quod si in Provinciis quoque erant *Legum doctores*, privato ii arbitrio, non publice probati docebant: unde a tutela, curave vacationem non habebant, *Modestinus in L. 6. §. 12. de excusationib.*

§. 64. Postremo de Justinianæ Jurisprudentiæ fati edifferamus, In Oriente, quia desuescere jam coeperat latina lingua, Justiniani libri Græce reddituri fuere. Theophilus Institutiones Græcas reddidit, cujus

jus paraphrasis a Car. Annib. Fabrotto
novis curis edita est. Pandectas ad ver-
bum in Græcum vertit Thalelæus, ipsi
Imperatori coævus: ac ipse, sive alius,
etiam Codicem, *Suarez. in notit. Basilic.*
Thalalæi opus nondum adspexit lucem.
Ejus Pandectas MS. vidisse se, testatur
Græg. Haloand. in *Præfat. Novell.*; uti
& Codicem Græcum visum esse in Cre-
ta insula, scribit Suallenb. in *prologom.*
Harmenop. Hæ versiones, necnon Iustinia-
ni Novellæ, posteriorumque Imp. Græcæ
Constitutiones, ad Sæc. VIII. in Oriente
Jus erant. Ut vero in ordinem leges re-
digerentur, non ut Justiniani tolleretur
memoria, quod putavit Marquardus Fre-
herus *præf. ad Jus Græco-Rom.*, novum
Juris corpus Imp. adornare cœperunt.

§. 65. Et Basilii Macedo anno Ch.
838. in 40. libros edidit *Προχειν των νομων*
Promptuarium legum. Perit hoc opus, præ-
ter quædam fragmenta de nuptiis: *Jo.*
Leunclav. Jur. Græco-Rom. Lib. II. Ba-
ron. an. 826. n. 12. Tum Leo philoso-
phus, Basilii filius, paternam collectionem
libris 60. confecit anno 886., sub titulo
Διαταξιν βασιλικων, *Constitutionum Imperia-*
lium. Tandem Constantinus Porphyroge-
ne-

vetus Sæc. X. ineunte, repetitam βασιλικήν
 prælectionem, quæ & προχρον μεγα, & το
 πλατος των νομων, necnon το πλατος absolute
 appellatur. Et hæc sunt illa βασιλικα, quæ
 post multorum curas, Græce, ac Latine
 edidit Fabrottus *Parisis ann. 1647.* se-
 ptem volum. in fol. In hisce Basilicorum
 libris multa sunt ex latina illa Romani
 Juris editione: pleraque namque desueve-
 runt: sunt & Græcorum Impp. Constitu-
 tiones; complura quoque ex Græcis Jctis,
 Patribus, Conciliisque desumpta. Atque
 ii libri a plurimis Græcis Interpretibus
 illustrati, in Oriente usque ad Imp. Con-
 stantinum Palæologum, hoc est ad Græci
 Imperii finem, anno 1453., Juris corpus
 fuere. Sed & Turcæ plura ex Romanis
 legibus deprompserunt; *Leunclav. in præ-*
fat. ad lib. III. Paratit. Menag. Amoen.
c. 26. Interpretes tamen illi, de quibus
 Suaresius *in Not. Basilic.*, vix faciunt ad
 genuinam, germanamque Romani Juris
 interpretationem. Maxime tamen facit
 solida, & mascula Græci Juris cognitio:
 atque contra ejus olores vide Fabrottum
in apologia pro Græcis, quæ XII. suis E-
 xercit. *Parisis editis*, subjecta reperitur;
 Contium, *Disp. I. 6.*, & Best. *in rat. e-*
mend.

mend. LL. c. 1. Neque hic dici potest, quod Plinius *Lib. VIII. epist. 14.* scribit; *Quotusquisque enim tam patiens, ut velis legere, quod in usu non sit habiturus?*

§. 66. Græcorum Impp. jussu multi quoque editi fuerunt libri, quibus veluti cunabula Juris, & contractior Jurisprudentia contineretur. Ita est *προχειρον των νομων manuale legum*, quod Basilium Macedonem, ejusque filios Leonem, & Constantinum, sive Alexandrum, auctores habet. Est etiam *εκλογη νομων* in 50. titulos divisa, cujus auctor fertur Romanus Junior Lecapenus. *Cujac. Obs. XVIII. 37.* Ita Synopsis Michaëlis Attaliotæ, jussu Michaëlis Ducæ concinnati, quæ *πονημα*, seu *πραγματιση*, quasi opus Juris, appellatur. *V. d. Suares. in Not. Basil., Enimund. Bonafidei in Jur. Orient., & Jo. Leunclav. Jur. Græco-Rom.*: necnon *προχειρον* Constantini Harmenopuli ex Basilicis contractum, & nuncupatum *εξιβιβλον* (Harmenopulus autem floruit circa annum 1345. & Græce, latineque editus est *Gen. 1587.4.* cum notis Jo. Merceri, & Dyonisii Gothofredi): & si qui alii sunt hujus lutei libelli. Observari hoc loco opus est, Græcos Justiniani Juris interpretes, uti & Theophilum, Har-

Harmenopulum, multas latinas voces retinuisse in Rom. Jure receptas, quæ vix in Græcum converti potuerunt sermonem; ex. gr. *suus heres, donatarius, legatarius.* Quod & Modestinus fecit, cum libros de excusationibus Græce scriberet; *L. I. §. I. ff. de excusat.*

§. 67. In Occidente vero ante Justinianum, Barbarorum jam irreperant leges. *Barbari* dicebantur, qui extrinsecus in Romanas provincias adventarant, ut a victis distinguerentur. *V. Fresn. v. barbarus.* Sed & Romanum Jus ex Theodosiano Codice vigeat; cum libertas victis relicta fuerit suo Jure vivendi. Quia Theodoricus Gothus leges Romanas servari jussit, si res Romanos inter, & Gothos esset, *Cassiodor. III. var. 13. Jann. III. 2. §. 2.* Postmodum sub Justiniano Italia, Sicilia, & Africa jam victæ, ejus leges receperunt. *Nov. 76.* At postquam Langobardi plurimas Italiæ Provincias invaserunt, nonnulli putant, has Justiniano Jure uti desuisse: illudque Sæculo XI. sub Lothario Saxone primum revixisse, ob Pandectas Amalphi a Pisanis inventos; indeque Florentiam translatos: necnon circa idem tempus Justiniani Codici

dicem Ravennæ inventum fuisse ; tum alios Justinianeos libros : Novellas solummodo in Italia jam antea adfuisse .

§. 68. Quæ opinio a veritate abludere videtur. Italis Langobardi, & Carolus M. optionem Legum dedere, *LL. Langob. I. 29. 2., & II. 57. 1.* : nimirum vivendi Jure Langobardo, aut Romano: quæ Jura communia erant; licet aliæ Gentes huc adventassent, quæ propriis utebantur legibus, institutisque. *Guilelm. I. in Const. puritatem.* De Langobardarum legum vulgata in tribus libris collectione, forte a Petro Diacono Casinensi sub Lothario II. facta, & postea a Carolo de Tocco, Andrea Bonello, aliisque glossis aucta, egimus in Institutionibus Juris Regni. V. Goldastum, Lindenbrogium, & Muratorium. In Hispania vero Wisigothorum leges invaluerunt, Romanis rejectis: nam hæ quamvis eloquiis polleant, tamen difficultatibus hærent, uti est in edicto Chindesuindi, quod perperam Carolo M. tribuitur a Gonzalezio in cap. 28. X de privileg. V. Petr. Pithoeum in Cod. LL. Wisigothicar. lib. 12. Nam a Caroli M. Imperatoris ætate Justiniani leges in Franciam invec-tæ fuerunt.

§. 69. Leges autem Romanæ , quibus sub ipsis Langobardis uti poterant Itali , erant leges Justiniani jam in Italiam investæ . *Murat. Antiq. Italic. Disf. 22. & 44., Don. Ant. Astensis de usu, & auct. Jur. Civ. II. 2.* Quod vero de odio Langobardorum adversus Græcos , reponit Jannonius *IV:6.* , pura puta conjectura est ; quæ quidem evanescit , si attenderimus , Paulum Diaconum Langobardum , Justinianeum Jus descripsisse , laudasse , nihilque nobis de Langobardorum in Justinianum animo proposuisse . Profecto Justiniani libri a multis ejus ætatis auctoribus laudantur : & vel ante Pandectas Amalphi inventos primum Pepo , dein Irnerius , eos Bononiæ docere jam cœperant . Pandectarum inventionem illam negare non audeo , uti negant Guido Grandi , Don. Ant. Astensis , aliique . Neque negotium facessit , si primus ejus rei mentionem faciat Fr. Raynerius de Grancis Pisanus , scriptor Sæc. XIV. , qui poëma concinnavit *de præliis Tusciæ* ; & si nihil de ea re habeant Alexander Telefinus , Petrus Diaconus , & Falco Benevertanus , qui Siciliæ res sub Rogerio gestas memoriæ tradiderunt . Licet vero Pisani Amalphim diripuissent anno 1130. , quo

Lo.

Lotharius, sicuti ajunt, in Germania erat, *V. Murat. Annal. d. ann.*; anno vero 1137., quo Pandectæ vulgo inventi efferuntur, Scalam, & Rebllum: dici tamen potest, illos inventos fuisse anno 1130. Cæterum ante eam direptionem in Italia jam Justinianeos libros extitisse, negandum non est. *V. Cyrillum nostrum in fine Historia Juris, & Graviam de ort. & progres. J. civil. c. 139.* Proinde bene probat Don. Ant. Astenfis in laud. opere II. 3., vulgares Pandectas minime ex Florentinis descriptos fuisse.

§. 70. Ergo vigebat Justinianeus Juris auctoritas tam sub diutina Langobardorum ditione, quam post Caroli M. imperium. Extabant Justinianeus libri, sed quia manu exarati, ab omnibus manu versari minime poterant. Sæculo X. sub Ottone M., qui artes, scientiasque fovit, Juris disciplina cœpit reviviscere. Sæc. XII. & Jurisprudentia Justinianeus commune Jus evasit, & facultatibus cæteris decus, ac lumen affulsit. Bononiæ Irnerius potius forte fortuna, quam Mathildis hortatu, Justinianeum Jus perscrutatus fuit, & cum laude, auditorumque frequentia, publice docuit. Ex ejus schola, veluti ex equo Tro-

Trojano, multi interpretes prodire. Antesignani fuere Martinus Gosianus, & Bulgarus; duarum principes sectarum. At Juris studium privatis cœptum curis, Impp. promoverunt; præsertim quia *Legistæ* a partibus Gibellinorum stabant.

§. 71. Ab ipso Sæculo XII., nimirum ab Irnerio ad Accursium usque, præcipue *Glossæ* pro verborum explicatione, locorumque sententiis, & *Summæ* Juris scriptæ sunt. Inter Summas eminet illa Azonis. Irnerius, Bulgarus, Rogerius, Pylæus, Azo idem, glossas exararunt; quas exinde Franciscus Accursius suis copulavit, Jurisque corpori, non sine improbo labore, adtexuit. Optimæ hujus corporis editiones sunt Lugdunenses tres, h. e. ann. 1554. cum signo Salamandræ, ann. 1580. cum signo Leonis, & ann. 1589., quæ continet Contii scholia, Cujacii paratitla, & Dionysii Gothofredi adnotationes: tum Veneta ann. 1574.; quæ exhibet Pandectas cum Florentinis collatos, Codicem nonnullis Græcis Constitutionibus, & Ant. Contii fastis Consularibus auctum, Ant. Persii scholia, & Aegidii Perrini rerum indicem.

§. 72. Hujus ætatis Interpretibus tribuitur Pandectarum divisio in Digestum vetus, Infortiatum & Digestum novum : tum illa Novellarum in *novem Collationes* a Burgundione Pisano facta : necnon latina Græcorum locorum in Pandectis, & Codice interpretatio, ejusdem Burgundionis; *Pancir. de clar. leg. interpret.*, non Bulgari, uti volunt Accursius, Ant. Augustinus, & Cujacius : Bulgarus namque Græce scribere nesciebat; tametsi non negaverim, eam versionem multis mendis inficetam esse, *V. Menag. Amoen. c. 33.*

§. 73. Tribuuntur quoque ejus ævi interpretibus *Authenticæ*, & *Decima Collatio*, Nimirum Consuetudines, ac leges feudales Gerardus Niger, & Obertus de Orto Mediolanenses, retulerunt in duos libros, quos Hugolinus Bononiensis, adjectis Conradi III. Imp., ac utriusque Frederici Constitutionibus, quia Jus Feudale commune in Europa ii continebant, addidit Novellis sub titulo *Decimæ Collationis*. Deinde post *tit. 58. Lib. II.* addita quoque sunt *Capitula Extraordinaria*, h. e. fragmenta Feudalia ab Ardizone, & Algarotto collecta; necnon quædam alia

liæ Constitutiones *Extravagantes*. V. *Thomas. select. Feudal.*, *Horn. Jurispr. Feud.* c. 1., & nostras *Juris Feudalis Institutiones in prænot.*

§. 74. Tandem *Authenticæ* sunt summaria ex *Novellis*, & quibusdam utriusque *Friderici Constitutionibus*, subjecta legibus *Codicis*, quibus opponuntur. Eæ *Irnerio*, aliisque interpretibus debentur. V. *Bynkersöek. de auctore, auctoribusve Authenticarum*. Sæpe a *Constitutionibus*, unde depromptæ sunt, discrepant, *Wisembach. Syllog. error. Irnerianor. in Authenticis*. Exempli habes in *Auth. bona damnatorum C. de bon. proscript.*, *Auth. ex causa C. de lib. præ.*, & *exher.*, *Auth. hæc ita C. de V. O.*, *Auth. sed bodie C. de judic.* Multis *Authenticas* scaterere vitiis, ex professo monstrarunt viri doctissimi *Contr. Ritthershusius in promulside errorum Irnerianorum*, & *Jo. Jac. Wissenbachius in Sylloge error. Irner.*. Attamen *Irnerii* causam strenue egerunt *Jo. Strauchius in Irnerio non errante*, & *Alex. Arnold. Pagenstecher. in Irnerio injuria vapulante*, qui commentariis etiam *Authenticas* illustravit. Quare legis vi eæ non pollent, nisi *Novellis* respondeant, vel nisi usu re-

ceptæ fuerint, *Alberic. Gentil. de libris Jur. Civ. c. 6.*, uti est *Auth. bona damnatorum, C. de bonis proscrip.*; quæ non respondet *Nov. 134. c. fin.*; & *Auth. sed Judex C. de Ep. & Cler.*; quæ est præter *Nov. 123. c. 7.*

§. 75. A Sæculo autem XVI. exitere Bartolus de Saxoferrato, Baldus ejus æmulus, ac auditor, Cynus Pistoriensis, Paulus Castrensis, Alexander Tartagnus, Jason Maynus, Bartholomeus Salicetus, Oldradus, Raphaël Fulgosius, aliique; *sæpe optimi condendi juris auctores, etiam tunc, quum conditi juris mali sunt interpretes*, uti ait Grotius *de J. B. & P. prolegom.*

§. 54. Profecto disputationibus studebant; nec breves glossas, sed longissimos, barbaros, atque ut plurimum obscuros commentarios in leges scripserunt.


§. 76. A Sæculo XVI. tandem politiores Interpretes, quorum familiam ducit Andreas Alciatus Mediolanensis, post bonarum litterarum restaurationem, floruerunt. Non equidem defuerunt ante Alciatum, qui veterem Jurisprudentiæ candorem restituere adlaborarunt, uti Castilioneus, Raphaël Cumanus, Fulgosius, Alexander ab Alexandro, aliique, sed eorum

rum sententiæ a cæteris barbariei adfuetis, rejectæ fuere. Felicitas autem Romanæ Jurisprudentiæ infelici civitatis Cpolitanae potissimum obtigit excidio. Cum enim, expugnata hac urbe, eruditissimi Græcorum in Italiam confugerent, ac Juris Romano-Græci libros adducerent, interpretes plerosque suppuduit barbariei *Realistarum*. Ita se se appellabant, qui veteri luto hædere maluerunt, & *humanitas* barbaro nomine cultiores dicebant. Quare Jurisprudentia respirare, nativamque dignitatem a priscis repetere coepit auctoribus. Post Andream Alciatum ejus restauratores fuere Guilielmus Budæus, Æmilius Ferrettus, Marci Jcti filius, Ant. Goveanus, cujus ingenium ipse admiratus est Cujacius, *Jo. Papirius Masson. in vita Cuiacii*, Antonius Augustinus, aliique. Mascula autem Jurisprudentia ex Italia mox in Galliam transiit. Et in Bituricensium schola docuerunt post Alciatum Eguinarius Baro, Fr. Duarenus, Fr. Balduinus, Hugo Donellus, & qui palmam omnibus præripuit, Cujacius. Floruerunt quoque Fr. Hotomanus, Barnabas Briffonius, Edmundus Merillius: & in Tholosana, aliisque scholis complures alii præ-

præstantissimi interpretes , de quibus vide Ferdinandum Hommelium in *Litteratura Juris*. Et tamen vetus barbaries aliquibi etiamnum obtinet : immo ex ipsis cultioribus interpretibus nonnulli ob nimium philologiæ studium , rationes ac philosophiam legum negligentes , mirum quantum in Juris artem peccarunt . Diversimode autem eruditi viri Jurisprudentiam illustrarunt .

§.77. Nonnulli ex his emendatiores Juris textus reddidere . Quapropter , ut omitteram antiquissimas Sæculi XV. , & XVI. editiones , de quibus *Fabricius vol. 12. Bibl. Græc.* , utque præcipuas recenscam , in glossatum Juris corpus curas posuit suas Greg. Haloander anno 1529. Noribergæ tribus volum. in 4.; unde *Norica* editio isthæc audit . Porro accuratam Pandeectarum Florentinorum editionem fecit Franciscus Taurellus Lælii filius , anno 1553. De triplici ista ff. editione , vulgata , Norica , & Florentina , vide Brunquellium *Hist. Jur. par. 2. c. 5. 6.* , & 14. Postmodum accuratissime universum Juris corpus edidit Ludovicus Ruffardus an. 1561. Lugduni: recusum Antuerpiæ cum nonnullorum notis , & Duare-
ni

ni summariis ad ff. an. 1567. Tum Ant. Contii Lugd. anth. 1580. 14. tom. in 12. apud Guilelm. Rouillium alia est editio. Post Contianam nitidissima Ludovici Charondæ editio typis Plantinianis an. 1575. in f. prodiit. Habemus quoque an. 1663. cura Simonis van Leeuwenii Amstelodami, & perfectiorem eodem anno Francofurti editionem Juris corporis, cum Dionysii Gothofredi adnotationibus. At glossata illa usu in Foro recepta est.





INSTITUTIONUM

JURIS ROMANI

L I B. I.

T I T. I.

DE JUSTITIA, ET JURE.

§. 78.



Andectarum exemplo primis hisce titulis agit Tribonianus de lege, & generalibus Juris præceptis : mox in sequentibus

de rebus, quæ lege ipsa constituuntur, verba factururus. Atque in hoc titulo Romanæ Jurisprudentiæ finem, definitionem, methodum, præcepta, species, & fontes paucis describit. Quum autem Jurisperiti, artisque Juris finis sit Justitia, *L. 1. §. 1. ff. de J. & J.*, de hujus natura pertractare incipit, ut quo eundum nobis est, videamus.

§. 79. Justitia *pr. b. r.*, præeunte Ulpiano, Papiniani discipulo, in *L. 10. eod.* definitur *constans, & perpetua voluntas jus suum cuique tribuendi*. Est nimirum mentis stabile consilium, animique constans propositum; in quo generatim perfectam

F

ctam

Etiam virtutem consistere Stoici dixerunt, Cic. *parad.* III. c. 1. Senec. *ep.* 66., & 121. Ab iis idcirco petita videtur ista definitio: quæ cateroquin Justitiam indigitat, non prout inest subjecto, sed prout inesse deberet. Quod vero cuique suum tribuit Justitia, ab aliis virtutibus dispecitur. Proinde ea definitio Justitiam universalem, de qua mox §. 83., complecti videtur: licet ad solam peculiarem aptari soleat. Et vero civilis disciplina non hanc tantum, verum & universalem respicit Justitiam, quæ omnium officia virtutum comprehendit: hinc Juris præcepta *infra* §. 93. omnem speciem virtutis honestatisque continent.

§. 80. Jam vero *tribuendi* Florentiæ legitur *in d. L.* 10. Multis placet *tribuens* ex Vulgata editione; ut intelligamus, Jætos non animum, ex. gr. solvendi, aut cogitationem sceleris attendere, sed implementum, & rem ipsam: aliter ea definitio vix civilibus regulis convenit: etenim in civitate justus dicitur, qui, licet constans absit voluntas, externas tamen actiones ad Jus conformat. Eodem ferme modo concepta est Justitiæ definitio a Cicerone II. *de Divinat.*: *est habi-*

*tus animi, communi utilitate servata, suam
cuique tribuens dignitatem.* Nimirum com-
munis servanda est utilitas, ne ita jus
suum cuique tribuatur, ut lædatur socie-
tas. Perperam vero a quibusdam notatur
Ulpianus, quod limitationem istam omi-
serit: est enim comprehensa in generali
Juris descriptione. Porro observandum, ju-
ris nomine apud veteres designari digni-
tatem, seu facultatem, quæ cuique ex le-
ge competit, *Budæus adnot. in ff.* Qua-
re *dignitatem* Tullio *jus* significat.

§. 81. *Justitiæ autem origo est ex ho-
minis natura, quæ ad societatem fertur:
& merito justum idem erit, ac quod natu-
ræ sociali convenit. Justum vero, atque
injustum, sicuti bonum, ac malum, non
a legibus, institutisque hominum invec-
ta sunt; quemadmodum somniarunt Sophistæ,
qui omni ævo Justitiæ fulcrum labefa-
ctare conati sunt; sed ab æterna veritate,
rerumque ordine, dependent. Profecto quod
rei cujusdam naturam destruit, ei bonum
certe non erit: quod vero conservat, ac
perficit, non erit certe malum. Atque
hæ rationes mutari ex humanis institutis
nullo modo possunt. Cumque turpe sit
malo studere, ac bonum averfari: justum*

autem sit ita agere, ut quod bonum alicui est, non intercipiatur, nec malum inferatur, vides istiusmodi rationes ab humano arbitrio minime pendere.

§. 82. Ex allata *justi* idea sequitur germana *juris* acceptio: nimirum *jus* esse facultatem, seu potestatem persequendi, conservandi, ac faciendi, quod justum est: tametsi vario, ac multiplici sensu accipi soleat *juris* vocabulum. Nunc enim pro ejus causa efficiente; idemque ac *lex* significat; unde aliquid dicitur naturali, vel civili *Jure* constitutum: nunc pro ipsa legum disciplina: unde Celso dicitur *ars boni & aequi*, teste Ulp. in *L. 1. de J. & J.*: nunc pro actione Judicis sententiam ferentis, etiam cum inique decernis; relatione scilicet facta non ad id, quod ita Prætor fecit, sed ad illud, quod Prætorem facere convenit: nunc pro Judicii loco; quæ omnia habet Paullus in *L. pen. eod. V. Briffon. de V.S. Lib. IX.*

§. 83. Si igitur justitiam consideraverimus relatione ad nos ipsos, utpote quæ nos, nostraque æque perficit, servatque, ac alios, vix ab honesto differt: omnesque ita virtutes continet. Hæc justitia *universalis*, *legalis* ab Aristotele

tele appellatur in difficili loco *Ad Ni-*
com. V. 3., quia directe a legibus na-
turalibus, ac civilibus pendet. Si vero
quid publica salus postulet, & virtus non
dicatur; adeo quidem, ut videri queat,
justitiam legalem omnium virtutum com-
plexioni, atque universali justitiæ non
aptari; nihilominus eo ipso, quod lege
civili continetur, honesti induit natu-
ram: honestum quippe est summo Impe-
rio obsequi.

§. 84. *Justitia peculiaris* ab universali non distinguitur, si generalis virtutis finis inspiciatur: utraque enim hominum perfectionem, atque incolumitatem spectat: sed diversa virtus est, si peculiaris consideretur finis; nam restituit & singulorum, & omnium jura, quæ ex proprietatibus tam ingentis, quam adscititiis proficiscuntur; atque servat inter homines æqualitatem. Quare a cæterarum virtutum fine, & materia distincta est: atque sicuti in mediocritate, sive inter plus, & minus, ita in æqualitate servanda consistit.

§. 85. At qua ratione æqualitas isthæc
fervatur? Nimirum omnibus hominibus
par jus est utendi fruendi non modo

iis, quæ natura cuique ingeneravit, sed omnibus aliis, quæ ex legitimo proprietatum, virium, ac facultatum exercitio sunt superaddita; unde multiplices hominum status emergunt. Justitia societatem, & communionem hominum tuetur; omnemque læsionem a proprietatibus, statibusque avertit. Tum in distributione pœnarum, ac præmiorum æqualitas servanda est. Quocirca Aristoteles Justitiam particularem divisit in *distributivam*, quæ ex proportionem geometrica servatur, & *correctoriam*, seu *commutativam*, quæ arithmeticam sequitur proportionem: atque doctrinam istam in Jurisprudentiam investam video. *V. Coccej. Jus Civ. controvers. tom. 1. præfat.* Vix tamen multis interpretibus, quod ea de re scripserunt, intelligere datum est. Proinde heic placet tantisper immorari.

§. 86. Proportio arithmetica ex excessum comparatione fit: Geometrica ex *continentiæ* quantitatum comparatione. Hæc applicentur justitiæ commutativæ. Et quidem varii hominum status inter se se comparandi sunt; ut videatur, qui æquales sint, qui inæquales, eorumque differentiæ dignoscantur. Si vero statuum rationes vel
spon-

sponte, vel injuria commutentur inter homines; tunc justitiæ commutativæ munus est statuum rationes tueri arithmetica proportionem; h. e. corrigendo quod injuria ablatum est: ita ut post ipsam commutationem æqualitas statuum quoque sit. Hoc modo læsi status violatio in integrum restituitur, si quod quis plus non ex jure usurpavit, læso retribuire cogatur. In statuum involuntaria commutatione, scilicet in definitione poenarum, pariter arithmetica proportio servatur, si variorum statuum læsio consideretur: etiam si morti quis patrato scelere datus sit: superest enim cæsi familia, & Respublica, cujus interest, eum cæsum non fuisse. Si vero gravitas delicti consideretur, locum habet in poenis irrogandis geometrica proportio: cum vero quoad gravitatem delictorum progressio sit a malorum maximo ad minimum; poenæ esse debent, ut crimina: sive, ut crimen unius ad alterius crimen, ita poena ad poenam. Profecto in maleficiis & damnum læso reparari debet, & poena reus affici ob patrati facinoris malitiam.

§. 87. Quoad distributionem vero attingit, qui summo in Rep. petitur impe-

rio, onera, & honores ex proportionē geometrica distribuit, pro meritis civium erga Remp., ac pro commodis a Rep. ipsa perceptis. Ita sicuti commodum, quod civis aliquis a Rep. perceperit, ad com-
moda se habet ab aliis percepta, ita sit onus eidem tributum ad aliorum onera: & sicuti sunt merita ejusdem in Remp. ad aliorum merita, ita sunt honores. Nimirum quoties com-
moda, & merita unius alterius com-
moda, & merita complectuntur; toties etiam onera, & honores inter eosdem divisa. Quid Aristotelicæ huic doctrinæ reponant Noodtius, Grotius, Bodinus, aliique, libens prætere-
o.

§. 88. Aristotelicæ divisioni Justitiæ in distributivam, & commutativam, affinis est illa Grotii in *attributricem*, quæ in præmiis, pœnis, & muneribus, habet rationem meriti, & cuique dat, quod habere dignus est: atque *explettricem*, quæ in commutandis rerum dominiis explet, compensat, & cuique tribuit, quod ex jure perfecto petere potest. Grot. I. I. §. 8., Pufendorf. I. 7. §. 8., Huber. Obs. J. I. 8. Cæterum Juris divisio a Grotio, & Pufendorffio statuta, in *perfectum*, ac *imperfectum*,

Num, nescio, an recto stare talo possit. Ne vero ulterius in aliorum campis vagari videar, ac de termino veluti moto querelam patiar, ad Jctos redeo.

§. 89. A *Justitia* appellatum *Jus*, ait Ulpianus *L. 1. de J. & J.* Verum id Philosophice, non grammatice dictum est. Nam sive *Juris* vocabulum proprie sumatur pro jussu, ac lege, sive improprie pro arte æqui, bonique; semper *Justitia* est prior lege, & arte *Juris*: ut enim ars *Juris* sit, *Justitiam* prius extitisse oportet.

§. 90. *Juris* cognitio, ac scientia menti, animoque inhærens, dicitur *Jurisprudentia*; quæ pars practicæ *Philosophiæ* ex *L. 10. §. 2. eod.* definitur in §. 1. *b. t.*; *divinarum, atque humanarum rerum notitia; justî, atque injusti scientia.* Priora verba *philosophiæ* etiam conveniunt; posteriora *Jurisprudentiæ* tantum, quæ & divina, & humana complectitur; quatenus tamen declarat, quid justî, quid injusti in iis sit; ita prima definitionis verba cum postremis conveniunt. Elegantissime etiam definitur a Celso nostra hæc disciplina *ars æqui, & boni*, *L. 1. tit.* ex quibus verbis *Juriconsulti* officium in interpretando, & in respondendo, consistit.

§. 91. Sane Jēti prudentia est in qua-
que re, quid æquum sit, meditari, ac re-
spondere: ideoque verborum vim, & le-
gis rationem, ac mentem, quæ vere æ-
quitas est, adeo scrutari, ut huic con-
gruant verba: unde extensiva, vel restricti-
va dici solet interpretatio; *V. Guil. For-
ster. de Juris interpretatione II. 2. Nood. ad
tit. ff. de LL.* Quare DD. dicunt, ces-
sante ratione legis, ipsam legem cessare;
quod tamen accipiendum, si illa cesset
in universum. At ipse Princeps adeundus
est, si in singulari specie cesset; *L. 1. C.
de LL.*: aliter dicitur, durum esse, sed ita
scriptam esse legem, *L. 12. ff. qui, &
a quibus manum.*

§. 92. Jēti itaque, qui ab Augusti
ævo Juris conditores dicti sunt, *L. 23.
C. de procur. L. 25. C. de nupt.*;
licet ob modestiam Juris studiosi quando-
que salutarentur, *L. 1. de offic. Assess.
L. 9. §. 4. de pæn. L. 4. de extraord.
cognit.*, *Cujac. Obs. VII. 25.*, *Rævard.
Conject. II. 10.*, plerumque Prudentes au-
diunt, quia philosophiæ practicæ peritifi-
simæ, quæ ad singulorum hominum, ac
Rerumpub. incolumitatem dirigit mores:
& cujus potissima pars est prudentia civili,
lis,

lis. Hæc vero complectitur Architectonicam, sive artem dirigendi omnia in civitate ad civilem beatitatem; Deliberativam, sive artem deliberandi, quid Reip. utile sit; ac Judiciariam, sive artem de actionibus moralibus, civilibusque secundum leges judicandi, *Arist. Rethor. I. 4., & Politic. IV. 4.*: quæ ab Jurisprudentiæ universalis, ac Ethices scientia pendet omnia. Bene Vinnius *princ. b. r.* scribit; *non minus late patet officium Jcti in legibus interpretandis, quam legislatoris in sanciendo: totoque falluntur judicio, qui officium Jcti cancellis forensium causarum circumscribunt.* Aliud a munere Jctorum erat Advocatorum munus, *L. i. §. 5. de extraord. cognit.*

§. 93. Monita ad Justitiam, sive præcepta Juris, tria sunt, §. 2. *b. r.*, *boneste vivere; alterum non lædere; suum cuique tribuere*: cum scilicet ex propria significatione sumuntur: aliter ex generali acceptione confundi possent. Sed quæ in re ea differant, diversimode exponunt nimis ingeniosi interpretes. Quidam dicunt, primum spectare ea, quæ turpia sunt, sed jure civili permessa: secundum alterius personam: tertium externa

cujusque jura. Alii opinantur, primum respicere hominem, quasi solitarium, cui adhuc necessaria est idea justitiæ, ut vir bonus sit: reliqua eum respicere tanquam societatis membrum, ut bonus civis, & Magistratus fiat. Nonnulli ad temperantiam, fortitudinem, ac justitiam referunt præcepta Juris: prudentiam vero ajunt omissam, uti virtutem intellectualem. Potius animadvertisse præstiterit, Stoicos dixisse, *decreta* imperare, ac *prodi sine scelere non posse*, Cic. Acad. quæst. IV. 9. ; at præcepta monere; ea-que, ut ait Seneca epist. 94., *non cogere, sed exorare*. Cum autem civilis lex non omnia honesta imperet, non omnia turpia vetet, puniat, quin ea quandoque permittat, L. 7. ff. de LL.; idcirco præter decreta, & virtutes legis proprias, sæpe præcepta dat, ut intelligamus, plurima extra publicas tabulas exigere pietatem, humanitatem, liberalitatem, justitiam, fidem, uti ait Seneca de Ira II. 27. V. Noodt. in Julio Paulo c. 10.

§. 94. *Hujus studii*, scilicet Juris, cui studetur, *duæ sunt positiones*, seu species, quoad ejus objecta, §. 4. b. t. Nam vel
 pu-

publicum est, quod primario statum rei Romanæ, h. e. Reip. respicit felicitatem, vel *privatum*, quod directe singulorum utilitatem, & jura spectat. Jus sacrum non est diversa species; sed ad publicum Jus refertur. Cæterum ex sui causa, atque auctoritate, omne Jus publicum est; ac opponitur juri, quod cuique privatim ex conventionibus acquiritur. Sæpe etiam Juris publici nomine venit, quod civibus omnibus ejusdem civitatis commune est. *V. Vinnium in d. §. 4.*

§. 95. Jam privati Juris Institutiones tradere se, ait Tribonianus, *simplici via*, §. 2. *h. t.* Et, quod facere pictores solent, prima lineamenta ducit, ac opus informat, postea accuratiori studio perficiendum. Ad rem Quintil. *Inst. Orat. I. 2.* *ut vascula oris angusti superfusam humoris copiam respuunt: sensim autem influentibus complentur; sic animi puerorum.* Proinde frequens brevium libellorum usus fuit apud veteres. Paulus *Manualium* libros tres; Pomponius *Excerptum* duos reliquit. Bene Quintilianus idem *Lib. 8. Inst. orat. proëm.* ait, *incipientibus brevius, ac simplicius tradi magis convenit: aut enim dif-*

difficultate institutionis tam numerosæ, atque perplexæ deterrerentur; aut eo tempore, quo præcipue alenda ingenia, atque indulgentia quadam enutrienda sunt, asperiorum rerum tractatu atteruntur. Privatum autem Jus ex Jure naturali, gentium, & civili proficisci, ait Tribonianus. Idcirco hos Juris nunc aperit fontes.

T I T. II.

DE JURE NATURALI, GENTIUM, ET CIVILI.

§. 96. **J**us Naturale est, quod natura omnia animalia docuit, ipsa etiam bruta, Ulpianus L. 1. §. 3. de J. & J., princ. b. r., ubi exempla adduntur; hinc descendit maris, & feminae conjunctio; liberorum procreatio; hinc educatio: vidimus enim cætera quoque animalia istius juris peritia censeri; scilicet quasi perita esse. Recte scribit hoc loco Vinnius, quæ naturalis juris sunt, bruta solo naturæ impetu facere, cum humani sensus similitudine; homines vero facere cum ratione. Nam ut in brutis quædam elucent simulacra rationis; ita

ita & juris, & virtutum; ait *Cic. II. de fin.* Similiter Plato existimavit, Naturam facere quamque rem perfectissimam voluisse: ideoque in plantis sensus, in brutis rationis, in hominibus divinæ mentis expressisse vestigia. *V. Salmas. de usur. c. 9.* Cæteroqui jus est ratio; ideoque hominum proprium, non brutorum, quæ generalibus præceptis minime reguntur. Nec eos moror, qui affirmant, Stoicos brutis rationem addixisse, ex eo, *quod nihil aliud si intellexerint, faciant. Senec. ep. 121.*

§. 97. Mens Ulpiani ex Stoicorum principiis declaratur. Nam ii naturam, vel communem animantibus omnibus, vel hominibus propriam esse statuebant; & proinde jus aut universæ naturæ animali conveniens, aut hominibus tantum: ita ut juste vivere esset vivere secundum naturam, sive secundum finem, ad quem quodlibet ex animantibus tendit. Dicendum igitur est, minime Ulpianum credidisse, rationis Jus cadere in animalia muta: sed ob simulacrum rationis, ac naturæ animalis, id considerasse in brutis. Proinde Jus naturæ ex ejus sententia hominem respicit, ut animal (atque, ut mihi videtur, de-
no:

notat naturales instinctus, animique motus: unde *jura animi* Ovidius in *metam.* eodem sensu dixit); Jus gentium, veluti ratione utentem, tandem Jus civile, veluti civem.

§. 98. Verum naturæ principia, nempe legem communem cum bestiis, dicunt Jus naturale quidam Jurisconsulti, inter quos Tryphoninus in *L. 64. de condict. indeb.* Sunt & alii, qui naturam propriam hominum statuunt pro Jure naturali; atque his Jus naturale, & Gentium sunt synonyma: ita Cajus in *L. 1. de adquir. rer. dom.*, Marcianus in *L. 2. C. 4. de rer. divis.*, Paulus *L. 84. §. 1. de R. J.*, Cicero *de Off. III. 5.*

§. 99. Jus Gentium est, quod naturalis ratio inter homines constituit, §. 1. *b. r. L. 9. ff. de J. C. J.*: intellige prope omnes, ut excludantur pravi Gentium mores: nam justum non ex populorum institutis, sed ex recta ratione æstimatur. Agnoscit Tribonianus, quod hodie dicitur, Jus Gentium *primævum*, & *secundarium*. Primævum est proprium hominum, ex naturæ dictamine, vique humanæ mentis proditum. Secundarium, quod proprie Jus Gentium appellari solet, est,
quod

quod usu exigente, & humanis necessitatibus, gentes sibi constituerunt, §. 2. h. t.; & quidem non in unum conveniendo, sed tacito populorum consensu: unde bella, servitutes, dominia, nummi, & ii contractus, qui immediate ex Jure civili non profiscuntur;

§. 100. Jus civile proprie est, *quod quisque populus sibi constituit, & cujusque civitatis proprium est, §. 2. h. t.* ex Cajo in *L. 9. de J. & J.* Vides, Jurisconsultos etiam in Monarchica civitatis forma sæpe Democratiae antiquo more fari consuevisse: argumento est vox illa *populus*. Quoniam vero Jus Romanum cæteris legibus civitatum præstare existimatur, dicitur *Jus civile*. Et sane vel *proprium*, seu *merum*, quod Romanorum institutis debetur, vel *commune*, seu *mixtum* ex Juris Gentium, Romanorumque institutis. *Positivum* autem Jus ex eo dicitur, quod *ponebatur* olim.

§. 101. Adnotandum hic ex §. 11. *h. t.*, Jus civile, quia ejus causa est humana voluntas pro variis rerum adjunctis mutabilis, posse mutari per legem posteriorem, vel per tacitum populi consensum. Et leges ergo contrariis legibus abrogantur, & consuetudines contrario usu exole-

G

scunt.

scunt. Verum enimvero Jus naturale, seu Gentium primum, æternum stat: nam ejus causa est sibi constans natura, ejusque auctor. Sed isthæ Juris naturalis immutabilitas nihil impedit, quominus ei Jus civile aliquid addat, vel detrahat, *L.6. ff. de J. & J.*; scilicet Jus naturæ jubens, aut vetans immutari nequit, licet res, quas regit, mutari videantur; ut in trito Socratis *apud Plat. I. de LL.* exemplo, de non reddendo gladio depositori, qui furere cœpit. Civiles additiones, vel detractiões æterna non mutant præcepta, sed explicant, quæ pro variis gentibus, moribusque servanda. Quare legem naturæ mutat civile Jus in hypothesi, non in thesi; ex. gr. parere parentibus, pacta conventa servare, sunt naturæ præcepta, quæ abrogari nullo modo possunt a civili Jure; sed in modo adplicandi, de quo nihil lex naturæ definit, aliquid additur, vel detrahitur per civiles regulas. Quæ autem permittit natura, variant pro rerum adjunctis, & proprie materia sunt legum civilium: ex. gr. lex naturæ donationem permittit; civilis addit insinuationem, si quingentos solidos donatio excedat. *V. Grot. l. 10.*

§. 102. Jus civile aut *scriptum* est , aut *non scriptum* . Illud fit promulgatione , atque expressa voluntate legislatoris ; hoc moribus receptis , & consuetudine , §. 3. *b. t.* Lacedæmoniorum leges scripto non constabant , & tamen Jus scriptum erant , quia Lycurgi jussione latæ . Errat proinde Tribonianus , §. 10. *b. t.* originem hujus discriminis petens ab Atheniensibus , qui leges suas litteris mandabant , & Lacedæmoniis , qui mandabant memoriæ . Hoc enim Juris discrimen a Romanæ Gentis institutis erat deducendum . Lex autem statim ac publicata est , obligat . Quod si Nov. 66. c. 1. duos indulget menses a die publicationis , ut obliget lex ; eam Nov. ita interpretes accipiunt , ut profint duo menses ad allegandam ignorantiam , quæ præsumitur : alioquin etiam post ejus temporis lapsum ignorantia allegari potest ; sed probanda est , *L. ult. de decr. ab ord. fac. Gudelin. de J. Novis. V. 2.*

§. 103. Scriptum Jus , si referas ad vetus Romanorum regimen , plures species habet : erant namque *Lex* , *Plebiscitum* , *Senatusconsultum* , *Principum placita* , *Magistratum edicta* , *Respon-*

sa Prudentum, §. 3. *b. r.* Sed duæ ultimæ species stante Rep. Jus non scriptum constituiebant; & quidem tacito Populi consensu receptæ: postea inter species scripti Juris etiam abierunt. Hæc omnia pro varia Civitatis Romanæ forma satis, superque exposita in Prolegomenis (§. 14. 20. 21. 22. 36., & 39.) denuo ad trutinam revocare nec vacat, nec lubet: immo quia tot Juris scripti species ex mutata subinde Rom. Reip. forma profectæ fuerint, hodie extra usum sunt.

§. 104. Jus civile non scriptum est mos, sive tacitus populi consensus, longa consuetudine inveteratus, qui legem imitatur, ac proinde & novum Jus inducit, & prius tollit, & optimus est legum interpretes; *L. 37. 38. ff. de LL. ? Quid enim refert*, ait Julianus *in L. 32. eod.*, *suffragio Populus voluntatem suam declararet, an rebus ipsis, & factis?* Cæterum inficias nemo iverit, in Monarchica civitatis forma ad consuetudinem inducendam opus esse Principis scientia, & patientia: nam ejus est legem tollere, cujus condere. Hinc legi a Principe latæ contraria consuetudine derogari nequit. Hoc sensu accipienda est *L. 2. C. quæ sit lon-*

ga consuetudo ; ubi statuitur, consuetudinem non posse rationem vincere (si enim est rationi contraria, aut bonis moribus, vim non habet, nec præsumitur a legislatore probari, *L. 39. ff. de LL.*), nec legem.

§. 105. Præterea ad inducendam consuetudinem requiritur temporis diuturnitas, & actuum uniformium frequentia, quibus tacitus populi consensus explicatur, *L. 1. C. cod.*. Doctores longum tempus decennio definiunt, & consensum utentium duobus judicialibus actibus probari contendunt. Sed cum in Jure id nusquam sit expressum, tutius est, utrumque Judicis arbitrio deferri, secundum regulam in *L. 1. §. ult. ff. de Jure deliberandi*, & *L. 9. C. de bonis auctoritate Judicis &c.* Et quod ait Ulpianus in *L. 34. de LL.*, consuetudinem probari in contradictorio Judicio, & re judicata, consilii esse videtur, non necessitatis. Quod vero inter partes Juris non scripti recensendæ non sint res judicæ, siue præjudicia, nec æquitas, docet Vin-
nius in §. 9. *b. r.*

§. 106. Ut finis Juris obtineatur, necesse est primum scire, quid sit suum
G 3 cui-

cuique; deinde qua ratione ab invitis obtineri queat. Jura autem vel ad diversitatem status personarum pertinent, vel ad res externas. Proinde tria sunt objecta Juris, sc. personæ, de quibus in primo hoc libro; res, de quibus in altero, tertio, & quarti primis titulis agitur; atque actiones, quæ a titulo quarti libri sexto ad ejus finem exponuntur. Hæc Cuij, ac Tribonianij methodus, a Cujacio præsertim laudatur, *Obs. XI. 38.*; & quæ alij reponunt, subtiles ineptiæ sunt. *Otto in pr. tit. sequentis.*

T I T. III.

DE JURE PERSONARUM.

§. 107. **P**ersona latinis est larva histrii, vel habitus fictus. Hinc P. Syrus, *heredis fletus sub persona risus est*. Jctis notat hominem in suo statu morali, *Pufendorf. II. 2. §. 1.* Jus personarum significat Jus varium pro vario hominum statu. Persona civium Romanorum propria est; eaque denotatur status libertatis, Civitatis, & familiæ. Quandoque tamen & servis tribuitur; sed improprie:

prie: nam in iis denotat conditionem, & statum naturalem hominis, qui in omnibus idem est; non adventitium. Quare melius in ff. conceptus est, titulus *de statu hominum*, qui huic titulo respondet. Profecto servi Jure Naturæ liberis sunt pares, *L. 64. ff. de cond. ind.*, *L. 32. ff. de R. J.*: adeo quidem, ut & heredes institui, & naturaliter cum obligare, tum obligari possint. Jure autem civili, & Prætorio ad classem rerum pertinent; ut dominio, commercioque humano subsint; & quadrupedibus exæquantur. *L. 2. §. 2. ff. ad L. Aquil. L. 32., & 209. de R. J. V. Orton. b. loc.* Hinc ad primum æque, atque ad alterum Juris objectum disputatio de servis, pro vario respectu, referri commode posse videtur.

§. 108. Tractatio isthæc duabus constat divisionibus. Altera est, ut alii homines sint liberi, alii servi: altera, ut alii sint sui, alii alieni juris: nimirum ex statu libertatis, & familiæ. Divisionem ratione civitatis omisit Tribonianus, fortasse quia inutilis videbatur post Constitutionem Caracallæ in *L. 17. ff. de statu hominum*, qua cunctis in orbe Romano viventibus jus Civitatis datum est.

De ea tamen agit Heineccius in *App. Lib. I. Antiqu. Rom.*

§. 109. Ratione libertatis omnes homines aut liberi sunt, aut servi, pr. h. t. Statuliberi qui dilatam in tempus, conditionemve habent libertatem, L. 9. ff. de statulib., & adscriptitii, seu glebæ addicti, servi etiam videntur fuisse: nam hi cum bonis erant in domini potestate, L. 21. C. 23. C. de agricolis, C. censitis; & cum prædio distrahi poterant, L. 2. C. eod. Coloni autem erant liberi, V. Cujac. in d. tit. C.

§. 110. Libertas est naturalis facultas ejus, quod cuique facere libet, nisi quid vi, aut Jure prohibeatur, §. 1. h. tit., & Florentinus L. 4. de statu hom. Ex Stoicorum doctrina definitio isthæc explicatur. Illis libertas non erat naturalis eligendi facultas mentis, & rationis, sed potius ipsius facultatis exercitium, quod externa vi cohiberi, atque impediri potest. Quemadmodum Theophilus naturalem facultatem vertit φυσικὴν εὐχέρειαν, expeditum exhibens libertatis exercitium: & Cic. in parad. 5. libertatem definit potestatem vivendi ut velis, quam Stoici una voce αὐτοπραγίας dicebant. Exinde conficiebant, stultos ho-

homines a cupiditatibus suis coactos liberos non esse; & solummodo liberos esse sapientes, qui affectibus imperant, *Senec. ep. 51., V. Lipsf. manud. ad Phil. Stoic. Lib. III. diff. 12. & Grot. in flor. spars.*

§. III. Qui vero Florentini interpretantur definitionem pro interna mentis libertate, illud *vi* idem significare ajunt, ac jus: uti Noodtius *in tit. ff. de stat. hom.*: ita ut libertas minime, externa *vi* illata, minuat. Et ne minuitur quidem, cum *Jure* quædam facere prohibeamur: nam lex licentiam cohibet, non libertatem. Apposite Tullius *pro Cluentio cap. 53., Legum idcirco omnes servi sumus, ut liberi esse possimus.* Verum hoc modo definita libertas Juris Gentium videtur esse, non Juris Quiritium. Hæc enim in quibusdam civium Romanorum juribus posita erat, *Heinecc. Append. ad lib. I. Antiqu. Rom. cap. 1. §. 25.* Hinc in *L. 5. §. 3. ff. de extraord. cognit.*, ubi dicitur, media capitis diminutione, & speciatim interdictione aqua, & igni, libertatem amitti, intellige Romanam, non vero Juris Gentium, *Noodt. Obs. II. 21.*

§. 112. Contra servitus est privatio libertatis.

bertatis, & definitur §. 2. *h. t. ex d. L. 4. §. 1.*, *constitutio Juris Gentium*, qua quis dominio alieno contra naturam subjicitur. Hoc loco *constitutio* indigitat rem Jure Gentium constitutam: non secus ac thesaurus in *L. nunquam 31. §. 1. de A. R. D.* dicitur *depositio pecuniæ*, pro pecunia deposita. Dein *τὸ Juris Gentium* monstrat, hic definiri servitutem ex captivitate. Et *contra naturam* significat contra statum naturæ primævum; non vero contra dictamen rectæ rationis: seu dicere mavis, contra Jus Naturæ permittens, non præcipiens.

§. 113. Profecto ab originario statu, in quo quilibet liber nascitur, salvo naturæ Jure, homines quandoque recesserunt, vel ex pacto (& de justitia pactitiæ servitutis vide Grotium *II. 5. §. 27.*: licet Romanis in commercio libertas non esset, *Hein. Antiqu. I. 3. §. 6.*); vel ex pœna: licebat enim captos, & deditos occidere: non item qui vitam salvam pacti essent, vel in fidenti recepti. *V. Vinnium hic; & Grot. III. 4.*: tametsi Augustinus *de Civ. Dei I. 2.* Gothos laudibus efferat, *illicitum sibi esse judicantes, quod belli jure licuisset.*

§. 114. Quare *servi ex eo appellati sunt*, quod Imperatores (nimirum belli duces uti vertit Theophilus των πολεμων ηγουμενας : *V. Grævium in præfat. Thesaur. Antiqu. Rom. Tom. I.*) nostri captivos vendere, ac per hoc servare, nec occidere solent : qui etiam mancipia dicti sunt; eo quod ab hostibus manu capiantur . Græcos quoque servare captos in bello consuevisse, monstrat Petrus Avellanus *Loc. rest. cap. 23.*: sæpius vero ad cujusdam Ducis cæsi tumulum immolare, *Menag. Amoenit. cap. 39.* Ea tamen *servi* etymologia, seu allusio, Stoica est, *Scip. Gent. Origines; Ducken. de lat. Jc.* Postea *servi* nomen primis Romæ temporibus pro captivis usurpatum, ad alia servorum genera tractum fuit, licet parum congrueret illa nominis allusio.

§. 115. Sane præter captivos, *servi ex ancillis nostris nascuntur*, §. 4. *b. r.*, & *L. 5. §. 1. eod.*: eosque acquirimus tanquam accessiones uteri. Ita placuit, ad natos dominium porrigi, quia alioquin si summo Jure captores uterentur, illi nascituri non essent; quod Grotius sub censuram vocat. *II. 5. num. 29.*

§. 116. Est etiam aliud servorum genus,

nus, eorum scilicet, qui majores 20. annis, servi personam fuscipientes, pretii participandi causa se se venundari patiuntur; modo patris, patronive jus non interverteretur. Hoc statutum immerito fugillavit Leo Imp. Nov. 59.: quisque enim in eo puniri, in quo delinquit, merito solet; etsi alias liber homo privatis pactioibus servus, aut libertus alicujus fieri non potuisset apud Romanos, *L. 37. ff. L. 10. C. de liberali causa. (§. 113.)* Id exemplo Scti Claudiani, & liberti ingrati adversus patronum, §. 1. *inf. de cap. dem.*, probat Everardus Otto in *b. loc.*. Addo & exemplum liberi ingrati, qui revocatur in potestatem parentis, *L. un. C. de ingratis liberis*. Sed alii veteres modi, quibus in pœnam servi fiebant, Justiniani tempore vel defueverant, vel ab ipso sublatis fuere.

§. 117. Tandem ob Christianam pietatem, quæ plurimos ad manumittendum suadebat, servitus exolevit circa Sæc. XII. in Italia, uti ex Decretalibus *sub tit. de serv. non ordin.*, ac *de conjug. serv.*; & ex Const. Frid. II. *mancipia fugitivæ* servatur tamen adversus nostræ Religionis hostes; etiamsi eam postea amplectantur :

tur: non enim obstat divina lex dominicæ potestati. *V. Huber. Prælect. ad b. t. in fin.* Proinde etiamnum aut per captivitatem servi fiunt, aut ex nostris ancillis nascuntur.

§. 118. Servi conditione non differunt inter se; ac pro nullis habentur ex Jure civili: domesticis tamen ministeriis differunt. Vide Turnebum, Popmam, Pignorium, Petrum Fabrum *in semestr.*, & Berneggerum *ad Taciti German. quæst.* 134. At liberorum non una conditio est; alii enim ingenui sunt, alii libertini, *L. 5. de statu hom.*

T I T. IV.

DE INGENUIS.

§. 119. **I**ngenuum latinis est nativum; Hoc sensu ingenuus est, qui libertatem cum sole quasi aspexit, *L. 14. C. de fideicommissariis libertat.: & princ. b. t. ex L. 5. §. 2. ff. de statu hom.*, dicitur, *qui statim ut natus est, liber est.* Ingenui quandoque *κατ' εἶδος* liberi dicuntur, *L. 4. ff. J. & J.*, ubi Ulp. invicem opponit *liberos, servos, & tertium*

tium genus, *libertos*, L. 2. C. Tb. de lib. causa.

§. 120. Sufficit autem ad ingenuitatem nasci ex matre libera. Quum autem habetur pro nato, qui in utero est, si de ejus commodum agitur, L. 7. eod., & favore libertatis id porrigi placuit (quod argumento est, veteres disputasse.) ad tempus vel conceptionis, vel gestationis in utero, vel partus. Vetus namque jus fuit favore libertatis, foetus, ubi de statu agitur, ventrem sequi. Si patrem sequeretur, ab uno conceptionis momento futurus ejus status penderet. Accedebat ratio, patrem incertum esse, certam matrem.

§. 121. Quare liber nascitur, cujus mater fuit libera: patris conditio minime attenditur, *princ. h. t.*, quia is incertus videtur extra matrimonium, quod in Jure est unum patris indicium. Tantum liberi ex legitimis procreati nuptiis sequuntur patrem, L. 10. de stat. hom. Si quis vero matrem ancillam habeat, is ex matrimonio non potest susceptus esse: nam non nisi cum cive Romana nuptiae contrahuntur, *pr. Inst. de nupt.*: si est igitur ejus pater civiliter incertus, neces-

cessario matris conditionem sequitur, quæ certo demonstrari potest.

§. 122. Sin liber natus *in servitute* fuerit, & postea manumissus, ejus natalibus (*τὴν εὐγενειᾶν*, *ingenuitati*, ait Teophilus) id non officit, §. 1. *h. t.*, & *tit. C. de Ingenuis manumissis*. Aliud est *servum esse*, quod Juris est; aliud *esse in servitute*, quod est facti. Qui enim est in falsa servitute, servus non est: tamen est in servitute. Ejusmodi est in bello civili captus, *Ulp. in L. si quis 21. §. 1. de capt. & postlim.*, obæratuſ creditoribus addictus, a latronibus captus, filius a patre venundatus, vel noxæ deditus.

§. 123. Porro sunt, qui natura non ingenui, jure tamen ingenuorum censentur; uti libertini, qui jus aureorum annulorum a Principe obtinuerunt, *L. 5. ff. de jure annulor. aureor.*; tum qui natalibus restituntur, *L. 2. ff. de natalib. restit.*; & qui sententia Judicis, licet non jure, ingenui pronunciati sunt, *L. 25. ff. de stat. hom.*; quique deferente Patrono, juraverunt se ingenuos esse, *L. 30. §. 4. ff. de jurejur.* Verum non magnum hic titulus usus habet, postquam novissimo Jure liberi

beri omnes pro ingenuis habentur. *Nov. 78. cap. 1.*

T I T. V.

DE LIBERTINIS.

§.124. **I**nde usque ad Appium Cæcum Censorem, libertini dicebantur libertorum filii; liberti vero servi manumissi. *Suet. in Claud. cap. 24. V. Sigon. de J. Civ. Rom. l. 6. & Rosin. Antiqu. l. 20.* Postea manumissi liberti dicti, si referrentur ad patronos, & ipsimet libertini, si ad ingenuos; quod se primum docuisse, jactat Valla *Elegant. IV. 1.* Libertini itaque, tertium genus hominum inter ingenuos, ac servos medium, sunt, qui ex justa servitute manumissi sunt, *pr. b. t.* vel generalius, qui desierunt esse servi; uti est in *d. loc. ex L. 4. ff. de J. & J.*

§.125. Servi ex luctuoso eorum statu per manumissionis beneficium eripiuntur. Manumissio est *de manu datio*. Sed hic reponendum ex libro Florentino *de manu missio*, idest datio libertatis, *d. L. 4.* Manus est potestas. Hinc Lucanus *Lib. l.*

In

*In manibus vestris, quantus sit Cæsar, habe-
tis. Sane quamdiu quis in servitute est ;
manui, & potestati suppositus est : ubi
illud & valet idest, uti in L. 1. de præ-
scr. verb. Verum postquam Jure Gentium,
subdit Tribonianus, servitus ingenuitatem
invasit (delendum tñ ingenuitatem ; ne-
que enim est in d. L. 4., neque in mul-
tis editionibus), sequutum est beneficium
manumissionis. Manumissionis igitur origo
est ex Jure Gentium, cujus est donare.*

§.126. Ad Servii Romanorum Regis
ætatem, uti & apud Athenienses, manu-
missione libertas dabatur, non Civitas :
Servius vero, qui libertinus fuerat, ma-
numissos Civitate quoque donavit : quod
ad Augustum usque stetit Romæ : perque
id tempus sollemnis manumittendi ratio
erat per *censum*, per *vindictam*, vel
per *testamentum* ; aliter nemo erat liber,
ait in Topicis Cicero *cap. 2.* Nam qui
naturalibus modis manumittebantur, ii
potius manebant servi ; nisi quod domi-
no servire eos cogenti obstabat Prætoris
æquitas. Id habemus ex cujusdam Jcti
fragmento, primum edito a Pithæo *sub
finem Collationis LL. Mosaicar.*, deinde a
Schultingio.

H

§.127.

§. 127. Manumissionis per censum auctor fortasse Servius idem, quem census certe habet auctorem. Censum profiteri proprium erat civis Romani. Si quis igitur servum suum scribere jubebat nomen in Censoriis Tabulis, hunc liberum faciebat, & Civem. Sed condi oportebat lustrum, quo veluti census perficiebatur. Porro vindicta erat virgula, sive festuca, forte a Vindicio ita dicta, Vitelliorum servo. Erat manumissio per vindictam actio legis: hinc praesentia Magistratus opus erat; cumque esset voluntariae Jurisdictionis, necesse non erat, eum pro tribunali sedere, vel diem esse fastum. Atque apud magistratum dominus servum tenens liberum declarabat. Magistratus pulsabat virga servi caput. Denique alapa percussus, actumque in gyrum, dominus e manu emittebat. Ex quo intelligitur illud Persii, *vertigine Quiritem fieri*, Sat. 5., & Senecæ ep. 8., *Philosophiam circumagere homines*, idest liberos facere. Testamento tandem servos manumitti, fuit Jus cum ipsa fere Urbe natum. Testamentaria isthæc manumissio nihil peculiare a natura testamenti habuit: ideo fieri poterat tam expresse, quam tacite;

veluti si dominus servum suum tutorem, vel heredem scripsisset. Si verò verbis directis fiebat, nullius liberti erant, & dicebantur *Orcini*, *Charoniani*, *Liberti familiae*. *Cujac. obs. III. 23.* Sin verbis fideicommissi, evadebant liberti heredis.

§. 128. Quoniam vero obsoleverat ævo Ulpiani manumissio per censum, hinc in Fragmentis inquit, *Censu manumittebantur olim*. Igitur duo alii sollemnes modi steterunt usque ad Constantinum M., qui primus legitimum fecit, editaque lege firmavit modum alterum, quo utebantur Christiani, manumittendi *in Ecclesia Catholica*, teste populo, domino testante scripto suam voluntatem, & signatore Episcopo, *L. 1., C. 2. C. de his, qui in Ecclesia*, Ecclesia hic significat cœtum fidelium. Sed procedente tempore, templum significavit: siquidem in §. 5. *b. r. dicitur in sacrosanctis Ecclesiis*. Hujusmodi manumissionis mentio est etiam apud *Cajum in Inst. lib. 1. tit. 1.*; sed forte ad hunc Caii locum Anianus sub Gothicis manum admovit, quia Constantinum M. *Cajus præcessit*.

§. 129. Primum sub Augusto lege *Ælia Sentia* an. U. 756. denegata Civitas fuit

H 2 . ser.

servis ob scelus quoddam publice cæsis ;
vinctis , tortis , & confessis : tum aliqua
nota punctis *igne , aut ferro ,* *Cajus*
d. loc. , scilicet ignito ferro, in fronte,
vel manibus. Hi servi *litterati* , & *stigma-*
matici audiebant. Sed Constantinus *in L.*
17. C. de penis , notari faciem prohi-
buit. *V. Spon. in miscell. erud. antiq.* .
Adhæc servis ad ludum gladiatorum
damnatis Civitas negata , ne talium li-
bertinorum colluvie foedaretur : iique non
erant meliores Populis dedititiis, qui nul-
lam Civitatis spem habebant. Hi sunt
Libertini dedititii , quibus veluti umbra
tantum libertatis erat ,

§. 130. Modi minus sollemnes erant, *in-*
ter amicos , & per *epistolam* , §. 1. *b. r.*
Quod vero olim necesse non erat, Justi-
nianus cavet, litteris dominum, & quin-
que testes subscribere oportere ; amicos
saltem quinque præsentis adesse , *L. un.*
§. 1. , & 2. *C. de latin. libertat. toll.*
Cajus alium addit modum , h.e. *per con-*
vivium. Sed & fuere alii plures.

§. 131. Hisce modis manumissi cujus
conditionis fuerint , modo tradidi ; eorum
autem jus auctum sub Tiberio : nam ple-
nam libertatem habuerunt ; & an. U.

771. Lex Junia Norbana dedit eis jura Latinarum Coloniarum, scilicet Latii, non Urbis, *Ez. Spanhem. Orb. Rom. exercit. l. 9., Sigon. de antiq. Jur. Ital. l. 1., & Briffon. Ant. Rom.* Latini enim coloniarii expertes erant jurium Romanorum Civium; tantumque jus commercii, & mancipationis cum Civibus habebant, *Ulp. Fragm. XIX. 4. & familiæ emtores, ac testes, & libripendes fieri poterant, Ulp. XX. 8. : itemque fideicommissum ex Civis Romani testamento capere, Ulp. XXV. 6.* Sed tamen nec testari iis licebat; nec ex testamento quidquam capere, nisi intra centum dies a creatione jura Quiritium consequerentur, *Ulp. XVII. 1.* Dicitur ideo, Latinos Junianos vixisse ut liberos, decessisse ut servos, *l. un. C. de lat. lib. toll. Heinecc. Antiq. Rom. b. loc.*

§. 132. Latini Juniani eo vel maxime a dedititiis libertis distinguebantur, quod hi nullam, illi aliquam haberent spem consequendi Romanam Civitatem: eam videlicet consequerentur, si uno ex tribus legitimis manumittendi modis, aut Principis beneficio eorum manumissio confirmaretur; si uxorem duxif-

sent, filiumque suscepissent; si Romæ inter Vigiles per triennium militassent, ex lege Visellia sub Claudio lata; vel si navis 10000. modiorum frumenti Romam advexissent, aut denique ibidem construxissent ædificium.

§. 133. Ex manumissione oriebatur Jus Patronatus. Obsequium, & hæreditas Patrono debita ipsi adhærebat manumissioni, nec opus erat conventionem. Operæ, scilicet officiales, dona, & munera, non debebantur, nisi promissa. *Cajus Inst. lib. 2. tit. 9. §. 4.* Dona ab una liberalitate pendebant: munera ex quibusdam officiis. *Oisæl. in d. loc. Caj.* Operæ officiales erant liberti officia sine ejus damno, ex. gr. in patroni negotiis procurandis, erudiendis liberis; fabriles erant artis cujusdam; *uti ex tit. ff. de operis libertor.*

§. 134. Sed licet Antoninus Caracalla ingenuis omnibus, qui in Orbe Romano essent, jura Civitatis indulgit, *L. 17. de statu hom.*; ejus tamen Constitutio ingenuos spectavit, non libertinos. *Spanhem in Orb. Rom. II. 5.* Justinianus vero, sublato quocumque discrimine inter libertinos Romanos, Latinos, & Dediticios, omnes civibus Romanis exæquavit,

vit, §. ult. b. t. L. un. de Latin. libert. toll., & L. un. C. de deditit. libert. toll. Novissime in Nov. 78. ingenuis eos pares fecit, salvo patronatus jure. Ita libertati multum, Reip. parum favit Imperator. Atqui omnes ferme illi manumittendi modi apud nos exoleverunt.

T I T. VI.

QUI, ET QUIBUS EX CAUSSIIS MANUMITTERE NON POSSUNT.

§. 135. **N**ON solum libertinis Augusti tempestate aditum ad Civitatem restrictus est, sed & servis ad libertatem; neque domini poterant, ut olim, pro arbitrio manumittere integras fervorum familias. Sua enim potestate abutebantur, & Civitas pessimis fœdebatur hominibus. Ad eam licentiam coercendam latæ leges Ælia Sentia, & Fusia Caninia. V. Henr. Noris. ad Cenotaph. Pisani. Diff. 3. c. 9.

§. 136. Lex Ælia Sentia lata est an. ab U. C. 756., S. Ælio Cato, & C. Sentio Saturnino CSS. Ejus multa statuunt capita interpretes. Sed Cujacius Obs. XV.

13. dignosci vix posse asserit, quid ei ex Sctis accesserit. Duo capita hic in medium profert Tribonianus. Primo statutum, *nihil agere*, qui in fraudem creditorum manumittit, *princ. & §. 3. l. 1.* Revera quicquid lege prohibente fit, ipso Jure nullum est, *L. non dubium §. C. de LL.* Nullum dicitur, quod lex ab initio invalidum facit; *rescinditur*, quod primo subsistens, per remedium actionis infirmatur. Quod si libertates non initio nullas esse, verum *rescindi*, *revocari* ajunt quidam Impp., & Jti, *L. §. 2. ff. qui & a quib. manumif. l. 45. §. 3. ff. de J. Fisci, l. 1. C. qui manumist. non poss. l. 1. de his, quæ in fraud. cred.*, id scriptum est vel parum proprie, vel quia ita manumissi, tanquam statuliberi censebantur, quousque de fraude non constaret, aut non urgerent creditores: adeo quidem, ut nullitas tantisper suspendi videatur, *L. 1. ff. de statib.*. Hoc caput refertur tam ad alienationem testamento factam, quam actibus inter vivos; itaut libertas data non consistat. *L. cum hereditas §. Qui, & ex quibus manumissi.* Alia bona in creditorum fraudem data revocare actione Pauliana ii pos-

possunt : at libertas in dicta specie non data intelligitur, quia semel data, revocari minime posset : neque ulla esset res alienata, h.e. servitus §. 6. *b. t. L. 9. ff. de minoribus.*

§. 137. Est autem *certum Jus*, concurrere etiam consilium oportere, *L. 1. C. qui manumitti non poss.*: Sape enim de facultatibus suis amplius, quam in his est, sperant homines, §. 3. *b. t.*, ex. gr. qui negotiationes exercent. Fraus sane non intelligitur sine animo fraudandi: solummodo in libertate fideicommissaria, effectus sine fraudis consilio libertatem impedit ab herede expectandam, *L. 4. §. 19. ff. de fideicommissariis libertatibus.* Ratio non est, quam aliqui reddunt, quia fideicommissum, deducto ære alieno, præstat: nam id etiam obtinet in legatis, & hæc directo relinquuntur, §. 3. *Inst. ad L. Falcid.*; sed est, quia facilius turbatur, & impeditur manumissio, ac libertas, quæ ab herede demum expectari debet.

§. 138. Uno casu manumitti servum lex patitur, si dominus, cui nemo alius est heres, servum suum sive liberum, & heredem, sive heredem scribat sine libertatis mentione; quod *nova* (h.e. egre-

gregia ; seu mavis dici *nova* , quia verus similis sententia Jētorum non obtinuit .
V. Vinnium) *humanitaris ratione* certi Juris fecit Justinianus §.1. & 2. : idque ob præsumptam voluntatem testatoris : quæ ratio olim in hac quæstione parum idonea videbatur ; fortasse quia libertas , utpote pretiosior hereditate , ab hac vires capere nefas æstimabatur , ex *L. quod per manus 10. ff. de J. Codicill.* Illud autem cautum fuit , ut parceretur famæ defuncti , ejus nomine bona auctione , sive hasta , distrahi , infamia erat ; non quidem ex edicto Prætoris de infamibus , sed infamia facti , *Cic. pro Quintio cap. 15.* Servus vero est necessarius heres . Sed ea lex in ea specie unum heredem institui concessit . Sin plures instituti , qui primus scriptus erat , liber & heres fiebat , *L. 60. ff. de her. instit.* Quid si de eo constare nequeat ? ab initio manumissio nulla esset , neque ex postfacto convalescere poterit .

§. 139. Altero legis *Æliæ Sentia* capite , quia adolescentes *εὐχερὲς ἀπατάσται* facile decipiuntur , ait hic Theophilus , ac temere libertates servis dabant , statutum fuit , quod *domino minori 20. annis non ali-*

aliter manumittere permittitur, quam si vindicta apud Consilium, justa causa manumissionis probata, fuerint manumissi, §. 4. b. r. ; neque expungendum τὸ vindicta. Consilium (quod laudatus Theophilus πατὴρ κρίνον dicit, quia certo anni tempore, maxime hyemis, quo convenientes magistratus a bellis feriati, operam juri dicundo dabant, Suet. l. 7.) Romæ erat quinque Senatorum, totidemque Equitum Romanorum, præsidente Consule, aut Præ-tore : in Provinciis 20. Recuperatorum Civium Rom., præsidente Præside. Vlp. Frag. l. 13. Recuperatores erant Judices in causis pecuniariis, quia per eos quisque debitum recipiebat, & recuperabat Theophil. hic. Hos Prætor mittere in consilium dicitur, L. 2. de off. ejus, cui mand., & L. 5. de man. vind. Peregrinos appellat Theophilus, quia hoc nomine etiam veniebant, qui dicebant Jus inter non Cives.

§. 140. Justæ causæ, scilicet ex justis affectionibus, L. illud 16. de manumiss. vind., multæ esse poterant §. 5. b. r. ac præcipuæ, si manumitteretur, vel qui dominum a periculo quodam liberasset, vel cognatus, collactaneus, præda-

dagogus, filius, alumnus, capfarius ; vel ancilla, ut duceretur uxor. Hinc in vetustis titulis reperitur *Patronus & conjux*. Quod non e lege Ælia Sentia esse, sed posteriori Scto adscribendum, monstrat inter alios Heineccius. Nam ea tempestate nondum licebat Civi libertinam ducere ; quod demum concessit lex Papia Poppæa anno U. 762., *Dio Cass. lib. 54.* Id tamen obtinebat, si juraret dominus, eam inter sex menses ducturum ; nisi iusta causa impediret ; ex. gr. si dominus Senator fieret, idque ex eadem lege Papia Poppæa, quæ alias promovit nuptias. Ex iusta causa quoque manumittebatur non minor annis XVIII., ut Procurator esset, nempe ad lites : nam negotia procurare poterant & servi, & minores 18. annis, *Cujac. Obs. XXII. 16. L. 13. ff. eod.* Cur vero Tribonianus in §. 5. *b. r.* inquit, non minor XVII. annis ? Cujacius de eo, qui annum attingit XVIII., accipit dictam *L. 13.* ; & dictum §. 5. pro eo, qui exegit XVII. Notandum est, favore libertatis placuisse, ut, causa semel probata, non revocaretur libertas ; licet falsam deinde fuisse causam appareret ; §. 6. *b. r.*

§. 141.

§. 141. Justinianus prius probavit enarratæ, legis caput; alteri derogavit: & concessit cuique domino post absolutum annum XVII., etiam sine caussa, manumittere inter vivos, §. *ult. h. t.* Nimirum plena pubertas annis 17. æstimabatur. Et Imp. media incessit via inter 20. annos, quibus expleris olim mittebatur inter viros manumittere, & 14., quibus permittitur in testamento. Hanc Justiniani Constitutionem non invenies extra hunc locum; nisi velis cum Charonda Græce scriptam petere ex lib. 45. Basilicon. Per testamentum autem cuivis, qui ea ætate esset, ut posset testari, h. e. puberi, liberam manumittendi potestatem fecit. *Nov. 119. cap. 2.* Ita, sicut sæpe dictum est, impense libertati favit Imperator.

T I T. VII.

DE LEGE FUSIA CANINIA TOLLENDÆ.

§. 142. **A**ugusti etiam ætate Romæ lata est ann. U. 751. lex alia libertati inimica; nimirum Furia, seu Fusia Caninia. Rogata est a Furio Camillo, & Caninio Gallo CSS. Facera est Accursii originationo Caniniæ a cane; sed temporibus suis digna. Num dici debeat in rubrica *tollenda*, an *sublata*, vide Ottoneum, & Muretum,

§. 143. Ea lex mori manumittendi servorum agmina, & legiones in testamento, ut magno cum pileatorum comitatu duceretur funus, fibulam imposuit; cavitque, testamento manumitti posse ex duobus servis ambos; ex tribus non plures quam duo; & usque ad decem non plures dimidia parte; usque ad XXX. non plures parte tertia; usque ad 100. non plures quarta parte; usque ad 500. non plures parte quinta; & ex quovis superiore numero non plures quam centum, etsi testator *nationes servorum* haberet, ut Tacit. 14. *Annal.* 44. V. Ulp. *tit.* 1.

¶ *Paul. IV. sent. 14.* Si quis justo plures manumississet, tantum priores nominati libertatem consequerentur, Si plures scripti, nemo nominatus, vel nomina in circulo scripta essent, nullus liberabatur. *Cajus Inst. lib. I. tit. 2. §. 1. V. Merill. obs. VII. 40.*

§. 144. Lex isthæc tantum testamentarias coercuit intra modum manumissiones; quia homines dum vivunt, vix liberales sunt. Quare inter vivos servi omnes manumitti possent, nisi vel alia lex obstarer, uti *Ælia Sentia*, vel legi *Fusæ* fraus fieret, *Cajus d. loc. §. 3.*

§. 145. Sed & hanc legem libertatis Patronus Justinianus omnino abrogavit; quia iniquum videbatur post abrogatum secundum *Æliæ Sentia* caput, morientibus prohiberi, quod vivis liceret, *L. ult. C. de L. Fusia*, Verum hæc Justiniani contra Augustum ratio, quod licet inter vivos, debet etiam in testamento licere, haud procedere, ubi dispar est ratio, debet, Ex. gr. pupillus tutore auctore inter vivos potest, non testamento alienare; & filiusfamilias de rebus quibusdam paganis potest *dominus*, non *dominus* habere, *vivus*, non *mortis causa* disponere,
Nov,

Nov. 117. c. 1. §. 1. Augusto hujus legis alia ratio constabat, sc. ne crebris manumissionibus Civitatis Romanæ honos vilesceret, ac ut *populum a servili colluvione incorruptum servaret*, Sueton. in Aug. cap. 40. : quod Græco Justiniano nihil curæ fuit,

T I T. VIII.

DE HIS, QUI SUI, VEL ALIENI JURIS SUNT,

§. 146. **P**ergimus nunc ad familiæ statum, qui reliquos hujus libri titulos occupat, ex altera hominum divisione, qui sunt sui juris, seu potestatis, & alieni, *princ. b. 1., & L. 1. ff. b. 1.* Negative definitur qui sint sui juris, h. e., qui non sunt alieni. Qui vero alieni juris subjecti sunt, patriæ potestati, vel dominicæ subsunt. Heic stricte, & proprie vox *potestatis* sumitur respectu subjectionis familiæ; adeo quidem, ut nec magistratibus, nec tutoribus conveniat; & ne maritis quidem; etsi Jus civile viro imperium domus ex sexus prærogativa, & Jure Gentium relinquat, *L. 195. §. 2.*

§. 2. *L. 196. pr. de V. S.*: at uxor socia, & domina dicitur, *L. 1. ff. rer. amor.* Aliud olim erat, cum nuptiæ per in manum conventionem fiebant. Qui igitur nec dominicæ, nec patriæ subsunt potestati, dicuntur *Jētis sui juris*, & *paterfamilias*: Plauto, & Persio *sui homines*.

§. 147. Jam servos Jure Gentium in potestate dominorum esse, probat *ex Cajo d.L. 1. §. 1. Tribonianus §. 1. b. r.*; tum quia apud omnes peræque gentes domini in servos suos jus vitæ, necisque habuerunt; tum quia omnia servi dominis suis adquirunt; suntque in commercio. Verum secunda hæc ratio Juri Gentium est conformis: nam qui sui juris non est, nil proprii habere potest, atque omnia ei acquirit, a quo alitur; de quo dominorum jure in servos circa res, infra *in tit. per quas personæ cuique adquir.*. At quoad jus circa eorum corpora, de quo hic agitur, prima illa ratio generalis non est: nam jus vitæ, necisque vel sine justa causa habebant pleræque gentes, non omnes. Quibusdam sane hoc rigidum jus, seu potius impunitas, displicuit. *V. Bodin. de Rep. I. 5., Grot. III. 14., & Senec. de Clem. I. 18.*

§. 148. Itaque dominica potestas a Jure Gentium habet originem (112.). Romæ servi erant res Mancipi , & in Quiritario dominio , *Ulp. Fragm. tit. 1. §. 16.* ; ac durissime , ut in officio continerentur , præsertim post Carthaginem devictam , habiti fuere : tametsi non defuerint ex Romanis domini , qui nihil humani a se alienum putarunt.

§. 149. Sed sub Imperio aliis , atque aliis latis legibus dominorum sævitiam coercitam legimus ; iisque variis poenis interdictum , ne servos ægrotos exponerent , necarent ; ne eos bestiis objicerent , evirarent , aut non dicta causa lenonibus , lanistisve venderent . Certe Antoninus Pius reos legis Corneliæ de sicariis illos pronuntiavit , qui sine *justa causa* suos servos occidissent , *L. 1. §. 2. ff. ad L. Corn. de scar.* Ita potestas vitæ , & necis in servos sublata est . Præcipue autem *causa* legibus cognita erat , quando dominus servum suum cum uxore rem habentem deprehenderit : quod scripsit Paulus *lib. sing. de adult.* : ex quo fragmentum superest *in collat. LL. Mosaic. tit. 4. §. 3.* At in *L. 2. ff. de bis , qui sui , vel alieni jur. sunt* , ubi Antonini ex-
tat

tat Constitutio, verba *vel ad impudici-
tiam, turpemque violationem*, Grotio in
Flor. spars. videntur a Triboniano adsu-
ta; quia sub Paganis Principibus istoc
flagitium respectu servorum *necessitas* au-
diret: & in servos nihil non domino
licebat: vetus dictum, cujus meminit
Seneca in controversia de Parrhasio. Id
quandoque verum fuit: quinimo ipsa le-
ge Scantinia nihil de servis cautum fue-
rat. *Jo. Frid. Christius in Hist. L. Scan-
tin.* Et tamen ea verba retinenda sunt,
uti genuina: nam Ulpiani testimonio in
L. 1. §. 3. ff. de off. Præf. Urb. con-
stat, tunc temporis huic sceleri obviam
ivisse leges. Idipsum affirmavit Seneca *de
benef. III. 22. V. Herm. Noordkerk. in
Disquis. de L. Petron. c. 3. §. 19.*

§. 150. Insuper Antoninus cavit, ut
servi ad Principum statuas confugientes
(Tribon. addit *ædem sacram*: quod non
ex Antonino est, verum ex Honorio, &
Theodosio, *L. 2. C. de bis, qui ad Ecclesiam*)
venderentur vel ab invitis dominis, &
bonis quidem conditionibus. Bonæ con-
ditiones opponuntur duris; quales irati do-
mini crebro venditionibus servorum im-
ponebant; ex. gr. ut exportentur, vel ne

manumittantur, *L. 25. de statulib. Theoph. hic*. Necessitas vendendi servos in hac specie, extra ordinem, ob publicam utilitatem dominis imponitur. Alias regulariter nemo cogi potest ad vendendam rem suam, *L. 11. C. de contrab. emt.*; & imperium nihil officit privatorum dominio, Seneca *de Benef. VII. 4.* Constantinus M. quoque homicidii poenæ subjecit, qui servos suos occiderent, *L. un. C. de emend. serv.*

T I T. IX.

DE PATRIA POTESTATE.

§. 151. **I**N potestate nostra sunt liberi nostri, quos ex justis nuptiis procreavimus, *pr. h. r. ex L. 4. ff. de his, qui sui Sc.*: quin etiam liberi liberorum in potestate nostra existentium: nam qui non est suæ potestatis, alium in potestate suâ habere nequit, *L. 11. ad L. Jul. de adult.* Extra nuptias quæsitæ in potestate patris non sunt, matremque sequuntur ex naturæ lege, *L. 24. de statu hom.* (§. 121.) Et quoniam femina familiæ finis est, *L. 195. ff. de V. S.*, nati ex filiabus nostris, non sunt

sunt in nostra, sed in eorum patris potestate: tamen ex nuptiis filiarum familias jus patriæ potestatis haud dissolvatur.

§. 152. Patria potestas ex Jure naturæ, ut recte liberi educarentur, apud omnes gentes recepta, non sine additionibus, & detractionibus, dicitur propria Romanorum, *L. 3. ff. cod.*; quia nullæ gentes talem habuerunt, ac tot peculiaribus usque a Romulo vallatam juribus, in liberos potestatem, qualem Romani, §. 2. *b. t.*, *L. item 3. ff. cod.* Revera dominium Quiritarium ea erat, quod patri competebat in res, sive filios suos. Hinc filii ratione aliorum hominum erant personæ, ratione Civitatis, cives; at ratione patris personam non habere, sed æque ac servi, res esse censebantur.

§. 153. Tantam Romani habuere potestatem ex Romuli scripta lege, *Bod. de Rep. I. 3.* Nec mirum, si Ulpianus in *L. patre 1. cod.* ait, *jus potestatis moribus receptum*; consuetudo enim proprie dicitur *moribus introduci*, *lex recipi*. *Jac. Gothofred. ad tab. 4.* Halicarnasseus *lib. 2. pag. 86.* ait, eam legem Regiam, incertum, scriptamne, an sine scripto proditam. Affirmavit vero sine scripto pro-

ditam Ulpianus; nec, quod scriptum defuit, magis consuetudo fuit, quam lex. A Romuli ætate patri potestas concessa fuit, non matri, §. 10. *infr. de adopt.*; in liberos qua naturales, qua adoptivos. *Gellius V. 19.*; cujuscumque ætatis, dignitatisve essent: At ea sexus prærogativa ordinem civilem spectat: *æqualitas enim pugnam facit*, *Ἡ γὰρ ἰσότης μάχης ποιεῖ*. *Chrysost. 1. ad Corinth. XI. 3. V. Huber. Digress. II. 3., & Matth. disput. 7. fundam. Jur.*

§. 154. Jura patriæ potestatis vel res liberorum respiciunt, vel personas. Quoad primum attinet, quicquid filius (ex peculio profectitio) acquirit, id patri querit, §. 1. *Inst. per quas person. acquirit.*: pater habet usumfructum in bonis adventitiis filii, *L. 1. C. de bon. mat.*: filius de bonis suis testamento disponere nequit, *pr. Inst. qui test. fac.*: pater imtuberi dat heredem, §. 4. *Inst. de pup. subst.* Quoad alterum, facit regula, pater, & filius una persona videntur, *L. ntr. C. de impub. & aliis subst.*, sed in privatis negotiis (in publicis enim filiusfam. pro patrefam. habebatur, *L. 9. ff. de bis, qui sui*: ac si Remp. tractaret, pa-

patria potestas interquiescere, & connivere videbatur, *Gellius II. 2.*): hinc suus heres filiusfam. est patri, §. 2. *Inst. de her. qual.*; nulla inter eos obligatio, §. 6. *de inutil. stipul.*, nulla lis esse potest, *L. 4. de judic.*; pater filiofam. tutorem dat testamento §. 3. *Inst. de tut.*; nuptias filiusfam. sine patris consensu contrahere nequit, *pr. Inst. de nupt.* Præcipue olim pater in liberos exercebat jus ter eos vendendi (in quo melior erat fervorum conditio); & vitæ necisque: de quo duplici jure pauca hoc loco.

§. 155. Trina venditio etiam in XII. Tabulis relata fuit: *si pater filium ter venunduit, filius a patre liber esto.* *Ulp. Fragm. tit. 10. §. 1.* Nec fuit imaginaria, uti putat Alexander in *Caji Instit. Lib. I. tit. 6. §. 3.*: aliter nulla reddi ratio posset illius Numæ legis, qua pater vetabatur illum filium vendere, cui uxorem ducere permisisset. Quod si Constantinus in *L. ult. h. t.* inquit, *libertati a majoribus tantum impensum est, ut patribus, quibus jus vitæ in liberos, necisque potestas olim erat permessa, libertatem eripere non liceret*, in hoc loco vel libertas pro ingenuitate accipienda, uti in *L. 4.*

ff. de J. & J. (§. 119.), vel majores non intelligendi sunt Romani Regionum temporum, sed qui XII. Tabulas sequuti sunt: post eas enim illa Romuli lex desuevit. Ræcardo ad LL. XII. tab. c. 3., qui autumat, veras filiorumfam. venditiones ante exactos Reges exolevisse, earumque imaginarium ritum retinuisse Decemviros, refragatur Halicarnass. Antiqu. Lib. II. pag. 97. & 98., scribens, Decemviros de veris venditionibus egisse: ut omittam, emancipationem, h. e. venditionem imaginariam, fuisse actum legitimum: ergo non ante, sed a Prudentibus institutum post XII. Tabulas.

§. 156. Tum quoniam erat pater domesticus Magistratus, & Cenfor filii, jus vitæ, necisque habuit, uti vel ex ipsa patet adrogationis formula. Eoque jure parentes usos, adhibitis ut plurimum in consilium necessariis, jam exemplis constat.

§. 157. Sed tanta patris majestas, quia principatus rationi vix conveniebat, sensim diminuta fuit. Propterea Marcianus scribit in L. 5. ad L. Pompejam de parricid., patriam potestatem in pietate consistere, non in atrocitate. Quare jus vendendi filios desiit, sed quando, incertum est,

est, *Bynk. de J. occid. liber. c. 6.* In *L. 1. C. de liberali causa*, cujus auctor fortasse Antoninus Caracalla, filios vendere *illicita*, & *inhonesta* res appellatur. Et Constantinus in *L. 1. C. 2. C. Tb. de alimentis*, quæ *inopib. parentib. de publico*, ne amplius egeni parentes venditione liberorum victum sibi compararent, statuit, ut ipsis alimenta e publico præberentur. Jure civili novo non licet filios vendere, nisi, urgente extrema necessitate, *sanguinolentos*, idest a matre adhuc rubentes, *L. 2. C. de patrib. qui fil. distraxer.* neque eos noxæ dare, §. 7. *Inst. de nox. act.*, neque pro arbitrio exheredare, *ut infra*.

§. 158. Jus per filios acquirendi ex peculiorum divisione restrictum est: qua de re commodius *Lib. 2.* Tandem quo tempore defierit jus vitæ, & necis, nec satis liquet. *V. Bynk. c. 2.* Dubio procul ex dictis Constantini verbis arguitur, hoc jus jure vendendi diuturnius fuisse. Ademptum tandem fuit, *L. 2. ff. ad L. Corn. de scar.*, relicta tantum potestate, filios privatim, ac moderate castigandi, vel, si graviolem animadversionem eorum facinus postularet, offerendi Magistratui, qui sen-

sententiam a patre dictam, modo æquam, proferret, *L. 3. C. de patria potest. L. ult. C. de emendat. propriinquor.* Sensim itaque asperi Romanorum mores ex Græcorum institutis mitigari cœperunt.

§. 159. Patres quoque pro arbitrio olim filios exponebant; sed expositio non videtur inter jura patriæ potestatis fuisse. Nam ex alia Romuli lege, quæ etiam transit in XII. Tab., non licebat exponere masculos, neque ex feminis primogenitas, nisi ex quinque vicinorum sententia monstri, debiles, aut insignes ad deformitatem essent judicati, *Halicarnas. Lib. 2. pag. 88.* Exoleta postmodum Romulea lege, eo res evasit, ut frequentissime infantes sub Impp. exponerentur, *Suet. in Octav. c. 65. Tacit. Hist. V. 5.* De partus expositione, & nece, commentarium habemus eruditissimum Noodtii, qui truncem hunc morem tantum fuisse prohibitum contendit tempore Impp. Valentiniani, Valentis, & Gratiani per *L. 2. C. de infant. exposit.* Impugnat hanc opinionem Bynkershoëkius in libello *de jure occid. liberos*; ubi hoc citius legibus veritum fuisse probat. Multo post sententiam suam defendit Noodtius singulari epistola. Tandem

dem sequutæ sunt Bynkershoëkii *cura secunda*, sive notæ ad amicam Noodtii responsionem.

T I T. X.

D E N U P T I I S.

§. 160. **P**Atria potestas justis nuptiis, legitimatione, & adoptione acquiritur. Ita filii familias, non secus ac servi, aut nascuntur, aut fiunt. Nascuntur ex justis nuptiis, justo tempore editi *ex L. 12. ff. de statu hom., & L. 6. ff. de his, qui sui, vel al.* Qui vero ex concubina, vel alio coitu nascuntur, patrem Jure civili non habere censentur, & ob Jus naturæ sequuntur matrem (§. 121.).

§. 161. *Nuptiæ, sive matrimonium, est viri, & mulieris conjunctio, individuum vitæ consuetudinem continens, uti in §. 1. superioris tit. : sive individuum accipias pro perpetuo, & indissolubili, quod nostra præcipit Religio, & opponitur divortio; sive pro quotidiano, atque artissimo, & opponitur separatæ conjugum œconomiae, quod legibus Romanis convenire videtur, ob divortia, quæ invaluerunt*

runt ab ann.U. 532., cum Carvilius sterilitatis causa uxorem dimisit. Nam ea definitio ex contrahentium voto substatinetur. In eundem modum Paullus in *L. 1. de J. D.* inquit, dotis causa perpetua est; cum voto ejus, qui dat, ita contrahitur, ut semper apud maritum sit.

§. 162. Sane in definitione vox *conjunctio* per *consortium omnis vitæ* explicatur, *uti in L. 1. de R. N.* Verbalia enim in *io* desinentia, sæpenumero continuitatem denotant. *Huber. in prælect. ad b. t.* Quapropter contrahentes consentire debent sine errore circa matrimonii naturam; sine vi, metuve gravi. Tantum cum filiafamilias olim durius actum est; si enim cui esset a patre desponsa, poterat dissentire, tantum si indignum moribus, vel turpem sponsum, elegisset pater, *L. 12. ff. de sponsal.* Quia vero regula Juris est, quod *nuptias non concubitus, sed consensus facit*, *L. 30. ff. de R. J.*, ideo cum dicitur *conjunctio*, effectus pro causa sumitur. Proinde deductio sollemnis in viri domum non erat necessaria, nisi de implenda alterius voluntate ageretur: extranei enim de nuptiis futuris loquentes, eas tunc exituras præsumunt, cum

cum publice de iis constat. Ita accipiendæ
L. 15. de C. & D., L. 24. C. de Nupt.
L. 6. C. de don. ante nupt. Huber. Digress. V. 11.

§. 163. At conjunctio ex legibus populorum variam formam accepit. Et apud Romanos forma, qua consensus edebatur, varia fuit. Sollemnes nuptiæ tribus modis fiebant, farre, coemptione, & usu; nisi velis, confarreationem fuisse potius sacrificium coemptioni accedere solitum. Verum illi ritus, de quibus Heineccius in *Antiqu.*, & interpretes in *tit. ff. de R. N.*, sub Impp. sensim defierunt. Et antea etiam, qui merum *matrimonium* contrahere volebant, solo consensu conjunctionem inibant, vel palam, vel tacite edito; addita quandoque sollemni in domum deductione, *L. 5. eod.* Ex variis hisce modis variis effectus prodire olim. Nam sollemnibus illis tribus mulier in viri manum, h. e. potestatem, transibat, veluti filiafamilias, ac heres; bona omnia marito acquirebat, eratque communio Divini, & humani Juris: audiebat vero *materfamilias*. Sine sollemni ritu appellabatur *matrona*, & *uxor*; ac bona sua retinebat, dote excepta. In utraque

que specie filii nascebantur in patris potestate. Desuetis his ritibus, varii non sunt Jure novo nuptiarum effectus. At ex Jure Canonico, quod apud nos Catholicos in nuptiis contrahendis servatur, *επερολογία* connubio, ut suos effectus habeat, accedere debet, c. 2. & 3. de clandest. despons.

§. 164. Præterea est in definitione *vi-ri*, & *mulieris*; ut videamus, eos, qui consentiunt, esse debere *unum*, & *unam*. Polygamiam sane simultaneam lex vetat, §. 6., & 7. h. t. V. Grotium II. 5. §. 9. Polyandriam omni Jure vetitam, & meretricium sapere, nemo unus inficias i-
verit. *Vir* autem, & *mulier*, quia in commercio non sunt, mero civili Juri contraria videri posset opinio Donelli *Comm. XIII.* 18., ac Vinnii *Partit. II. 21.*, qui contendunt, matrimonium contractum esse, & quidem societatis, *uti in L. 1. C. de repud.* Contractus veri ad dandum, vel faciendum tendunt, & de eo instituti sunt, quod locupletiores nos facit, deque eo, quod interest; ac actiones produ-
cunt. Sed nemo est locupletior, quia uxorem habet: neque animorum, corporumque conjunctio civilem ejus, quod in-
te-

terest, rationem continet. *Ita Huber. in præl. b. 1.*

§. 165. *Nuptiæ autem debent esse justæ, pr. b. 1., h. e. secundum legum præcepta initæ; quæ hoc loco ad quatuor capita referri possunt: 1. ad jus Civitatis: 2. ætatem habilem: 3. consensum tam contrahentium, quam parentum. 4. ad honestam sanguinis, & affinitatis distantiam.*

§. 166. Et primo loco Romani jus *connubii*, proprium fecerunt civium Rom., non vero Latinorum, & peregrinorum cum Civibus, *Sigon. de J. civ. R. c. 9.* Quare deportata definit esse nupta, *L. 56. ff. sol. matr.*; idque quoad civiles effectus, *L. 13. §. 1. de don. inter. vir. & ux, L. 17. §. 5. ad Sc. Trebell.*; licet vitæ consuetudo, quæ Juris Gentium est, manere possit, *d. L. 13. §. 1. L. 1. C. de repud.* Ac *matrimonium* ut plurimum audiebat, quod cum personis liberis non Civibus contrahebatur. Verum ab Antonino vulgato Civitatis honore, omnes provinciales *nuptiarum, connubii*que jure aucti fuere; & tantum cum servis, ac Gentilibus hoc jus non erat. Servorum *contubernium* dicebatur. Gentiles vocabantur, qui non erant ex Imperii provin-

vinciis; licet Romanis militarent. Ast Ecclesiastico Jure, moribusque, hodie servorum matrimonia consistunt. *c. 1. de conjug. serv.*

§. 167. Quin tanquam indecoræ, vel noxiæ nuptiæ ex XII. Tab. Patres inter, & plebejos vetabantur, ne turbarentur auspicia: quod tamen ex quodam Plebiscito sublatum fuit, *Livius IV. 6.* Et Justin. nuptias Senatorum cum libertinis, ac scenicis mulieribus, exemplo, & lege scripta, ratas esse cavit, *L. 23. C. 28. C. de nupt.* Tum vetabantur inter ingenuos, & propudiosas mulieres, *Ulp. Fragm. tit. 13. §. 2. L. 43. de R. N. tit. 13.*: tutorem, curatoremve, ac pupillam, adultamve, ante redditas rationes, *L. 59. C. sequ. cod.*: præsidem, ac mulierem provincialem, *L. 38. C. 63. cod.*: Christianos, & Judæos, *L. 6. C. de Judæis*: raptorem, & raptam, *L. un. C. de raptu virg.*: adulterum, & adulteram, *L. 40. ff. ad L. Jul. de adult.*

§. 168. Secundo nec nuptiæ sunt, nisi mares sint puberes, sc. majores annis 14.; femina viri potentes, sc. majores annis 12.: celerius namque eæ maturescunt: Sed Græcis sapientibus minus placuere ju-

juvenum matrimonia . *Xenoph. de Rep. Lacedæm. cap. 1. §. 6, Plato de LL. Lib. 4. & 6. Arist. Polit. VII. 16.* Apud Romanos vero ante eam quoque ætatem si quædam ducebatur , *quasi uxor* , vel *nuptæ loco* audiebat : fiebat autem *legitima uxor* , annum 12. apud virum egressa , *L. 14. de R. N.*

§. 169. Tertio consistere nequeunt nuptiæ , nisi *consentiant omnes* , id est , qui coeunt , quorumque in potestate sunt , *L. 2. ff. cod.* Debere patremfamilias in liberorum suorum nuptias consentire , & *civilis* , & *naturalis ratio suadet* , *princ. b. t.* , ubi *suadere pro imperare est* , *uti in L. 17. §. 1. cod. , & L. 1. §. 6. ne quid in fl. publ.* Naturalis ratio est honor parentibus debitus . Sed potius ex ipsa naturæ ratione nuptias sine consensu parentum contractas *illicitas* esse , non vero *nullas* , jam eruditi dixerunt . Nullæ sunt ex mero Jure civili , quod emancipatum filium , dissentiente patre , uxorem ducere patitur , *L. 25. ff. de R. N. , §. 12. b. t.* : quicquid Cujacius dicat *Obs. III. 5. (inf. §. 180.)* . Civilis ratio est ipsa patria potestas . Pro nuptiis masculorum alia occurrit ratio , sc. ne patrifam. invito suus heres agnascatur , §. 7. *infra*

de adoption. Idcirco in nuptiis nepotis debet etiam filius consentire ; in nuptiis neptis sufficit avum consentire , C. 16. *eod.* Lege autem Julia statutum fuit , ut qui filiis familias injuria prohibuerint nuptias , imperio Magistratus cogerentur , Quin prohibere videri eum , qui conditionem non quærit , Marcianus scribit in L. 19. *eod.* Verum ex Tridentina Synodo *Seff. 24. c. 1. de reform. matrim.* , sine patris consensu nuptiæ validæ sunt , licet illicitæ .

§. 170. Tribonianus insuper ait , jussu parentis *præcedere* debere . Hinc excluditur ratihabitio , quæ recurreret ad tempus nuptiarum : nec ante justæ intelliguntur nuptiæ , quam pater eas ratas habuit . Id de accusatione adulterii ait Ulp. L. 13. §. 6. *ad C. Jul. de adult.* Quod vero in L. 12. C. *de Nupt.* dicitur , consensum patris *accedere* , intelligendum non contractis nuptiis , sed contrahendis . E contrario ratihabitionis vim retrogradam , quæ ad principium actus recurrat (ut expiret monstrum illud *spuriorum ex justis nuptiis* , quod fingit Veseimbecius in L. 5. C. *eod.*) , tuentur in hac specie Huberus , & Heineccius adversus Vin-

Vinnium . Verum nisi pater evidenter dissentiat, intelligitur consentire, veluti si cognitis nuptiis minime contradicat, *L. 7. de sponsal.* Sin demens sit, vel furiosus, solummodo de nuptiis filii olim dubitatum, ex eo, quod nepotes heredes avo futuri essent: Sed Justinianus permisit, filiam æque ac filium justas contrahere nuptias, consentientibus curatore, & propinquis, auctore Episcopo, vel Magistratu, *L. 28. C. de Episcopali audientia*, *L. 25. C. de Nupt. Captivorum*, vel absentium liberi recte contrahunt, vel elapso triennio, vel ante, si certum sit, patrem conditionem non repudiaturum, *L. 9., C. 11. ff. de R. N. Matris consensus ex honestate, non necessitate, requiritur, uti nec curatorum, L. 20. eod.*

§. 171. Quarto denique quia Romani in nuptiis non solum quid liceret Jure civili considerabant, verum etiam quid honestum esset, *L. 42. ff. de R. N.*, ad justas nuptias opus est, ut iis neque cognatio, neque affinitas impedimento sit: nam natura, vel lex civilis incestas prohibet nuptias. Cognati sunt, qui a communi stipite descendunt, sive ob justas nuptias, aliamve licitam conjunctionem, uti

Jure Romano erat concubinatus, five ex illegitimo complexu, five ex nexu civili, nempe adoptione, §. 1., & 2. *b. r.*: tametsi adgnatos proprie (cognatos nonnisi lato sensu) faciat adoptio. Hinc triplex cognatio est: naturalis ex injusto concubitu: civilis ex adoptione: mixta ex justis nuptiis. Naturalis cognatio oritur etiam ex servorum contubernio. Ea quoque nuptiis est impedimento, §. 10. *b. r.*, L. 14. §. 2. *ff. de R. N.*: Quin obstat etiam ipsis servorum contuberniis. Perperam id negat Boëhmerus *Jur. Eccles. IV. 9.*, quia *leges ad serviles cognationes non pertinent*, L. 10. §. 5. *ff. de grad.* Nam hæc lex ita accipienda, ut effectus civiles cognationum leges denegent. Sane in *matrimonii contrahendis naturale Jus*, & pudor spectatur, d. L. 14.

§. 172. Cognationis linea vel est recta inter genitores, & genitos; vel transversa inter conjunctos ex latere. Tum hæc vel æqualis, vel inæqualis, prout cognati æque distant a communi stipite, vel inæqualiter. Gradus est distantia cognatorum; isque a communi stipite æstimatur. Computantur gradus Jure civili una hac regula in quacumque linea: tot sunt

sunt gradus ; quot generationes , §. 7. *Inst. de gradib. cognat.* Ex Canonico autem Jure hæc regula in recta linea adhibetur : at in transversa æquali hæc alia ; *eo gradu distant collaterales inter se , quo distant a communi stipite ; in inæquali , quo distat remotior a communi stipite , eo distant inter se.*

§. 173. In recta cujuscumque cognationis linea non consistunt nuptiæ in infinitum , §. 1. , & 10. *b. t.* , ne cognatio confunderetur , & ne vis fiat naturali pudori , qui tanti est , ut dissoluta per emancipationem civili cognatione , nec etiam nuptiæ in recta linea iniri possint . Nec matrem patris adoptivi uxorem ducere possum , non quidem propter civilem necessitudinem , quæ nulla est inter nos , sed propter reverentiam . Eam ducere possum , soluta per emancipationem adoptione , quia nunquam mihi fuit aviæ loco , sed extranea semper . Verum ne post emancipationem quidem licet ducere uxorem patris adoptivi , *L. 14. b. t.*

§. 174. In linea transversa æquali fratres , sororesque vetantur coire , sive germani sint , sive consanguinei , sive uterini , §. 2. *b. t.* : quod jus *moribus* , h. e. Ju-

re Gentium, non *legibus*, h. e. Jure civili, introductum, Pomponius scribit in *L. 8. de R. N.* Ultra fratres, sororesve nulla cognatio nuptiis obstat, §. 4. *b. r.* modo æque distant cognati a communi stipite. Equidem nuptiæ inter patruales, & consobrinos *diu Romæ fuerunt ignoratæ, sed tempore addito percrebuerunt*, Tacitus *Annal. XII. 6.* Primus Theodosius major consobrinorum nuptias improbavit. Probarunt postea ejus filii Arcadius, & Honorius in *L. 19. C. b. r.*, & Justinianus *d. §. 4.* Quod si Theophili paraphrasis, & nonnulla Institutionum exemplaria, habent *conjungi non possunt*, error est. Græci sane Principes Justiniano juniores vetus Jus de harum nuptiarum prohibitione recentarunt. Quod vero Gothi cum Græcis ut plurimum sentiebant, Anianus fortasse corripit Caji locum *Instit. Lib. I. tit. 4. V. Ottonem de Nuptiis consobrinorum*. Sed Jus Canonicum prohibitionem ad quartum gradum suæ computationis extendit, *cap. ult. X de consanguin.*; idque in æquali linea: nam in inæquali etiam ulterius. Ex eoque Jure in graduum computatione remotior distantia est numeranda, *d. cap. fin.*

§. 175. In linea transversa inæquali, cum alii parentum, alii liberorum loco sunt, æque ac in recta, omnis cognatio in infinitum nuptiis obstat, §. 3., & §. b. r. Parentis loco esse dicitur, qui immediate communi stipiti subest, remotiore altero; uti patruus, & propatruus erga fratris neptim, atque proneptim. Quod autem Ulpianus habet *Fragm. tit. 5. §. 6.*, nunc etiam ex tertio gradu licet uxorem ducere, sed tantum fratris filiam, non etiam sororis, pertinet ad Sctum, quod Claudius extorsit, amore captus Agrippinæ Germanici fratris filiæ. Idque Jcti de sola fratris filia accepere. Constantinus hujus Scti primum vim fregit in *L. 1. C. Th. de incestis nuptiis*, tum Zeno in *L. ult. C. Just. eod.* Atque ex his legibus corruptum judicamus Caji locum *Instit. Lib. 1. tit. 4. §. 3.*, & *L. 17. C. b. r.*

§. 176. Quoad civili nexu conjunctos in linea transversa, filius naturalis sororem adoptivam ducere nequit, §. 2. b. r. Nec licet ducere sive amitam, sive amitam magnam adoptivam, §. 5. b. r. Sed avunculus, & matertera non fit per adoptionem, per quam cum iis tan-

tum personis necessitudo contrahitur, quæ si sanguine nos contingerent, agnatæ nobis essent. Quare filiam ejus mulieris, quam pater tuus adoptavit, te ducere non impedit nec cognatio naturalis, quia cognata non est, nec civilis, quia avunculus non fit per adoptionem, §. 3. *b. t.* Quod vero in transversa linea pudor tantus non est, quantus in recta, nuptiæ inter fratrem naturalem, & sororem adoptivam, adoptione dissoluta, consistunt; nimirum emancipato vel filio naturali, vel filia adoptiva, *Vinnius in* §. 2. *b. t.* Hinc si quis generum adoptare velit, debet antea filiam emancipare; & si velit adoptare nurum, debet antea emancipare filium, *L. 17. b. t.*: alioqui dirimeretur matrimonium; quod inter fratrem, & sororem, licet adoptivos, non consistit.

§. 177. Affinitas, cognationis simulacrum, est necessitudo inter conjugem unum, & alterius familiam: ita dicta, quia per nuptias duæ diversæ cognationes copulantur, & altera ad alterius finem accedit. Affinitatis gradus proprie non sunt, sed per quamdam analogiam: eorumque dignoscendorum hæc regula: *quo quis est*
ve-

viro cognatus, eo gradu est affinis uxori, & vice versa. Contrahitur etiam affinitas ex illegitima conjunctione, uti & cognatio.

§. 178. In recta affinitatis lineâ nuptiæ non consistunt, ne perempta quidem affinitate, §. 6. & 7. *b. r.* In transversa æquali Jure novo vetitæ sunt inter eos, qui sunt secundo gradu, puta inter fratrem, & defuncti fratris uxorem, *L. 5. & 8. C. de incestis nuptiis.* In transversa inæquali inter eas personas, quæ parentum, liberorumque loco sunt, perpetua nuptiarum interdictio. Et semel nuptiis contracta affinitas, Jure novo, dissolutis nuptiis, etiam inter affines ex latere consistit, *L. 2. C. Th. eod.* Inter comprivignos vero matrimonium recte contrahitur, *licet habeant fratrem, sororemve ex matrimonio postea contracto natos*, §. 8. *b. r.*; idest, licet communi fratre, aut sorore postea susceptis ex novo parentum matrimonio, videri possent privigni arctius conjungi, *L. 54. b. r.* Ex Jure Canonico ad quartum quoque gradum porrigitur impedimentum affinitatis ex legitima copula profectæ, *cap. 8. X de consangu.*: ad secundum, si ex fornicaria copula, *Trid. Sess. 24. c.*

4. *de ref.*, desueta regula trium adfinitatis generum ex unis, binis, ternisque nuptiis, *d. c. 8.* De spirituali per baptismum cognatione, non hic dicendi locus est.

§. 179. Sed & honestate nuptiæ Jure Romano prohibentur (§. 171.). Nam, ut Paulus ait *in d. l. 14.*, in iis contrahendis non solum jus, sed & pudor inspiciendus est. Proinde nec sponsam filii, nec patris sponsam licet ducere, etiamsi nulla sit ex sponsalibus affinitas, §. 2. *b. t.* Nec licet ducere uxoris filiam post divortium ex alio marito natam. At præter species legibus expressas, nominum confusio matrimonii copiam haud restringit: ex. gr. cum tu filiam tuam mihi; ego tibi meam filiam collocamus: vel cum pater meus filiam uxoris meæ ducit: quod utrumque licet, *L. ult. §. 14. de grad.*: quamvis in hac specie pater sit uxoris meæ gener, & socer: ejusque uxor mea noverca, & privigna: adeoque & ego patri sim soceri, & vitrici loco. Cæterum vide *L. 14. §. 3. in fine de R. N.*

§. 180. Illegitimæ conjunctiones, nimirum contra ea, quæ diximus, initæ,
&

& ipſo Jure nullæ ſunt , & pro qualitate delicti pœnis coercentur. Neque ex iis dos intelligitur, neque nati ſunt in poteſtate patris, §. 12. *b. r.*; ſed æque æſtimantur , ac ſpurii , quos ſcilicet mater vulgo concepit. Obſervandum eſt, vocem *Spurius* apud Rom., cum prænomen denotabat, his notis *SP.* ſcriptam fuiſſe ; cum denotabat filios illegitimos, *S. P.* puncto interjecto. Ex dictis patet, ob merum civile Jus filiorumſam. nuptias invitis patribus initas, prorsus nullas fuiſſe. *Paullus L. 2. de R. N.* At Cujacius *Obſ. III. 5.* injuſtas dicit eſſe, non vero nullas. Ita interpretatur Paulli verba. *Sent. II. 19. §. 2.*, *eorum, qui in poteſtate patris ſunt, ſine voluntate ejus matrimonia jure non contrahuntur, ſed contracta non ſolvuntur: contemplatio enim publicæ utilitatis privatorum commodis præfertur.* At Jeſus dicere videtur, ſemel nuptias jure, & voluntate patris contractas, minime ſolvi contraria patris voluntate. *Duaren. ad tit. ff. ſol. matr. c. 11.* Apud nos Catholicos quid obtineat juxta Tridentinum, ſuperius indigitavi (§. 169. *infin.*).

§. 181. Sequitur altera patriæ poteſtatis

tis

tis causa, nimirum legitimatio; quæ est
 legitimus modus, quo naturales liberi
 iusti fiunt. Filii naturales quandoque di-
 cuntur etiam nati ex iusto matrimonio;
 sc. quando cum adoptivis comparantur.
 Alias naturales sunt respectu patris, qui
 sunt suscepti ex concubina; quo sensu
 hic accipiuntur: respectu matris vero
 omnes liberi, etiam vulgo quæriti, &
 incestuosi, naturales sunt. Licitus Romæ
 esse cœpit concubinatus, lata lege Julia,
 & Papia Poppæa; *in quam vide Heinecc.*
II. 4. Non erat tamen legitima conjun-
 ctio. *Vide contra Cujac. Observat. Me-*
rillii III. 25.: ac proinde ex ea nati
 filii naturales erant, non legitimi; ideo-
 que non in patris potestate. Constantino
 M. concubinatus, ex Græcorum Patrum
 sententia, fuit invisus. Sed successores
 Principes ejus consilium de abolendo con-
 cubinatu adeo spreverunt, ut tempore
 Justiniani diceretur *licita consuetudo*, *L.*
5. C. ad Scñum Orphit.
 §. 182. Constantinus indirecte concu-
 binatum everfurus, primus cavit, ut ex
 ingenua suscepti filii, per nuptias cum
 ea subsecutas, iusti fierent. Quare tantum
 tempore legis natos, non postea nascitu-
 ros,

ros, legitimos sequenti matrimonio fieri voluit, *L. 5. C. de naturalibus liberis.* Sed Anastasius, & Justinianus Constantini consilium negligentes, id ad nascituros produxerunt, *L. 6. C. eod.* Dotalium instrumentorum in §. 13. *b.t.*, ac *Nov. XVIII. 11.*, & *Nov. XII. 4.*, mentio ideo facta est, quod vix sine iis, & sine dote nuptiæ fieri solerent, non quod ea ad legitimationem necessaria essent. *Cujac. not. post. in Inst. III. 1.* At cur Tribon. in *d. §.* postquam scripsit, *e muliere libera procreatum, dotalibus instrumentis compositis, in potestate patris effici,* addit; quod & aliis liberis, qui ex eodem matrimonio fuerint procreati, similiter nostra Constitutio præbuit? Dubitari ne poterat, legitimos esse ex justis nuptiis editos? Ut alias interpretationes præteream, mens Tribon. fuit, natos ex legitimis nuptiis non esse potiores natis ante eas. Confer *L. 10. C. de nat. lib;* quam ipse memorat. Tandem quæ videri possent legitimationis exempla ante Constantinum, beneficia principalia fuere, in *L. ult. de adopt.*, & *L. 57. §. 1. de R. N.* §. 183. Accessit legitimatio per oblationem Curia, cujus auctor Theodosius

Junior. Leo autem, & Anthemius *L. 4.* ac Justinianus *L. 9. eod.* hunc legitimandi modum confirmarunt. Curia in Civitatibus inferioribus, puta Municipiis, & Colonjiis, erat uti Senatus Romæ: & Decuriones, uti Senatores: inde dicti, quod ex iis, qui in Coloniam deducebantur, decima pars consilio publico in Curia adscriberetur, *L. 259. de V. S.* Curialium autem, quibus Curia constabat, & inter quos eminebant Decuriones, dura erat conditio, *Merill. Obs. VIII. 26.* Et offerre Curiaë erat mares subjicere conditioni Curiali, feminas Curialibus nuptui dare, *L. 3. eod.* Legitimationem per adrogationem ab Anastasio inceptam, *L. 6. eod.*, sustulit Justinus in *L. 7. tum Justinianus Novell. 74. cap. 3.*

§. 184. Justinianus addidit legitimatorem per rescriptum Principis, impetratum a patre, *Nov. 75. cap. 1. & 2., Nov. 74. Nov. 89. cap. 9.* Idem est, si filius Principis rescriptum impetret, modo extet testamentum patris, quo heredem eum instituit, & rescriptum hoc desideravit, *d. Nov. 89. c. 11.*

§. 185. Naturales liberi, ut legitimentur, debent consentire; quod obtinet etiam
iam

iam in legitimatione per subsequens matrimonium; quemadmodum statuiffe videtur *Novella 39. cap. 11.*: licet in aliam abierit sententiam *Peretius in Cod. L. 5. tit. 27.*

§. 186. Jam vero legitimati per subsequens matrimonium ejusdem sunt conditionis, ac ex justis nuptiis nati, §. *ult. b. r.*: Immo quia concubinatus interdictio ex legibus hodie est, inter concubinam, & meretricem, quoad habitationis necessitatem, nil interest. Quare vel spurius ex quæstuaris susceptus legitimari potest; modo mater conceptionis tempore cum pluribus se non miscuerit, *Strauch. ad jus privat. diff. 4. §. 2.* Legitimati per oblationem Curiae sunt quidem legitimi heredes patri, non patris agnatis, *L. 9. C. de natural. liber.* Oblatio Curiae autem minime obtinet hodie; quia ignota est Curialium conditio, Denique per rescriptum Principis legitimati admittuntur ad paternam successionem, si soli sint, *Nov. 89. cap. 9.* Quod si justii alii filii extent, præcipuam hi habent legitimam: ad reliquam partem legitimati quoque admittuntur, si voluerit pater, & Princeps concesserit. Verum per rescriptum legitimatio fieri
sq.

solet ad natalium maculam potius eluendam, quam ad patriam potestatem conciliandam: unde spuris, adulterinis, ac incestuosis hoc beneficium haud denegatur.

T I T. XI.

DE ADOPTIONIBUS,

§. 187. **A**doptio, quæ est ultimus modus patriæ potestatis constituendæ, definitur actio legis, *qua, qui natura filius non est, in jura filii adsciscitur*. Ea imitatur naturam, cujus imago dicitur, & *similitudo*; inventa in solatium eorum, qui filios non habent, *Theoph. in princ. b. t.* Crebrior, quam alibi, Romæ fuit adoptio multis ex causis: quinimmo testamentaria crebro in usu erat; sed nomine tantum adoptio fuit. Nam quia testamentum post mortem valet, testator patriam potestatem acquireret, cum amplius in vivis non esset, Maritus quoque uxorem testamento adoptabat, uti Augustus Liviam. *Tacit. Annal. V. pr.* Verum ipse Tacitus *Annal. I. 8.* eam non *adoptionem* vocat, sed *adsumptionem*
in

in familiam Juliam, nomenque Augustæ.

§. 188. Adoptio nomen generis est, ejusque duæ species, *adrogatio*, & de nomine generis *adoptio*, §. 1., & L. 1. §. 1. *b. t.* Sane plura sunt negotia, quam vocabula, L. 4. *de præscriptis verbis*. Adrogantur, qui sunt sui juris: adoptantur, qui sub patria alicujus potestate existunt. Adrogatio, auctore Principe, fiebat: adoptio imperio Magistratus, *Cajus in L. 2. b. t.* Quoniam vero *Cajus* idem *Instit. lib. 2. tit. 3.* adrogationem, inquit, fieri *per populum* in Comitiiis Curiatis (fortasse ea ratione, quod ex Tabula IX. legis Decemviralis de capite civis, nisi per maximum Comitatum, statui nihil posset); hinc manu Triboniani *in d. L. 2.* positum est *Principis auctoritate*. Adrogatio autem non videtur ita dicta ab usitata Populi rogatione, sed a rogatione tam adrogantis, quam ejus, qui adrogabatur, num id vellent, *d. L. 2.* Adoptionis autem veterem ritum omitto; h. e. imaginariam venditionem coram quinque testibus, libripende, & antestato; quæ fieri dicebatur per æs, & libram: in filiis quidem tribus ex mancipationibus, seu venditionibus, duabus manumissionibus, ac ces-

L

sione

sione in jure: in filiabus, liberisque ultioris gradus, ex una mancipatione, *L. ult. C. b. r.* Profecto Justinianus d. *L. ult.* veteres sustulit circuitus; satisque habuit desiderium patris naturalis *actis intervenientibus apud competentem Judicem manifestari, praesente eo, qui adoptatur, & non contradicente, necnon, qui eum adoptat.*

§. 189. Adrogandi ipsi debent consentire, *L. ult. ff. de his, qui sui;* in adoptione & pater, qui dat in adoptionem, & filius, *L. 5. eod.* Atque utroque adoptionis genere acquirebatur patria potestas. Utriusque generis adoptivi participes fiebant jurium agnationis, quippe quæ civilia sunt; non cognationis, quæ naturalia. Et ideo adoptati nullo jure adnexi erant uxori, aliisque patris adoptantis cognatis. Hinc avunculus per adoptionem non fiebat.

§. 190. Si, mortuo patre naturali, adoptio per emancipationem solveretur, excluderetur filius adoptivus utriusque parentis successione. Nec leges in adoptionem datis quidquam adjudicabant ex patris naturalis hereditate nisi quod Sctum Sabinianum dari jussit quartam hereditatis iis, qui

qui essent adoptati ex tribus maribus, *L. 10. §. 3. C. de adopt. §. 14. Inst. de her. qua ab intest.*: ut nimirum tres liberi, qui parentibus proderant ob multa privilegia ex lege Julia, & Papia, & ob Sctum Tertullianum, exsortes omnino non essent eorum hereditate. Verum Justinianus cav-
vit *L. penult. C. h. r.*, adoptione ab ex-
traneo facta, sc. ab eo, qui est extra
lineam parentum (unde qui a patruo,
vel avunculo adoptantur, perinde haberi
debent, ac si a quovis extraneo adopta-
ti essent), manere potestatem patris na-
turalis: & tamen adoptatum adoptanti ab
intestato succedere; solummodo transire
filium in patris adoptivi familiam, si a-
doptio a non extraneo facta fuerit, *§. 2. h. r.*

§. 191. Olim nonnisi vesticeps adroga-
batur: nam pupillus auctor sibi ipsi non
erat idoneus: ac tutoris potestatem hæc
res excedebat. *Gell. V. 19.* Nec mulieres
adrogari poterant, quia feminis Comitia
minime dabantur. Sed hæc ratio hodie
cessat, *L. 21. h. r.*; & pupilli adrogatio
ex Constitutione Antonini permessa fuit,
Ulp. tit. 8., non solum indulgentia prin-
cipali, qua in cæteris adrogationibus quo-

que opus erat; verum etiam auctore tutore, consentientibus propinquis, & datis fidejussoribus *servo publico*, L. 18. ff. *b. t.*, seu *personæ publicæ*, §. 3. *b. t.*, sc. tabulario, *uti Theoph.*, ad hoc, quod si intra pubertatem pupillus decesserit, restituantur bona iis, ad quos fuissent perventura, si adoptio facta non fuisset; & causa cognita; nimirum ætatis, liberorum, & morum adrogatoris (*ut dicitur Theoph. apud Theoph.*, ne ob turpem amorem fiat, *Theoph.*): quarum rerum inquisitio olim erat Pontificum, quia in alterius sacra adrogati transibant. Adrogationis pupilli proprium erat, ut facultatum ejus, & adrogatoris comparatio fieret, L. 17. §. 2. *b. t.* Statuit denique Antoninus, emancipato pupillo a patre adoptivo sine justa causa, vel exheredato, licet ex justa causa, præter bona, quæ is transtulit ad patrem, hunc quartam bonorum suorum ei relinquere debere.

§. 192. Quarta hæc Divi Pii non est quarta pars portionis ab intestato debitæ unicuique filiorum, sive legitima, sed quarta *bonorum*, uti dicitur §. 3. *b. t.* L. 2. C. de adopt. §. ult. ff. si quid in fraud. patr. Petitur namque iudicio fami-

mi.

miliz eriscundæ, non querela inofficio-
fi, uti legitima, *L. 8. §. 15. ff. de inoff.
test. §. 2. §. 1. ff. fam. erisc.* Quid?
melior ne futura causa adoptivorum, quam
naturalium? Ita sane; nec mirum. Nam
impuberes, quia simul cum bonis suis in po-
testatem recipiuntur, emolumento potius,
quam oneri adrogatoribus esse solent. Cæ-
terum vix hæc quæstio accidere poterat,
cum causæ cognitione opus esset in im-
puberum adrogatione, *d. L. 17.*; nec fa-
cile ea permittebatur iis, qui vel susce-
pissent, vel possent liberos suscipere.

§. 193. Utrique adoptioni communia
sunt quædam. Primo non potest natura
major a minore adoptari: sed pater a-
doptivus debet præire filium plena pu-
bertate, id est annis XVIII. *L. 40. §.
1. b. r. §. 4. b. r.* Secundo in locum
nepotis licet adoptare, quamvis filium
quis non habeat, *§. 5. b. r.*: nam sufficit
habere potuisse, *L. 43. ff. b. r.*: qua in
re demiratur Romanum Jus magnam par-
tem commentitium Contius *subsecipar.
lect. I. 6.* Tertio in nepotis adoptione
etiam filius in potestate, sive adoptivus,
sive naturalis, consentire debet, ne ei
invito suus heres agnascatur, *§. 7. b. r.*

Quarto adrogatus, vel a non extraneo adoptatus, potest ab adoptivo patre alteri in adoptionem dari, §. 8. *b. t.*: ubi illud a non extraneo adjectum est ex *L. penult. C. b. t.* Quinto, qui generare non possunt, quales sunt spadones, adoptare possunt; castrati autem non possunt. Ita §. 9. *b. t.*, ubi *to* non sonat idem ac *non-dum*. Otto Tabor in *Briffon. de V. S.* & spadones temporariam ob morbi causam frigent, sed integras habent partes genitales, *L. 6. ff. de lib.*, & *post.*: castrati autem natura nequeunt generare, *L. 5. ff. ad L. Corn. de sic.*, *L. 39. §. 1. ff. de J. Dor.*, *L. 1. ff. de Ædil. Edict.* Tribonianus ideo sibi non adversatur. Cæterum latiori significatione spadones sunt quandoque in Libris Juris iidem ac castrati; & generatim, qui generare non possunt, sive in perpetuum, sive ad tempus, sive naturæ vitio, sive fortunæ, *L. 6. ff. de Ædil. Edict.*, *L. 128. de V. S. Vid. Amaya Obs. III. 6.*, & *Otton. Diff. ad L. 27. §. 28. ff. ad L. Aquil.* Leo Philosophus *Nov. 26.* castratis quoque adoptare permittit: ea tamen *Nov.* contra Jus Justinianum vix obtinet (§. 61.). Sexto feminæ adoptare ne-

nequeunt, quia naturales liberos in sua potestate non habent, ut ait Tribonianus §. 10. *b. r.* Sed is poterat hac ratione abstinere, postquam Justinianus patri adoptivo extraneo patriam denegavit potestatem. Verum Imp. viduis permiserunt adoptare in solatium liberorum amissorum; non ut filios in potestate, sed ut haberent heredes, *L. 29. §. 10. de inofficioso.* Permissum id etiam virginibus a Leone *Nov. 27.* Septimo denique, quoniam adoptio inventa est in solatium eorum, qui liberos non habent, adoptare nequeunt, qui procreandis filiis pares sunt per ætatem 60. annis minorem, & qui jam liberos naturales habent, *L. 17. ff. b. r.*

§. 194. Adoptionis vero proprium est, ut possit quis & filium alienum in locum nepotis, & nepotem in locum filii adoptare, §. 6. *b. r.* Adrogationis proprium est, ut adrogatus cum liberis suis in potestatem transeat adrogatoris, §. 11. *b. r. L. 40. eodem;* cum e contrario liberi adoptati in avi remanent potestate, *L. 28. eod.* Postremo Tribonianus §. 12. scriptum refert apud Catonem, quod servi a domino adoptati, ex tacita voluntate domini, fierent liberi, non filii:

nam in filios adscisci a dominis non poterant, nec possunt. Nulla cum iis Comitiorum communio: nullus eorum Jure Civili consensus. Idipsum Justin. C. un. §. 10. C. de lat. libert. toll. At posse servos a dominis per Pratorem in adoptionem dari, multi ex veteribus credidere, Gellius V. 19.

§. 195. Adrogationes, atque adoptiones hodie abolitæ non sunt, uti putant Vinnius, & Gudelinus. Ipsi nostri Pragmatici complures pertractant de iis questionibus. V. Montan. controuv. 30.

T I T. XII.

QUIBUS MODIS JUS PATRIÆ POTESTATIS SOLVITUR,

§. 196. **L**icet ex Romuli instituto duo tantum essent patriæ potestatis dissolvendæ modi, sc. patris naturalis aut mors, aut voluntas; procedente tamen tempore quasdam dignitates Byfantini Impp. adjecerunt. Septem inde modi hoc titulo proponuntur. I. est mors naturalis patris, vel avi; modo in patris sui potestatem nepotes non sint re-
te

caſori; h. e. modo ante pater mortuus fuerit, vel emancipatus, *princ. b. 1.*; aliove modo, puta per adoptionem, familiâ egreſſus fuerit. Non ita res ſe habet, ſi pater ob dignitatem ſuæ poteſtatis evaſerit: nam quia non eſt capite minutus, filius, avo mortuo, recidit in manum patris. Emancipatio contra & patriam ſolvit poteſtatem, & capite minuit, *Nov. 81.* Cum itaque patria poteſtas jus perſonale ſit, cum perſonis extingui debet, *L. 196. de R. J.*; licet ejus effectus poſt mortem in multis duret, *§. 3. de tut.; tit. de pup. ſubſt., §. 2. de her. qual., L. 5. pr. de C. & D.*

§. 197. II. Deportatio (h. e. deductio in inſulam ob maleficioſum) ſeu patris, ſeu filii: ea enim capitis minutione, quæ mors civilis eſt, amittitur Jus civile, cujus eſt patria poteſtas. Hæc vero reviviſcit, ſi deportatus rediens non tantum in patrium ſolum, & dignitatem præcedentem, verum etiam a Principe per omnia reſtituatur, *§. 1. b. 1.*, ubi ſi ex indulgentia principali reſtituti fuerint per omnia, (hic comma adpingendum) priſtinum ſtatum recipiunt. Ob relegationem ſalva remanet patria poteſtas, *§. 2. b. 1.*

b. r. ; quoniam per eam non amittitur civitas, sed patria tantum quis abesse cogitur, Aicet in certum locum mittatur, *Ovid. Trist. Lib. 5. Eleg. 12. V. tir. ff. de interd. & releg. , & Huber. Digress. III. 10.*

§. 188. III. Poenæ servitus (quam poenalem servitutem appellat Tertull. *Apolog. 8.*) per fictionem inducta , ut excluderetur lex Porcia , ex qua ob civicum decus civis affici ultimo supplicio non poterat ; *Liv. X. 9.* Nimirum fictio excogitata est , qua qui crimen commiserat sanguine expiandum , non ut Civis , sed ut servus ipsius poenæ , puniretur , *L. 12. ff. de poen.* Proinde & Civitatem , & libertatem amittebat , *L. 29. eod.* Apud Tribonianum §. 3. *b. r.* poenæ servi proprie sunt , qui in metallum , sive ad efodienda metalla damnantur , & qui bestiis objiciuntur ; *uti in L. 25. §. 3. de acquir. hered. , & L. 8. §. 11. de poen. Cujac. Obs. XIII. 10.* Sed non tantum servitute poenæ , sed etiam quavis alia civili servitute , jus patriæ potestatis solvebatur. Ultimo supplicio damnati videntur primum servi poenæ fieri desiisse post Nov. 22. cap. 8. , unde decerpta Auth. *sed ho-*

hodie C. de donation. inter Vir. & Ux.

§. 199. IV. *Summa dignitas Patricia-*
tus, §. 4. *b. t.*; videlicet summa intra-
 aulam: nam extra eam cedebat Consula-
 tur. Sed eo potior Patriciatus Consulatu,
 quod illo perimeretur olim patria pote-
 stas; quod primum a Justiniano inductum,
 ait Tribonianus, *h. e. in L. ult. C. de*
Consul. Patricii autem, primum institu-
 ti a Constantino M., erant summi in-
 aula Ministri, qui consiliis suis Impera-
 tori aderant, & veluti ejus partes, im-
 mo patres censebantur, *Cassiodor. Variar.*
V. 2. Forte successerunt Jctis, qui olim
 in consilium Principis assumti fuere, *L.*
30. ff. de excusation. Justinianus autem
 in *L. ult. C. de Consulib.*, & *Nov. 81.*
 quod de Patriciis jam sanxerat, produxit
 ad Consules, Prætorio, & Urbi Præfectos,
 Magistros militum, Episcopos, & gene-
 ratim ad omnes a Curiarum oneribus li-
 beros. Ita derogatum ab eo est Ro-
 muleæ legi, qua cautum refert Halicar-
 naeus *Lib. 2. pag. 96.*, ne ulla filiifa-
 milias dignitate patria potestas solveretur,
 Cæterum liberatio a patris potestate ob
 dignitatem, fit sine capitis deminutione;
 proinde integra familiæ jura adhuc per-
 mar

manent, *d. Nov. Cap. 2.*

§. 200. V. Captivitas : ab hostibus enim capti servi fiunt hostium, §. 5. *b. r.* Hostes vero sunt non piratæ, aut latrones, nec qui in civilibus dissentionibus in alterutram discedunt partem, sed quibus publice decretum est bellum, *L. 24. de Captivis.* Sed contra hanc servitutem duplex apud Rom. invaluit fictio. Prima postliminii; altera legis Corneliæ. Postliminium est jus, quo captivi, fines imperii ingressi, pristina recipiunt jura, Quare si captivus ad suos rediisset (sive dimissus, sive dolo, sive vi effugiens, & animo non redeundi), fingebatur nunquam apud hostes fuisse, ut ita captivitatis, ac reditus tempora conjungerentur; & captivi filius semper sub patria potestate mansisse videretur. Postliminii autem fictio ea tantum reddit, quæ sunt juris, non ea, quæ facti. Proinde possessio captivitate interrupta, non restituitur: sed ea omnia, quæ filius, captivo patre, sibi quæsit, pater reversus potest occupare, ut sibi quæsitum jure peculii, licet filius obierit, *L. 15. eod.* Tum reverso patre, creditor ob mutuam pecuniam non habet actionem: patre ca-
pti-

ptivo, tutor filio dari non potest; nam hic sui juris non est; sed debet rebus curator dari, *L. 6. de tut.* tandem si filius testamentum condidit, nuptias contraxit, illud irritum est, nuptiæ quasi jussu patris initæ censentur. Postliminium autem captorum est, non transfugarum, qui hostium numero sunt; nec eorum, qui victi hostibus se dedidere: pactiones enim cum hostibus Jure Gentium valent, *Grot. III. 19.* Dicitur postliminium a *post*, & *limen*: limina enim sunt fines imperii. Hanc Scævola originationem probat Tribonianus, non illam Servii, qui tantum notabat *post*: & *liminium* esse dicebat productionem sensu vacuum; non secus ac *finitimum*, *meditullium*, *legitimum*. Nec mihi arridet de postliminio Heineccii sententia, quod reversi ex hostico ædes ingrederentur, non per limen, sed post, seu per tegulas, atque impluvium. Quod si quis apud hostes decesserit, Cornelia lex de captivis, incertæ ætatis, & auctoris, fingit eum ante captivitatem decessisse, scilicet liberum, & Civem; ut ea omnia, quæ captivi filius in Urbe egerat rata manerent, veluti facta ab homine sui juris. At cur lex isthæc

istæ fictionem adhibet, cum fictiones
 Jætorum, & Prætorum propriæ sint? Ni-
 mirum quia æquitati veritas, atque ordo
 rerum naturalis obstabat. Vides ex dictis,
 statum filiorum captivi patris in incerto
 esse, & *in pendentii*, L. 12. C. 22. *Cod.*;
 atque captivitate patris, vel filii non
 tam solvi patriam potestatem, quam
 suspendi.

§. 201. VI. Emancipatio; nimirum
 actio legis, quæ expediebatur per æs, &
 libram, perque tres mancipationes, toti-
 demque manumissiones. *Cajus Instit. lib.*
I. tit. 6. Quare filiusfamilias mancipa-
 batur patri fiduciario, ita dicto a fiducia
 remancipandi, quæ accedebat vel tertiæ
 venditioni, si filius, vel uni, si filia, cæ-
 terive liberi emanciparentur. Quæ fidu-
 cia Jure novo, etiamsi omittatur, inter-
 posita censetur; ut pater naturalis posset
 in filium emancipatum jura patronatus
 acquirere, §. *ult. Instit. de legit. agnat.*
succ. Sed veterum tricis finem imposuit
 Anastasius in L. 5. C. *de emancipat.*, ubi,
 expediri emancipationem, cavit, ex
 Principis rescripto apud competentem Ju-
 dicem insinuato, insciis etiam liberis in-
 fantibus; consentientibus vero majoribus
 in-

infantia. Justinianus denique in *l. ult. C. eod.*, ne Principem quidem adiri voluit, eo tantum contentus, ut pater liberos suos manu dimittat, apud acta, sc. per solos *competentes Judices*, vel *Magistratus*, §. 6.; ubi *vel valet hoc est*. Nam legis actio, qualis emancipatio est, nequit expediri per Judices datos; nec per eos, quibus non data est jurisdictio. Tam vero filius, qui emancipatur, quam qui datur in adoptionem, saltem tacite debet consentire, h. e. sufficit, ut non expresse contradicat patri. Tandem potest parens liberos, ac deinceps emancipare nepotes ex filio, filio eodem in potestate retento, §. 7. *h. r.*, & vice versa.

§. 202. VII. Adoptio a non extraneo patre facta ex *L. penult. C. de adoption.*, §. 8. *h. r.* At per adoptionem filius non fit homo sui juris, sed vel in alienam transit familiam, si a non extraneo adoptetur, vel remanet in potestate patris naturalis, si adoptetur ab extraneo, uti diximus a Just. fuisse statutum.

§. 203. Tandem Tribonianus §. 12. duo nos docet. Alterum est, quod si avus filium emancipet, aut in adoptionem det,

der, nunt uterum gerente, quod ex ea nascitur in avi potestate est; non vero conceptus post emancipationem, vel adoptionem: nepos enim non ex nativitatibus tempore familiam sortitur, sed ex tempore conceptionis: qui ut primum conceptus est, in rerum natura esse creditur: uti & qui conceptus est antequam pater Senatu moveretur, pro Senatoris filio habetur, *L. 7. de Senatorib.* Qui vero post dies 182. a tempore emancipationis prolem suscepit, habet eam in potestate, *L. 3. §. ult. de suis, & leg. V. Arnold. Fabrot. in exerc. de temp. hum. partus.* Alterum, quod nec naturales parentes, nec adoptivi ullo pene modo compelluntur emancipare: *pene*, inquam; nam in nonnullis speciebus contrarium observatur: ita si quis impubes adoptatus, pubes factus emancipari desideret, audiendus est, *L. 32. de adoption.*; uti & qui a patre ad turpitudinem adiguntur, vel contra pietatem adficiuntur, *L. si lenones C. de episcop. aud., L. ult. ff. si a parent. quis manum.* Tum filium emancipare cogitur, qui legatum ea conditione sibi relictum agnovit, *L. 92. de C. & D.* Et ex *Nov. 12.* filii patria potestate liberantur, si pater incestas

stas, nefariasque nuptias contraxerit. Igitur licet *vi pene*, quod est apud Tribon., non legatur apud Marcianum *in L. 31. de adopt.*, non ideo cum Ottone dicendum est, eo additamento Tribonianum ad Jus novum *in L. 12. C. de episc. aud. spe.* tasse: cum & veteri Jure causæ sint cogendorum parentum ad emancipandum.

§. 204. Hodie morte finitur patria potestas. At jus captivitatis inter Christianos minime exercetur: ipsique Christiani a Turcis capti, apud nos pro liberis habentur. Ultimo supplicio damnati servi poenæ fieri desierunt tempore Just. *Nov. 22. cap. 8.* Deportati potius relegatis comparandi sunt; ideoque patriam potestatem, juraque alia retinent. Emancipatio fieri solet per publicum Instrumentum coram Notariis. Immo alicubi per nuptias, ac separatam oeconomiam, salvis familiæ juribus, filii a patris exeunt potestate. De Consuetudine *sed & mulier*, ac de Pragm. de Macedoniano, egimus in Jure Regni. Tacita isthæc emancipatio non est repetenda a *L. 1. C. de pat. potest.*, unde decennium vulgo requirunt; ut quis tanquam paterfam. cum aliis civibus se gerat, & vicennium,

ut a patria potestate liberetur: sed repetenda a Nov. 25 Imp. Leonis, usu apud nos recepta; ex qua nullum tempus ad hanc rem præscribitur: unde Judicis arbitrio remitti debet.

T. I. T. XIII.

DE TUTELIS

§ 205. **A**D eos, qui sui juris, potestatisque sunt, gradum faciamus. Hi sunt vel in tutela, vel in curatione, vel neutro jure tenentur, Potestas hic strictè intelligitur patria, & herilis. Qui in tutela est, pupillus appellatur. Pupillus impuberem patremfamilias denotat: impubes hominem certæ ætatis, *princ. b. t.* Tutela, quæ Jure Gentium invaluisse videtur, propriis Romanorum institutis temperata fuit. Ea Servio Sulpicio est, *vis, ac potestas in capite libero ad tuendum eum, qui propter ætatem se defendere nequit, Jure civili data, ac permissa, §. 1., & L. 1. b. t.*

§. 206. In hac definitione opus non est legere *jus, ac potestas*, uti quidam ex Theo-

Theo-

Theophili auctoritate: nam *vis ac potestas* jungi solent, §. 2. *h. t.*, L. 17. *ff. de LL.* Et sæpe *vis* valet *jus*. Nec audiendus Hervecius, qui variam in iis verbis querit tutoris potestatem. Tum in *capite libero* (sc. in hominem sui juris, uti latini pupillum appellarunt) referendum ad pupillum: & quandoque latini, ac Jcti sextum casum pro quarto usurpant. Quare peregrino tutor recte non datur: non enim ille gaudet libertate Romana, secundum quam capita libera censebantur. Præterea *tueri* est pupillo prospicere in omnibus, quæ sunt ad vitam opus. Unde tutores, quasi *tutores* dicti, sicuti *æditui*, qui ædes tuebantur. Hinc qui pupillos tueri nequeunt, tutelam exercere prohibentur: & tutela legitima impeditur, testamentaria saltem suspenditur, si tutor sit minor, furiosus, aut demens, sordus, aut mutus. Hinc etiam patrem habenti tutor dari nequit. Sed licet primario spectet pupillorum utilitatem tutela, est tamen munus publicum, non exercendum a servis, nec mulieribus: obeundum tamen necessario ab omnibus, etiam filiisfam. Sequitur *ad eum*, quod tutorem separat a curatore: tutor enim primario

personæ; bonis nonnisi per consequentiam datur. Tandem Servius fortasse scripsit *propter ætatem, infirmitatemve consilii*. Probabilis divinationo Francisci Hotomani. Non ita Huberus, *Praelect.* p. 1. L. 1. tit. 13. n. 2., qui improprie tutelam feminarum dictam fuisse, ex eo asserit, quod tantum auctoritate tutorum eæ indigebant, sed ipsæ administratione fungebantur, *Ulp.* tit. 11. pr. At vera olim feminarum perpetua erat tutela, *Ev. Orto Dissert.* 4. Cap. 1., quæ sub Imp. sensim oblanguit; tandem omnino desit. Quare dici potest, Tribonianum solam ætatis causam in Serviana definitione reliquisse. Ex iisdem verbis patet aliud discrimen tutorem inter, & curatorem; etenim causa dandi tutoris est tantum pupillaris ætas. Denique ex postremis verbis definitionis triplex tutelæ genus eruitur; legitima, testamentaria, & dativa. Vox *data* refertur ad legitimam, quam lex dat immediate: *permissa* vero ad testamentariam, & dativam, quas dat testator, vel Magistratus, lege permittente. Quamvis autem tutela a Jure Gentium sit, ad Jus tamen civile eodem modo refertur, quo nuptiæ, patria potestas, & alia.

§. 207. Antiquissima est testamentaria: ex testamento enim Regis Anci Martii Tarquinius Priscus, qui illi non erat agnatus, fuit tutor liberis datus. *Livius*

§. 14. Ex hoc veteri more Decemviri, *Paterfamilias uti legasset super pecuniæ, tutelæve suæ rei, ita jus esto. Ulp. Fragm. tit. II. §. 14.* : nec opus est lectione Noodtii, qui reponit *super tutela sua, Obs. II. 10.*

§. 208. Datio itaque testamentarii tutoris patriæ potestatis est effectus. Propterea tantum pater, vel avus tutorem dare possunt liberis utriusque sexus in potestate constitutis, utut exheredatis, *L. 1. C. 4. ff. de testament. tut.* : non potest mater, nec emancipato pater, *L. 1. §. 1. de confirmat. tutor.* Verum hac in specie Magistratus tutorem confirmat & a matre datum (a patrono quoque, vel quovis extraneo) *cum inquisitione*, h. e. cum causæ cognitione (& modo filium mater heredem scripserit. In *L. 4. C. de testam. tut.*, quæ ob stare videtur, Cujacius negationem expungit, *V. Vinium hic, C. Bynk. Obs. II. 17.*) ; a patre vero *sine inquisitione omnimodo*, *d. §. 3.* Sed cautius Modestinus ait ut-

plurimam, in d. L. 1. Sane disquirendum est, an duraverit patris voluntas; quæ defecisse existimatur, si in tutore emer-
serit celata morum improbitas, aut ini-
micitia cum patre, aut damnosus cum
filio contractus, L. 8. & seq. ff. de
conf. tut. L. 4. ff. de test. tut. Tum a
patre datum emancipato filio, licet ex-
heredi scripto, Magistratus confirmat. Se-
quitur etiam ex patria potestate, ut &
cæteris liberis in potestatem parentum
suorum minime recasuris, dari tutor pos-
sit, etiam postumis, §. 4. b. t. V. Pe-
trum Fabrum Semestrium III, 24. Tutor
autem scribendus in testamento, vel co-
dicillis testamento confirmatis. Si in te-
stamento imperfecto, vel in epistola,
confirmatione est opus, L. 3. de testa-
ment. tut.

§. 209. Apud nos hodie tutores om-
nes, sive testamentarii, sive legitimi, con-
firmantur. Et legitimi quidem, ac ii,
qui minus sollemni testamento dati sunt,
sine confirmatione tutores dici nequeunt:
qui autem perfecto testamento sunt dati,
ante confirmationem possunt delatam si-
bi gerere tutelam; illamque in tutelæ
ingressu petere.

T I T. XIV.

QUI TESTAMENTO TUTORES DARI
POSSUNT.

§. 210. **T**utores testamento dari possunt
omnes, qui pares sunt mu-
neri publico obeundo, & quibuscum testa-
menti factio est, *L. 21. ff. de testament.
tutor.*; quia tutela testamentaria, uti
pars hereditatis censebatur; proinde re-
cte tutor datur filiusfamilias sive testamen-
to, sive a Magistratu, *princ. h. t.* Quam-
vis enim publica munera filium patria
potestate minime liberarent, faciebant
tamen, ut ea interquiesceret, quoad pu-
blica causa administraretur. Sola legitima
tutela filii non est, quia pater eum gra-
du præit, §. *ult. infra de capit. deminut.*

§. 211. Deinde servus tum proprius,
tum alienus, recte testamento tutor dari
potest: & proprius liber, ac tutor erit,
sive adscripta libertate, sive non adscripta:
nam tutores nonnisi liberi, Romanique
cives esse possunt. Si libertas non adscri-
pta fuerit, directa ne, an fideicommissaria
existimanda sit, expeditum non est. Di-

recta censetur ex L. 32. §. 3. ff. de testam. tut., & ex §. 1. b. r.: fideicommissaria ex rescripto Valeriani, & Gallieni in L. 9. C. de fideicomm. libert. V. Fabrum Conject. VI. 6. Cujacius in not. ad d. §. 1. docet, primum a Justiniano, invita Jurisprudencia, statutum fuisse, ut libertas per consequentiam tutelæ data, uti directa deberetur. Quod si paterfamilias servum tutorem dederit, quem liberum putabat, datus tutor nec tutor erit, nec liberi præsumptio enim legis est, testatorem non facile scripturum tutorem, quem servum esse scivisset, L. 22. ff. eod. Alienus servus pure dari tutor nequit; potest vero sub conditione cum liber erit, §. 1. b. r. Æquius Ulpianus in L. 10. §. 4. eod. tradit, etiam pure datum, videri datum sub conditione cum liber erit. Verum proprius servus sub ea conditione datus tutor, nec tutor est, nec liber, d. §. 1.

§. 212. Sed ut ad liberos homines redeamus, etiam furiosi, aut minores, utiliter, recteque dantur tutores, sive pure, sive sub conditione, cum sapere, aut majores esse cæperint: administratio tamen in idoneum tempus confertur, §. 2. b. r.;

&

& interim alius tutor datur a Magistratu, L. 10. §. 7. ff. de excusat.

§. 213. Tres sequuntur regulæ quoad modum dandi tutoris. Prima; potest testamentaria tutela à certo tempore, & ad certum tempus, sub conditione, & usque ad conditionem dari, §. 3. b. t.; non potest tutela legitima, nec dativa, quia est actus legitimus. Altera; potest tutor scribi & ante, & post heredis institutionem, d. §. 3.; idque obliquit favore pupillorum; nec locum habuit olim in libertatibus, neque in legatis, §. 32. infra de legatis. Major itaque fuit pupillorum, utpote civium, favor, & gratia, quam libertatis. Tertia; certæ rei, vel causæ testamento dari nequit tutor, §. 4. b. t. Sed bona accedunt personæ pupilli, L. 12. ff. de testament. tut.; adeout personæ dari tutor, deductis rebus, nequeat. d. L. 12. ff. de test. tut. Quod si pupillus patrimonium habeat tanto locorum intervallo sejunctum, ut commode ab uno administrari nequeat, receptum est, ut testator possit rebus ita diffitis particulares tutores assignare. Non tamen inde fit, ut tutela dividatur; quæ una est: & singuli dati tutores in solidum tenentur, fo.

sola inter eos administratione divisa; *L.* 15. *C. b. r.*, *C. tit. C. de divid. tuti.*
§. 214. Tandem qui filiabus filiisve suis tutores dederit, videtur liberis primi tantum gradus dedisse; qui dederit liberis, etiam nepotibus, & deinceps dedisse videtur. Tum filiorum, & liberorum nomine postumi veniunt, postumæve, & vice versa, *§.* 5. *b. r.* Quare filiorum angustior, quam liberorum significatio, nisi voluntatis conjectura aliud suadeat, *L.* 84., *C.* 201. *ff. de V.S.*; quemadmodum ex eadem conjectura filiarum nomine non venit postuma, *L.* 17. *de leg. 1.*

T I T XV.

DE LEGITIMA AGNATORUM TUTELA.

§. 215. **S**equitur tutela; quæ *legitima* dicitur, quia ex lege descendit, *§.* 2. *b. r.*; nimirum per excellentiam ex XII. Tabulis: subaudi vero sine ullo facto hominis: nam & testamentaria tutela ex eadem lege descendit: quapropter testamentarii tutores quandoque *legitimi* appellati. At ex ea lege aut *propria*
lam

lam, idest verbis ipsis, aut *per consequen-*
tiam, id est ex interpretatione, tutela
 inducta, *Ulpian. tit. 11. §. 3.* Propalam
 fuit tutela agnatorum *Tab. 5.* Et vide-
 tur etiam post agnatos vocavisse gentiles
 ad tutelam *Lex XII. Tabularum*: ad le-
 gitimas enim hereditates etiam gentiles
 vocavit, *Ulp. Fragm. tit. 26. §. 1.* Tem-
 pore autem Ulpiani nullæ erant genti-
 lium successiones. Legis verba sunt: *Si*
paterfamilias intestato moritur, cui impu-
bes suus heres escit, agnatus proximus tu-
telam nancitor.

§. 216. Ad agnatos itaque tutela perti-
 net, cum pater quoad tutelam intesta-
 tus moritur; hoc est siue testamentum
 non fecerit, siue fecerit quidem, sed in
 eo tutorem aut non dederit, aut dederit
 ad certum tempus, quod deinde finitum
 sit, aut sub conditione, quæ postea de-
 fecerit. Ad agnatos quoque tutela redit,
 si datus tutor vel ante inceptam, vel
 ante expletam tutelam decesserit, §. 2.
h. t. Aliter se res habet, si datus tutor
 vel se excuset a tutela, vel ab ea tan-
 quam suspectus removeatur: tunc enim
 non legitimus, sed dativus tutor succedit.
 Discrimen pendet ex eo, quod in priori-

bus

bus speciebus tutela ipso jure extinguitur; in hac vero specie cessare tantummodo videtur: & tutores excusati, remote habentur, ac si adhuc tutores essent: quod sufficit ad excludendos legitimos, *ut infra tit. 20. princ.*

§. 217. Agnati sunt, qui per virilis sexus personas cognatione juncti sunt, quasi a patre cognati, §. 1. *in b. n.*, ex. gr. frater eodem patre natus, aut adoptivus, fratris filius, patruus &c. Sane hi- scē verbis hic non comprehenduntur feminae per masculos cognatione junctae; quia tutela est virile munus. Quando vero cognationis nomen non generice sumitur, sed veluti agnationi oppositum, ad eam restringitur cognationis speciem; quae per feminas copulatur. Agnatorum proximo (& capite non minuto, ut *infra* §. 202.) ea tutela detetur, & pluribus in eodem gradu: administratio tamen uni, sed omnium periculo decernitur, *L. 1. ff. de legitim. tutor.* Quod si omnes proximi decesserint, vel capite minuti sint, sequentes in tutela succedunt, *L. 3. de leg. tut.*

§. 218. Si itaque primus gradus desit, succedit secundus. Quod si existens in primo

mo

mo gradu vel excusetur, vel removeatur, vel ad tutelam gerendam idoneus non sit, veluti si in primo gradu existat femina agnata, quæ tutorii muneris incapax est, non secundus gradus admittitur, sed dativus succedit tutor; quasi proximus gradus adhuc supersit.

§. 219. Legis ratio est, ut qui sperarent successionem, iidem tuerentur bona, ne dilapidarentur, d. L. 1. Idem jus Lacædæmone fuit ex Lycurgo. Contra ex lege Solonis agnati heredes erant, non tutores: hos enim e cognatis, aut e remotissimis agnatis dabant Archontes. Athenis homines boni optimi, mali pessimi, ait Plutarch. in Dion. sub finem. Sed non propterea dicendum est, tutelam legitimam agnatorum a Laconibus Romanos accepisse, Otto Præfat. tom. 3. Thesaur. Romæ diu post Decemviros stetit vetus illa sinceræ, & innoxia pastoriæ sectæ integritas; ait Florus III. 12. Heredipetarum exempla, quæ regerit Heineccius, ut vitio vertat Decemviris, quod Lycurgum maluerint, quam Solonem hac in re imitari, multo sunt Decemviris recentiora. Potius miror, succrescentibus Romæ vitiis, hoc Decemvirale Jus adhuc reten-

rum. Sed Romæ instituta Majorum non facile mutata. Corruptis autem deinde moribus; rerum administratio agnatis relicta est; & sæpenumero arbitrio Judicis constitutus, qui pupillum aleret, & educaret, *L. 1. ff. ubi pupillus educari, L. 1. C. eod.* Et contra Juris antiqui regulas Prætor cognatos ad bonorum possessionem admisit, non ad tutelam; eosque ideo, quia hujus oneris expertes, fecisse videtur potiores agnatis.

§. 220. Justinianus denique cognatos per omnia exæquavit agnatis, omnesque sanguine junctos, modo idonei forent, secundum gradus prærogativam, ad legitimam vocavit tutelam; matremque, & aviam prætulit omnibus a latere conjunctis, modo secundis nuptiis, & Vellejano renunciarent, *Nov. 118. cap. 4., & 5.*

§. 221. Cum vero agnatio omni capitis deminutione plerumque perimatur; unde intercidunt tutelæ, & hereditates; cumque cognatio minima capitis deminutione haud tollatur, §. 3. *b. t.*, hinc sequens titulus adnectitur.

DE CAPITIS DEMINUTIONE.

§. 222. **C**aput est persona. Utrunque
hoc vocabulum & hominem
ipsum designat, & statum hominis, idest
libertatis, Civitatis, & familiae. Postero-
re hoc sensu servi non habent caput, §.
4. *h. r.* Hinc capitalis poena. Priore illo
sensu, & improprio *servilem personam*
Ulpianus dixit in *L. 21. de R. J.*, &
servile caput Paulus in *L. 3. de capiti-
minut.* Hoc titulo caput status est, &
minuere est *mutare*. Definitur ideo capi-
tis diminutio *prioris status commutatio*
princ. h. r.; cum nimirum aut libertas,
aut Civitas, aut familia amittitur. Hei-
neccius capitis diminutionem e censu Ro-
manorum profectam asserit; quia sicuti
capite census dicebatur, qui nihil prater
caput, nomenque deferbat in censum;
ita servum, vel peregrinum, aut filium
familias appellatum esse putat capite di-
minutum, quia ne capite quidem pote-
rat cenferi. Sed hac sententia, licet
vera videri posset de servo, aut peregri-
no,

no, aptari tamen nequit ad eum, qui vel filiusfamilias est natus, vel e filio paterfamilias factus per emancipationem. Communiter autem Latini ampliorem significationem *status* vocabulo tribuunt, quæ angustior est in Jure: servus enim, qui manumittitur non mutat statum, quia eum non habebat; & Senatori, qui Senatu movetur, dignitas *magis, quam status permutatur*, §. 4., & §. b. t. ubi *magis* positive accipitur, non comparative. Jam capitis deminutio aut maxima est, quæ familiam, Civitatem, & libertatem; aut media, quæ familiam, & Civitatem; aut minima, quæ solam perimit agnationem. Prima facit servum: altera peregrinum: tertia vel patremfam. per emancipationem, vel filiumfam. per adoptionem.

§. 223. Maxima capitis minutio est quævis servitus, etiam pœnæ. De modis quibus servi fiunt, actum superius. (§. 113. & seqq.)

§. 224. Mediam deinde patiuntur exules, hoc est ii, qui aqua, & igni interduntur, aut in insulam deportantur, §. 2, b. t. (Adde transfugas, seu qui ad hostes transeunt, L. 5. ff. de capit. minut.

nur.) Aqua, & igni interdicti, cum omni humana ope privarentur, alteri civitati sese adscribere, necessitate impellente, cogebantur; & ita facto suo Romanam amittebant, quia nemo duarum civitatum civis esse poterat, *Corn. Nep. vit. Attic. cap. 3.* Quoniam vero timendum erat, ne tot exules extra Imperii limina agitantes, facto agmine, contra Principem irrumperent, Augustus, hortante Livia, deportationem instituit, h. e. insulis reos clausit. Proinde deportatio a Suetonio in *Aug. c. 65.* dicitur *insulæ vinculum*; uti aquæ, & ignis interdictio *lata fuga* appellatur a Marciano *L. 5. de interd. & releg.* Cæterum utriusque pœnæ idem erat effectus: utraque enim caput de Civitate eximebat, §. 2. *b. 1. L. 2. ff. de public. judic.*; unde qui eam patiebantur, ea, quæ Juris civilis erant, amittebant omnia; non vero quæ Juris Gentium. In Regno nostro mediam hanc deminutionem subeunt deportati, &, qui his comparantur, relegati, *De Rosa ad cons. Neap. proëm. n. 458.*, atque ad triremes damnati; modo utrumque perpetuæ pœnæ causa fiat.

§. 225. Minimam denique subeunt ad-

N

ro-

rogati, eorumque filii; itemque, qui in adoptionem (non extraneo, secundum novam Justin. Const. (§. 201.)), & filii emancipati, qui cum sui juris fiant, statum mutare intelliguntur; nimirum familiam, §. 3. *b. r.* Nec audiendus Paulus, qui causam, cur emancipati capite minuerentur, repetit ex imaginaria servili causa, in quam illi deducebantur, L. 3. §. 1. *de caput. minut.*: nam emancipati etiam post veterem emancipationem exeunt e familia patris sui. At Jure novo, maxime *ob Nov. 118. cap. 4. & 5.* etiam emancipatis jura successio- nis, & familiæ (si hæc lata significa- tione sumatur) salva sunt. Nec bene Tri- bonianus post abolitam Anastasiana Con- stitutione veterem illam servitutis imagi- nem, rationem Pauli in Pandectis inse- ruit.

§. 226. Jus agnationis omni deminu- tione capitis, etiam minima, *plerumque* perimitur: nam est Juris civilis; & ci- vilis ratio civilia Jura corrumpere potest. Sed jus cognationis perimitur maxima, & media, non item minima: nam civilis ra- tio naturalia non omnino corrumpit, §. 6. *l. r.* *to plerumque* Tribonianus usurpavit, ut
osten-

ostenderet, non semper novo Jure minima capitis deminutione perimi jura familiaræ. Sane Anastasiana Constitutione fratres emancipati ad fratrum legitimam successionem, & tutelam vocantur, *L.4. C. de legit. tutel.* Et lege Justiniani filius emancipatus ad patris, & fratrum successionem legitimam admittitur, *L. ult. C. de legit. hered.* Quoniam vero cognatio est jus sanguinis; quod nullo Jure civili perimitur, *L. 8. ff. de R. J.*, dicendum est, Tribonianum spectasse cognationem, quatenus pertinet ad leges, seu ad effectus civiles; quales sunt tutelæ, hereditates, bonorum possessiones &c. Nunc intelligitur Horatius, de Regulo scribens *Lib. III, ode 3. Fertur pudicæ conjugis osculum, Parvosque natos, ut capitis minor, A se removisse.*

T I T. XVII.

DE LEGITIMA PATRONORUM TUTELA.

§.227. **L** Ex XII.Tab. hereditatem liber-
 torum, libertarumve, sine suo
 herede intestato decedentium, deferebat pa-
 tronis, eorumve liberis. Hinc Prudentes,
 sive interpretes XII. Tabularum, ex mente
 legis horum *legitimam* in illos tutelam
per consequentiam introduxerunt; nimirum
 argumento ducto ab hereditate ad tute-
 lam, quo jam usi erant Decemviri. Si
 vero mulier impuberem servum manumit-
 tat, ad hereditatem vocatur, non ad tu-
 telam, *L. 1. & 3. de legitim. tut.*;
 idque obtinuit etiam Justiniani ævo;
 nam Imperator tantum matri, & aviæ
 jus singulare fecit, *Nov. 84. cap. 2., Auth.*
matri, & aviæ, cum seq. C. quando mul.
offic. tutelæ fungi poss., ut eæ legitimos
 omnes tutores excludant.

T I T. XVIII.

DE LEGITIMA PARENTUM TUTELA.

§.228. **E**Xemplo patronorum recepta tutela legitima parentum, si filios, filiasve, nepotes, neptesve ex filio, ac deinceps, impuberes emancipando, in eos jus patriæ potestatis amittant. Olim tutela ista tum erat legitima, cum emancipatio contracta fiducia fiebat; aliter extraneus emtor, per patroni similitudinem, tutelam nanciscabatur, & proprie dicebatur *tutor fiduciarius*, Ulp. *Fragm. tit. 11., §. 5.* Postea similitudine rationis (non auctore Ulpiano, uti fere omnes putant), parentes ipsi dicti fuere *fiduciarii* tutores. Sed novo Jure, uti diximus, emancipatio semper contracta fiducia facta intelligitur, *L. 6. C. de emancipat. liberor.* Et Jure novissimo pater, tanquam proximus cognatus, ex ipsa lege tutor est; quia & ab intestato succedit, *Nov. 118. cap. 2. 4. & 5.*

T I T. XIX.

DE FIDUCIARIA TUTELA.

§. 229. **L**egitimæ quoque tutelæ vicem obtinet fiduciaria. Tutelæ fiduciariæ tres sunt veluti gradus: primus, cum pater, avo mortuo, tutelam suscipit filii sui ab avo emancipati: secundus, cum patruus (deficiente fratre emancipati) tutelam suscipit fratris filii emancipati: tertius, cum, patre defuncto, frater natu major fratrum, sorororumve minorum tutelam suscipit, *princ. b. r.* Quia vero Modestinus in *L. 4. de legit. tut.* huius tertii gradus tantum mentionem facit, nec aliorum graduum in reliquis Juris libris mentio est, ideo nonnulli unum illum agnoscunt, contra Theophilum, & veteres libros Institutionum. Profecto in Institutionibus quædam sunt, quæ non alibi. Vocatur hæc tutelæ species (ob alterius vocabuli inopiam, uti Hotomanus putat) *fiduciaria*, etiam a fiducia, quæ in emancipationibus contrahi solebat: & ita appellatur, ut proprio nomine a tutela *legitima* patronorum distingueretur. Hic quæ-

quæritur, cur fratres sint tutores fiducia-
rii, & filii patronorum tutores legiti-
mi? Respondet Tribonianus, quia liber-
tus si servus mansisset, in potestate filio-
rum domini esset post hujus mortem;
filius vero emancipatus non esset in fratrum
potestate. Sed id verum est, si emanci-
pat pater, falsum, si avus. Potius ratio
est, quia filios patroni vocabat ad here-
ditatem Lex XII. Tabularum, non
fratres. Ceterum jure cognatico ad a-
gnatici formam redacto a Justiniano, qui
olim fiduciarii erant, videntur facti le-
gitimi. Profecto apertis verbis legis
& pater post mortem avi, & fratres, &
patrui, tanquam proximi cognati, ad suc-
cessionem, atque ad emancipatorum tu-
telam vocati sunt, *L. 4. C. de legit.
tutor. Nov. 118. cap. 2., & seq.*

T I T. XX.

DE ATILIANO TUTORE, ET EO, QUI
LEGE JULIA, ET TITIA DABA-
TUR.

§. 230. **R** Emanet tertia tutelæ species, scilicet honoraria, seu dativa; quæ a Magistratu datur (quandoque generali locutione ipsi testamentarii tutores *dativi* dicuntur, *Ulp. Fragm. tit. II. §. 14.*). Dativa tutela est actus legitimus, quo deficientibus testamentariis, vel legitimis tutoribus, constituitur tutor a Magistratu ex lege, *princ. b. r.* Itaque decernitur a Magistratu tutor, siue cum nullus testamentarius, legitimusve tutor est, siue cum spes est alterutrius, & interim aut conditio, diesve pendet testamentariæ tutelæ; aut pure scripto tutore, nondum heres adierit hereditatem (nam si hereditas non adeatur, testamentaria tutela concidit); siue tutor ab hostibus captus sit, vel Reip. causa absit, §. 1. & 2. *b. r.* Sit regulæ loco, quod habet Ulpianus in *L. II. de testament. tut.*, quamdiu testamentaria tutela spectatur,

ratur ; cessat legitima . Devoluta vero ad testamentarium tutela , si deinde excusatus sit , vel remotus , dandus est a Judice tutor , non venit legitimus . Quæ forte placuerunt ; quia paterfamilias ad tutelam vocando extraneos , de agnatorum fide dubitasse videtur ; & quia sola spes testamentarii heredis , legitimos a successione excludit . Verum si tutela testamentaria tutoris morte finita fuerit , tum legitimo tutori , non dativo locus erit ; quia tutela ipso jure finitur , *L. 6. ff. de legit. tutor.* Quæ omnia & supra exposita sunt (§. 216. , & 218.)

§. 231. Tutoris autem datio ex Romano Jure , neque imperii est , neque jurisdictionis ; nimirum ordinariæ , *sed ei soli competit , cui nominatim hoc dedit vel lex , vel Sænum , vel Princeps , L. 2. §. 2. ff. de tutelis.* Nimirum non omnia , quæ Magistratus expediunt , ordinario eorum officio continentur ; sed quædam extra ordinem a lege demandantur (uti est tutelæ datio) ; atque ideo tunc competunt , cum speciatim , & nominatim lex dederit . Mandata autem jurisdictio alteri nequit mandari , *L. 1. ff. de offic. ejus , cui mand. est jurisd.* Hinc mandata jurisdictio-

stione; tutoris datio minime transit in eum, cui jurisdictio mandata est, *d. L. 1., & L. 8. ff. de tutor. & curator dat.*

§. 232. Diversis temporibus, diversis Magistratibus tutoris datio concessa est. Et Romæ dativa tutela primum instituta fuit lege Atilia, fortasse lata a Lucio Atilio Regulo Trib. Pl. anno 443.: & ex eo Plebiscito pupillis, & mulieribus tutore carentibus tutores dabantur a maiore parte Tribunorum Pl., qui tunc erant decem. Ita favore pupillorum; quamvis alias vel unus Tribunus Pl. intercedendo, aliorum placita turbaret. Id obtinuit Roma tantum, *princ. b. t.*, non vero in Municipiis Italiæ, quemadmodum asseverat Everardus Otto. Sed inquit Ulp. in *L. 3. de tutor., & curatorib.*, tutores etiam datos fuisse a Magistratibus Municipalibus, sc. Præfectis in Præfecturis, vel Duumviris in Coloniis, & Municipiis. Atque id moribus introductum videtur: nam Ulp. ait, *eoque jure utimur*; forte quia jus, quo Urbs Roma vivebat, & alibi servandum esset, si aliæ deficerent leges, *L. 35. de LL.* Extra Italiam denique Atilianum jus fuit ad Provincias productum, ubi Præ-

Præfides tutores dabant ex L. Julia , & Titia anno 722. lata, Augusto III. , & Marco Titio Rufo Cfs.: quæ una lex est, non separanda , uti facit Theophilus .
V. Heinecc. Hist. Jur. Lib. 1. c. 4. §. 164.

§. 233. Romæ Atilia lex ad Claudium usque servata . Primus hic *sanxit* , ut *pupillis extra ordinem tutores a Consulibus darentur* , §. 3. *b. 1.* ; *Suet. in Claud. c. 23.* Ita res stetit usque ad Marcum Antoninum Philosophum , qui Prætorem tutelarem ab Urbano diversum ad eam rem constituit ; isque *tutelaris* dictus , non a tutela Urbis , uti Pitiscus *in lex Antiqu.* , sed a tutoribus dandis . Causa vero novi post legem Atiliam Juris , potius esse debuit incuria Prætorum , Tribunorumque Pl. , quam ea , quæ a Tribon. afferitur , quia deerat aliquid in primis legibus ; sc. cautio a tutoribus exigenda rem pupilli salvam fore , & actio ad compellendos tutores ad tutelæ administrationem . Nam hæc , quæ deerant in antiquis legibus , facere poterant , ut nova lege supplerentur , non ut dandi tutoris jus transferretur in alium Magistratum . At quid est in §. 3. *b. 1.* ? defuisse ex his LL. ,
idest

ideſt. Atilia, ac Julia & Titia, tutores dari, poſtquam dari cœperunt a Conſulibus, tum a Prætore tutelari? Anne ab his etiam in Provinciis dati tutores? Tacent Interpretes. Accuſo ego Triboniani negligentiam.

§. 234. Poſtea moribus receptum, quod ſequitur in §. 4.: *ſed hoc Jure utimur, ut Romæ quidem Præfectus Urbi* (extra ordinem), *vel Prætor* (tutelarıs: & Prætor intra Urbem, Præfectus Urbi intra centefimum ab Urbe lapidem, vel in provinciis ſuburbicariis, tit. ff. de off. Præf. Urb. Jac. Gothof. Diff. de provinciis ſuburbic.) *ſecundum ſuam juridiſtionem* (.h.e. locum ſuæ juridiſtionis): *in Provinciis autem Præſides ex inſpectu tutores crearent, vel Magiſtratus* (Municipales) *juffu Præſidum, ſi non ſint magnæ pupilli facultates.* Oſcitanter Tribonianus verba *hoc Jure utimur*, a quodam Jcto deſumpta, hic appoſuit. Cum enim ea ſcribebat, jam prodierat nova Juſtinianeæ Conſtitutio, ex qua in Provinciis novam tutoris datio formam acceperat.

§. 235. Tandem Juſtinianus poteſtatem dandi tutoris in Provinciis dilucidius, diſtinctiusque propoſuit. Cavit enim,

nim,

nim, ut si pupilli facultates quingentos solidos (solidi erant iidem, atque aurei; & singuli sub Impp. Christianis sextam unciae auri partem valebant, *L. 5. C. de susceptor. L. X.*) minime excederent, Defensores civitatum (ab Impp. constituti exemplo Tribunorum Pl., ut plebem tuerentur, *L. 4. C. de defenf. Civitat.*) una cum civitatis Episcopo, vel aliis publicis personis (quæ testes erant: modo iis civitas abundaret), vel Magistratus (ita legendum ex *L. 30. C. de Episcop. aud.*, non vero vel alias publicas personas, idest Magistratus), vel Juridicus Alexandrinæ Civitatis (qui Alexandriæ jus dicebat, *L. 1. ff. de offic. Juridici*, sub Præfecto Ægypti, ab Octaviano Cæsare post devictum Antonium constituto, qui *Præfectus Augustalis* audit, uti in *ff. C. C.*), non expectata jussione Præsidum, exacta tamen fidejussione, quæ periculo esset eorum Magistratuum, tutores crearent. Sin pupilli, vel adulti quingentarii sint, Præsides ipsi ex inquisitione, vel Magistratus jussu Præsidum tutores darent, §. 5. *h. t.*

§. 236. Igitur Justin. statuit, ut si pupilli facultates quingentos solidos, sive au-

aureos non excederent, liceret omnibus Magistratibus cum civitatis episcopo tutores creare: si vero excederent, rem esse Præsidi deferendam, ex ejusque jussu administrandam, *L. sancimus C. de episc. aud.* Ex his liquet, quod si tutores a majoribus Magistratibus dentur, inquisitione opus est, non satisfactione; si a minoribus, satisfactione, non inquisitione. De satisfactione infra *tit. 24.* Quoad inquisitionem, in quatuor per Magistratus inquiri debet; nimirum quæ sint tutoris facultates; qui mores; an tutelam gerere velit; & an pecuniam dederit, ut eam consequeretur, *L. 21. de tutorib., & curatoribus datis.*

§. 237. Quemadmodum autem naturalis postulat æquitas, pupillos alterius tutela regi, §. 6. *b. t.*; ita tutorem, quovis modo tutela finiatur, reddere rationem compelli judicio tutelæ; sed finita, uti dixi, omnino tutela, §. 7. *b. t., & tit. ff. de tutelæ, & rationib. distrab.* Hodie tutoris datio ordinariæ est jurisdictionis; ideoque omnium judicum, quibus est civilis jurisdictio; sive sint Regii, sive Baronales. De Balio feudatariorum, ex *Const. minoribus* egimus in Jure Regni.
TIT.

T I T. XXI.

DE AUCTORITATE TUTORUM.

§. 238. **T**utoris quacumque ratione constituti officium constat administratione, & auctoritate. Cum tutor pro infante omnia agit, & suo, non pupilli nomine, administrat, proprie dicitur *tutelæ gestio*, seu *administratio*, quod tutor loco domini habetur, L. 27. ff. de administratione tutor. Infans vero intelligitur, qui septem annos nondum excessit, L. 14. ff. de sponsal. Quod si pupillus sit major infante, ipse, si tutor velit, agit, tutoris auctoritate, L. 9. ff. de adquir. hered. Et tutela large dicitur potestas, §. 1. supra de tutelis; proprie est auctoritas, sc. jus probandi, quod agitur, L. 3. de auctor. tutor.: nam potestas magis imperii vox est. Itaque tutoris munus potissimum consistere videtur in persona pupilli tuenda, ut is educetur, instituatur; in rebus ejus gerendis, ut omnia in ejus cedant utilitatem; & in auctoritate ei præstanda, ut ea probe tutor, quæ a pupillo, vel cum pu-
pillo

pillo geruntur. Duo autem priora exponuntur in tit. ff. & C. de *administrat. tutor. vel curator.*; tertium hoc titulo.

§. 239. Definitur tutoris auctoritas, actus legitimus, quo tutor sollemniter probat, quod pupillus major infantia gerit, ut quod huic deest ob lubricum ætatis, suppleatur. Verum non semper ea necessaria est. Favore enim pupillorum receptum est, eos meliorem suam conditionem facere posse sine tutoris auctoritate; deteriorem non aliter, quam tutore auctore, *princ. b.t.* Hinc illi per se recte possunt quocumque lucrativo titulo acquirere, non vero aliquid tradere, promittere, alienare sine auctoritate tutoris. Adeo autem verum est, pupillos sine tutoris auctoritate ad aliquid obligari non posse, ut ii contractus, qui utramque partem obligare deberent, ex una tantum parte pariant obligationem: nimirum, si tutoris auctoritas non interveniat, qui cum pupillis contrahunt, obligantur, non item pupilli, *princ. b.t.* Hæc de obligatione civili, ex qua actio datur, accipienda sunt: naturaliter enim obligantur pupilli sine tutorum auctoritate: modo sint pubertati proximi. *V. Vinnium in §. 9. infra de iniuri.*

inutilib. stipulat. Quin etiam civiliter sine tutorum auctoritate obligantur, si locupletiores facti sint, *L. 6. de negotiis gestis*, aut ex re nascatur obligatio, *L. 1. § 5. ff. de auctor. tutor.* Præterea ex eodem principio Cajus, *L. 9. h. t.*, & ex eo Tribonianus, *§. 1. h. t.*, scribunt, non aliter posse pupillos adire hereditatem, aut suscipere ex fideicommisso, aut bonorum possessionem petere, quam ex tutorum auctoritate; *quamvis illis lucrosa sit, nec ullum damnum habeat.* Ita legitur apud Cajum, & Theophilum. Cum vero ponitur hereditas *lucrosa*, certe in mendo est vulgata lectio, *nec ullum damnum habeant*, *Ant. Augustin. Emend. III. 7.* Hoc cautum fuit, tum quia aditio hereditatis, præsertim ob cretionem cum ea conjunctam, sollemnia quædam efflagitabat, *L. 77. de R. J.*, quæ peragere pupillus non poterat, nisi auctore tutore, *L. 19. h. t.*: tum quia pupilli creditoribus, & legatariis obligarentur: nec obligari possunt sine tutorum auctoritate, *L. 8. de acquir. hered.*

§. 240. Cum auctoritas tutoris sit actus legitimus, rejicit diei, vel conditionis adjectionem: ac pure interponen-

O

da

da est; etsi contractus sit conditionalis, L. 8. ff. b. r. Duo autem requiruntur, ut tutor auctoritatem suam interponere possit: primum ut in ipso negotio animo, & corpore *præsens* sit, certoque cognoscat, quid rei, & qua fide a pupillo generatur: unde nec mutus, nec surdus dari tutor potest, L. 1. de tutel.: alterum, ut statim, ac peractum est negotium, auctor ipse fiat, & quodammodo integret personam pupilli, qui ex se contrahere non posset, §. 2. b. r., ubi dicitur, quod debet statim in ipso negotio *præsens* auctor fieri: post tempus vero, vel per epistolam interposita auctoritas nihil agit. Dicitur statim, h.e. uno statu, antequam animus aliis rebus adjiciatur; quæ regula est actuum, qui *continui* dicuntur, L. 137. ff. de V. O. Quare nulla emendatione opus est in L. 25. §. 4. de acquir. her. ubi, tutoris auctoritas interponitur perfecto negotio.

§. 241. Sed tutor in rem pupilli auctor sit, non in rem suam. Hinc non recte res pupilli emit, L. 34. §. 7. ff. de contrab. emt.; nisi palam, & bona fide, veluti publica auctione, L. 5. C. eod. Hinc etiam si inter tutorem, & pupil-

pillum judicio agendum sit, dari debet curator in litem, si nullus alius sit tutor, vel agi debeat cum omnibus contutoribus, §. 3. *b. t.* Ante Justinianum pupillo dabatur a Prætoris tutor, qui *Prætorius* dicitur a Triboniano, *Prætorianus* ab Ulpiano *Fragm. tit. 11. §. 24.* Et moribus eum datum esse, ait Ulpianus idem; nimirum contra duo Juris principia, & quod tutorem habenti dari nequit tutor, & quod dari nequit certæ causæ. Quoniam vero aliud erat principium, sc. ea, quæ sollemnitatem Juris desiderant, peragenda esse cum tutoris auctoritate, nec consensum sufficere curatoris, *L. 19. b. t.* (curator enim quæ facti sunt, exequitur; tutor, quæ juris); ex hoc ii mores perfecti videntur. Postquam vero sollemnia judiciorum vetera defuerunt, dari coepit curator in litem, cujus in ff. mentio sæpe fit. Et primum curator ipse ex Justiniano Jure dandus, definebat curator esse, expleto judicio, *d. §. 3.* Deinde perpetuus videtur factus *Nov. 72. cap. 1. & 2.* Verum id vix contingere potest, Nam *d. Nov. 72.* vetuit tutorem creari eum, qui pupilli debitor, vel creditor esset: & ei, qui pupillo, aut cui pupillus post

coeptam tutelam debere coepit, perpetuum curatorem adjungi voluit. Putant DD., ab hac regula excipi eos, qui ex certa scientia testamento tutores dati sunt. Illud certum est, matrem, & aviam, neque debito, neque credito impediri, quominus filiorum, aut nepotum suorum tutelam gerant, *Auth. ad hęc. C. quando mul. officio tutelæ fungi possit.*

§. 242. Præter tutoris auctoritatem, judicis sententia opus est in pupillorum prædiis alienandis, *L. 4. C. de prædiis, & aliis reb. Minor.* Item si auctoritate tutoris solutio pupillo facta fuerit, & inde pereat pecunia, debitor conveniri potest, si judicis decretum in solutione non intervenerit; idque nisi agatur de annuis redditibus, & pensionibus, *L. 25. C. de admin. tutor.* Adnotandum denique, tutoris auctoritatem hodie non censi actum legitimum; & vix servari discrimen inter infantem, & majorem infantia; sed plerumque tutores ipsos per se negotia omnia expedire,

T I T. XXII.

QUIBUS MODIS TUTELA FINITUR.

§.243. Tandem tutela vel ipso jure, vel Magistratus ministerio certis quibusdam modis finitur. Et ipso jure finitur I. adveniente pubertate; quæ in feminis duodecimo anno expleto fuit constituta ab Augusto, lata lege Papia Poppæa, *Dio lib. 54.*; in masculis vero Cassiani pubertatem æstimabant *ex habitu corporis*; Proculiani ex certo annorum numero; *quidam veteres* cum Prisco (Javolenus hic, an Neratius fuerit, non liquet) ex utroque æstimabant, *princ. h. r., & Ulp. Fragm. tit. 11. §. 28.* Habitu corporis accipit Tribonianus pro corporis inspectione, quæ fuit a Justiniano sublata *in princ. h. r., & in L. ult. C. quando tutores esse desinunt.* Tribonianum in interpretando *habitu corporis* turpiter lapsum putant nonnulli: sed eum alii tuentur. Huberus autem *Digress. III. 14., & Bynkershoëkius Obs. III. 24.,* mediam tenuere viam, existimantes in sola nuptiarum causa, si de gignendi vi in ma-

sculis controversia foret, partes ipsas corporis inspicere consuevisse. Certe Justinianus falsum ritum veteribus tribuit, ubi agebatur de tutela ob pueratē finienda, condendisq; testamentis: nam de ea re nullum vestigium in antiquitatis monumentis. Ad hanc *habitus corporis* latinis erat externa corporis forma, ex qua de pubertate constare poterat, *Cic. pro Caelio cap. 24., & de Nat. Deor. I. 35.* In tanta de pubertate masculorum incertitudine saepenumero parentes testamento suo annum constituiebant, quo filii puberes censerī deberent. *V. Merill. Obs. V. 16.* Justinianus denique in *d. L. ult.* haberi puberes voluit, mares 14. anno; feminas 12. majores; quod olim visum Proculianis. Hodie tamen etiam puberes ad majorennitatem usque, ab ipsis tutoribus regi solent.

§. 244. II. Finitur tutela capitis diminutione pupilli, aut tutoris: veluti si pupillus ab hostibus capiatur, vel in servitutem redigatur pubertati proximus, nimirum capax doli (quod alii ex annorum numero definiunt, alii rectius arbitrio judicis deferunt), tanquam *ingratus a patrono*: quod optimum exemplum
ex

ex Theophili auctoritate inserit Hotomanus in §. 1. *b. t.* Licet non adsit in *L. 14. de tutel.*, ex qua is §. descriptus est, neque in aliis codicibus. Tum si pupillus, doli quoque capax, deportetur, vel servus poenæ fiat. Tandem si adrogetur, §. 1. *b. t.* Finitur etiam tutela si tutor desinat esse civis, aut liber, §. 4. *b. t.* Sed minima capitis deminutio tutoris non perimit tutelam testamentariam, & dativam, quæ a filiisfamilias recte exercentur; perimit legitimam, quæ jure agnationis defertur *d. §. 4.* Post Novellam 118. *cap. 5.* ne legitima quidem tutela tollitur ob minimam capitis deminutionem tutoris; veluti si iste in adrogationem se dederit: nam tutela, uti & hereditas, defertur etiam cognatis, quorum jus non tollitur ex minima deminutione, uti mox dictum est.

§. 245. III. Finitur tutela ex conditione, quæ existit, aut tempore, quod venit, si ad certam conditionem, certumve tempus sit datus testamento tutor, §. 2., & §. *b. t.*

§. 246. IV. Tutela finitur morte naturali pupillorum, tutorumve, §. 3. *b. t.*: nulla enim tutela hereditario jure transfertur, *L. 16. de tutel.*: nam in publi-

cis muneribus non est successioni locus. Favore tamen pupillorum invaluit, ut negotia a defuncto tutore inchoata, ejus heredes perficiant; modo perfectæ ætatis, & mares fuerint, *L. 1. ff. de fidejussorib., & nominator., & hered. tutor.* Ad liberos virilis sexus perfectæ ætatis legitima tutela descendit, non jure hereditario, sed proximæ agnationis.

§. 247. Modi, quibus non quidem *tutela finitur*, sed quis *desinit tutor esse* (quæ loquutio placet Cujacio in §. 6. *b. r.*, sed perpetua non est), sunt tutoris remotio, & excusatio, *d. §. 6.* De utraque ea re mox peculiaribus titulis.

§. 248. Finita tutela tutor ad reddendas rationes tenetur *tutelæ judicio*. Hinc titulus *C. arbitrium tutelæ*. Atque ex hac actione tenetur tutor etiam solvere, quod ejus culpa non acquisiverit, cum honeste potuisset, *L. 7. C. cod.* Si dolo malo pupilli bona interceperit, dabitur actio *de rationibus distrabendis in duplum*. Hodie quotannis administrationis rationes redduntur: & hinc quovis tempore, si tutor in mora fuerit, ad eas reddendas compelli potest, vel judicis officio, vel urgentibus cognatis; non vero a pupillo *judicio tutelæ*. TIT.

T I T. XXIII.

DE CURATORIBUS .

§.249. **A**D patresfamilias progrediamur, qui sub curatoribus agunt. Duo sunt curatorum genera. Primum eorum, qui nulla personæ habitatione, si necessitas exigat, bonis præponuntur; puta debitoris, vel absentis, vel latitantis; heredis, qui in utero est; domini ab hostibus capti; & de iis agitur sub tit. ff. *de curatore bonis dando*. Alterum eorum, qui certis personis alieno auxilio indigentibus, ad eorum res administrandas dantur, & de his nunc agimus. Curatio itaque est potestas administrandi negotia, & rem familiarem ejus, qui quoquo modo rebus suis superesse ipse non potest. Dicitur *quoquo modo*, ut duæ horum curatorum species comprehendantur: una eorum, qui ob animi, vel corporis morbum dantur furiosis, prodigis, mentecaptis, mutis, & surdis, iisque omnibus, qui perpetuo morbo laborant: altera eorum, qui ob ætatem dantur minoribus. Curatores autem (sæpe *procurato-*

res

res etiam appellati) eo maxime differunt a tutoribus, quod hi personæ, illi patrimonio directe dantur: Latini quandoque curationem *tutela* nomine complectuntur; sed ejus locutionis exempla in libris Juris non prostant.

§. 250. Curatores aut *legitimi* sunt, qui a lege XII. Tab. dantur, aut *honorarii*, qui a Prætoribus constituuntur, Ulp. *Fragm. tit. 12. §. 1.* Testamentarii curatores nulli sunt: sola enim impubes ætas patrum arbitrio subest; non ea, in qua liberi testamentum condere jure possunt. Deinceps invaluit, ut a patre, vel matre testamento dati curatores confirmarentur a Prætoribus, vel Præsides, §. 1. *b. t. L. 1. ff. de confirmat. tutor.*

§. 251. *Lex XII. Tabularum furiosum, itemque prodigum, cui bonis interdictum est, in curatione jubet esse agnatorum.* Ita Ulp. *d. loc. §. 2.*, & Tribon. §. 3. *b. t.* De curatore furiosi nominatim Lex loquitur. Deinde ad prodigum producta est ejus sententia: prodigus enim furiosum facit bonorum exitum, *L. 12. §. 2. de tutor. & curator. datis.* Obstare videtur Ulpianus idem in *L. 1. de curator. furiosor.* ubi, *Lege XII. Tab. prodigo interdici-*
ci-

citur bonorum suorum administratio : quod moribus quidem ab initio introductum est. Complures sunt, qui mores hic interpretantur non Jus Regionum temporum, sed Jus ex interpretatione XII Tab. profectum. Furiosi autem, qui in rabiem acti, in se, & in alios desævire solent, ipso jure agnatorum curæ subsunt : at prodigi, si iis a Præatore bonis interdictum sit, L. 10., & 15. ff. de Curatoribus furioso dandis: furor enim perspicuis signis cognoscitur; prodigalitas contra non ex natura, sed moribus, & patrimonii quantitate dijudicatur. Hinc Horatius; interdicto huic omne adimat jus Prætor, & ad sanos abeat tutela propinquos.

§. 252. Videtur autem Lex XII. Tab., tum ejus interpretes, ex ea ipsa regula curationem detulisse, qua detulerat tutelam: nam quemadmodum pupillorum, ita furiosorum, prodigorumque, & hereditates, & ideo tutelæ ad agnatos, ac gentiles redibant. Hinc effatum illud in stultum hominem, *ad gentiles, & agnatos.* At Jure novo Magistratus, causa cognita, furiosis, & prodigis curatores constituunt, §. 3. h. r.; tamen si non facile præterire debeant idoneos propinquos, L. 13. ff. eod.,

ead., & L. 5. C. de curat. furioso.

§. 253. Sequuntur honorarii curatores, qui a Magistratibus constituuntur, sive jure officii sui, sive ex legum præscripto; quod nimirum leges curatores dari jubeant, sed personas non designent eo munere onerandas. Tales sunt curatores, qui dabantur libertinis prodigis, qui libertini olim fieri heredes patri non poterant; cum nulla veteri Jure esset cognatio servilis. Tales etiam erant, qui dabantur ingenuis prodigis, si patri heredes ex testamento facti essent, *Ulp. Fragm. tit. 12. §. 3.* Ex his liquet, legitimæ prodigorum curationi tum fuisse locum, cum prodigi ingenui ab intestato heredes existissent. Præterea honorarii, vulgo censentur curatores, qui dantur surdis, mutis, & perpetuo morbo laborantibus. De mutis, surdisque sunt LL. 8. & 12. de tutor., & curator. dat., quæ etiam sub nomine laborantium morbo perpetuo eos omnes comprehendunt, qui in ea sunt causa, ut rebus suis ipsi superesse non possint. Honorarii pariter dici solent curatores, qui dantur mentecaptis, seu perpetuo amentibus. De hac tamen re jure merito dubitandum. Non enim verisimile

le est, nihil Decemviros cavisse de mentecaptis, qui in duriore statu sunt, quam furiosi: mentecapti enim, sive amentes, dementesve (qui, uti Festus ait, de sua mente discesserunt) in sua perdurant amentia; furiosi contra temporario morbo corripiuntur, & inducias plerumque habent. Proinde probabile est, Decemviros ipsos *furiosi* nomine etiam mentecaptum intellexisse. Apposite Cicero *Tuscul. Quæst. III. 5.* testatur, furorem in XII. Tab. esse *mentis ad omnia cæcitatem*, quæ par est in mentecapto, & furioso. Ad hæc Julius Capitolinus in *Marco Antonino Cap. II.* ait, Curatores datos XII. Tabulis *propter lasciviam, vel propter dementiam*. Quare Tribonianus §. 4. *b. 1.* si inter honorarios recenset curatores mentecaptis datos, aut *furiosum* in XII. Tab. stricte accipit, aut illud scribit, quia videbat mentecaptis curatores a Magistratu dari, *L. 6. ff. de curator. furioso dand.* Igitur magis est, ut hos curatores inter legitimos recenseamus. Nec obstat quod in *L. 8. de tutor. & curator. datis* Prætoris mentio fiat: nam tantum ii honorarii sunt, quos ipse Prætor primum instituit. In legitimis curatoribus dandis etiam

etiam cognitione Prætoria opus est, ut constet, eum, quem esse in curatione iussere Decemviri, vere talem esse, qualem ii finxere; quoniam plerumque vel furorem, vel dementiam fingunt, quo magis, curatore accepto, onera civilia detrectent, *L. 6. de Curat. furioso*. Quin a Prætoribus dari curatorem furioso dicitur in *d. L. 8. §. 3.*, & generaliter omnes curatores a Magistratibus dantur, *§. 1. b. t.*

§. 254. Inter honorarios curatores sunt, qui puberibus sive masculis, sive feminis dantur, quousque minores sunt. *Ulp. d. §. 4.* Hinc Tribonianus *princ. b. t.* scribit, masculi puberes, & femine viripotentes, usque ad vigesimum quintum annum completum Curatores accipiunt. Quod de feminis hic dicitur, Jus est recentius Constantino, ad cujus usque tempora perpetua erat feminarum tutela, *L. 2. C. Tb. de tutor. creand.* Annum vero vigesimum quintum compleri necesse est ob utilitatem minoris, *L. 3. §. 3. de Minor.* Eo anno minorem ætatem finiri, primum cavit Lex Lætoria lata a M. Lætório Planciano, sive an. U. 490., quo Tribunatum plebis, sive an. 497., quo gessit Præturam. Hanc legem Plautus

vocat *Quinamvicenariam* ; atque ex ea factum nomen *legitimæ* ætatis, quia post annum 25, quo pervenit homo *ad statum suum*, L. 77. §. 14. *de leg. 2.*, & *virilis vigor completur*, L. 1. §. 2. *de minor.*, rei familiaris administrationem ea lex adultis permittit.

§. 255. Antiquissimis Romanorum moribus puberes adolescentes, qui non otio torpebant, sed vel ruri, vel militiæ, vel pacis studiis incumbabant, nullis curatoribus addicti fuere. At ubi luxus, aliæque pessimorum causæ morum post XII. Tab. tempora inoleverunt, adolescentibus dari cœperunt curatores, sed per interdictum ; ne qua infamiæ nota illi aspergerentur : majoribus namque placuit, furiosos solummodo, & prodigos habere curatores. Quare lex Lætoria inter alia cavit, ut Prætores darent curatores adolescentibus 25. annis minoribus, *qui peterent, & causa cognita*. Sed Marcus Antoninus Philosophus, ut omnibus adolescentibus, etiam non reddita causa, curatores darentur, constituit, seu potius Edictum Prætoris eam in rem antea latum confirmavit, & latius produxit. Sed Antoninus videtur etiam

voluisse, ut omnes peterent, & veluti sponte sua curatores acciperent adolescentes: nam non prius patrimonii administrationem eos a tutoribus accipere voluit, quam peterent, & acciperent curatores. Proinde Jcti post Antoninum, & Justinianus ipse, docent, invitos adolescentes curatores non accipere, §. 2. *b. t.* Ergo perperam Rævardus *Varior. l. 12.* incitizæ arguit Tribonianum. Solum in judiciis inviti adolescentes curatores accipiunt, *d. §. 2.*, quia sine curatoribus legitimam in judiciis personam non habent, *L. 2. C. qui legitimam personam standi in judicio*: unde, ni ita placuisset, minoribus agentibus, aut judicio conventis, adversarius elusorio judicio frustraretur: cum sententia adversus minorem lata ipso jure nulla sit, *L. 54. de re judic.* Idem dicendum, si debitor velit, aut cogatur minori solvere; ac si, qui tutor fuit, rationem administrationis suæ reddere velit; scilicet curatorem minor etiam invitus accipiet, *L. 7. de minor. L. 7. C. qui petant tutor. vel cur., & ubi petantur.* Postremo doctiores putant, in vecto Antonini Jure, mulieres, licet perpetuis subjectas tutoribus, etiam cura-

to-

tores accēpisse, qui earum bona administrarent, *Ant. Schult. in Paul. Recept. sent. lib. 2. tit. 19. §. 9.*

§. 256. Est & curatio pupillaris: quandoque enim impuberum tutori *solet* curator adjungi; veluti si legitimus tutor minime idoneus sit, vel fraudulenter tutelam gerat, §. 5. *b. t. L. 9. ff. de suspect. tutor.* Item si testamento, vel a Magistratu datus tutor idoneus non sit, licet sine fraude administret; tum si tutor non in perpetuum, sed ad tempus excusetur. Regula enim Juris est, tutorem habenti dari tutorem non posse, *L. 27. de testam. tutor.*; quæ profecta videtur ex verbis Atiliæ legis, quæ dari jufferat tutores non habentibus, *Ulp. Frāgm. tit. 11. §. 18.* Et plerumque Jctorum ratio est ipsa legislatoris voluntas, *L. 20. de tutorib., & Curator. datis.*

§. 257. Pergit Tribonianus §. 6. *b. t.*; quod si tutor adversa valetudine, vel alia necessitate (veluti si diffusa negotia sint, si dignitas, ætasve impedimento sit tutori, *L. 24. de administ. tutor.*) impediatur, quo minus negotia pupilli administrare possit, & pupillus vel absit, vel infans sit, quem velit, actorem periculo ip-

P

sus

sius tutoris Prætor, vel qui Provincia præerit, decreto constituet. Ex verbis vel absit, vel infans sit, eruitur, actorem proprie constitui litium causa, L. 31. §. 6. ff. neg. gest. Unde ab agendo nomen accepit. Nam si pupillus adsit, & fari queat, auctore tutore, sine Magistratus decreto, ipse sibi constituet procuratorem, L. 11. C. de Procurator. Si absit, aut infans sit, cum ex persona sua nequeat tutor in rem pupilli facere procuratorem (nam licet quantum ad administrationem, bonorum loco domini sit; tamen dominus litis non est ante ejus contestationem), decreto confirmandus actor a tutore nominatus, uti habetur ex L. 9. ff. rem rat. hab., L. 10. C. qui dar. tut., & L. un. C. de act. a tut. dand. Quare tamen quem velit in §. 6. ad tutorem referendum, cujus periculo actor constituitur: quæ vis est verbi nominare, uti ex L. 4. §. ult. de fidejuss., & nominat., L. 1. de magistr. conv. Atque hoc modo nominis novitate, sc. actoris, pupillo consultum est: nam procurator, qui tantum nomine distat ab actore, a domino esset constituendus, L. 1. & 33. ff. de Procurator.

§. 258. Magistratus iidem, qui dant tuto-

tutores, honorarios quoque dant curatores, §. 1. *b. t.*: & qui tutores esse possunt, dari quoque possunt curatores, non vero qui tutelam administrarunt, si se excusent, §. 18. *infra de excusat.*

§. 259. Jam curatores *consensu* bona administrant, nec eorum officium ad personas extenditur; nec ad inuptias, *L. 20. ff. de R.N.* Furiosi tamen salutem curare eos debere, dicitur in *L. 7. ff. de curator. furioso dandis.* Recepta autem mente, & valetudine, finem habet curatio furiosorum, & morbo impeditorum. Sed prodigorum tum demum finem habet, cum sublata a Prætoris fuerit bonorum interdictio, *L. 1. eod.* Adolescentum curatio majori ætate finitur. Possunt tamen ii antea veniam ætatis a Principe impetrare, *L. 2. C. de his qui veniam ætatis.* Hoc modo rerum suarum administrationem habent, nec amplius restitutionem in integrum; Verum res immobiles alienare, aut obligare sine Magistratus decreto non possunt.

§. 260. Denique contra curatorem competit *actio utilis negotiorum gestorum*, qua compellitur is ad rationes reddendas, damnum resarciendum dolo, culpa lata, vel levi datum; quæ actio quandoque di-

Etia est *tutelæ judicium*, L. 3. C. *arbitrium tutelæ*: & competit, curatione finita, licet ea durante singularum rerum nomine curatores conveniri possint. V. *Vinnium in §.7. de Atil. tut. l.4. ff. C. l. 16. de tutelæ, C. ration. distrab.* Apud nos major ætas 18. anno constituitur.

T I T. XXIV.

DE SATISDACTIONE TUTORUM, VEL CURATORUM,

§.261. **H**ucusque singillatim de tutoribus, & curatoribus. Quæ sequuntur ad utrosque indiscriminatim pertinent. Etsi vero solam satisfactionem præferat epigraphæ, duo tamen hoc tit. continentur. Primum est, in præparatione ad illorum munus satisfactionem exigere, de quo agitur in tit. *ff. rem pupilli salvam fore*. Alterum est actio in Magistratibus subsidaria; qua de re est tit. *ff. & C. de magistratibus conveniendis*. Ex Constitutionibus Principum tutores, curatoresve satisfacere jussi sunt rem pupilli, vel adolescentis salvam fore, §. 3. *su-*

3. *supra de Atil. tut.* Atque id curare Prætor debet, *princ. b. tit.* Quod si tutores, curatoresve satisfacere detrectaverint, antequam munus suum susciperent, eos captis pignoribus Magistratus coërcebit, §. 3. *b. t.* Satisfacere est aliquem securum facere, datis fidejussoribus, *L. 1. qui satisfacere cogantur.* Licet vero in Jure sint aliæ cautionum species; hic tamen fidejussio requiritur ob damni incertitudinem, *L. 7. ff. de Prætoriiis stipul.* Cum vero fidejussio stipulatione fiat, vel pupillus major infante stipulatur, vel si minor infante fuerit, servus proprius, vel publicus, vel quilibet extraneus a Prætore datus. Fidejussores constituti, actione ex stipulatu conveniuntur, licet nudo consensu, taciteque se obligaverint; nec divisionis beneficio ex Epistola Divi Hadriani gaudent, si plures pro eodem tutore fidejusserint, *L. ult. ff. rem pup. salvam fore.* Sed ex personis tutorum divisio competit, *L. 6. ff. de fidejussor., & nominator.* Hujusmodi autem stipulatio committitur, ubi cum tutore, curatoreve agi potest: & ex ea agitur non tantum ad damna, sed etiam ad lucra neglecta, & generaliter ad ea omnia, quæ in judicio tutelæ,

vel curæ veniunt: & tutor quidem tenetur finita tutela, curator vero statim ac res non salva esse cœperit, *L. 1. de tut., & rat. distrab.*, *L. 15. de adm. & peric. tut. vel cur.*

§. 262. At non omnes tutores, curatoresve satisdant: nam satisfactio remittitur testamentariis, & datis ex inquisitione, *princ. b. tit.* Nulla enim in eos mala suspicio cadit, aliquid detrimenti rebus pupilli, vel adulti afferri, quæ causa satisfactionem suavit. Remittitur etiam iis, qui a patre filiis emancipatis tutores dati, auctoritate Magistratus confirmantur; pro testamentariis namque habentur, *L. 3. ff. de confirm. tut.* Itaque satisfacere coguntur dati ex inquisitione a minoribus Magistratibus, & legitimi omnes. Quandoque vero ipsi testamentarii tutores, & ex inquisitione a majoribus Magistratibus dati satisfacere debent. Profecto si illi, mortuo testatore rebus suis exciderint, vel pravis moribus fore videantur, Prætor eos ad satisfaciendum coget, *L. 4. ff. de testam. tut.* Fieri etiam potest, ut tutores vel testamento, vel inquisitione dati, satisfactio obstringantur. Si enim plures sint, quoniam administratio com-

commodius ab uno, quam a pluribus exercetur, *L. 3. §. 6. de adm. tut.*, potest alter alteri satisfactionem offerens præferri (potest tutor offerre, utrum satisfactionem velit accipere contutor, an potius dare; sed non potest petere satis, h. e. satisfactionem a contutore, *L. 17. ff. rem pup. salvam fore*). In hac re Prætor complures fecit gradus a Tribon. enumeratos §. i. *h. t.* Primus gradus est, ut ei, qui ex pluribus tutoribus satisfactioni non obnoxiiis, satisfacere promptus sit, tutela deferatur. Secundus, ut si nemo satisfactionem offerat, is tutela fungatur, quem testator elegerit. Tertius, ut si nemo a testatore designatus fuerit, is tutor sit, in quem major pars collegarum consentit. Quartus denique, ut dissentientibus tutoribus, Prætor suas partes interponat, & causa cognita unum ex ipsis administratorem constituat, §. i. *h. t.*, *¶ d. L. 3. §. 1. ¶ 7.* Verum hæc obtinent, si agatur de tutela uni, vel alteri demandanda. Nam si tutores omnes gerere velint, aut petant administrationem inter se dividi vel in partes, vel in regiones, aut demum omnes satisfacere parati sint, ne alienum periculum inviti subire cogantur,

tur, a Prætorè audiendi sunt, *d. L. 3. §. 8., L. 17. de testam. tut.*

§. 264. Si a tutoribus, curatoribus, eorumve fidejussoribus damnum datum obtineri nequeat, prodita est actio in ipsos Magistratus, qui satisfactionem omiserint, aut minime idoneam acceperint, idque ex Scto, auctore Trajano, *L. 3. C. de Magistrat. conven.* Eaque actio in *L. 1. C. eodem* appellatur *utilis*, subaudi *tutelæ*; & in *L. 1. ff. eod. subsidia-ria*, §. 2. *b. r.*; nimirum si alio modo satisfieri in solidum nequeat. Cum Magistratum heredibus agitur etiam causa doli, vel culpæ dolo proximæ; cum Magistratibus ipsis, etiam levis culpæ, *d. l. 1.* Sed cave putes, Magistratus in hac causa fuisse *ordinem*, *d. L. 1.*; hoc est Magistratus Urbanos, & provinciales: sunt enim municipales, & Duumviri, *L. 5. C. eod.*, §. 3, *b. r.* Scite Tribonianus ait, eo judicio posse tantummodo cum iis agi, *qui exigere satisfactionem solent*; non cum iis, quibus tutores dandi jus est; intellige jure suo.

§. 265. Hodie quia apud nos actorum Magistri satisfactionem pro pupillis exigunt, ipsi, non Magistratus, actione subsidia-

fiduciaria conveniri deberent. Insuper tutores satisfiant juxta expositas Romani Juris distinctiones: at Balii indistincte, licet testamentarii sint, *De Curt. Resol. Feud. c. 3.*, & pro quantitate a Regia Camera Summaria præscripta: immo quotannis administrationis suæ rationes reddere dabent, *De Ponte de potest. Proreg. tit. 20. §. 1. de bal. dandis. De Marin. Resol. I. 137.* Vide nostras *Institutiones Juris feudalis.*

§. 266. Addere hic juvabit, tutores, & curatores, præter cætera, teneri bonorum repertorium facere, *L. 7. de adm. & peric. tut.*; & jurare, se rem ex fide, & utilitate gesturos, *Auth. quod nunc C. de curat. fur. vel prodig.* Præterea tutorum, curatorumque bona pro administrationis officio esse pignori tacite obligata, *L. 20. C. de admin. tutor. vel curator.*; nec eos posse pupillorum, minorumque bona immobilia, & ex inobilibus ea, quæ servando servari possunt, alienare sine cognitione, & decreto judicis, *L. 22. C. cod.*

T I T. : XXV.

DE EXCUSATIONIBUS TUTORUM , VEL
CURATORUM .

§. 267. **T**utela, & curatio sunt munera publica, sive civilia, quæ per consequentias bonum spectant Reip. Quod enim directe illud spectat, munus Reip. dicitur *L. 6. §. 15. ff. h. t.* Excusationes autem a publicis muneribus, quæ ob utilitatem ipsius Reip. invaluere, sunt exceptiones, sive causæ, propter quas cives munus publicum, adeoque tutelam, curamve suscipere non coguntur, vel prohibentur, *L. 1. §. 3. ff. de postulando*. Proinde aliæ excusationes voluntariæ sunt, quæ oppositæ profunt, & a tutela, vel cura suscipienda, vel jam suscepta, liberant; aliæ necessariæ, quæ etiam non oppositæ repellunt. Tum earum, quas hic proponit Tribonianus, aliæ sunt communes tutoribus, & curatoribus, aliæ curatorum propriæ. Undecim sunt communes, & voluntariæ, quas excipient tres communes item, sed necessariæ.

§. 268. I. Est liberorum numerus, h.
e. Ro-

e. Romæ trium, in Italia quatuor, in Provinciis quinque, *pric. h. r.*: qua in re domicilii est habenda ratio, non personæ, *L. 2. C. Th. de in integrum restitutione*; idque ex lege Papia Poppæa. Quoniam enim civium numerus est Reip. ornamentum, Romæ fœcunditati præmia proposuerunt leges in libera Rep., *Dio L. 56.* Sed rem perfecit Augustus, cujus hortatu anno 763., M. Papio Mutilo, & Q. Poppæo Coss., perlata est lex Papia Poppæa. Ac *jus liberorum* a Principibus impetrare consueverunt celi-
bes, & matrimonium frustra experti, *V. Heinec. ad d. L. lib. 2.* Ex ea quoque lege vacatio a tutela, curave perfecta est. Nihil autem interest, in potestate sint liberi, an emancipati; primi, an ulteriorum graduum; mares, an feminæ. Verum si sint ulteriorum graduum, ex filio natos esse, necesse est; numerusque spectatur stirpium, non personarum. Quod si adhuc filius vivat, ex eo nati ei tantum profunt. Sed in numero non veniunt, qui in utero sunt, illegitimi, adoptivi, qui Cives esse desierunt, & mortui; non tamen *bello amissi* (*h. e. in acie, L. bella 16. ff. de excusa*

cusationib.), cujuscumque sexus essent ; L. 18. b. 1. : nam ii ex veterum sententia Græcorum , ac Latinorum , in perpetuum per gloriam vivere intelliguntur ; princ. b. 1. Mirum autem videri debet , stetisse dictum locorum discrimen etiam post L. 17. de stat. homi. , & L. ult. C. de temporibus in integrum restitutionis.

§. 269. II. Excusatio est administratio rerum fisci, quod Divus M. Antoninus Philosophus rescripsit in *semestribus consiliis*, §. 1. *b. 1.* : In semestria referebantur, quæ ab Imp. constituebantur per sex hybernos menses, quos consiliis ut plurimum ii ; non bellis destinarant, *Suet. in August. c. 35.* . Hoc privilegium concessum etiam fuit *colonis patrimonialibus*, idest conductoribus fundorum, qui in privato Principum patrimonio sunt, *L. ult. C. qui dare tut. : tum rei dominicæ procuratoribus. L. 22. & 41. ff. b. 1.* Quoniam vero discrimen inter ærarium, & Fiscum vix erat, nomine administratorum Fisci etiam eos comprehendi, quibus ærarii cura erat, Huberus demonstrat, *Digress. III. 21.* Sed civitatibus jus Fisci non competit, *L. 10. ff. ad municipali. : unde a tutela, vel cura non excusantur admi-*

administratores rerum ad civitates pertinentium, *L. 15. §. 7. b. t.*

§. 270. III. Est absentia causa Reip., §. 2. *b. t.*. Reip. nomine licet alias veniant inferiores civitates, *L. 8. ff. ex quibus causis majores &c.*; hic tamen Populus Rom. intelligitur, *L. 10. ff. b. t.* Quare legati civitatum proprie non absunt Reip. causa; sed in integrum ex æquitate restituuntur. Ita latius patet Reip. causa, ubi de in integrum restitutione, quam ubi agitur de excusatione a tutela, vel cura. At non omnes, qui alicujus muneris publici, vel officii causa absunt, a tutela, vel cura excusantur, sed ii, quibus nominatim hoc privilegium indultum est, uti Præsides, Legati, Procuratores Cæsaris, milites. Hi & a suscepta, & a suscipienda tutela excusantur, *quatenus*, h.e. quousque absunt: & siquidem brevis, curator; si vero diuturna futura sit absentia, tutor dabitur, *L. 12. ff. de tutel.* Reversi, nondum finita tutela, quam susceperunt, eam continuo recipiunt; sed a novis tutelis per annum continuum a reditu excusantur, *L. 10., & 41. b. t.*

§. 271. IV. Est potestas, §. 3. *b. t.*, ex qua excusantur Magistratus, nedum
ma:

maiores, uti Vinnius, & Huberus scripserunt, sed etiam minores, *L. 6. §. 16. de excusat.* Potestas hic imperium est, & coercendi facultas. Ædiles ideo recte dabantur tutores, *L. 17. §. 16. cod. V. Gell. XIII. 13.* Hæc de tutela suscipienda scripta sunt: nam susceptam ante Magistratum tutelam, qui in potestate sunt, retinere coguntur, *d. L. 17. §. 1.*

§. 272. V. Est professio artium liberalium. Hinc excusantur Grammatici, Rethores, Sophistæ, Medici, Jcti, si intra numerum sunt, h. e. in numerum decreto ordinis adlecti, *§. 15. b. r.* Et Medici quidem, non qui docent, sed circulatorum, sive qui faciunt medicinam, *L. 6. §. 1. b. r.* Forte vacationem hanc Medicis primus dedit Augustus in gratiam Antonii Musæ liberti. Grammatici, & Rethores excusantur, si doceant. Sunt Grammatici hoc loco non grammatistæ, qui elementarias docent litteras; sed qui a Seneca *Epist. 95.* appellantur *latini sermonis custodes*, quique ab Homero, & Virgilio prælectiones incipiebant suas, *Cujac. in d. L. 6.* Excusantur etiam Philosophi, & Jcti, qui docent, *d. L. 6. §. 11.* Romæ Jctos docere necesse erat; tum
a Con-

a Constantino ea necessitas remissa, *L. 6. C. de Professor.* Reliquæ artes non excusant, *L. 22. ff. eod.*

§. 173. VI. Est onus trium tutelarum, curationumve, quæ non sint affectatæ, etsi *in domo una*, sc. familia, §. 5. *b. r.* Verum non pupillorum numerus, sed difficultas conficiendarum rationum in hac causâ consideranda est: quod Judicis cognitioni deferendum, *L. 31. §. ult. b. r.* Igitur generatim qui tribus tutelis, vel curis distinetur, durante earum administratione, a quarta excusatur.

§. 274. VII. Est paupertas, sive mediocritas, *d. L. 6. §. ult.*: non omnis, sed quæ adeo aliquem ad incitas redigit, ut ad victum necessaria sibi comparare cogatur: unde tutelæ impar evadit, §. 6. *b. r.* Laudat in hanc rem Ulpianus in *L. 7. b. r. rescriptum Divorum Fratrum*, h. e. M. Antonini Philosophi, & Ælii Veri, non ut alij putant, Severi, & Antonini (§. 39.), Tribonianus addit, idem rescripsisse *Marcum per se*, h. e. solum: is enim aliquandiu imperavit post Ælii obitum.

§. 275. VIII. Est adversa valetudo, §. 7. *b. r.* At si jam coepta sit tutela, vel
cura,

cura, non omnis adversa valetudo excusat, sed fonticus tantum morbus; quo nomine & delirium, & quicumque alius morbus intelligitur, qui humanas impediatur actiones, *L. 11. C. 13. eod.*

§. 276. IX. Est senectus post annum septuagesimum expletum, §. 13. *b. t.*, quæ ut a tutela, & cura, ita a cæteris personalibus muneribus præstat excusationem, *L. un. C. qui ætate se excusant.* In honoribus autem annus cœptus pro expleto habetur, *L. 8. de muner., C. honor.* Et librarius certe peccavit in notâ numerali cum in *L. un. C. qui ætate Cc.* scripsit LV. Ætas 60. annorum excusat Jure Canonico, recepto etiam a Jure civili.

§. 277. X. Est imperitia litterarum, scilicet elementariam, *quamvis* & imperiti litterarum possint ad administrationem negotiorum sufficere, §. 8. *b. t.*; ubi *etiam* *quamvis* negligentis est, non excipientis. E contrario apud Modestinum in *L. 6. §. ult.*, ubi legitur, *ejus, qui se negat litteras scire, excusatio accipi non debet, si modo non sit expers negotiorum, et si modo non excipientis est, non negligentis.* Ad hoc dissidium componendum, dici

dici potest, sententiæ immemorem in ff. relata, Jus novum proposuisse in Institutionibus; quia propter rationum redditio- nem expedire videbatur vel primarum litterarum scientia.

§. 278. XI. Est inimicitia capitalis vel cum pupillo, aut minore, vel cum eorum patrē: quæ, nisi reconciliatio, saltem tacita, intervenierit, excusat, §. 11. *b. r.*, L. 6. §. 17. *ff. b. r.* Capitalis inimicitia hic est gravissima, quæ ipsum caput petit, h. e. vitam, libertatem, existimationem. Reconciliatio tacita ex gr. censetur, si testator ab aliquo læsus, eundem testamento filiis tutorem dat. At si tutor sit, qui læsus fuit, aperta reconciliatione opus est: alioqui absque reconciliatione datus, se legitime excusare potest. Hæc inducta sunt, non quia indulgendum sit odiis, sed quia ignoscendum est iis, qui sinistram suspicionem evitare, & remotionem prævenire cupiunt.

§. 279. XII. Communis (sed necessaria excusatio) est ætas nondum perfecta, sc. minor, quæ a tutela legitima, & dativa repellit, §. 13. *b. r.*, non vero a testamentaria; tametsi administratio differatur,

§. 2. *sup. qui testam. tut. dari poss.*

§. 280. XIII. Communis (sed necessaria), est militia: nam Reip. interest, ne milites propter privata negotia ab armis avocentur, §. 14. *b. r.*, L. 4. C. *qui dari tutor.*

§. 281. XIV. Communis item, sed necessaria excusatio est lis cum pupillo vel minore. Supra (§. 241.) diximus, olim orta lite inter pupillum, & tutorem, additum tutori curatorem fuisse. Sed id obinebat, cum de particulari aliqua re, eaque parvi momenti, controversia fortasse orta fuerit: nam si de omnibus bonis, aut majori eorum parte disceptandum fuisset, tutor excusabatur, §. 4. *b. r.*

§. 282. Excusationes curatorum propriæ duæ sunt: altera voluntaria, sc. tutela antea gesta, §. 18. *b. r.*; adeo ut si paterfam. qui testamento tutorem dedit, adjecerit, se eundem dare curatorem, tamen is ad curam adigi non possit. Sed non excusatur ob hanc causam libertus a curatione liberorum patroni, L. 5. C. *b. r.* altera necessaria, sc. matrimonium. Maritus enim uxori suæ curator esse nequit, §. 19. *b. r.*, L. 2. C. *qui dar. tutores.* Agitur autem de uxore vel minore

nore 25. annis , vel mentecapta , quæ bona habeat extra dotem. Dos enim Jure veteri in dominio viri esse credebatur. Bonis igitur , quæ extra dotem uxor habebat , maritus curator esse non poterat , ne administrationis rationes interverterentur ; cum uxor blanditiis viri capta , aut metu territa , adduci possit , ut eas non peteret . Has vacationis causas exponit Tribonianus. Aliæ perendæ ex aliis Juris libris ; veluti necessaria , & communis est furor , dementia , surditas , cæcitas , *L. un. C. qui morbo se excusant* ; item sacerdotium , & vita monastica : excipe tutelam legitimam , quæ presbyteris , & Diaconis , non vero Episcopis permittitur. *Nov. 123. cap. 5.* : ad hæc malevolentia testatoris , qui aliquem ideo filiis tutorem dedit , ut eum implicaret negotiis ob eam causam difficillimis redditis ; & aliæ .

§. 283. Jam tutores cujuscunque generis sint , idest qualitercumque dati fuerint , excusari possunt , §. 13. *h. t.* , etiam legitimi : ut mirum videri debeat , id Cujacium negasse in *Ulp. Fragm. tit. II. §. 17.* , argumento ducto a suis heredibus : sed hi nihil commune habent , nec simile , cum legitimis tutoribus. Quod si veti-

ti fuerunt olim legitimi tutores *abdicare* se tutela, teste Ulp. *d. loco*, observandum est, abdicatione jam susceptam tutelam deponi; excusatione propriæ recusari delatam.

§. 284. Qui plures habet remissionis causas, omnibus uti potest intra legitima tempora. Et quidem excusationum iudicio peragendo quatuor menses continui a nominationis die statuti sunt, *L. 38. ff. b. r.* Nimirum uti ad proponendas excusationes numerus 50. dierum definitus est, sic ad eas, vel ad unam earum probandam, alii dantur 70. dies continui. Itaque ad causas proponendas intra centesimum lapidem statuti sunt dies 50. continui. Ultra centesimum lapidem si tutor, vel curator sit, habet vicena milliaria in dies singulos, & plus dies 30. ex Marci Constit.; quam Iſti ita interpretati sunt, ut nunquam minus 50. diebus detur. Milliaria Romani lapideis columnis signabant. *Briffon. Antiqu. IV. 8.* Numeratio incipiebat ab *aureo milliario*, seu aurata columna in capite fori Romani ab Augusto posita, in quam omnes Italiæ viæ competeabant, & desinebant. *V. Pirisc. in Lex. Antiq. Rom.* Quoniam vero peti-

riculum tutelæ a die scientiæ tutoris est, hic administrationem suscipere potest, prævia potestatione, se vacationem habere ex justis causis proponendis.

§. 285. Insuper Tribonianus §. 16. ait, non appellare, qui se vult excusare, nimirum apud eundem judicem (non superiorem), qui tutorem dedit, curatoremve, justæ causæ allegandæ sunt: quod a D. Marco favore pupillorum cautum est, ad differentiam aliorum munerum civilium, *L. 1. de vacat.* Sed appellari potest, si repulsæ fuerint a primo judice immunitatis causæ. Causæ eadem omnino debent esse veræ. Quod si quis falsis allegationibus excusationem meruerit, tutelæ onere non liberatur, §. 20. *b. 1.* Decretum enim, quo tutor ob non veras excusationum causas tutela eximitur, est ipso jure nullum, & tutor periculo tutelæ tenetur ab eo usque tempore, quo datus fuit, *L. 1. & ult. C. si tut. vel curat. falsis allegat.* Id favor pupillorum suasit. Nam decretum ex falsis causis latum, non est ipso jure nullum, sed contra illud, si provocatum non sit, petenda est restitutio in integrum, *L. Divus 33. de re jud.; tit. C. si en falsis in-*

strum., & testimon. judicat. sit.

§. 286. Tandem qui se excusant universum onus debent declinare, nisi postulent, ne ultra centesimum lapidem in aliena Provincia tutelam administrent, *L. 21. §. 2. ff. b. t.*; ex qua lege supple quod deest §. 17. *b. t.*, qui certe mutilus est. In hoc §. dicitur, *datus tutor ad universum patrimonium datus esse creditur*. Conjicit Hotomanus, servulum, qui a manu erat Triboniani, jussum describere totum §. 2. *d. L. 21.*, partem descripsisse, & omisisse verba, *ne ultra centesimum lapidem tutelam gerat*.

§. 287. Hodie jus liberorum minime prodest. Excusationes necessariae ubique ferme receptae sunt. At plerisque locis maritus curator uxoris censetur suae, *Gudel. de J. noviss. l. 7.* Ita apud nos exolevit *L. 2. C. qui dari tut.*: nam maritus est legitimus administrator rerum uxoris, etsi minoris. Ac minores feudatariae cum nubunt, a balii exeunt potestate, *Pragm. 2. de minor.* Vide nostras *Inst. Juris Regni*.

T - I T. XXVI.

DE SUSPECTIS TUTORIBUS, VEL
CURATORIBUS :

§. 288. **D**Um administrant tutores, curatoresve; si suspecti sint; ut removeantur ab administratione, prodita est *accusatio suspecti*; seu *crimen ex XII. Tab. lege*, L. 1. §. 2. ff. b. r. Est enim Decemvirale carmen; Si tutor dolo malo gerit, vituperato. Hoc jus cognoscendi de suspectis tutoribus cum sit ordinariæ jurisdictionis, Romæ exercebatur a Prætoribus; a Præsides in Provinciis, §. 1. b. r. Cumque, mandata jurisdictione, totum transit juris dicendi officium, exercebatur etiam a legato Proconsulis, atque ab eo, cui mandabat Prætor jurisdictionem. Hinc, quamvis nullo accusante, potest magistratus tutorem, vel curatorem manifesto suspectum remove, L. 3. §. præterea de accusat., & L. 13. de off. Præsidis. Fieri autem suspecti possunt cujusvis generis tutores, & curatores, etiam patroni, parentesque, modo eorum famæ parcat, §. 2. b. r., h. e.

modo nullæ actiones adversus eos proponantur, quæ infamiam afferant. Sed Modestinus in *L. 9. b. r. optimum factu esse*, ait, *curatorem ei potius adjungi, quam eosdem cum notata fide, & estimatione remove.*

§. 289. Suspecti actio, qua agitur ad remotionem, & quandoque etiam ad irrogandam pœnam, est *quasi publica*, §. 3. *b. r.* Duo sane (quæ pupillorum favor extorsit contra naturam actionis) communia habet cum vere publicis actionibus; & quod cuivis de populo pateat, & quod vel sine accusatore Prætor remove tutorem evidentissimis probationibus potest. Cæterum hæc actio natura sua privata est: exercetur enim coram Prætorē, cui merum imperium non est; & directe non spectat ad tutorem, curatoremve puniendum. Ergo non omittenda vocula *quasi*, uti omittit Theophilus (similes voculas omittere solitus, ut docet Marcilius in *b. §.*), & Samuel Petitus ad *LL. Atticas*. Ad accusandum autem admittuntur omnes, etiam mulieres; non modo quæ ex necessitudine moventur, verum & quas pietas, & verecundia probat, §. 3. *b. r.* : quamvis mos judiciorum fer-

ferret, ut mulieri non liceret publico iudicio quemquam accusare, nisi suam, aut conjunctorum injuriam persequeretur, *L. 12. de accusat.* Minores accusare quoque possunt curatores cum consilio necessariorum, idest cognatorum: non possunt pupilli, uti rescripserunt Severus, & Antoninus, §. 4. *b. r.*: neque alibi extat hoc rescriptum.

§. 290. Suspectus autem est qui aut gerit *non ex fide*, hoc est dolo, aut negligenter, §. 3. *b. r.* Sed etiam potest quasi suspectus rejici, qui gerere nondum coepit, modo ex rerum adjunctis de fide non integra præsumptio sit, *d. §. 3.*; puta si satisfacere nolit; si ob negligentiam non gesserit tutelam; aut dolo fecit, quominus gereret. Præterea sicuti creditor mittitur in possessionem bonorum debitoris latitantis, ita pupillus, vel minor mittitur in possessionem bonorum tutoris, vel curatoris, qui latitat, nec sui copiam facit, ut alimenta pupillo, vel minori decernantur: ac si extent bona, quæ ex mora deteriora futura sunt, dato curatore, distrahi jubentur. Tutor ergo, vel curator eam ob causam latitans, non solum uti suspectus removetur, sed & illud

lud patitur, ut pupillus, vel minor ejus bona possideat, §. 9. *b. t.* Apertior dolus est, si tutor, vel curator non latitans, sed præsens, per mendacium negat ob inopiam patrimonii, pupillo, vel minori alimenta posse decerni, §. 10. *b. t.* qua in specie remittitur etiam puniendus a Pratore ad Præfectum Urbi, *L. 3. §. 5. eod.*; sc. ad eum, cujus erat merum imperium, *L. 1. §. 7. de officio Præfecti Urbi.* Ad Præfectum etiam mittebatur & qui tutelam, corruptis ministeriis (ita legit Cujacius in §. 10. *b. t.*) Prætoris redemerat, *d. L. 3. §. 15.*, h. e. qui data pecunia tutelam. vel curam sibi quaesivit; & libertus in tutela liberorum patroni cum fraude versatus, §. 11. *b. t.* (Apud nos hodie cum raro jurisdictio a mero imperio sit sejuncta, idem judex & remove, & animadvertere potest). Tandem quis habetur pro suspecto ex moribus, non vero ex facultatibus suis, aut satisfactione, §. 12. *b. t.*

§. 291. Actionis istius effectus duo. Primus est administrationis interdictio, quoad cognitio finiatur: idque non ipso jure, uti putat Otto, sed imperio Magistratus, qui interea dabit alium, qui administret, *L.*

L. 7. C. b. t., Secundus est remotio, §. 6., & *7. b. t.*, cum infamia, non si culpa, sed si dolus intervenerit: nec doli nomine hoc loco venit culpa lata, uti quidam putant. Quia aliquando etiam si quis manifestarius doli sit, famæ ejus parcitur, & verbis temperanda cum actio, tum decretum, uti si cognatus, affinis, patronusve sit, *L. 9. ff. b. t.* (§. 288.): verbis nimirum, nulla in actione facta doli mentione; sed agendum in hunc modum; sc. minus bene tutelam gerere. Decreto autem vel adjungendus tutori curator, quod est eureka Modestini; vel ille gerere prohibendus, non expressa causa. Denique finita seu morte, seu alio modo tutela, curave, suspecti cognitio, licet ante cœpta, finitur, §. 8. *b. t. L. pen. ff. L. 1. C. b. t.* Finita enim tutela, opus non est hoc remedio; cum satis pupillo, prodita tutelæ actione, prospectum fuerit.



INSTITUTIONUM

JURIS ROMANI

L I B. II.

T I T. I.

DE RERUM DIVISIONE, & ACQUIRENDO IPSA-
RUM DOMINIO.

§. 292. **V**IDIMUS quæ de perso-
nis habet Tribonianus,
nunc de rebus agen-
dum est. Rei vocabu-
lum generice sumtum,

personas etiam, atque actiones comple-
ctitur: proprie vero denotat quicquid ne-
que persona, neque actio est, *L. 5. de*
V. S. Res dividuntur primo in eas, quæ
sunt in nostro patrimonio, sive in bonis
(quod magis proprie dicitur pecunia);
& eas, quæ extra nostrum sunt patrimo-
nium. Illæ sunt quæcumque (sive cor-
poralia, sive jura) aut peti per actio-
nem, aut retineri per exceptionem pos-
sunt, *L. 52. de acquir. rer. dom.*. Cæ-
tera omnia extra nostrum patrimonium
esse

esse creduntur; sc. quæ non sunt in commercio, & quæ a nemine adhuc occupata sunt, vel sunt derelicta. Patrimonii vocabulum in primis paterna solummodo bona significavit; deinde & materna, & a nobis quæsitæ. Latius ergo patet patrimonium, seu bona, quam dominium: nam pecunia credita in dominio debitoris est, in bonis creditoris (& bonis adnumeratur quicquid nos *beat*, L. 49. de V. S.: unde latinis divites *beati* dicuntur: *insolens malum est beata uxor*, ait Seneca 1. contr. 6.): tamen quandoque patrimonium stricte pro dominio accipitur, L. 9. ff. rem pup. salvam fore. Sunt qui tertium genus rerum addunt ex Paulo in L. 1. ff. de usu, & usufr. leg.: nimirum, quæ neque in bonis sunt, neque extra bona, veluti servitutes. Sed perperam. Icti enim post Stoicos negabant res incorporales esse, sed tantum intelligi affirmabant: neque extra bona servitutes esse, ait Paulus; quia etsi mente solummodo intelligerentur, utilitatem tamen præstant, Noodt. Probabil. II. 1., & 3. & cum jam constitutæ sunt, in bonis sunt, quia actionibus petuntur, §. 2. Inst. de act. Huber. Prælect. ad h. t. n. 2.

§. 293. Ex his, quæ extra nostrum patrimonium sunt, quædam naturali jure sunt communia, quædam publica, quædam universitatis, quædam nullius. Ita Tribon. *princ. h. t.* ex Marciano in *L. 2. de Rer. divis.*; in qua librario inter scribendum exciderunt *publica*, quæ idem Jctus exponit, separatque a communibus in *L. 4. §. 1. eod.* Accuratiorem partitionem rerum facit Cajus in *L. 1. eod.* (a quo Tribon. heic nescio cur discedit), quod aliæ divini, aliæ sint humani Juris: illæ nullius in bonis, veluti res sacræ, religiosæ, & sanctæ: istæ vero aut publicæ, aut privatæ: & publicarum rerum nomine continentur communes, publicæ, resque universitatis, *V. Huber, Digress. p. 2. L. 2. c. 1., & Noodt, Prob. I. 7. & 8.*

§. 294. Communia dicuntur, quæ quantum ad proprietatem, nullius sunt, quantum ad usum, omnibus patent, *L. 51. de contrab. emt.*; quia cum occupari, ac teneri non potuissent, atque inexhausti usus essent, in primam rerum divisionem venire minime potuere. Proinde sunt adhuc communes *naturali Jure*, h. e. secundum primævum naturæ statum; uti aër, aqua profluens, sc. fluminis perennis,

nis, mare, & per hoc littora maris, *princ.*
 C. §. 1. *b. t. L. 14. b. t.* Et usum
 quidem aëris omnibus patere, vel ex eo
 constat, quod sine eo vita duci nequeat.
 Communis etiam est ad lavandum, &
 potandum aqua jugis, quæ vel ab imbri-
 bus collecta, vel e venis terræ scaturiens,
 perpetuum fluxum agit, flumenque, aut
 rivum perennem facit. Mare quoque li-
 berum est, & omnibus patens ad navigan-
 dum, & piscandum, *L. 13. §. 7. de injur.*
 De hac re vide Grotium *de mari libero*,
 Seldenum *de mari clauso*; necnon Hube-
 rum *Digress. I. 4.* Bynk. *peculiari Diss.*
 & Jac. Gothof. *in L. 9. ff. ad L. Rha-*
diam. Maris naturam sequuntur littora.
 Littus maris est quatenus hybernus flu-
 ctus maximus excurrit, mari tenorem
 suum servante, §. 3. *b. t. L. 96. C.*
112. ff. de V. S. Ita M. Tullium cum ar-
 biter esset, primum constituisse, Celsus
 scribit; seu potius Tullium Aquilii Galli
 definitione primum usum fuisse, *uti ex*
Topicis cap. 6. Sed littorum non eadem
 ratio, ac maris: non enim sunt commu-
 nia per se, sed per accessionem maris:
 quo pertinet illud *per hoc.* Quisque igitur
 jure suo ad littora accedere potest:
 tum

tum monumenta, & villas, sc. parvas casas, in quas se recipiant piscatores, retia siccant, vel aliud simile faciant, in littore ponere Jure Gentium licet, §. 5. *b. r.*: sed dilapso ædificio, locus, veluti jure postliminii, in pristinam causam re-vertitur, sic ferente rerum communium natura, §. 1. & 5. *b. r.* Quid autem est, quod Celsus scribit in *L. 3. ne quid in loco publico*; nimirum littora, in quæ *Populus Rom. imperium habet, Populi Rom. esse arbitror*? Id multi accipiunt de Populi Romani imperio, non de dominio. Verum de *dominio*, quod consecrarium *imperii* facit, egit Celsus; quem forte transversum egit opinio vetus de summa Rom. Populi potentia; locutiones Democratæ proprias etiam sub Impp. secuutus. Putavit quoque Celsus, jus in littore ædificandi non commune omnibus esse, sed divisum pro imperiorum diversitate, quibus littora continentur; etsi alioqui innoxius, & fugitivus littoris usus omnibus esset communis. Quod vero dictum est, posse in littore quemvis ædificare, intelligendum, si constet littoris usum deteriore non fieri; qua de re opus est cognitione, & decreto Prætoris, *L. 50. de acq. rer. dom.*

dom. Ex hoc tamen non conficitur, si quis in littore sine decreto ædificat, ejus non fieri solum. Cæterum in littora, & maria, licet omnibus pateant, pro imperii sui tutela, potestatem exercent Principes jure suo. De Regalibus vide Interpretes Juris publici; & nostras *Juris Feudalis Institutiones*.

§. 295. Publica sunt, quæ quantum ad proprietatem unius sunt Populi, quantum ad usum, singulorum ex eo Populo; uti flumina *pæne* omnia, & portus: tum viæ, per quas ire omnibus licet, *L. 2. b. t.* Non moror opinionem Noodtii, qui nullum agnoscit inter res communes, & publicas discrimen. Perperam Tribonianus omittit illud *pæne*, quod est in *L. 4. eod.* Tantum enim publica sunt flumina perennia: torrentes enim, & rivuli, qui æstate exiccantur, non publici sunt, sed privati. Quod si flumen perenne æstate quadam exarescat, perenne etiam censetur, *L. 1. §. 2. & 3. de flumin.* Flumen autem est ipsa aquarum universitas alveo comprehensa: aqua vero profluens est quævis aquæ particula fluens: proinde hæc, quæ privati hominis, aut Populi ditione contineri non potest, &

R

nun-

nunquam eadem est, omnibus patebit ad lavandum, & bibendum; cujus rei gratia particulis aquæ utimur: illud est publicum ad piscandum, & navigandum, cujus rei gratia universitate aquarum, & alveo utitur quilibet de Populo. Quod si alicubi in Jure scriptum inveniatur, *commune omnibus esse jus in flumine publico navigandi, aut piscandi*, §. 2. *b. t.*, accipiendum id est de Populo, in cujus territorio fluit flumen. Verum de fluminis ripis aliud, quam de litoribus maris, jus est: nam usus illarum publicus etiam; proprietas tamen illorum est, quorum prædiis hærent; adeoque iis cedunt arbores, & fructus, qui inibi nascuntur, §. 4. *b. t.* Cautum hoc est in gratiam eorum, qui sæpenumero a proximis fluminibus damnum habent in eorum prædiis. Sed & ripas, tanquam alvei partes, publici juris esse, putant Hotomanus, & Grotius; quod facilius admittendum esset, si ripa significaret extremam alvei crepidinem. Istis vero significat partem terræ adjacentis, ex quo primum a plano vergere incipit, usque ad aquam, L. 3. §. 2. *de flumin.* Paulus quidem *in princ. d. L. 3. ripas*, ait, fluminum publicas esse:

esse: sed intelligendum hoc est de usu earum, non de proprietate. Portus dicta sunt loca in mari, aut fluminibus conclusa, & munita, quo importantur, & exportantur merces: sunt etiam stationes navium adversus injurias prædonum, piratarum, ac tempestatum, §. 2. *b. t.* Verum hodie hæc ferme omnia inter regalia jura censentur. Ita Regum dignitati provisum iis rebus, quibus carere minus incommodo privatis est, *Grot. II. 8. §. 5.*

§. 296. Res universitatis sunt, quarum proprietas universitatis est, usus singulorum ex ea; veluti theatra, stadia, Basilicæ, porticus, balnea, foræ, prata, pascua, aliaque civitatum communia, §. 6. *b. t.* Quandoque dicuntur publica, sed Jure Civitatis, non Gentium. Universitatis nomine non solæ veniunt civitates, sed & collegia, societates, aliaque ejusmodi corpora, quæ in civitatibus sunt; quibus ad exemplum Reip. res communes habere licet. Aliud est patrimonium universitatis, cujus usus non omnibus ex universitate patet; cujusmodi, præter alia, est servus communis universitatis, *L. 7. §. 1. ff. quod cujusque universitatis.*

§. 297. Nullius in bonis sunt communia. Horum autem quædam usui hominum subjiuntur, uti mare, ær, aqua profluens; quædam fieri etiam privata possunt, uti feræ bestię, aves, lapilli in litore inventi, res pro derelictis habitę, res hereditatis jacentis. At per excellentiam dicuntur nullius, quę hominum dominio, atque usibus exempta, divini juris sunt; nimirum sacra, religiosa, & sancta, §. 7. *h. t.*

§. 298. Sacra sunt, quę publice consecrata sunt, Marcianus *L. 6. §. 3. de rer. divis.*, seu quę rite, & per Pontifices dedicata sunt Deo, Tribon. §. 8. *h. t. Nov. 67.*, & 131. *cap. 7.*; Macrob. *Saturn. III. 3.*; quales arę, templa, ædes sacre, donaria ad ministerium Dei dedicata, puta vasa, vestimenta, clypei, coronę, aliaque. *Livius V. 21.* Sed Tribonianus & ad Christianam Religionem Pontificis vocabulo spectavit, & ad Gentium Pontifices. Illud publice valet ex publica auctoritate: nam ex publico civitatis decreto hujusmodi res Diis superis sollemniter consecrabantur a Pontifice; postea a Principibus, qui Pontificis Maximi titulum, & sacerdotium assumerunt, *L. 9.*

§. 1.

§. 1. *de rer. divis.* Quare vetita erant sacra, & dogmata peregrinæ Religionis, quæ privatim in Urbe inferebantur, *Bynk. de cultu Religionis peregrinæ apud veteres Rom.* Proinde sacris privatis adfuit etiam publica auctoritas, & adrogationes, arbitris Pontificibus, expediebantur; quia per eas transitus fieret in sacra aliena. Sacra autem *privata* ideo dicebantur, ut *popularibus* opponerentur. Denique sacra sunt extra commercium, & in nullius bonis: ut nec alienari, nec obligari possent. *Ædes* etiam, diruto ædificio, manent sacra, *L. 73. de contrab. emt.* Religione vero liberabantur sacra ab hostibus capta, *L. 36. ff. de Religiosis*, & si inde sacrorum fieret sollemni ritu evocatio, a Romana politica inventa, *L. 9. §. 2. de rer. divis.* Ex *L. sancimus 22. C. de Sacros. Eccl.*, & *Nov. 120. c. 10.* vetita est alienatio, & obligatio rerum sacrarum; nisi id fiat vel ad redimendos captivos, vel ad alendos pauperes in publica caritate, vel ad æs alienum Ecclesiæ dissolvendum. Bona Ecclesiastica, quæ humano usui inserviunt, ministrosque Dei, ac pauperes alunt, diversa a sacris sunt: verum nec ipsa possunt, nisi certis ex

R 3

caus.

caussis, alienari, Nov. 7.

§. 299. Religiosa sunt loca, *ubi corpus, offave hominis* (etiam servi: nam mors solvit quidquam commentitii est ex Romano Jure) *condita sunt* a loci domino, L. 2. §. 5. *de Religiosis*: adde & cineres. Romani enim frequenter usque ad Commodi Imp. ætatém cremare cadavera consueverunt. *Guter. de Jure manium* l. 25. Sola cadaveris illatione, & privata auctoritate sepulchra fieri religiosa, & veluti in Deorum Manium dominio posita, eximi commercio, exploratum est: tamen aliquando ex Ethnica superstitione consecrari consuevissent, ut cineres, & defunctorum animæ quiete persisterent. Sed jus inferendi erat in bonis, & in commercio; adeo ut legari posset, cum non possent monumenta, L. 14. *C. de legat.* Igitur quisque sua voluntate facit religiosum locum suum, dum mortuum infert, §. 9. *b. r.* Sin in diversis locis cadaver fuerit sepultum, religiosus ille erit, in quo caput hominis positum sit, L. 4. *de religiosis*. Tum cenotaphia, seu inanes tumuli, non sunt religiosi, uti rescripserunt Divi Fratres Antoninus, & Verus L. 7. *de rer. divis.* Sed ante Divos

vos Fratres pro religiosis habebantur. Id vero mirum, Marcianum, qui post Divos Fratres vixit, scripsisse cenotaphium esse religiosum, *L. 6. §. ult. cod.* Jam vero mortuo sepulto, non totus locus sepulturæ destinatus fit religiosus, sed quatenus corpus ipsum humatum est; & fortasse locus certo spatio definitus, materie circumjecta, *L. 2. §. 5. ff. de religiosis.* Loca autem ejusmodi semper erant ex XII. Tab. Legibus extra Urbem, & præcipue secus vias publicas. Cæterum quandoque illatione religiosus non fit locus. Si quis in locum alienum, vel in eum; cujus habet alter aut proprietatem, aut usumfructum, inferat, invito, aut ignorante domino proprietario, aut fructuario, locum non facit religiosum: sed oportet, consentire eum, cujus interest. In locum vero communem *purum*, seu profani juris, invito socio, inferre non licet, *L. 41. de religiosis.* Sed in commune sepulchrum socium inferre licet, sociis etiam invitis: nam quisque eorum in solidum habet utendi potestatem, *L. 6. §. 6. communi dividundo.*

§. 300. Sancta sunt mœnia, & portæ urbium, vel oppidorum, §. 10. *h. t. Ge-*

neraliter sanctum est quicquid adversus hominum injurias sanctione munitum est, *L. 8. de rer. divis.*: qua acceptione libertas, leges, Tribuni Pl., Legati, ac Reges *sancti* appellantur. Verum non quicquid sanctio tuetur juris divini est, & in bonis nullius; sed quod tuetur in gratiam Religionis, per excellentiam *sanctum* vocatur. Muri apud Græcos, & Romanos Diis medioxumis sollemniter dedicabantur, & nonnullæ portæ; uti *Joviæ*, atque *Herculeæ* in antiquis titulis. Quin in omnibus posita simulacra Deorum, *Lucretius Lib. 1. v. 318.* Nec audiendus Plutarchus; nec quidam Jcti, qui negant portas sanctas esse. Certe affirmat Hermogenianus in *L. 2. ne quid in loco sacro*: qua in lege nihil interest, num legas *sanctis locis*, an *sacris*. Quæ enim sancta, eadem sacra sunt, & viceversa. Religiosa vero sunt sancta, & sacra: eorumque omnium nil poterat impune violari: omnia namque Diis dicabantur.

§. 301. Hucusque de rebus, quæ sunt extra nostrum patrimonium, egimus; nunc de iis, quæ nostræ esse possunt, & *proprie*, *privæ*, sive *privatæ* dicuntur. Harum ante Justinianum aliæ erant *mancipi*,
aliæ

aliæ nec *mancipi*. Pretiosiores erant *mancipi* (quæ vox non est indeclinabilis , sed contracta ex voce *mancipii*. *Vossius de arte grammatica* III. 46.); viliores nec *mancipi* erant. *Bynk. de rebus Mancipi cap. 2.* Illæ alienari debebant sollemni mancipatione: hæ vero nuda traditione abalienabantur, *Ulp. Fragm. tit. 19. §. 3., & 7.* Sustulit hanc differentiam Justinianus in *L. un. C. de nudo Jure Quirit. toll.*, licet quædam veteris discriminis vestigia in ff. supersint.

§. 302. In privatis rebus, quod singuli homines possunt habere , vel est jus *in rem*, vel *in personam*. Primum appellatur etiam jus *in re* : posterius *ad rem*, quod uno nomine dicitur obligatio; de qua lib. III. agendum. Hoc loco de jure *in rem*, cujus quatuor enumerantur species , dominium, servitus, pignus, hereditas. Et perperam Vinnius in §. 11. *b. t.*, alii-que possessionem addunt : nam hæc jus momentaneum producit ; nec recuperatur actione *in rem*, si amissa fuerit, *Zachar. Huber. lib. 3. Dissertat. 5. §. 17.* : etsi ex Decretalium Jure & possessio tanquam jus *in rem* consideretur.

§. 303. Dominii , de quo in primis
agen-

agendum est, ante Justinianum duplex erat genus. Nam alii quasdam res habebant *tantum in bonis*, sc. *naturali dominio*; alii alias res ex *Jure Quiritium*, sc. in dominio legitimo. In bonis erant res nec mancipi, ex justa causa etiam a peregrinis quaesitæ; & res mancipi, quæ acquirebantur modis naturalibus. E contrario ex *Jure Quiritium* a solis Romanis acquirebantur res tantum mancipi, modis legitimis, & civilibus; puta mancipatione, usucapione, hereditate. Quæ res si puda traditione acquirebantur, duo erant ejusdem rei domini. Qui enim accipiebat rem, tantummodo in bonis habebat, & qui tradebat, dominus erat *Jure Quiritium*. Potior vero erat conditio ejus, qui habebat in bonis; eique servus acquirebat, *Ulp. Fragm. tit. 19. §. 20.* Sed hæc rerum, & domini distinctio a Romanis excogitata, ut prærogativam præ aliis Gentibus affectarent, sublata fuit a Justiniano *in d. L. un.*

§. 304. Dominium est jus, quo de re corporali quisque sua libere statuere potest, nisi obstet lex, testatoris jussus, vel pactio, *L. 21. C. mandat. L. 13. de acquir. rer. dom.* Ac domini quoque su-

sumus, et si rei dispositio, & vindicatio aliquatenus per leges limitetur: non secus ac liberi sumus etiam, cum certi fines a Jure nostræ constituentur libertati. Porro placuit, dominium accipi pro potestate statuendi de re corporali; forte quia acquirebatur certis modis, qui in incorporalibus rebus locum habere non poterant. Verum ipsi veteres aliquando largius domini vocem acceperunt, non tantum pro re corporali, sed pro omni jure, quo res quædam nostra est, *L. 17. ff. quibus modis ususfr. amittitur, L. 10. §. 3. ff. de acquir. rer. dom.* Dicitur etiam proprietas, *L. 13. eod.*, a re jam quæ sita: licet sæpenumero in Jure proprietatis vox nudam proprietatem denotet, a qua sc. usufructus sejunctus est. De dominio pleno, directo, utili, alibi.

§. 305. Jam acquiritur dominium vel Jure Gentium, vel civili, & certis causis, modisque, §. 11. *b. r.* Causæ remotæ proprie dicuntur *causæ*, sive *tituli*; proximæ *modi*. Tituli pariunt jus in personam. Modi immediate dant ipsum rei dominium (tamen si Jure naturali & dominium sine traditione transferri queat, *Pufendorf. de Jure nat. ac Gentium L. 4. cap. 9.*

§. 8.

§.8., & Romano Jure in quibusdam causis nec requiritur traditio) . Generaliter igitur quo dominium acquiratur, causam, & modum concurrere necesse est . Modi aut sunt Juris Gentium , aut Juris civilis, *d. §. 11.*: qua in re Juris Gentium vocabulo Romani Jcti videntur abusi . *Grot. II. 8. §. 1.* Vere dictum ab Ottonne in §. 12. *b. t.*, Romanos, quod secundum jus naturæ permittens peregrinis pariter, & Civibus concedebant, id omne *Jus Gentium* appellasse . Modi Juris Gentium sunt numero quatuor, occupatio, accessio, fructuum perceptio ex re aliena, ac traditio, de quibus hoc tit. Modi Juris civilis sunt 18. ex enumeratione Antonii Contii *Disp. I. 12.*: quorum undecim exhibet Tribonianus *a tit. 6. hujus lib. ad tit. 12. lib. 3.*; quinque singulares; usucapio, donatio, jus accrescendi, legatum, & fideicommissum singulare: sex universales; hereditas, bonorum possessio, adrogatio, bonorum addictio libertatis causa, emptio bonorum obærat, & mulieris liberæ addictio ex Scto Claudio .

§. 306. Occupatio est rei nullius (quæ tamen potest fieri privata, idest custodia con-

contineri) corporalis apprehensio cum animo eam sibi habendi. Ejus tres species, venatio, occupatio bellica, & inventio ; quæ ex sequentibus Juris Rom. principiis procedunt ; quæ tamen hodie ob regalia jura vix obtinent . Jam vero nullius sunt feræ bestię , & volucres , & pisces , §. 12. *b. r.* Hic separantur ; sed vere feræ bestię sunt etiam volucres, & pisces ; unde illarum partitio in *marinas* , & *terrestres* in *L. 44. de acquir. rer. dom.* Definiuntur quidem, quæ natura libere vagantur , nec sine vi capiuntur : captæ custodia coercentur, *d. §. 12.* Nec quod humana arte mansuescant , earum natura mutatur, §. 15. *b. r.* Tales Jure nostro sunt pisces, cervi, apes cum favis, pavones, columbæ : non vero gallinæ , aut anseres , §. 14. 15. , & 16. *b. r.* Atque occupari feræ bestię possunt etiam in alienis fundis ; licet dominus ingredi prohibuerit ; quo tamen casu injuriarum is agere potest, *L. 13. §. 7. ff. de injur.* Si vero vivariis, alveariis , piscinis sint inclusæ , occupari nequeunt , quia non sunt nullius. Sunt præterea nullius lapilli, gemmæ, cæteraque, quæ in mari, aut littore inveniuntur, §. 18. *b. r.* :
item

item thesaurus, seu *vetus depositio pecuniae*, hoc est pecunia deposita, cujus memoria non extrat, adeo ut jam dominum non habeat, §. 39. *b. t.*, L. 31. §. 1. *de acquir. rer. dom.*; tum res habitæ pro derelictis, d. §. 47. *b. t.*: quod ex animo dijudicari debet, §. 48. *b. t.*; adeo ut quæ dominus levandæ navis gratia in mare projecit, quæ excidunt de rheda, pecora, quæ sunt a lupis erepta, domini maneant, §. 48. *b. t.*, L. 8. §. *ult. ff. familiae etc.*; quique ea invenerit, tenetur facere, quoad ejus fieri potest, ut domino reddantur. Denique res nullius Jure Rom. censentur hostes, hostiumque res, §. 17. *b. t.* Bello enim justo indicto, humanæ rumpitur societatis foedus: & ex utraque parte bellantium res redeunt ad primævæ communionis statum. Immobilia autem non cedunt militibus, sed Reip., uti & mobilia publico belli actu capta. Sane quæ bello occupantur in dominio ejus sunt Principis, qui bellum gerit; & in peculatum incidunt milites, si quid e præda retineant, eo invito, cujus mera instrumenta sunt, & a quo stipendium accipiunt. Capta itaque in bello tum demum propria fiunt, cum pax erit inita.

His

His omnibus rebus id commune est, quod
 tum nostræ fiant, cum corporaliter ad-
 prehensæ sint, *L. 1. §. 1. de acquirenda
 possess.* Quare profligata est a Triboniano
 Trebatii opinio, feram bestiam a nobis
 ita vulneratam, ut capi possit, nostram
 esse, donec eam persequamur. Non enim
 occupasse dici potest, qui occupationis so-
 lam spem habet: cum plurima accidere
 possint, quæ eam spem eludant, *§. 13.,
 & seqq. b. r.* Quin in dicto *§. 18., §.
 39. b. r., & L. 1. §. 2. ff. eod., inve-
 nire* est inventa occupare, & possessionem
 nancisci. Sed proprium est ferarum be-
 stiarum, ut perpetua custodia coerceantur:
 secus desinunt occupantis esse, si se re-
 ceperint in naturalem libertatem, *d. §.
 12., ac 13.* hoc est, si aut occupantis o-
 culos eæ effugerint, aut ita videantur, ut
 difficilis sit earum persecutio, *L. 5. ff.
 de acq. rer. dom.* Facilius itaque hoc do-
 minium retinetur, quam acquiritur. Præ-
 terea ex dictis sequitur, si qua fera a
 nobis occupata, & mansuefacta, abire, &
 redire soleat, eousque nostram manere,
 donec redeundi servet consuetudinem, *d.
 §. 15., d. L. 5.* Thesauri aliquid pro-
 prium est. In aliis rebus nullius, nihil
 in.

terest, quo ea loco occupemus, & forte fortuna, an consulto. At in thesauro acquirendo notanda sunt tam locus, quam modus inventionis. Hadrianum de thesauris ita cavisse, scribit Spartianus *in ejus vita cap. 18.*, *ut si quis in suo reperisset, ipse potiretur, si quis in alieno, dimidium domino daret: si quis in publico, cum Fisco aequaliter potiretur.* Verum huic historici loco supplendum aliquid est ex *d. §. 39. b. r.* Hadrianus quidem inventori dedit thesauros repertos in sacro loco, & religioso, quasi repertos in suo (pecunia autem in hisce locis & securitatis causa, & ad luxum deponi consuevit): repertos vero in loco Cæsaris, vel Civitatis, dividi jussit inventorem inter, & Cæsarem, Civitatemque. Item referre voluit, in iis locis fortuito ne, an de industria reperti essent thesauri. Priore casu inventorem admisit in partem: posteriore expertem fecit. Alienum sane locum scrutari, incivile est: scrutari sacrum, religiosumve, est impium. Totus etiam ad Fiscum pertinet thesaurus sceleratis sacrificiis, atque odiosa arte inventus, *L. un. Cod. de thesauris.* Nunc intelligis, cur diversa ratione thesauri acquisitio modo ac-

accessionibus adenseatur, *uti in* §. 39. *b. r.*, modo inventionibus, *uti in* L. 31. §. 1. *ff. de acquir. rer. dom.* Sed Hadriani Constitutioni derogatum aliquid per Constitutionem Divorum Fratrum, ex qua thesauri in religiosis locis, vel in monumentis reperti, medietas Fisco data est, *uti ait Callistratus in* L. 3. §. 10. *de J. Fisci.* Tribon. itaque debebat aut novam hanc Constitutionem, quæ Hadrianæ derogat, non inferere in *ff.*, aut veterem illam non probare in Institutionibus. Qui convenire putant inter Hadrianum, & Divos Fratres, nugas agunt, atque operam ludunt, *V. Water. Obs. III. 3.*

§. 307. Secundus acquirendi Jure Gentium dominii modus est accessio, seu rei adjunctio ad rem, quæ prævalet, *Paulus in* L. 23. §. 4. *de reivin.*, quæ sc. principalis est, licet minoris pretii. Estque accessio naturalis, artificialis, aut mixta.

§. 308. Naturalis existit sine facto hominis; ejusque nonnullæ sunt species. I. species est foetura: quod namque ex animalibus nostris, aut muliere nascitur, nostrum est, §. 4. *de J. person.* §. 19. *b. r.*; eodem modo, quo fructus e nostro solo nobis

cedunt . II. Est alluvio , five incrementum latens causa fluminis . Excluduntur stagna , & lacus , quæ licet crescant , decrescantque , iisdem tamen terminis semper concluduntur : flumina vero terminos suos mutare solent . Itaque cum ex alienis fundis aliquid abrasum a flumine , latenter accedit agro nostro , nostrum fit ; quia nemo est , qui quantum , & unde accesserit , certe designare queat : ut proinde haberi debeat pro re nullius , §. 20. *b. r.* ; & agro *arcifinio* , seu naturalibus finibus incluso , non vero agro *limitato* , cedit . III. Est avulsio , five incrementum patens . Nam si fluminis , maris , aut terræ motus vi , alieni prædii portio diffiliat , meoque accedat , & jam cohæsit , *arboresque* , *quas secum traxit* , in fundum meum *radices egerunt* , *ex eo tempore videtur mihi acquisita* , L. 5. §. 3. ff. *de reivind.* Quapropter in §. 21. *b. r.* eodem sensu legendum *videtur acquisita* ; non *videntur acquisitæ* : non enim de solis arboribus agitur . Ratio hujus legis est , quia pars alieni fundi nec certo designari , nec tolli sine damno potest , L. 9. §. 2. ff. *de damno infecto* . Si vero nondum cohæsit , ejus manet , cuius erat , d. §. 21. *b. r.*

b. r. IV. Est insula in flumine nata, quæ eorum est, qui ex utraque ripæ parte prædia possident: ita ut si in medio flumine nascatur, ad omnes; sin alteri parti propior, ad eos tantum pertineat, qui ex ea parte prope ripam prædia habent, pro modo latitudinis cujusque prædii, qua ripam spectat, §. 22. *b. r.* Insula vero nata in mari, maris naturam sequitur; ideoque, utpote communis, occupanti cedit. Quæ diximus, accipienda de insula, quæ alveo fluminis cohæret, non de insulis natatilibus. Cauta vero hæc sunt ex mera humanitate; & quidem non jure accessionis; accederet enim insula alveo, & flumini; ut proinde publica esse deberet, *Grot. lib. 2. cap. 8. §. 9.*; sed in compensationem damni. Quod si alicujus agrum circumfluum flumen in insulæ formam redegit, dominus non mutatur, §. 22. *b. r.* V. Est alvei derelictio. Novum alveum fecisse flumen dicitur, si post aliquod tempus alio coepit abire, §. 23. *b. r.*, cum e contrario inundasse dicitur, cum recessit eodem impetu, *L. 30. §. 3. ff. b. r.* Alveus derelictus a flumine desinit esse publicus (licet contrarium scripserit *Grotius loco cit.*), quia jam populus eo non

utitur, L. 30. §. 1. ff. *h. t.* Igitur exiccatus alveus prædiis vicinis pro modo latitudinis accedit, §. 23. *b. t.*, & ager, quo flumen abit, vel domini manet, si a flumine inundetur, vel fit publicus, si in eo novum alveum sibi faciat flumen, §. 23. & 24. *b. t.*. Et novus hic alveus, si relinquatur a flumine, quod ad veterem alveum se recipiat, non redit ad dominum: nam ejus ager propriam amisit formam; sed vicinorum prædiorum dominis accedit *ex stricta ratione*: sed *vix est, ut id obtineat*, Cajus L. 7. §. 5. *de acquir. rer. dom.*, ubi *vix* prorsus negat ex verecundo Jætorum loquendi more. VI. Est confusio. Liquida proprie confunduntur, arida miscentur, §. 27., & 28. *b. t.*; licet promiscue sæpenumero hæ voces asurpentur. Liquidæ res duorum, five ejusdem, five diversi generis, utriusque voluntate confusæ, communes fiunt pro rata, *d.* §. 27. Sed hæc est species mutuae traditionis, non hujus loci. In confusione fortuita accessioni est locus, si fortuito confusa diduci nequeant. Si possint diduci, communia non fiunt; ut si plumbum, & argentum, aut argentum, & æs conflata sint; quæ metalla ab artifi-

tificibus separantur , L. 5. ff. de reivindic. Ex hac re temperandum est , quod primum legitur in d. §. 27. , de rebus casu confusis *idem juris esse*, quod de confusis dominorum voluntate: nimirum confusa voluntate dominorum , nullo discrimine communia fiunt, confusa vero casu, tunc demum, si non possint separari. Insuper quod facit ad arida , si casu , vel unius domini voluntate commixta fuerint , nunquam fiunt communia : singula enim cujusque corpora *suam propriam speciem retinent*, L. 23. §. 5. ff. de rei vindic. Tribonianus autem in d. §. 28. minus proprie scripsit *in sua substantia durant* , substantiam pro specie accipiens ; quasi minimæ illæ rerum fortuito confusarum particulæ arctissime coeunt , non in sua substantia durent . Tum proponit exempla frumentorum , pecorumve commixtorum . Verum non eadem est ratio . Omnia quidem per commixtionem retinent propriam speciem ; quod sufficit ad dominium retinendum : sed quædam , licet commixta , designari possunt , uti pecudes ; hinc singuli singula corpora vindicant ; quædam non , uti frumenta ; hinc singuli partem petunt a iudice , d. §. 28. ,

cujus officium erit æstimare, quale cujusque frumentum fuerit, & plus ei adjudicare, cujus frumentum pretiosius erat, §. 5. *infra de offic. judicis*. Quæ omnia non ubique hodie eodem modo obtinent; & insulæ in flumine natæ, ejusdem censentur juris, ac flumen ipsum.

§. 309. Artificialis accessio est, quæ nostra opera fit: ejusque duæ species, specificatio, & adjunctio. Specificatio est nova specieieductio ex materia aliena, aut partim aliena, partim propria; uti si ex alienis medicamentis emplastrum, aut collyrium quis composuerit; ex aliena lana vestimentum fecerit; ex alieno auro, argento, ære, vas aliquod composuerit; ex uvis vinum; ex vino, & melle mulsum; aut ex tabulis navim, subsellia. Si quis novas species suo nomine, & bona fide ex alienis rebus effecisset, quoad earum dominium, ex Proculianorum opinione, prævalebat species, ex Sabinianorum, materia, *d. L. 7. §. 4. ff. de rer. divis*: cujus pugnx supersunt in ff. vestigia, *V. L. 26. de acq. rer. dom.*, & *L. 61. de reivindic.* Erciscundi postea Jcti putarunt, quod si species ad materiam reverti possit, uti vas ad rudem

mas-

massam, dominus materiæ erit dominus speciei; sin reverti nequeat, uti vinum ad uvas, dominus erit, qui speciem fecit. Id etiam probavit Justin., §. 25. *b. t.*: ubi tamen perperam specificationis exemplum ponit Tribon. frumenti excussionem ex spicis alienis, immemor ejus, quod ipsemet ex Cajo retulerat in ff., *excussum frumentum ejus esse, cujus & spicæ fuerunt*, L. 7. §. 7. *de adquir. rer. dom.* Quod si quis novam speciem fecerit ex materia sua, & aliena, *dubitandum non est, eum esse dominum, qui fecerit; cum non solum operam suam dederit, sed & partem ejusdem materiæ præstiterit*, §. §. 24. *b. t.* Neque in hac re dispiendum, possit, necne, facta species ad suam redire materiam, quod in superiori quæstione fieri oportebat, uti rectissime Bachovius. Præterea adjunctione res aliena ita adnectitur ad nostram, ut dignosci queat, veluti si alienam gemmam auro nostro includamus. Spectatur autem, uti diximus, non rei pretium, sed prævalentia. Igitur meum est alienum metallum meo per adferruminationem adjunctum. Et cedit gemma auro, ansa statuæ, vestimento subsutum, ædificium solo,

membranæ scriptum, §. 26, 29. 30. *C.* 33. *b. r.* Num pictura tabulæ? Defuit Jus certum ad tempora Triboniani, §. 34. *b. r.* Ei autem arrisit sententia illorum, qui putarunt, tabulas cedere picturæ; quam exceptionem suasit *picturæ pretium*, *L. 23. §. 3. ff. de reivind.*

§. 310. Mixtæ accessionis, quæ partim opera nostra, partim sine ea fit, species itidem duæ, plantatio, & satio. Plantæ, & semina solo cedunt: hæc quidem statim ac sata sunt, cum nequeant separari a fundo; illæ ubi jam radices egere; tum quia divelli nequeunt sine fundi detrimento; tum quia *alio terræ alimento aliæ factæ sunt*, *L. 26. §. 2. de acquir. rer. dom.* Arboris itaque dominium ex radicibus Rom. Jure æstimabatur: unde prope confinium posita, nimirum intra quinque pedes, communis est pro regione prædii, in quo actæ sunt radices, §. 31., *C.* 32. *b. r.*

§. 311. Propositum de accessionibus jus temperandum est ex alia Juris regula, neminem cum alterius detrimento, atque injuria, fieri posse locupletiolem, *L. 206. de R. J.* Quare præter ea, quæ in naturalis accessionis speciebus ad probandam legitimi domini acquisitionem, sparsim dicta

Et sunt, multa ex Jure civili prodita videmus in accessione industriali remedia, quæ omnem amoveant injuriam. Quare qui rem suam ad alienam prævalentem sciens adnectit, quoniam sponte sua agit, eam donare videtur: ac proinde rem, & rei æstimationem, & impensum amittit, §. 30. *b. 1.* Sed qui ignorans, & bona fide adnectit, si possidet, poterit rem retinere, quousque sibi plene fiat satis, opposita doli mali exceptione rei prævalentis domino, §. 30. 32. 33., & 34. *b. 1.* Si non possidet, & quod adjunctum est separari possit, ad exhibendum agit, ut separaretur, & postea vindicari queat: nam quamdiu cohæret, alienum est, & vindicari nequit. Si separari non potest, actione in factum agit, ut tantum sibi restituatur, quanti factus est locupletior rei prævalentis dominus, *L. 23. §. 52. & L. 52., & 25. de reiv.* Eodem modo agitur cum eo, qui ad suam rem prævalentem bona fide alienam adnectit: nam si mala fide, tenetur etiam furti actione, & condictione furtiva, §. 26. *b. 1.* Insuper notandum, separari non posse ferruminata, posse adplumbata, *d. L. 23. §. 5.* Porro vetat Lex 12. Tabul. solvi tignum injunctum adi-

ædibus, vineæve; ne urbes ruinis deformentur, aut vinearum cultura turbetur. Tignum generaliter in ædificiis est materiæ omne genus, qua illa constant: in vineis est, quicquid eis necessarium est, ut pericæ, pedamenta, *L. 1. §. 1. de tigno juncto*. Stante igitur ædificio, vel vinea, quia neque vindicari, neque agi ad exhibendum potest, locus erit actioni de tigno juncto in duplum: diruto autem ædificio, poterit dominus, si duplum non fuerit consequutus, tignum ipsum vindicare, §. 29. *b. r.* Quinimo de accessione jus æquioribus regulis hodie continetur, *V. Heinecc. Elem. J. Nat., & Gen. l. 9. §. 250., & seqq.*

§. 312. Nunc de fructuum perceptione. Qui iusta de causa fundum, aliamve rem ab aliquo accepit bona fide, idest putans eum, unde accepit, dominum esse, aut alienandi jus habere, uti est procurator, tutor, fructus percipiendo suos facit, §. 35. *b. r.* Fructus potius a fruendo dicti sunt, quam a ferendo. *V. Vossium voc. fructus*, ubi Varronis verba afferuntur. Non agitur hoc loco de civilibus fructibus, qui jure percipiuntur occasione rei, & magis vicem fructuum

fluum habent, quam veri sunt fructus ; ac proinde huc non pertinent ; uti vesturæ navium, vel jumentorum, usuræ, & mercedes prædiorum, *L. 121. de V.S.* Sed hic agitur de naturalibus, §. 37. *b. t.*, uti sunt in fundo segetes, uva, olea, poma ; in pecoribus lac, pilus, lana, foetus, *d. §. 37. b. t.* : nisi quod ancillarum foetus in fructu non est, *L. 68. de usufructu*. Fructus naturales vel proprie *naturales* dicuntur, qui sponte sua veniunt, ut poma, oleæ, nuces, ligna, glandes, fœnum ; vel *industriales*, qui opera nostra perveniunt, uti frumentum, vinum, segetes, legumina, & alia in agris sata, *L. 58. & 48. de acqu. rerum dom.* Atque tam naturales, quam industriales dicuntur *pendentes*, si adhuc rei cohæreant ; aut *percepti*, si a re separati, *L. 44. de reivindic.*, *L. 25. §. 1. de usur.* ; aut *extantes*, si percepti adhuc sint penes eum, qui percepit ; aut denique *consumpti*, si non sint amplius apud eum, qui percepit, sed iste vel iis usus sit, vel eos in alios transtulerit, *L. 22. de pigner. act. L. 3. C. de condict. ex lege*. Utraque fructuum species bonæ fidei possessori acquiritur, *Paul. in d. L. 48.*

&

& quidem ipsa perceptione: quo is distat a vero domino, qui etsi fructus non percipiat, etiam dominus est. Acquisitionis vero fructuum causa est *fundi cultura, & cura*, non bona fides, §. 35. *b. r.* Bona fides autem, titulusque conditiones sunt, sine quibus ea causa eum effectum non producit. Modus porro non est accessio, sed ipsa fructuum separatio, *d. L. 25. §. 1.* Opponitur dictus §. 35., ubi scriptum, bonæ fidei possessorem *consumptos fructus lucrari*; extantes præstare fundi domino debere. Respondetur, ex Paulo *in d. L. 48. b. r.*, illum percipiendo fructus facere suos *interim*, hoc est quamdiu res non evincitur. Ergo perceptorum fructuum dominium temporarium, & revocabile est: sed desinit revocabile esse, cum consumuntur. Ita fructuum acquisitionem perceptio statim inchoat; consummatio consumat, sicuti ait Cujacius *ad Africanum tract. 7. ad L. 40. de acq. rer. dom.* Porro diximus ex Paulo *in d. L. 48. in hac causa venire etiam fructus industriales*. Nec obstat Paulus idem *in L. 45. de usuris*, qui tantum bonæ fidei possessori industriales fructus concedit, non item naturales. Nam agit de bonæ fidei pos-

possessore destituto justo titulo, uti est conjux, cui aliquid a conjuge donatum. Nec obstat Tribonianum illud *pro cultura*, & *cura*: nam hæc vox amplior est, & ad universum fundum refertur: ut o-mittam, naturalibus quoque fructibus culturam prodesse. Jam vero malæ fidei possessor nullos fructus facit suos, *L. 22. C. de reivin.* Igitur extantes vindicantur, condicuntur consumti, *d. §. 35.* Utrique tamen possessores in fructibus restituendis impensas deducunt. Proprie enim fructus est, id, quod deducta impensa, superest, *L. fructus 7. ff. sol. matr.* Verum possessor bonæ fidei deducit *omnimodo*, licet res non extet, in quam impendit; veluti si fortuito casu nulli venerint fructus. Contra possessor malæ fidei deducit, si res melior sit, *L. 36., & 38. de hered. petit.* Quædam alia addit Tribon. de fructuario, & colono *in §§. 36, 37., & 38.*, quæ potius ad quartum titulum pertinere videntur. Nimirum hi æque, ac bonæ fidei possessor, fructus percipiunt, sed non eodem jure. Hic acquirit jure soli; fructuarius vero jure servitutis; colonus jure conventionis, atque ex aliorum voluntate, non ex causa culturæ. Melior tamen est bo-

bonæ fidei possessoris conditio, cujus fiunt fructus, cum a solo separati sunt quoquo modo, L. 25. §. 1. ff. de usuris; h. e. sive ab ipso possessore, sive ab alio, tum possessoris nomine, tum suo. Fructuarii vero fructus fiunt, cum ipse eos perceperit, §. 36. b. r., aut ejus nomine alius, L. 61. §. 3. de furtis. Quare b. f. possessor utpote dominus, conditionem habet adversus eos, qui fructus furati sunt. Fructuarius vero, & colonus, quia ex domini voluntate fructus percipiunt, solam furti actionem habent, L. 12. de usufr. Eadem ratione si fructuarius decesserit fructibus maturis, nondum perceptis, hi pertinent ad proprietatis dominum, non ad heredes fructuarii. Secus est in bonæ fidei possessore, qui jus in solo transmittit ad heredes. Discriminis ratio, uti mox diximus, est, quia hic jure soli, & animo domini rem retinet, ille jure usufructus, qui cum persona perit. Quod de fructuario, idem fere (quam vocem male rejicit Theophilus) de colono statutum. Adpositum est illud fere, quia jus coloni jure fructuarii pinguius est; adeout, illo intra conductionis tempora defuncto pendentes fructus ad heredem pertineant, d. §.

d. §. 36. ; L. 10. C. *de locato*. Si id excipias, colonus æque, ac fructuarius, fructus nonnisi percipiendo suos facit. Ex quo sequitur, posse locatorem vendere fundum; & sic facere, ut fructus pendentes emtori cedant, L. 9. C. *eod.*; data tamen colono in dominum venditorem actione in id, quod interest ratione fructuum. Nam non modo fructus percepti æstimandi sunt, verum & qui honeste percipi potuerunt. Tum Tribonianus §. 38. docet, fructuarium gregis, aut fundi, debere in locum demortuorum capitum alia submittere. At quid hoc ad domini acquisitionem? Scilicet omisit, quod habet Pomponius in L. 69. *de usufructu*, a fructuario *substituta statim domini fieri*, id est jure accessionis.

§. 313. Remanet traditio, ultimus acquirendi Jure Gentium domini modus. Ea, definiente Cujacio, est *datio possessionis*. *Dare* ad dominium refertur (quandoque etiam traditionem denotat, L. 4. ff. *de usuris*); *tradere* ad possessionem. Traditio autem vel est vera, vel ficta. Vera est datio possessionis per corporalem rei translationem de manu in manum, vel per inductionem in prædium, si res soli

foli tradenda sit. Ficta est per alios modos; quorum unus est in §. 44. *b. r.*; ubi præcedens vera traditio vice fungitur alterius, quæ omittitur; atque hæc dicitur *brevi manus*, in L. 43. §. 1. ff. de J. D., vel ubi res tradenda e longinquo demonstratur, quæ traditio *longa manu facta* dicitur in L. 79. ff. de solution. V. *Aulium nostrum ad tit. de acquir. vel omitt. possess. quæst. 6.* Alter modus est in §. 45. *b. r.*, ubi clavium horrei traditio, est pro traditione mercium in horreo existentium. De hac symbolica traditione per claves, instrumenta, glebam &c., vide Ottonem de *Jurisprudentia Symbolica*. Jam vero traditione dominium transfertur, si qui tradit, habeat jus, & voluntatem alienandi, L. 9. §. 3., L. 20. de acq. dom. (quare pupillus sine tutoris auctoritate non recte tradit, §. 2. quibus alienare licet); tum si ex justa causa tradat, §. 40. *b. r.* L. 31. de acq. rer. dom.; si ve ipse dominus tradat, si ve ejus voluntate alius, puta procurator, tam specialis, quam generalis, §. 42. & 43., si ve certis, si ve incertis personis tradatur. Huc pertinent missilia, §. 46. *b. r.* Tribon. missilibus comparat res a dominis suis pro de-

derelicto habitas. Verum hæ non per traditionem fiunt occupantis, ut illa, sed per inventionem; nam dominus eo tantum spectat, ut ipsarum amittat dominium, nihil sollicitus de iis, ad quos pervenire debeant. Diversa ratio est earum rerum, quæ levandæ navis gratia in tempestate ejiciuntur; nam furtum facit, qui illas aufert lucri studio. Quin ex *Amb. navigia C. de furt.* statuta est omnium bonorum publicatio in eos, qui aliquid ex bonis naufragorum ad littus appulsum subripiunt. Naufragorum bona vetuit etiam publicari Constantinus, sive potius Antoninus, uti putat Salmasius *de modo usur. cap. 5.*; licet parum humana sit aliqui contraria consuetudo Principum maris æccolarum. Eadem est causa rerum, quæ de rheda currente, vel alio modo amittuntur (§. 306.); quod si dominus omnimodo non inveniatur, & inventor sit pauper, poterit, uti existimo, rem retinere; siq. dives, pauperibus erogare. Domino jam apparente, nil poterit pro indicii præmio peti, *L. falsus creditor ff. de furtis, L. 4. ff. de condict. ob turpem causam*. Jam vero in venditione ad transferendum dominium & illud necesse est, ut aut pretium solutum sit, aut

T

alio

alio modo satisfactum, puta expromissione, vel pignore dato, §. 41. *b. r.*, vel etiam habita sit fides de pretio; *L. 19. de contrab. emt.*: pretium enim finis est traditionis rerum venditarum. Insuper olim sola res nec mancipi nuda traditione abalienabatur. Sed post Justinianum cujusvis generis sit corporalis res, idest quamvis sit mancipi, a domino tradita alienatur: itaque stipendiaria quoque & tributaria prædia eodem modo alienantur, §. 40. *b. r.*; ubi corporalis tantum rei mentio fit, cujus propria est, & vera possessio, ac traditio, *L. 43. §. 1. b. r.* Sed & incorporalium quasi possessio, & quasi traditio inducta est, quæ in concedentis patientia, & usu accipientis consistit. Ubi vero est stipendiaria quoque; Hotomanus reponit Italica quoque; quia hæc mancipi erant; illa nec mancipi. At nihil mutandum. Nam alienari per traditionem prædia stipendiaria poterant & ante Just., & postea; diverso tamen effectum; Antea quia in bonis possessorum erant, sed in dominio quiritorio Pop. R. (unde, facta inter Pop. & Augustum Provinciarum divisione, quod hæc pendebant Principi & tributum, quod Populo stipendium dicebatur, Theoph. in *b. §.*)

illi

illi alienare poterant, salvo Populi jure. Post Just. alienabant eodem modo, ad Italicæ prædia, & alias res mancipi, quæ immunes erant: atque ita plenissimum in accipientem jus transibat. *V. Bynk. de reb. manc. c. 9.* Tandem non semper traditionem ad dominium transferendum necessariam esse, supra diximus (§. 303.); & passim videbimus. Ita jus hypothecæ solo pacto constituitur, *L. 1. ff. de pign. act.* Servitutes negativæ nec quasi traditionem admittunt: res judicio duplici adjudicatur, sc. comm. dividendo, fam. eriscer, vel finium regundorum, §. *fin. Inst. de off. Judic. Ulp. tit. 19. §. 16.*: & acquisita per ultimam voluntatem, etiam non facta traditione, pleno jure acquiruntur, *L. ult. ff. de serv. leg., L. 19. §. 1. quem. serv. amitt.*

T I T. II.

DE REBUS INCORPORALIBUS.

§. 314. **R**erum privatarum aliæ corporales sunt, incorporales aliæ, *princ. b. t.* Utræque in bonis sunt: atque licet res incorporales in dominio proprie non sint, sunt ta-

men in bonis. Cic. *Famil. Lib. V. ep.*
 17. ait, non minus nostra esse, quæ ani-
 mo complectimur, quam quæ oculis intue-
 mur. V. Huber. *Digress. part. 1. lib. 4.*
cap. 6. Corporales sunt, quæ tangi possunt,
 §. 1. *b.t.*: cum Stoici corpora solo tactu,
 ad quem unum sensus omnes referebant,
 æstimarent. *Seneca Ep. 106.* Contra in-
 corporales sunt, quæ tangi nequeunt, seu
 quæ ip jure consistunt, §. 2. *b. t.*; ni-
 mirum, ut exponit Vinnius, eas habent
 naturam, qualem Jus fingit. Melius ex
 sententia Ciceronis, *Top. cap. 5.*, in ju-
 re, sive in ratione, consistere dicuntur
 res, quarum solummodo in mente notio
 est; adeout non esse dicerentur (§. 292.).
 Inter corporalium exempla est aurum,
 argentum, *d. §. 1.* Verum in nummis si
 spectetur materia, corporalis ea est, si
 æstimatio, incorporealis, *L. 94. §. 1. de*
solut.: quantitates namque æque, ac qua-
 litates tangi nequeunt. Rerum corpora-
 lium aliæ mobiles sunt, aliæ immobiles.
 Porro exempla incorporealium sunt tutela,
 agnatio, hereditas, usus, usufructus, o-
 bligationes: sunt enim jura, licet ad cor-
 pora dirigantur: tantum abest, ut sint istæ
 actæ. *Jetorum ineptia*, uti dicuntur apud
 Se-

Senec. *de Benef. VI: §.* Et miror, Vin-
nium absurdam existimasse hereditatis no-
tionem ; postquam Papinianus in *L. 50.*
de hered. petit. scripsit ; hereditatem *et-*
iam sine ullo corpore ; juris intellectum ba-
bere. Sane aliud est hereditas ; sive jus
heredis ; aliud patrimonium ; sive bona
defuncti ; quæ ex eo jure perveniunt.
At Jēti quandoque vulgari more ajunt ;
hereditatem peti , dividi , possideri : Jam
vero inter res incorporales sunt servitu-
tes :

T I T. III.

DE SERVITUTIBUS .

§. 315. **S**ervitus in prædiis est jus in
re aliena ; quo dominus alie-
no commodo, aliquid in re sua aut pati,
aut non facere compellitur . Cum vero
aliena res vel prædio servire possit ; vel
personæ ; hinc servitutum aliæ rerum ,
seu in rem , aliæ personarum . Servitus
autem proprie dicitur relatione ad prædium,
unde debetur . Hoc titulo agitur de *ser-*
vitutibus prædiorum ; quæ prædiis impo-
nuntur , & prædiis quoque debentur . Qua-

re solum ea imponere potest prædii dominus ; cujus nomine & emphyteuta , & superficiarius comprehenduntur , §. 3. *h. t.*

§. 316. Prædia, quibus servitutes debentur , aut rustica sunt , aut urbana , *prinç. & §. 1. h. t.* Ubi agitur de effectu Juris in servitutibus , magis est , ut ea prædia distinguantur materia , & qualitate , quam usu , aut fine , sicuti in aliis negotiis. *V. Vinnium in §. 1. h. t. L. 198. de V. S.* Unde Neratius *L. 2. de servitut. rusticor.* , ubi ait , rustici prædii servitutem esse *licere altius tollere* , & *officere Prætorio* (*Prætorium ædificium erat ruri positum , & ab habitatione villici separatum , in quo dominus ruri agens habitabat Columell. de re rust.*) vicini , accipiendus non est de effectu Juris in servitutibus. Simpliciter ibi Jæsus quærit , quorum prædiorum eæ sint : qua ratione distingui possunt loco , perinde ac ipsa prædia , *L. 196. de V. S.* Sed in hac causa loca omnia ædificiis vacua , sive ruri , sive in Urbe , pro rusticis habenda sunt ; & omnia ædificia urbana prædia appellantur , etsi in Villa sint , §. 1. *h. t.* Servitutes rusticæ rusticis , urbanæ urbanis prædiis debentur .

§. 317. Jura prædiorum rusticorum sunt

sunt iter, actus, via, aquæductus. Iter est *jus eundi, ambulandi hominis, non etiam jumentum agendi, vel vehiculum, princ. b. t.* Hoc jure constituto, tu pati debes, me per fundum tuum ambulare, ire ad fundum meum, cui servitus ea debetur. Ire est ad necessitatem, vel utilitatem prædii; ambulare est ad valetudinem, aut animi causa. Licet enim ad solam voluntatem servitus non constituatur; voluntas tamen potest esse accessionis loco; & vel ipsi conceditur usuario, L. 12. §. 1. de usu, & habit. Ire etiam dicitur, qui sella, vel lectica, vel equo vehitur, L. 7., & 12. ff. de S. P. R. Et in definitione *jumentum* intelligitur sarcinis onustum: adeo ut opus non sit Hotomani emendatione, pro ea voce *armentum* reponentis.

§. 318. Actus amplior itinere, est *jus agendi vel jumentum, vel vehiculum, princ. b. t., & L. 1. ff. eod.*: nimirum non solum armenta, verum etiam gregem. *Armentum* proprie est grex majorum bestiarum, veluti bovum, L. 89. de V. S.: grex minuta pecora complectitur, veluti oves, & capras, L. 81. §. 4. de Leg. 3. Hotomanus idem ex L. 12. ff. eod.

non *jumenta* in hac definitione, sed legit *armentum*. Sane *jumentum* acceptio angustior est, & animalia designat, quæ collo, & dorso domantur. Sed melius dici potest, vocem *armentum* in d. L. 12. exempli loco positam: tum vocem *jumentum* lata significatione *armentum* etiam complecti. Jam ex præsumpta concedentis voluntate, qui actum habet, etiam iter habere, eoque uti posse sine *jumento*, dicitur in d. princ., ac L. 1. de servit.

§. 319. Via actu ipso amplior, est *jus cundi*, & *agendi*, & *ambulandi*; d. princ., & d. L. 1. Sunt qui pro *cundi* legunt *vehundi*. Sed opus non est hac emendatione: nam ex definitione constat, eum, qui viam habet, ire, ambulare posse, & *jumentum*, aut *vehiculum* agere. Docent Interpretes, viæ certam fuisse latitudinem ex XII. Tab.: h.e. octo pedum in porrectum, 16. in anfractum, Cujac. Obs. XXII. 35. Bynkershoekius IV. 7. tener, aliud fuisse *vehiculum actus*, aliud *viæ*; hoc majus, illud minus, & manuale pro latitudine quatuor pedum, quam actui tribuit. Ex verbis ipsis definitionis discrimen appareret, quod viæ propriam iter inest, actui tacite, & per consequens.

sequentias: quæ observatio ad vindicationem instituendam facit.

§. 320. Aquæductus est *jus aquæ ducendæ per fundum alienum. V. Goveanum Lest. I. 17.* Quinque alias rusticorum prædiorum servitutes subnectit Tribonianus §. 2., aquæ haustum (ad prædii nostri, vel familiæ rusticæ usum, & commoditatem; quod distinguendum est ab aquæ itinere), pecoris ad aquam appulsam, jus pecoris pascendæ (quæ pariter realis est servitus, fundo, cujus in fructu pecus est, non pecori ipsi debita), jus calcis coquendæ, & arenæ fodiendæ. Sunt vero & aliæ in aliis libris Juris. Omnes autem, ut diximus, ad prædiorum usum, utilitatemque spectare debent; alias videntur magis servitutes hominum. Rustica servitus etiam urbana fieri potest, si urbano prædio debeat, *L. 14., ff. communia præd.*

§. 321. Urbanorum prædiorum servitutum, quas habet §. 1. *b. i.*, prima est servitus oneris ferendi. Regulariter in omnibus servitutibus resectio ad eum pertinet, qui sibi servitutem asserit, *L. 6. §. 2. si servitus vindic.* In hac vero contrariam Servii sententiam invaluisse, subdit Ulpianus. Idem docet Paulus *L. 33. de*

de

de S.U.P. Quidam tamen putant, id non nisi ex peculiari pacto, quod alii J&S improbabant, obtinuisse. Secunda servitus immittendi, nimirum tigni, sive trabis. Sed olim Romæ cum ex Decemviri carmine ædes disjunctæ, essent certo spatio, sive ambitu, idest, festerio, pede, nullus primis illis temporibus erat servitutibus his duabus locus. Tertia est servitus stillicidii: quarta fluminis recipiendi, vel non recipiendi. Nimirum, pulsus Gallis, Romæ publico bono cautum, ut vicinus, certis causis, aquam vicinæ domus in fundum suum recipere compelleretur. Ac si alicubi peculiare fuerit hoc statutum, huic servituti locus fieri posset. Quinta est servitus *altius non tollendi*, hoc est ne altius tollat quis ædes suas, ne luminibus vicini officiat, d. §. 1. Quæ postrema verba finem explicant hujus servitutis. Alibi servitus ne luminibus officiat, alia est a servitute altius non tollendi, & latius patet: nam & arbore officii luminibus potest, L. 15. de S. U. P. Est & altius tollendi servitus, §. 2. infra de act., & alibi; ad quam intelligendam inter tot sententias dici potest, publicis legibus Augusti, Neronis, & Trajani,

jani, certum modum pro ædificiorum altitudine statutum fuisse. Sed cum non liceat pactis privatorum publicas infringere leges, & illud, mea sententia, statutum alicubi sit oportet, ut vicinorum gratia aliquem certum altitudinis modum non liceat excedere. *DD. post Jo. Fabrum. ad §. æque inf. de action. V. Donell. Comm. II. 5.* Ultima est servitus prospectus, sive ne prospectui officiat: ut domus liberiores, gratioremque prospectum habeat. Lumen ingreditur; prospectus egreditur. Illud est, ut coelum videamus; hic, ut terram, maria, nemora, flumina. Vetur ergo hac servitute vicinus ea omnia facere, quæ amoeniorem prospectum interturbent. *V. Cujac. ad L. II. C. de ædific. privat., & Obs. I. 13., & Duar. Disp. I. 33.*

§. 322. Omnes servitutes communia hæc habent. I. In patiendo, vel in non faciendo eæ consistunt, *L. 15. §. 1. ff. de servitut.* Hinc dominus prædii, unde servitus debetur, non tenetur facere, ut prædium suum præstandæ servituti idoneum sit. De servitute oneris ferendi mox. Hinc etiam si quis ab altero stipuletur, ut viridaria tollat, in suo aliquid pingat, alio-

alioue modo prospectum sibi amoeniorem faciat, nulla servitus constituta videtur.

II. Quia in jure consistunt, sunt individuae; tam si sint affirmativae, quae in patiando; quam negativae, quae consistunt in non faciendo, *L. 2. §. 72. ff. de V. O.* Ideo ab initio nec pro parte constitui; nec acquiri possunt, *L. 8. §. 1. ff. de servit.* Excipe ex peculiari ratione usufructum. Sed servitus semel acquisita potest ex parte retineri, *d. L. 8.* Ita si praedium tuum mihi serviat, & ego partis praedii tui dominus esse coepero, vel tu mei; per partes servitus retinetur.

III. Perpetuam causam habere debent; *L. 28. ff. de S. P. U.* Causa dicitur, cujus aut habendi gratia; aut arcendi a nostro praedio servitus constituta est. Perpetuum dicitur, quod ex naturali causa oritur, etsi non sit assiduum, *d. L. 28.* ex. gr. aqua pluvia. Sed & quod ex facto nostro oritur, pro perpetuo habetur, si aliquid pro arbitrio nostro facere liceat, & in eam rem paratum sit praedium, aut ejus pars; uti est fumi immissio ex taberna caesaria in superiora aedificia.

IV. Commodum, & utilitatem praediis (vel personis), praestare debent. Quod si

si Labeo in *L. 19. de servit.* doceat, prædio acquiri posse servitutem, licet *aquam alicui ducere non expediret*, id accipendum, quia in futurum fortasse utilis erit prædio servitus. Prædiales itaque servitutes sola utilitate prædiorum æstimabantur olim, cum rigidi stabant Veterum mores. Deinceps etiam amoenitatis causa constitui eas posse, obtinuit, si prædio pretium augeatur. Eo spectat Ulpianus in *L. 8. §. 1. si servitus vindic.*, ubi affirmat, valere servitutem, *ut in parietem signa immittere liceat*, *supraque eo signo porticum ambulatoriam facere*. Sed solius amoenitatis gratia servitus prædio constitui nequit, *L. 8. de servit.*; etsi aliud doceat Noodt *Probabil. l. 2., V.* Constituuntur servitutes vel domini voluntate, veluti supremis judiciis, pactionibus (sc. legitimis, §. 4. *b. r.*), stipulationibus (at pactiones, & stipulationes sunt potius tituli; servitutes enim affirmativæ quasi traditione immediate acquiruntur); vel constituuntur præscriptione 10. annorum inter præsentēs, & 20. inter absentes, *L. ult. C. de præscription. longi temp.*, uti mox *tit. 6.*; vel jussu judicis in judiciis communi dividundo, & familiæ eriscundæ.

§. 323. Amittuntur servitutes primo remissione tum tacita, si sciens volens patiar, dominum prædii servientis ea in prædio facere, quæ servitutem impediunt; tum aperta, si contraria pactioe jus servitutis resolvatur. Secundo confusione, puta si prædium dominans, & prædium serviens in unius perveniant dominium. Tertio si solutum sit jus constituentis, nam servitus imposita prædio emphyteutico, aut beneficiario, sive feudo, ab emphyteuta, & Vassallo, tollitur, cum ea prædia ad dominos redeunt; modo illius constitutioni dominus ipse assensum non dederit. Quarto, non usu 10. annorum inter præsentis, & 20. inter absentes. Denique interitu prædii alterutris; licet restituto prædio servitus etiam restituatur, L. 20. §. 1. ff. de S. P. U. *Vide plura apud Vinnium hic, & c.*

§. 324.

T I T. IV.

DE USUFRUCTU.

§. 324. **T**Res sequuntur personarum servitutes, usufructus, usus, & habitatio. Usufructus definitur *princ. b. r. jus alienis rebus utenti fruendi, salva rei substantia*. Idem colono jus, sed servitus non est. Usus necessitate personæ finitur. fructus omnem continet utilitatem. Unde qui usufructum, sive fructum (nam fructui usus inest) alicujus rei habet, omnem redditum, omne commodum percipit, quod vel ex ea re, vel ejus rei occasione provenit. Quare qui usufructum castri, vel jurisdictionis alicujus habet, potest antiquas renovare investituras, poenas pecuniarias, & alia emolumenta exigere. Fructuarius universitatis bonorum, cui jus patronatus adnexum sit, jus habet præsentandi. Fructuarius ejus rei, quam alter in emphyteusim habuerit, exiget non solum annum canonem, sed & laudemium, seu quinquagesimam pretii portionem in casu alienationis. Ita DD. communi calculo. Si igitur fructus rei

rei ad fructuarium pertinent, non potest is rem fructuariam alienare, servos manumittere, proprietatem pignori dare; nam ea jura domini sunt, non fructuarii.

§. 325. Tum *salva* esse debet *rei substantia*; nec consumi, nec deterior fieri, nec in aliam formam transmutari potest. Unde a fructuario non possent oves occidi, arbores frugiferæ excidi, ædium partes dirui, vel novæ ædificari; licet id in rem domini sit, Unde etiam animalia ægrota curanda sunt, ager colendus vites subserendæ, ædes reficiendæ; et in omnibus patrisfam. vice fungitur fructuarius. Ad quæ facienda tenetur is cautionem initio usufructus proprietatis domino præstare, se usurum re fructuaria boni viri arbitratu, & finito usufructu, restitutum, quod inde extabit: quæ cautio neque a testatore remitti potest, *L. 7. C. ut in possessione legator*, Tandem ad fructuarium pertinent onera prædiorum, *L. 7. b. 1.* Gregis fructuarium debere in locum demortuorum capium ex foetu *submittere*, sc. supplere, *L. 38. de R. J.*, supra dictum est (§. 312. *in fin.*).

§. 326. Iisdem definitionis verbis monemur, usumfructum in iis solummodo

re-

rebus constitui, quæ usu statim non consumuntur; ne rei usufructus in proprietatem abeat, §. 2. *h. t.* Verum postea cautum fuit Scto sub Tiberio in *L. 3. C. de usufr. ear. rer. Cc.*, ut etiam earum rerum, quæ usu tolluntur, vel minuuntur, usufructus legari possit. Non poterat quidem Senatus mutare naturalem rationem, sed remedio introducto, idest cautione, sive satisfactione, cœpit quasi usufructus haberi, *L. 2. C. 8. cod.* Igitur quo latior, liberiorque foret morientium voluntas, Senatus censuit, satisfactione legatarium heredi cavere, quandoquidem is mortuus, vel capite minutus sit, ejusdem qualitatis rem restitui, *L. 7. cod.*

§. 327. Iisdem ferme modis usufructus constituitur, & a proprietate separatur, quibus aliæ servitutes acquiruntur (§. 322.). Et quidem conventionem idoneam ad dominium transferendum: testamento, codicillisve (& *fundi* vocabulo tam proprietas, quam usufructus venit, *L. 19. de usu, C. usufr. leg.*) : tum etiam sententia judicis in familiæ erciscundæ, & communi dividundo judiciis: demum constituitur lege; ex.gr. pa-

tri super bonis filii adventitiiis ; & patri emancipatori super parte dimidia bonorum adventitiorum filii emancipati , ut infra tit. 9. V. Noodt. de usufr. II. 4.

§. 328. Ne vero inutilis esset nuda proprietas, usufructus certis modis finitur. Si vero tribus ex causis proficisci possunt; aut ex jure auctoris soluto, veluti si legatum alicui usumfructum sub conditione, heres, ea pendente, alteri constituerit, & post constitutionem conditio extiterit ; cum enim tunc usufructus legatario debeat, solvitur jus heredis, qui eum alteri constituerat: aut ex lege constitutioni dicta, veluti si usufructu ad conditionem, vel ad diem constituto, conditio extiterit ; aut dies venerit ; tandem ex natura ipsius servitutis pluribus modis, extinguitur usufructus. I. Est mors fructuarii. Civitas autem centum annis vivere præsumitur. Ea dicitur etiam mori, cum terræmotu, vel inundatione absorbetur. Immo & mortem civilem pati, & quodammodo capite minui potest, inducto in eam aratro; quod Carthagini accidit. II. Capitis diminutio maxima, & media, ex Justiniani constitut. in L. penult. C. de usufructu; olim etiam minima, III. Si quis

quis non utatur *per modum, & tempus*, §. 3. *b. r.* At quoniam si non fuerit servatus modus, *servitutem non amitti* docet Marcellus L. 11. ff. *quemad. servitus amittatur*, hic ea verba intellige; per modum temporis, sive *per tempus ad amissionem constitutum*, L. 10. §. 1. *cod.* De hoc frequenti latinorum schemate vide Vossium *Inst. Orat. V. 4.* Tempus hoc *moderatum* olim erat annus, si quis re mobili non utebatur, biennium si re soli. Tum Justinianus, uti *sic*, 6. dicemus, annum ad triennium produxit; biennium ad annos 10. inter præsentes, 20. inter absentes. IV. Est consolidatio, seu reditus ususfructus ad proprietatem; cum fructuarius proprietatem rei acquirit, vel ususfructum cedit domino proprietatis; nam *cedendo extraneo nihil agit*, §. 3. *b. r.*: scilicet Jure novo id non valet ad ususfructum finiendum. V. Tandem est rei interitus, *d. §. 3.* adeo quidem, ut nec in reliquis, si quæ sunt, rei partibus, locum habeat ususfructus. Quare una cum nomine quadrigæ, & gregis, ususfructus extinguitur; nec debetur in area, ædibus incendio consumptis, aut terræmotu absorptis.

§. 329. His modis cum totus finitus fuerit usufructus, revertitur ad proprietatem. Si namque pro parte extinguatur, pars vacans conjuncto cedit ex jure accrescendi; *ut infra ad §. eandem de legatis*.

T I T. V.

DE USU, ET HABITATIONE.

§. 330. Quibus modis usufructus constituitur, aut finitur, iisdem *pene* usus, *princ. b. r.*: & uti a fructuario, ita ab usuuario quoque exigitur cautio de bene utendo, *L. penult. §. 2. b. r.* Rectissime additur *pene*: usufructus enim, quia dividuus est, constitui pro parte potest, non usus, qui est individuus; quemadmodum individua est cujusque necessitas; iisdemque modis constituitur, & finitur habitatio: nisi quod hæc minima capitis deminutione olim non amittebatur, uti usufructus, & usus amittebantur: nam potius in facto, quam in jure consistere videbatur.

§. 331. Usus est jus utendi re aliena; salva rei substantia, quantum quotidiana ne-

ne-

necessitas postulat; quod exemplis illustrat Tribonianus §. 1. *ad. 4. b. 1.* Nemo autem potest usum alteri locare, vendere; aut donare; quæ omnia facere fructuarius potest: tametsi cum usuario benignius actum fuerit, quam ut subtile Jus postularet. Potest igitur cum suis convivis re uti; atque ex ovibus modicum lac, licet magis in fructu sit, sumere; *L. 12. b. 1.* Quod vero facit ad onera rei usufructuariae, eam distinctionem in Jure receptam video, siquidem omnis fructus ad usufructum redeat, etiam tributa, impensæ refectionum, vel culturæ, ad eam pertineant; si vero ad proprietarium, hic onera subire teneatur: si ad utrumque, dividantur pro rata, *L. 18. eod.*

§. 332. Habitationem, sc. jus inhabitandi, Proculiani esse ajebant usufructum, Sabiniani usum, Javolenus rem tertiam. Hujus sententia a Justiniano probata *L. 23. C. de usuf.* Verum habitatio propius ad usufructum accedit: nam locari potest, quod usufructuario prohibetur; licet usui insit habitatio. Qui vero inhabitandi jus habet, non æque potest, ut fructuarius, donare, *d. L. 13.*

§. 333. De operis servorum est pecunia.

liaris titulus in ff. ; sed de iis non agit hic Tribonianus . Eæ neque usus , neque usufructus sunt , sed locantur uti usufructus , sunt individuae et usus , *V. Cujac. Obs. XIX. 23.* Si quis vero usum fructum fervorum habeat , eorum operis utitur fruitur , easque locare potest , & omnia acquirit , quæ a servis ex re fructuarii acquiri possunt . At usufructus , operis fervorum utetur in qualibet re , sed sine facultate eas locandi , aut utendas concedendi . Acquireret vero per servum nonnisi ex re sua : puta si servus sit institutor . Idem dicas de usu jumentorum .

DE TITULO VI.

DE USUCAPIONIBUS , ET LONGI TEMPORIS PRÆSCRIPTIONIBUS.

§. 334. **N**unc de modis dominii acquirendi , ex Jure civili , quibus supra recensuimus (§. 305.) ; præter quos & alii olim fuerunt : uti particulares , mancipatio , in jure cessio , sub corona emptio , adjudicatio , auctio : ac generales , uxoris conventio in manum viri , successio Fisci in bona damnatorum , &c

& sine heredibus decedentium . Tribonianus vero egit tantum de iis, qui usui magis esse poterant . Primus singularis domini acquirendi modus ex Jure civili est usucapio, h. e. *adjectio* (neque est cur Cujacius reponat *adeptio*) *dominii per continuationem possessionis temporis a lege definiti*, L. 3. *h. t.* Nam si a non domino bona fide, h. e. eum dominum putans, justo titulo, h. e. causa vera, & ad transferendum dominium idonea, accipio, & per tempus lege definitum possideo, ejus dominium jure mihi adjicitur. Tria igitur ad usucapionem requiruntur, justus titulus, bona fides, & non interrupta legitimi temporis possessio: quæ cum in XII. Tab. dicatur usus, dedit usucapioni nomen.

§. 335. Causa igitur non solum justa, h. e. idonea ad transferendum dominium, sed vera esse debet. Ita non sufficit opinari, sed vere emtum ex. gr. donatumve esse oportet, §. 11. *h. t.* Interest autem, uti animadvertit Hotomanus, an intervenerit traditio, nec ne: si interveniat, usucapio procedit. Ita si heres rem, tanquam legatam tradiderit mihi bona fide accipienti, me usucapturum, ait Pom-

ponius *L. 4. pro suo*. Quod si rem possideo, quam mihi legatam falso puto, non sum pro legato usucapturus, *L. 2. pro legato*. Sed etiam interest, an qui rem tradit, causam habeat notam, necne. Et generatim justo possessoris errori parcendum, *L. 2. C. 11. pro emt. L. ult. pro suo*. Præterea bona fides initio possessionis intervenire debet. Mala fides superveniens usucapionem minime interpellat, *L. 44. b. r.* Aliud est Jure Canonico, *cap. 2., C. 5. X. de præscript.*; quod Juris naturæ simplicitatem sequutum esse videtur, non item civitatis bono consuluisse: interest enim, dominia certa esse, litibusque modum imponi. Vide Coccei *Dissertationes duas de finibus bonæ fidei in præscript. de J. can.* Hic adnotandum est ex *LL. 2., C. ult. C. de quadriennal. præscript.*, qui a Fisco, ab Augusto, vel Augusta rem alienam emit, aut alio titulo accepit, sive bona fide, sive mala id faciat, statim tutum esse; prodita vero rei domino actione intra quadriennium adversus Fiscum. Ita ex Zenonis, & Justiniani Constitutionibus, *§. ult. b. r.* Tandem quoad tempus, Jure civili res mobilis, cujus

le-

levior jactura est, olim anno ubique uno, immobilis biennio, ex interpretatione tantum in Italico solo usucapiebatur; *princ. b. r.* Sed Justinianus & locorum fustulit differentiam, & annum produxit ad triennium; biennium vero ad *longum tempus*, idest ad 10. annos inter præsentes, qui in eadem provincia; 20. inter absentes, qui in diversa vivunt provincia, *L. un. C. de usucap. transform. L. ult. C. de præscript. long. temp.*

§. 336. Possidere hic intelligitur, qui animo domini rem tenet. Unde creditor, fructuarius, colonus, depositarius, comdatarius, usucapere non possunt. Debet etiam possessio esse perpetua, ut non proficiat, si aliqua ratione interrumpatur, & *usurpetur*. Id accidere potest vel *naturaliter*, si quis de possessione ejiciatur, vel *civiliter*, si lis contestetur, sive etiam libellus offeratur. Interruptio naturalis facit, ut tempus a recuperata possessione rursus inchoari debeat; civilis usucapionem omnino interpellat. Præterea possessionem morte interrumpi, ratio Juris postularet. Sed *jure singulari* receptum (per fictionem repræsentationis defuncti), scribit Papinianus in *L. 44. §. 3. b. r.*, ut fundi

di

di possessio heredi pro fit ad usucapionem, si illa iusta fuerit, quamvis heres rem esse alienam sciat: si fuerit iniusta, non prodest heredi, quamvis ignoranti, *L. 43. b. r.* Ita jus olim fuisse de *diutina possessione*, sc. immobilium (uti ex verborum contextu eruitur), ait Tribonianus §. 12. *b. r.*; & primum Justinianum similiter & in *usucapionibus* (sc. mobilium) *observari constituisse, ut tempora continerentur*. Sed successor particularis non per omnia refert decessorem: propterea aliud jus de eo esse oportuit. Nihilominus inter *venditorem quoque, & emitorem conjungi tempora*, Severus, & Antoninus rescripserunt, *d. §. 12.*: nisi quod in hac specie bona fides in utroque requiritur, *L. 2. §. 17. pro emitto*. Eadem cauta inveniuntur de quovis alio successore ex titulo singulari, §. 7., & 8. *b. r. V. Ottonem prafat in tom. 5. Thesauri*.

§. 337. Hæc obtinent omnia, nisi res vitium habeat, aut ex ipsa rei natura, si res in commercio non sit, uti quæ divini juris est, & homo liber, §. 1. *b. r.* aut ex accidenti, si res in commercio sit, sed eam usucapi lex vetet ob causam extrinsecam; puta quod furtiva, quod vi pos-

possessa, quod Fisci sit, §. 2. *¶* 9. *b. r.*
 Furtivarum rerum usucapionem prohibuit
 Lex XII. Tab. Nam scriptum est *tab. 2.*
quod subreptum erit, ejus aeterna auctori-
tas esto. Tum prohibuit Lex Atinia: At
 quid erat opus hac lege? Putat Heinec-
 cius, furtivæ rei usucapionem furi tan-
 tum ex lege XII. Tab. prohibitam fuisse:
 lege Atinia vero quibuslibet aliis
 possessoribus. Potius lex Atinia exemit
 casum, si res ad dominum redisset, *L.*
4. §. 6. b. r., uti mox. Furtivarum
 rerum numero est servus fugitivus, qui sui
furtum facere dicitur, L. 60. de furt.: ipse
 igitur est fur, & res furtiva. Idem mox
 cautum de rebus vi possessis, ex lege Julia,
 & Plautia, §. 2. *b. r.*; quæ duæ leges
 sunt, uti patet ex ipsa particula *¶*. Ve-
 rum ut res incipiat esse furtiva, sufficit
 tradi ex quadam causa ab eo, qui scit
 esse alienam, §. 3. *b. r.* Id non sufficit,
 ut vi possessa dicatur; sed vim factam
 fuisse necesse est. Proinde si quis *loci va-*
cantis (quem sc. nemo possidet vel *ob*
absentiam, sed *longi temporis*, *L. 37. §.*
1. b. r., vel si dominus sine successore
 decedat, aut si possessio non fuerit ab
 herede naturaliter adprehensa, *L. 23. de*

acquir. poss.) possessionem nactus sit sine vi, licet possideat mala fide, tamen si ex justa causa tradat alteri bona fide accipienti, hic longa possessione acquirit, §. 7. *b. r.* Res autem furtivæ, & vi possessæ, immo & quæ, spreta lege Julia repetundarum, L. 8. *ff. ad L. Jul. rep.*, Præfidi dantur, non ideo hic recensentur, ut eas a fure, violento possessore, & Præfide usucapi non posse sciamus: id enim supervacaneum esset monere; cum iis semper bona fides, & justus titulus desint: sed ut intelligamus, in iis nunquam usucapionem procedere posse, quamvis a fure, violento possessore, & Præfide, bona fide, justoque titulo transeant ad alios. Ut autem in ejusmodi rebus vitium purgetur, & usucapio locum habere possit, oportet; eas ad dominos, quibus ablatae sunt, redire; aut saltem iis alio modo satisfactum fuisse, §. 8. *b. r.* Res denique Fisci sunt, quorum facta incorporatio est, L. 3. *C. de bonis vacant.* Antiquitus quæsitum, an usucapi possent bona vacantia nondum nunciata Fisco per delatorem; nimirum quorum neque heres, neque possessor extat; quæ idcirco Jure ipso, idest L. Julia caducaria,

ria, ad Fiscum pertinent. Et usucapi posse, affirmavit Papinianus; ejusque sententiam Antoninus Pius, tum Severus, & Antoninus probarunt, §. 9. *b. t.* Rursus vitium ex accidenti habent etiã res Ecclesiarum, L. 24. C. de SS. Eccles., pupillorum, minorum, L. 2. C. de usucap. pro emto-
re, filiorum familias, L. 1. §. 2. C. de annal. except., fundus dotalis, res prohibita alienari aut lege, aut testamento, L. 28. de usurp., & usucap., res publicæ, res Cæsaris, aliæque. Sed rerum ex accidenti vitiosarum non est usucapio, est tamen præscriptio; vitiosarum natura sui neque præscriptio, neque usucapio.

§. 338. Ita acquiritur dominium usucapione, & longi temporis præscriptione: quæ duo idem esse videntur post Just. Const. in L. un. C. de usucap. transform. Sed extat etiam præscriptio longissimi temporis, quæ sicuti neque justum titulum, neque bonam fidem requirit, & sola nititur possessione 30., vel 40. annorum; ita non parit possessori dominium rei possessæ, sed ei tantum tribuit exceptionem, qua is dominum post id tempus agentem excludat. Hoc tamen commune est omnibus aliis actionibus, quæ ob
eun-

eundem temporis lapsum præscribuntur, h. e. exceptione repelluntur: præscriptio enim exceptio est. Hinc Tertull. liber *de præscriptionibus adversus hæreticos*.

§. 339. Quid autem olim distabat a præscriptione usucapio? Primo in iis casibus, in quibus ex XII. Tab., & Jure civili usucapio non obtinebat; in subsidium introducta fuit, fortasse primum ab Hadriano, præscriptio; ex, gr. ante Just. prædia provincialia, utpote publica, non usucapiebantur; præscribebatur tamen iis. Post Just. usucapi possunt. Tum vectigalia, idest emphyteuticaria, itemque superficiaria prædia non usucapiuntur; quia jus emphyteusæ, ac superficiæ est incorporale; cujus proinde vera possessio non est; quod in causa fuit, cur usucapionem servitutum contra leges XII. Tab. a Prudentibus introductam, Scribonia lex abrogarit. Sed utrumque illud jus recte præscribitur, pariter, ac servitutes, *L. ult. C. de long. temp. præscript.*; ex qua lege constat, nec bonam fidem, nec justum titulum in servitutum præscriptione esse necessariam. *V. Zachar. Huber. Obs. 13. rer. judic. Cossa h. t.* Deinde exceptiones dicuntur *præscriptiones*. Quare usucapio facit dominum, quod

quod Jctis dicitur *præscribi rei* ; præscriptio possessorem perpetuo exceptionis operueretur ; quod dicitur *præscribi actioni* . Postea eo ventum est, ut qui jam præscriptionem haberet, utilem quoque haberet in rem actionem, possessione amissa, *L. 8. C. de præscript. 30. ann.* Tum usucapionis tempora statuta leguntur ; præscriptionis varia sunt, *V. Cujac. de diversis temporum, præscriptionibus, & terminis* ; ex. gr. qui a Fisco alienam rem emerat, post quinquennium a venditione dominum repellebat, ex edicto Imp. Marci, *L. ult. C. si advers. Fisc.*, quamvis a Fisco emissæ mala fide, Aliud Jure Justin. ex *L. ult. C. eodem dictum est* (§. 335.). Tandem nullâ sine bona fide, ac juto titulo est usucapio . Contra est cautum jure Civili de nonnullis præscriptionibus *uti Lib. IV. tit. 12.*

§. 340. Quoniam vero præscriptio longissimi temporis inducta est, & præscriptionis tempus varium est pro rerum varietate: hinc 30. annis, præter actiones personales *L. 3. C. de præscript. 30. ; vel 40. annor.*, præscribuntur res vitio adfectæ, seu furtivæ, & vi possessæ, si præscribens initio fuerit in bona fide, *L. 8.*

§. i.

§. 1. *C. eod.*, res minorum, *L. 3. C. Quib. long. temp. præscript. non obst.*, res adventitiæ filiorumfam., *Nov. 122. c. 24.* Tum 40. annis præscribuntur res fiscales, *L. 4. C. de præscr. 30., vel 40.*, & res patrimoniales Principis, *L. ult. C. de fundo patrim.*, res Ecclesiarum immobiles, *Nov. 131. c. 6.*, & jus hypothecæ, si ipse debitor possideat rem oppignoratam, *L. 7. §. 1. C. de præscr. 30., vel 40.* Tandem 100. annis res civitatum, *L. 24. C. de SS. Eccl.*, & res Ecclesiæ Rom. *ex Autb. quæ actiones C. eod.*, quæ desumpta videntur a *Nov. 9.* At postea *Just. d. Nov. 131. c. 6.* præscriptionem adversus Ecclesias, & pia loca, ad 40. annos restrinxit. Est & præscriptio immemorabilis, cujus in contrarium non extat memoria, *L. 2. ff. de aqua, & aqua pluvi. arc., L. 3. ff. de aqua quotid.*; eaque acquiri dicuntur regalia, & immunitates a tributis, *L. 6. C. de præscr. 30., vel 40.*

§. 341. Denique adnotandum, usucapionem si ex publico bono æstimetur, non esse appellandam *impium præsidium* cum Justiniano *Nov. 9.*

T I T. VII.

DE DONATIONIBUS .

§. 342. **A**lter civilis modus domini
adquirendi est donatio, qua-
tenus traditione completur: nam alias ti-
tulus esse videtur. Jure veteri quidem
modus civilis erat: ex lege Cincia enim
non valebat sine mancipatione, & solle-
mni traditione, *Brummerus ad L. Cinc. c.*
13. Sed & Tribonianus donationem in-
ter modos refert civiles: fortasse mortis
causa donationem, de qua primum o-
mnium agit.

§. 343. Mortis causa donare dicitur,
qui aut mortis periculo, aut sola morta-
litate cogitatione (quicquid dicat Hoto-
manus) donat, §. 1. *h. t.*; five res do-
nata donatario statim tradatur, *L. 2. ff.*
de mortis causa donationib., five ita do-
netur, ut tunc demum accipientis fiat,
cum *quid humanitus* donatori contingat,
d. §. 1. De hac loquutione vide Alberic.
Gentil. in L. 162. §. 1. ff. de V. S..
Donationes id genus irritæ fiunt, si aut
periculum evanescat, aut donatori dona-

tarius præmoriatur , aut donatorem donationis pœniteat , *L. 16. ff. de mort. caus. donationib.* Tum eas, dirempta veterum controversia , Justinianus ad exemplum legatorum *per omnia fere* redegit , *L. ult. C. de mortis causa donat.* Conveniunt siquidem donationes istæ cum legatis ex septem potissimum capitibus : I. Quinque testes requirunt , *L. ult. C. eod.* II. Morte confirmantur , & revocari possunt. III. A morte donantis dominium transit in donatarium ; & quidem vi juris sine traditione , *L. 2. ff. de public. act.* IV. Donatario substitui potest , *L. 1. C. de donat. caus. mort.* V. Est locus Falcidiae , & juri accrescendi . *L. 5. C. ad L. Falc. L. un. §. 14. C. de caduc. toll.* VI. Conjux conjugi causa mortis donare potest. VI. Insinuatione opus non est. In quibusdam vero legatum , & donatio causa mortis discrepant , I. Illud pendet ab aditione hereditatis, hæc vero sola donantis morte confirmatur , *L. 32. ff. de mort. caus. donat.* II. In hac non donationis, sed mortis tempus inspicitur, an quis capere possit : in illa vero etiam tempus facti testamenti , §. 4. *Inst. de her. qual.* , *L. 22. ff. de mort. caus. donat.*

III.

III. Illud relinqui potest absenti, & ignorant; hæc in præsentem a præsentem conferenda; aut utique in absentem, vel per nuntium, vel per epistolam, ut donationem is sciat, & accipiat, *L. 10. C. 38. ff. eod.* Si quis autem absenti, & ignorant donet, ex recepta DD. sententia defenditur donatio jure fideicommissi. IV. Filiusfam, mortis causa donare potest, non item legare, *L. 25. §. 1. ff. eod.*

§. 344. Donationes vero inter vivos omnino non comparari legatis, inquit Tribonianus, §. 2. *b. r.*: eæque, in duobus potissimum distant a mortis causa donationibus, & legatis. Unum est, quod si perfectæ fuerint, donatoris voluntas, quam ratam habuerit donatarius, temere eas revocare non possit. Earum vero revocandarum nonnullæ sunt justæ causæ ex vitio ingrati animi, in *L. ult. C. de revoc. donat.* Est & alia causa in *L. 8. C. eod.*; si unquam libertis patronus, filios non habens, bona omnia, vel partem aliquam facultatum, fuerit donatione largitus, & postea susceperit liberos, totum quidquid largitus fuerat, revertatur, in ejusdem donatoris arbitrio, ac ditione mansurum. Hanc legem de solis patronis, libertisque loquentem,

ad omnes alios donatores protulit constanti
 Fori praxis, *Andr. Tiraquell. Comm. in*
d. L. Alterum est, quod in illis rei da-
 tio necessaria est, *L. 35. §. 5. C. de do-*
nat., ubi Justin. statuit, solo consensu do-
 nationem perfici, non secus ac emptio
 venditio consensu perficitur; etsi hic con-
 tractus a donatione in quibusdam differat:
 præsertim quoad beneficium competentiae,
 & evictionem, *L. 18. b. t.*

§. 345. Modum effusis largitionibus
 primum, lex Cincia imposuit. Tum Ju-
 stin. *L. 34. C. b. t.* jussit, donationem,
 quæ 500. solidos, sc. aureos, excederet,
 insinuatione, h. e. judicis auctoritate, con-
 firmandam esse, & in publicas tabulas
 referendam, *d. §. 2. b. t.* Quod si quis
 ultra dictam summam absque insinuatione
 donet, donatio infirmatur pro ea tantum
 quantitate, quæ dictam summam exce-
 dit.

§. 346. Impropiæ donationis inter vi-
 vos species sunt dos, & donatio propter
 nuptias. Sicuti enim illa est donatio no-
 mine uxoris in maritum collata, ad onera
 matrimonii sustinenda; ita hæc est do-
 natio, quæ ex parte mariti in uxorem,
 vel sponsi in sponsam, confertur, in securi-

ta-

tatem dotis, & quasi dotis remuneranda gratia. Hoc donationis genus incognitum veteribus Jētis, translato in Orientem Imperio, a junioribus Divis Principibus, idest Constantino recentioribus, quicumque ii fuerint, introductum fuit; quod olim ante nuptias vocabatur, post Justin. propter nuptias, *L. ult. C. de don. ante nupt.* Rerum propter nuptias donatarum dominium uxor non acquirit, sed jus tantum in iis specialis hypothecæ, ut ei dos sit cautior: unde eas maritus alienare, & oppignere non potest, *Nov. 61.* Similes autem sunt dos, & donatio isthæc, quod quemadmodum soluto matrimonio dos ad uxorem, ita donatio propter nuptias ad virum redit: & sicuti, uxore sine causa divertente, vir dotem lucratur, ita & uxor donationem, si vir injustam causam divortio dederit. Cum autem antea hæc donatio vel nulla, vel dote major, aut minor constitui potuisset, Justinianus *Nov. 97.*, unde *Au- th. æqualitas C. de pact. convent. tam sup. dor. C. 1.* eam necessariam fecit, & doti in omnibus respondentem. Recessit vero ab hac Constitutione consuetudo, quæ & necessitatem, & donationis propter nuptias æqualitatem respuit: fecitque, ut

unaquæque Regio sua haberet peculiaria statuta.

§. 347. Tertius civilis acquirendi domini modus, erat olim jus accrescendi ex manumissionis causa. Si quis enim servum communem manumittebat vindicta, vel testamento, pars ejus amittebatur, & socio accrescebat, quasi donata; atque idcirco ea de re agitur in §. 4. b. r. Verum Justinianus, sublato veteri illo jure accrescendi, servum esse liberum voluit, dominumque, qui manumisit, partem pretii inferre socio: atque ita gratia libertatis hunc rem suam vendere invitum cogi, *L. 1. C. de comm. servo manumiss.*

T I T. VIII.

QUIBUS ALIENALE LICET, VEL NON.

§. 348. **A** Lienare, five transferre dominium, potest dominus, aut qui eam potestatem a domino accepit. Quandoque autem id facere dominus vetatur. Maritus fundum dotalem Italicum, cujus est dominus, alienare nequit, invita uxore ex *L. Julia*; non potest obligare,

re, ne uxore quidem consentiente. Plus enim cautionis est in re, quam in persona, *L. 23. de R. j.* Lex item ea fieri prohibet, quæ facilius accidere possunt; iis vero non consulit, quæ vel absque prohibitione non facile accidunt. Eadem ratione Scto Vellejano juvatur mulier, quæ pro alio se obliget, non quæ donet: & lege Fusia Caninia testamentariis, non vero inter vivos manumissionibus modus est positus. Verum Justinianus & sustulit rerum discrimina, & alienationem inhibuit, sicuti Lex Julia inhibuerat hypothecas, *L. un. §. 15. C. de rei uxoriæ actione*. Cum vero hæc cautæ sint de rebus dotalibus immobilibus, patet, mobilia a marito, qui tamen solvendo sit, posse alienari. Immobilia tunc alienari vetantur, cum inæstimata in dotem data sint. Distinguenda tamen est æstimatio quasi venditionis causa facta, a simplici taxatione.

§. 349. Pupillus etiam alienare nihil potest sine auctoritate tutoris, §. 2. *b. r.* Illum vocat Tribonianus *minorem* κατ' ἀρχαίαν: sed & idem jus de vere minoribus, si sub curatoribus agant, *L. 22. C. de administrat. tutor.* Et pupillus solvendo si-

ne tutoris auctoritate, nihil agit, L. 9. de auctor. tutor. E contrario etiam non auctore tutore, recte datur pupillo: ideoque (dicere Tribonianus debebat quamvis) si debitor pupillo creditori (secus erit, si solutionis tantum gratia adjectus sit stipulationi pupillus, L. 11. de solut.) solvat, necessaria est debitori tutoris auctoritas; alioqui non liberabitur, §. 2. b. t. 1. Licet si soluta pecunia salva sit, aut versa in rem pupilli, exceptione doli mali ille juvetur, si eandem pupillus petat. Quo autem plenissima securitas debitori fit, iudicis decreto pro solutione opus est, L. 25. C. de administr. tutor. Ex verbo plenissima eruitur, & sine decreto liberationem contingere. Hoc plus, sine decreto adversus solutionem restitui pupillus potest, L. 1. C. si advers. solut.; non adversus eam, quæ fit cum decreto. Accursius in L. 7. §. 2. de minor., contra quem frustra disputat Faber. Conject. XVII. 13. Præterea nec ipse tutoris consensus satis est ad omnia bona pupillaria alienanda. Nam immobilia, & ex mobilibus ea, quæ servando servari possunt, opus habent decreto iudicis, tot. tit. de reb. eor.; qui sub tutela.

§. 350. Interdum recte alienat, qui dominus non est. Ita creditor alienare pignus potest. Et ex Just. Const. in *L. ult. C. de jur. dominis impetr.*, si in pignoris datione conventio quædam facta fuerit cum debitore, ea servanda est: si minus, potest creditor post elapsum annum a die denunciationis, illud vendere. Si non inveniat emptorem, creditor debitorem monebit, ut intra certum tempus pignus luat, & repignoret; aut, eo latitante, certum tempus, quo id faciat, per judicem præscribetur. Quod si debitor filere pergat, creditor a Principe impetrabit facultatem pignus pro domino possidendi. Ea impetrata, adhuc biennium debitor habet, quo creditori satisfacere possit: quo tandem elapso, creditor pignoris dominus fit, §. 1. *b. t.* Cæterum hæc hodie vix obtinent.

T I T. IX.

PER QUAS PERSONAS CUIQUE AC-
QUIRITUR.

§. 351. **P**ER alios etiam, tanquam per instrumenta, nobis acquiritur, *princ. b. 1.* In primis filii familias utriusque sexus *olim sine ulla distinctione* parentibus suis acquirebant, §. 1. *b. 1.* Augustus vero, eumque sequuti Principes, priscum hoc Jus leniverunt. Et Augustus excepit *peculium castrense*, h. e. quod per occasionem armatae militiae filius sibi quaesivit. Sed & post Augustum exemptum est a paterno patrimonio *peculium quasi castrense*, sc. partum ex liberalium artium professione, quam veteres *militiam* dixerunt. Utrumque hoc peculium adeo filiorum fam. proprium est, ut in iis pro patribus fam. habeantur, & de iis possint testari. Porro Justinianus *peculium adventitium*, idest quicquid filii familias aliunde obvenit, quam ex militia, vel ex re patris, proprium esse voluit filii, sed reservavit patri *debitum honorem* (nescio cur Cujacius *honorem* ex §. 1. expungat), hoc est usufru-

fructum; ita tamen, ut non possit filius proprietatem sine consensu patris alienare. Sunt tamen casus, in quibus plena proprietas hujus peculii filio acquiritur: uti si filius hereditatem sibi delatam, renuente patre, adeat, *L. ult. §. 1. C. de bon. quæ lib.*; si aliquid filio ea nominatim lege detur, ne ususfructus ad patrem perveniat, *Nov. 117. c. 1. 3.*; si filius una cum patre succedat germano fratri, aut sorori, *Auth. excipitur. C. de bon. quæ lib. Nov. 118. c. 2. 4.*; & si pater in bonis filio restituendis dolose versatus sit, *L. 50. ff. ad S. C. Trebell.* Atque ita in dominio patris est solum *peculium profectitium*, quod vel a patre, vel ab aliis occasione patris in filium proficiscitur, *L. 6. C. de bonis, quæ liberis.* Insuper patri filium emancipanti dedit Constantinus in *L. 1. C. 2. C. Th. de bonis matern.*, quasi pro pretio emancipationis partem tertiam bonorum, quæ patri non acquirebantur. Sed Justinianus dedit dimidiam ususfructus, quæ jure ipso cederet patri, licet expresse non retenta, *d. L. 6. §. 3.* E contrario profectitium peculium, si expresse non sit ademptum, ad emancipatum pertinet, quasi tacite donatum,

tum, L. 31. §. 2. de donation.

§. 352. Quoniam vero dominium ne momento quidem temporis consistere potest in eo, qui in potestate est, nec pendere potest, §. 3. h. t., ideo ignorantibus etiam, *& invito nobis, per servos acquiritur, pæne ex omnibus causis*; L. 32. de acquir. rer. dom. Obstat, quod nolenti, & invito beneficium non acquiritur, L. 19. ff. de donat. L. 69. ff. de R. J. Respondetur, id Juris ratione fieri; sed integrum esse domino, quod sibi acquisitum est, repudiare. *Vinn. in §. 3.* Illud *pæne* pertinet ad hereditatem, quæ jussu domini, ne invitus is obligaretur æri alieno, adiri debet. Sed etiam possessio, non solum proprietas, domino, patrique acquiritur, etiam ignoranti, si ex causa peculii; ex aliis vero causis non nisi scienti, & volenti. Nam possessionem adquirimus simul corpore (sive nostro, sive alieno), & animo (semper nostro). Ex peculiari causa, licet ignorantes, nostro tamen animo adquirimus. In aliis causis ea generalis voluntas non adest; proinde speciali voluntate, certaue scientia est opus. Id notent, qui ex omni causa acquiri putant ignoranti. Quod si
servi

fervi in fructu sint, per eos *adiici* ; hoc est acquiri non potest *omni* fructuario ; sc. non tantum jure legati, sed quocumque modo constituto usufructu, uti obtinuit, *L. 25. §. ult. ff. de usufructu* ; nisi aut ex hujus re, aut ex operis eorum, *§. 4. b. t.* Quod si servus institutus heres sit, expressa contemplatione fructuarii, tunc hereditas fructuario, cujus jussu eam servus adibit, acquireretur. Idem dicas de servis alienis, & liberis hominibus, a nobis bona fide possessis.

§. 353. Per alios, præter eos, quos enumeravimus, nobis acquiri nequit: excipe procuratorem, per quem proprie possessio, utpote non in jure, sed in facto, & corporali rei adprehensione sita, acquiritur (nec refert, num sciat quis, an ignoret, quo tempore procurator possessionem capiat, *§. 5. b. t.*) ; & per hanc possessionem etiam dominium, si dominus fuerit, qui tradidit, vel usucapionem (sed hoc casu requiritur domini scientia : aliter non procedit usucapio ex possessione per procuratorem quæsitæ, *L. 1. C. de acquir. possess.* : non enim potest bonam fidem habere is, qui se possidere ignorat : id notare Tribonianus debebat), aut longi-
tem-

temporis praescriptionem, si dominus non sit, d. §. 5. Insuper possessionem, ac dominium acquirimus per tutorem, curatoremve, L. 1. §. 20. de acquir. possess. Jam vero Tribonianus, abrupta hoc loco tractatione de singularibus modis domini acquirendi, ad universales gradum facit. Legata enim, fideicommissa, & jus accrescendi, intelligi vix possunt, nisi prius de testamentis, quorum appendices sunt, agamus.

T I T. X.

DE TESTAMENTIS ORDINANDIS.

§. 354. **P**ER modos Jure civili acquirendi universales, rerum universitatem, sive bona alicujus universa, una veluti averfione nobis acquiri, superius dictum est. At in hoc non res, sed praecipue spectanda est causa. Ita bonorum universitas donata, aut legata, singulari titulo acquiritur: relicta vero testamento, aut ab intestato delata, universali titulo in acquirentem transit. Accedit illud Papiniani in *L. 50. de her. pet.*, *hereditas etiam sine ullo corpore hereditario, juris in-*

intellectum habet. Quatuor universales modos refert Justinianus, susceptionem hereditatis, bonorum possessionis agnitionem, adrogationem, & additionem bonorum libertatum conservandarum causa.

§. 355. *Hereditas est successio in universum jus, quod defunctus habuit, L. 62. de R. J.* Delatio causa est; aditio acquirendi modus; nisi quod delatio est eisdem modus, si de necessariis, ac suis heredibus agatur. De hereditate, quæ ex testamento defertur, in primis agendum est.

§. 356. Testamentum, quæ simplex vox est, sc. *testamen*, & productio illa voci, sensu vacua est, allusione quadam dicitur *testatio mentis*, *princ. b. t.* Definitur voluntatis nostræ *justa sententia de eo, quod quis post mortem suam fieri velit, L. 1. qui testam. fac. poss.* Dicitur *justum*, quod Jure perfectum est, *L. 2. §. 1. testam. quemadm. aper.*, seu quod secundum Juris sollemnia factum est. Ita *justæ nuptiæ* alibi. Juris civilis esse hujusmodi testamentum, recte probant præ cæteris Heineccius *elem. J. nat. I. 11.*, & Bynk. *Obs. II. 2.* Aliud Leibnitius in *nova method. Jurispr.*, & Grotius *II. 6. §. ult.*, qui per-

peram testamentum dicit esse *alienationem*. Sane Romani Jēti, ut disponderent homines de rebus suis in illud tempus, quo domini non sunt, & quasi bona sua heredibus tradere viderentur, finxerunt, tempus aditionis ad mortis tempus retrahere, *L. 193. ff. de R. J. L. 54. ff. de acqu. vel om. her.* & jacentem hereditatem defuncti personam repræsentare, *L. 31. §. ult. ff. de her. inst.* Sane qui mortuus est, non potest dominium transferre. Proinde *Potestas civilis* pro imperio illo, quo omnia possides, uti ait Seneca *de Benef. VII. 4.*, testamenta permisit.

§. 357. Testamentum commune, seu paganicum (Pagani sunt, qui non militant. De hujus vocis ratione vide Gaudent. *Jurid. expos. II. 43.*, & Jac. Gothof. in *L. 3. C. Tb. de veteran.*), vel publica fide ordinatur, vel privata. Publica fide, cum quis, ex Const. Honorii, & Theodosii in *L. 19. C. b. t.*, vel precibus Principi oblatis, vel judici apud acta, sine alia sollemnitate, suam declarat successionem. Potest enim hoc modo condi testamentum, & valet; licet oblatis precibus Princeps non rescribat. Privata fide, cum quis præscriptis a Jure sollemni-

ta-

tatibus inserviens, testatur. Quæ ut intelligantur, attingendi sunt varii testamenti condendi modi, qui olim in usu apud Rom. fuerunt, & ex quibus conflatus est communis, & a Jure probatus.

§. 358. Antiquitus duo apud Romanos fuere testamentorum genera, cum Urbe ferme nata. Alterum, quod in pace fiebat, nuncupato herede in modum legis, per rogationem Populi, *calatis Comitibus*, qua Curiatis, qua Centuriatis (& perperam Vinnius, aliique Centuriata huc non pertinere arbitrantur), *Gruch. de Com. Rom. II. 4.*; non vero Tributis; quia non aderat Populus universus: deerant enim Patricii. Alterum, quod exituri in prælium faciebant in *procinctu*, nuncupando herede, tribus, aut quatuor testibus audientibus. Romani milites succincti in prælium exhibant, more a Gabiis ducto; unde *cinctus Gabinus*; & *exercitus procinctus*, *classis procincta*. Imperite vero Tribonianus hoc testamentum *procinctum* vocat. Primum illud testamenti genus defuevit post XII. Tab., ex quibus testandi amplissima patrifam. libertas concessa fuit. Alterum diu stetit, sed exoleverat Tullii temporibus. Initio autem civibus Rom.

denegatam fuisse testamenti factionem, ob agri divisionem; ut portiones in familia perpetuo manerent, a Romulo factam, *Halicarn. Antiq. Lib. 2.*, putat Montefquieus *XXVII. 1.*

§. 359. Accessit *deinde*, h. e. perlatis XII. Tab., tertium testamenti genus per æs, & libram, idest per *mancipationem*, sive *emancipationem*, quæ erat imaginaria, & ficta venditio, nummo uno facta: ut quis quodammodo viventis hereditatem ficta emtione acquireret; & ita, salvis juris principiis, ea post mortem testatoris transferretur. Hæc videtur vera ratio hujus testationis, postquam per XII. Tab. libera patrifam. testandi facultas data fuit; non quæ ratio redditur a Bynk. *obs. II. 2.*, & Heineccio *Antiq. II. 10. §. 6.*, quia privata voluntate tolli non poterant de legitima successione leges. In eo autem testamento duæ res agebantur, teste Ulp. *fragm. tit. 20. §. 9.* Altera erat *familia*, h. e. hereditatis *mancipatio*; primum ipso herede emtore, tum alio ab herede, §. 20. *b. 1.*, qui heredi a testatore designato post hujus mortem remanciparet, h. e. rursus venderet. Quod ideo factum, ne herede propalam destina-

to,

to, & ab omnibus cognito, possent ab hereditatis infidiæ strui. Altera erat nuncupatio testamenti, quæ etiam *testatio* dicebatur, ex formula, *hæc uti in his tabulis, cerisve scripta sunt, ita do, ita restor &c.* Tandem & hoc desit partim in usu esse; sc. in desuetudinem abiit mancipatio; retenta nuncupatione, uti mox.

§. 360. Successit Prætoria testandi forma, secundum quam, remissa mancipationis necessitate, satis erat, signari (quod civile Jus ignorabat) tabulas septem testium signis cum sigillaritio annulo, §. 2. *b. t.*, nunc quovis instrumento signatorio. Nec interest, num suo quis, an alieno utatur instrumento; & num sint diversa signa, §. 5. *b. t.*: non enim septem signis, sed septem testium obsignatione est opus. Edictum de hac re multo est antiquius Tullio: nam hic *translatitium* vocat, *L. 1. in Verr. c. 45.* Quod testamenti genus probavit Arcadius, *L. 3. C. Tb. de testamentis.* Ergo non sustulit Constantinus Magnus, uti Cujacius autumat. *V. Gothofred. in L. 1. C. Tb. eod.* Qui vero in testamento Prætorio scriptus erat heres, Jure civili heres non censebatur, quia testamentum Jure nullum; erat tamen Jure

Prætorio bonorum possessor, uti *Lib. III. tit. 9.*

§. 361. Fiebat eodem tempore vel Prætorio Jure testamentum eo modo, quo dictum est, vel Jure civili per æs, & libram, quod post Arcadium exolevit; enatumque novum genus testamenti *tripartiti*, §. 3. *b. 1.*, hoc est compactum ex veteri Jure civili, ex Jure Prætorio, & ex Principum Constitutionibus, quæ accesserunt: eoque nunc utimur. Requiritur propterea I. testes septem præsentēs, & rogati. II. contextus unus; idque ex Jure civili, uti & rogatio. III. testium signa; quæ, uti & numerus testium, ex Edicto Prætoris sunt; ac IV. testatoris, testiumque subscriptiones ex Constitutionibus Principum inductæ. Quod si testator scribere nequeat, octavum vocari testem ejus nomine subscripturum, cavit Theodosius, *L. 21. C. de testam.*; quo opus non est ex nova Const. Justiniani in *L. 28. C. eod.*, si testator testamentum ipse scripserit. Idem Imperator testatoris, testiumque manu scribi cavit nomen heredis, §. 4. *b. 1.*, *L. 29. C. eod.* Verum id abrogavit in *Nov. 119. cap. 9.*

§. 362. Testes esse possunt illi, cum
qui-

quibus testamenti factio est, §. 3. *b. t.* Male Heineccius hos intelligit, qui jus habebant Comitiorum; nam hæc jamdiu defierant. Nec bene alii alio modo hanc regulam intelligunt. Tu intelliges, qui jus habent capiendi ex testamento. Sed & regulam proponit pro activa testamenti factione Ulpianus *L. 18. qui testam. fac. poss.* Utroque autem modo regula exceptiones habet. Jam vero testes adhiberi ad testamentum nequeunt I. mulier, quia ad sollemnitatem testes hic requiruntur. II. Impubes *propter lubricum consilii*, *L. 3. §. 5. de testib.* III. Furiosus; excipe tempus intermissi furoris, *L. 20. §. 4. qui testam. fac. poss.* IV. Is, cui bonis interdictum est. V. Mutus, quia frustra interrogatur. VI. Surdus. VII. Servus, quia nullam habet Juris civilis communionem. Si vero is tempore testamenti *omnium consensu* liberi loco habeatur, testamento subveniunt ex *sua liberalitate* Hadrianus *in L. 1. C. de testam.* (quæ omnium quotquot sunt in Codice est antiquissima), ac Severus, & Antoninus *in §. 7. b. t.* quorum rescriptum alibi non extat. Hoc cautum, non quod error communis faciat jus; alias e-

nim communis error haud prodest, *L. 44. §. 1. ff. de judiciis*; sed ob publicam utilitatem. Cum autem eadem sit ratio, idem putant DD. dicendum de quolibet alio simili testium defectu; ex. gr. si impubes adhibitus sit, qui pubes putabatur; vel mulier virili habitu virum simulata. VIII. Intestabilis, seu *improbis*, *intestabilisque*, uti in XII. Tab. apud Gellium *I. 16.*, five cujus testimonium neque recipi potest, neque ei testimonium dici, *L. 26. qui testam. fac.* Tales erant ex XII. Tabulis antestatus, & libripens, detrectantes perhibere testimonium rei, cui adfuerant; tum damnati ob crimen famosum ex quodam Scto; atque ex Constitutionibus Apostatae, alique *V. Jac. Gothofr. in Tab. 8. IX.* Qui in potestate testatoris est, ubi vox *potestas* large sumenda pro familia, & conjunctis etiam e latere; modo in eadem sint potestate. Non nocet autem potestatis vinculum, quo testes inter se junguntur. Contra recte adhibetur testis filius emancipatus in testamento patris, non emancipatus in testamento matris, vel avi materni: tum pater in testamento filii emancipati, avus in testamento nepotis ex filia, vir in testamen-
to

to uxoris ; patronus denique , & colonus : quamvis hi omnes in judiciis testes esse non possint , utpote domestici , proindeque suspecti . Non enim testimonia judicialia cum testamentaris confundenda sunt . X. Heres , quive in potestate heredis est , aut heredem habet in potestate : nam *totum negotium inter testatorem , & heredem agitur* , §. 10. *b. t.* ; non totum inter testatorem , & legatarios , fideicommissariosve : proinde ii , quique de eorum familia sunt , testimonii dictionem specialiter concessam habent , ex Justiniani Const. §. 11. *b. t. L. 22. C. b. t.* , quæ intercidit . Demum fratres heredis , qui in ejusdem patris potestate sunt . §. 6. 9. & 10. *b. t.*

§. 363. Præterea nihil interest , num testamentum fiat in tabulis cera obductis (Salmasio *de subscript. testam. cap. 26.* neganti , id inveniri in Jætorum scriptis , repone *L. 52. de Leg. 3. L. 19. ff. de bon. pos. cont. tab.* , & *L. 1. ff. de bon. poss. sec. tab.*) , in charta tam nova , quam deletitia , & opistographo , idest utrinque scripta , an in membranis , vel alia materia , puta corio , §. 12. *b. t.* Nihil etiam interest , unus , an plures sint ejusdem

testamenti codices, sive exemplaria. At non possunt plures sua testamenta in unum codicem conferre: nam uniuscujusque testamenti una esse debet contestatio, nullo alio interrupta negotio; ac proinde unum instrumentum: quæ vera est Romanæ opinio; licet contraria usu Fori probata sit, *Vinnius hic*.

§. 364. Hactenus de testamento scripto, sive clauso; ita dicto quia celato heredis nomine, testibus offertur subscribendum, atque obsignandum. Hoc vero sollemniter, mortuo testatore, aperiri debet, *rit. ff. quem. test. aper.*: & olim intra tres, aut quinque dies (a testatoris morte, aut a die decimo post mortem, ut juxta persolverentur, *Heinecc. ad L. Jul. & Pap. III. I.*); quod constitutum fuit lege Julia vicesimaria. Quin cito tabulas aperiri, etiam heredum intererat: nam ea, quæ deficiebant ante apertas tabulas, uti caduca erant, *L. un. §. 1. C. de caducis toll.* Hodie nullum est ad hanc rem tempus statutum. Sunt qui putant, ex *Nov. 115. c. 5.*, intra nonum diem a testatoris morte, eas aperiri non posse. At in ea *Nov.* potius creditoribus imponitur, intra novemdialem luctum modestiam herede-

redibus non facere. Est & testamentum, quod fit sine scriptis, sed per nuncupationem, idest herede coram septem testibus *palam* nuncupato, §. 13. *b. r.* Alia est testamenti nuncupatio prorsus necessaria ad testamentum mysticum, sive clausum, quæ, defueta mancipatione, retenta fuit. Testes in hoc testamento totam testatoris voluntatem excipiunt; ejusque probatio ab eorum depositionibus post testatoris mortem pendebat. Ne vero ita irrita fieret testantium voluntas, tabularius, qui scribat, adhibetur: scriptura vero non ad substantiam, sed ad rei probationem pertinet. *Vinn. §. ult. b. r.*

§. 365. Sunt vero quædam testamentorum genera, in quibus aliquid ex Juris sollemnibus remittitur. Et primo testamentum inter liberos nuncupativum, si de voluntate patris testantis duobus saltem testibus constet, valet; si vero scriptum fuerit, etiam valet, modo is tempus testamenti facti, nomina liberorum, res inter liberos distributas expresserit clare, & plenis litteris, non notis, & sua manu subscripserit, *L. 21. §. 1. C. de testam. Nov. 107. c. 1., unde Auth. quod sine C. eod.* Secundo in testamentis rusti-

canorum remissæ sunt subscriptiones testium, qui vel si sint quinque, sufficiunt; modo plures non reperiuntur, *L. ult. C. eod.* Tertio in testamento pestis tempore facto, necesse non est septem testes simul jungi, *L. 8. C. eod.*, ad quam vide Jac. Gothofredum peculiari Dissert. Quarto in testamento posteriore, in quo scripti sunt legitimi heredes in priori omissi, placuit sufficere quinque testium juratorum depositiones, ac infirmato priore testamento, posterius valere, non tanquam testamentum, sed tanquam voluntatem ultimam intestati, *L. 21. C. eod. Vinn. in §. 7. tit. 17. infra, Cujac. consult. 1., & Desider. Herald. quæst. quotid. c. 17.*

T I T. XI.

DE MILITARI TESTAMENTO.

§. 366. **T**estamentum in procinctu fuit Decemviris antiquius, & in desuetudinem abierat Ciceronis ævo: sed militare testamentum, legitima observatione solutum, est ex Constitutionibus Imp. , primum Julii Cæsaris, quod fieri poterat tantummodo cum erat in prælio
ex-

exequendum; tum Nervæ, cui faciendū totum expeditionis tempus concessum est, *L. 1. ff. de testam. milit.* Remittuntur autem militibus testamenti sollemnia; idque unum requiritur, ut scripto, vel testibus constet de voluntate, *L. 24. eod. §. 1. b. t.* Proinde si milites per nuncupationem testentur, opus est saltem duobus testibus, *L. 12. de test.* Si per scripturam, qualiscumque ea fuerit, *L. 15. C. eod.*, testibus opus non est. Hoc privilegium militibus indultum, ait Tribonianus *princ. b. t.*, propter nimiam imperitiam eorum; quam Imperatores in Mandatis simplicitatem dixere, *L. 1. b. t.* Sed vera ratio videtur periculum, in quo milites Reip. causa versantur. Quod diximus de tempore expeditionis, *Const. Just. in L. 17. C. b. t.* aperte cautum est, *princ. b. t.* Nam ante Just. toto militiæ tempore licuit præter regulas testari, *L. 1. b. t.* Quare milites extra castra, hoc est citra expeditionis necessitatem (in suis ædibus uti legit Cujacius *consult. 49.* & a Costa in *§. 1. b. t.*, sive in suis sedibus, uti ex Theophilo multi veteres libri habent. *Noodt. obs. II. 16.* Dissentiunt in hac re Balduinus de *LL. Constantini lib. 2.*, & Cu-

Cujac. *d. consult. 49.*), & veterani post missionem, testari debent iure communi, æque ac pagani. Quod si miles nondum dimissus, militari jure testetur, & intra annum decedat postquam missus est, ejus testamentum valet, etiamsi post annum extiterit institutionis conditio, §. 3. *b. r. L. 38. ff. de test. milit.*: conditio enim retrahitur; perinde ac si adjecta non fuisset, *L. 26. ff. de cond. inst.* Quo distat a milite non miles, qui in hostico testatur: hujus namque valet testamentum, tantum si illic decedat. *L. ult. ff. de test. milit. L. un. ff. de bon. possess. ex test. milit.* Illud vero accipiendum de missione honesta, vel causaria, non de turpi, *L. 26. ff. de test. milit.* Constare etiam de voluntate militis posse non solum verbis, sed etiam factis, exponit Tribonianus. : §. 367. Sequuntur duo alia privilegia. Alterum est, posse mutum, & surdum, qui jam miles est, testari. Ante Justinianum idem poterant facere pagani, si aut tantum muti, aut tantum surdi essent, factionemque testamenti a Principe impetrarent, *L. 7. & 10. qui testam. facere.* Milites vero muti simul, & surdi recte testabantur *jure militari*, *L. 4. b. r.* Alterum
 si

Si miles pater, filiusve familias *de castren-
sibus rebus duntaxat* testatus fuerit, &
postea adrogatus, emancipatus, vel ado-
pratus, ejus testamentum valet, *quasi ex
nova militis voluntate*; cum ex diverso
pagani testamentum adrogatione, quæ ca-
pitis minutio est, irritum fiat, §. 5. *h.
i.* Licet Ant. Matthæus observet, fal-
sum esse, quod Tribonianus ait post Mar-
cianum in *L. 22. cod.*, h. e. testamen-
tum filiifam. militis, qui emancipatus est,
valere, *quasi ex nova militis voluntate*.
Nam miles quoad factionem testamenti,
per emancipationem statum non mutat:
quia etiam sub patria potestate in castren-
sibus bonis pro patrefamilias habetur.

§. 368. Non solum externæ sollempni-
tates in condendis testamentis militibus
remittuntur; sed & aliis ii fruuntur pri-
vilegiis. Potest miles plura condere testa-
menta, quæ simul valent, *L. 19. C.
35. ff. de test. milit.*; liberos præ-
terire, & exheredes facere, §. 6. *Inst.
de exher. lib. L. 9. C. cod.*; mori
pro parte testatus, *L. 6. ff. cod.*; codi-
cillis heredem instituere, *L. 36. ff. cod.*;
quocumque modo substituere *L. 5. C.
15. cod.*; legare plus, quam per *L. Fal-
ci.*

cidiam liceret, *L. 17. ff. & L. 12. C. eod.*, & instituere heredem deportatum: modo fuerit restitutus, quum miles decedit, *L. 13. §. 2. ff. eod.*

T I T XII.

QUIBUS NON EST PERMISSUM FACERE TESTAMENTUM,

§. 369. **C**Ajus in *L. 4. de test.* in persona testatoris requirit & facultatem de rebus suis disponendi, & formam testamenti a Jure præscriptam; quantum ad testamenti modum, cum ad res testamento comprehensas spectat. De modo testandi superiore titulo egimus. Nunc de persona testatoris hoc titulo; ac de rebus testamento comprehensis in sequenti. Lege XII. Tab., *Ulp. Fragm. XI. 14.*, jus testandi *patrifamilias* datum fuit, sc. homini sui juris; sed & eum esse civem, necesse est, Testantur & feminæ; quamvis istæ, stante earum perpetua tutela, tutore auctore testarentur, *Cic. pro Cæcina c. 6. Ulp. fragm. XX. 15. V. Heinecc. ad L. Jul. & Pap. II. 11.* Ergo jus testandi non habent peregrini, deportati, servi,

servi, & capti ab hostibus, *L. 8., § 19. qui test. fac. poss.*; & præterea obsides, nisi tamen id ipsis concedatur. Nec habent filii familias, nec servi, quia olim nihil habebant proprii. Verum non ex hac una causa filios familias interdictum est testari; nequit enim testari de adventitiis, licet ad eum pertineant post Justinianum *L. 6. C. de bonis, quæ liberis*. Summa ratio fuit, quod non esset princeps familiæ. Quare postquam ei licere coepit per Constitutiones de castrensi, & quasi peculio testari, id perinde acceperunt Jæti, quasi Constitutiones ipsæ in utroque peculio qualitatem ei dederint patris familias, *L. 2. ad S. C. Maced.* Facultatem vero de castrensi peculio testandi filiis familias primum dedisse Augustum (expunge *Marcum*), non Julium Cæsarem, uti conjicit Heineccius *Antiq. II. 9.*, auctor est Ulpianus *Fragm. tit. 10.* Id confirmarunt Nerva, optimus Trajanus, & Hadriani *subscriptio, princ. h.r.* Igitur præter eos, qui castrense peculium, vel quasi habent, si quis alius filius familias testamentum fecerit, inutile est, tametsi pater id ei permiserit. Idem jus de servis.

§. 370. Sed non eadem est causa testamenti, & donationis causa mortis: nam jure filiusfam. bona, de quibus testari non potest, mortis causa donat: & profectitia quidem, necnon ex adventitiis ea, quorum ususfructus pertinet ad patrem, nonnisi patre consentiente donabit: ea vero, quorum plenam habet proprietatem, etiam sine patris consensu. Quid si filius intestatus, & nulla facta donatione decedat? Certe post Nov. 118. ejus bona tum castrensia, & quasi, tum adventitia, primo liberis, deinde patri deferuntur, simulque matri, fratribusque defuncti: profectitia semper redeunt ad patrem. Duos autem casus ex communi DD. sententia exceptos video, in quibus filius, consentiente patre, de adventitiis testari possit; si quid relinquat in pios usus, & si liberos heredes instituat,

§. 371. At non omnes patresfam. testari possunt. Ob animi vitium testari prohibentur impuberes, *L. 5. ff. qui test. fac.* §. 8. *Inst. de pup. subst.*; furiosi, cum in furore sunt, §. 1. *h. t.* *L. 9. C. qui test. fac.*; & dementes: item prodigi; non vero minores. Nam his volentibus dantur curatores, prodigis invitis. Ob corporis

ris vitium *non semper* facere testamentum possunt surdus, & mutus, §. 3. *b. 1.* Videlicet olim nullo modo testari poterant, *L. 7. qui test. fac.* . Sed ex Justin. *L. 10. C. qui test. fac. poss.*, natura mutus simul, & surdus (sed vere talis) nullam habet testamenti factionem: si vero non natura, sed casu; tunc poterit testari, cum litteras calleat, quibus voluntatem suam scripto consigner. At si mutus tantum sit, vel surdus, sive natura, sive morbo talis sit, licebit huic testari eo modo, quo poterit, aut scripto, aut lingua. Posse autem surdos natura esse, non item mutos, docet Justin. Id alii contingere non posse docent, *V. Ferrand. Adduens. Explic. Jur. II. 12.* Coecus testari olim poterat, & hodie potest. Sed Justinus Justiniani *pater*, §. 4. *b. 1.*, h. e. adoptivus, ad fraudis suspicionem amovendam, *L. 8. C. b. 1.*, cavuit, coecum, sive morbo, sive natura, testamentum facere tantum per nuncupationem posse; tabularium, si adsit, vel octavum testem, a testatore dictata excribere, aut ab alio ante scripta palam recitare, omniumque subscriptiones, & consignationes accedere.

§. 372. Neque testari possunt ii, quibus lex ob delictum admissum, aut apostasin, vel hæresim, nominatim testamenti factionem ademit. Olim omnes capitali crimine damnati, quod servi pœnæ fierent, & cum libertate civitatem amitterent, testandi quoque facultatem amittebant, Quamvis autem post Nov. 17., & 22. tum servitus pœnæ, tum publicatio bonorum, liberis, aut parentibus extantibus, in ea specie sublata sit, nihilominus sunt, qui putant, damnatos etiam Jure novo non posse testari; quia eorum bona licet non publicentur, iis tamen adimuntur, & ad liberos, vel parentes transferuntur.

§. 373. Si de testamenti vi quæritur, ad testamenti tempus spectandum est. Proinde si testator eo tempore factionem testamenti non habebat, non valet, nec tractu temporis convalescet, si factionem postea habere cœperit, *princ.* §. 1. & 5. *b. s.*: idque per regulam Catonianam, *L. 3. ff. de R. J.* Verum quæ testamenti initio valent, tunc irrita fiunt, cum aliquam capitis deminutionem testator postea passus fuerit, §. 1. & 3. *b. s.* Quare ex. gr. præter castrense, & quasi peculium, testamentum filiifam. inutile est; et-

etiam si is suæ potestatis factus decesserit. Demum si quis in civitate testatus, in hostium pervenerit potestatem, ejus testamentum valet postliminii beneficio, si redierit; vel legis Corneliæ, si apud hostes decesserit, *d. §. 5.* Hodie hæc locum habent tantum in iis, qui in bello a barbaris capiuntur. Transfugæ etiam, cum jura civium amittant, & hostium loco habeantur, jus testandi amittunt.

T I T. XIII.

DE EXHEREDATIONE LIBERORUM.

§. 374. **N**UNC ad ea, quæ ipso testamento contineri debent, accedamus. Jure civili debet testator liberos in potestate constitutos, & gradu proximos, vel heredes scribere, vel nominatim *exheredare*: si prætereat, testamentum nullum erit, etiam si præteritus testatori præmoriatur; ob regulam Catonianam, *princ. b.t.* Quod autem dictum est, tantum spectabat mares, filios primi gradus, jam natos.

§. 375. Filias, aliosque liberos testamenti tempore natos, utriusque sexus, per virilem sexum descendentes, sa-

tis erat exheredari *inter ceteros* : præteriti vero, præteritæve, salvo testamento, scriptis heredibus accrescebant ; suis quidem in partem virilem, extraneis in dimidiam, *pr. h.t. Ulp. Frāgm. XXII. 17.* Sane masculi primi gradus arctius cum parentibus devincti videbantur ; quod tribus tandem mancipationibus e patris exirent potestate. Exheredari autem proprie dicuntur sui heredes, §. 2. *Inst. de her. qual. & diff.* ; improprie agnati, & parentes : extranei vero ita dici possent, cum ante heredes scripti, tum successione privantur, *L. 27. ff. ad L. Falc.*

§. 376. Liberi postumi, uti incertæ personæ, institui heredes non poterant, §. 25. *Inst. de legatis* : tantum abest, ut exheredari debuerint. At quia ii, si sui heredes essent, agnascendo testamentum rumpebant, invaluit, ut nullo sexus discrimine, aut instituendi heredes essent, aut exheredandi. Sed postumi sequioris sexus exheredari poterant inter ceteros, modo legaretur eis aliquid ; ne testator eos præterisse videretur : masculi vero, idest filii, & deinceps, h. e. alii, qui sui nascerentur, non aliter, quam nominatim, hoc modo ; *quicumque mihi filius*
ge-

genitus fuerit, heres esto; & ita placuit,
§. 1. b. r., L. 10. ff. de lib. & post.
 Ulpianus e contrario *Fragm. XXII. 22.*
 scribit, postumos mares ulterioris gradus,
 etiam inter cæteros potuisse exheredari.
 At Imperator id, quod tutius erat, eo-
 dem Ulpiano teste, nobis proposuisse vi-
 detur. Præteritis autem postumis cujuscum-
 que sexus, & gradus, valebat testamen-
 tum, eorum tamen agnatione; aut suc-
 cessione in locum sui heredis, rumpeba-
 tur; contra quam fuerat de jam nato-
 rum præteritione constitutum. Diversita-
 tis ratio est, quia Jæti postumorum præ-
 teritionem oblivioni magis, quam irato
 animo, tribuendam putarunt.

§. 377. Jam postumorum multiplex
 genus. Proprie ita vocantur, qui post
 mortem patrum (intra decimum mensem,
L. ult. ff. de fideicomm. libert. L. ult.
C. de postumis heredib. inst. V. Gellium
III. 16.) nascuntur. Sed primum per le-
 gem Corneliam, quæ de confirmandis
 testamentis ante captivitatem factis est
 lata, captivo patre nati pro postumis ha-
 bentur. Atque hi postumi *Corneliani* au-
 diunt. Tum Aquilius, Ciceroni æqualis,
 novum excogitavit postumorum genus.

Aquiliani postumi sunt nepotes, neptēve ex filio, tempore testamenti jam concepti, conceptæve, ac post patrem vivo avo mortuum, postquē ipsius avi obitum nati, natæve, *L. Gallus 29. ff. de liberis, & postum.* Sed casus aliquot ab Aquilio omīssos supplevit Lex Junia Velleja, ad postumos etiam instituendos, vel exheredandos. Sane poterat contingere, ut nepos post avi testamentum mortuo patre, sed vivo avo, nasceretur suus: evenire etiam poterat, ut nepos natus tempore testamenti avi, quo tempore pater eum gradu præcedebat, mox moriente patre, aliove modo de potestate avi exeunte, in sui heredis locum succederet: quibus speciebus Lex Velleja prospexit. Sed & post eam legem accidere poterat casus, quo ea deficiebat: si enim post avi testamentum vivis avo, ac patre, nepos nascebatur non suus, tum patre mortuo succedebat in locum sui, ad nepotem istum non pertinebat primum caput legis Vellejæ, quia vivo quidem avo nascebatur, non tamen suus; nec alterum caput, quia non erat tempore testamenti natus. Hi quoque postumi, *Julianci* dicti a Salvio Juliano, institu-

tuendi, vel exheredandi. Ex his definitio cujusvis generis postumorum confici ita potest; postumus est, qui post testamentum jus sui heredis est nactus; *Cujac. obs. III. 4.* Unde unus in voce postumus productio sensu expers videtur. In *d. L. 29. ff. de lib. & post.* legi possunt Cujacius, Goveanus, Duarenus: necnon Faber *Conject. Lib. 9. & 10.*; Gravina *de legib. & Scis cap. 79.*; & Commentarius Francisci Ramos del Manzano in *tomo 7. Thesauri Meermannii.*

§. 378. Haftenus dicta de necessaria liberorum institutione, aut exheredatione, pertinebant ad suos, sive naturales; sive adoptivos, §. 3. & 4. *b. r.* Emancipatos, datosve in adoptionem; quod jam familiam mutaverant, prateriri poterant ex civili Jure, *d. §. 3.* Sed Prætor & suos, & emancipatos, si heredes non instituantur, exheredari jubet; virilis sexus nominatim, feminini & inter cæteros: prateritis autem contra tabulas bonorum possessionem *promittit* (non legendum *permittit*, uti in vulgatis Institutionum libris. Vide Cujacium), §. 3. *b. r. L. 3. ff. de bon. possess. contra tab.*; nimirum emancipatis a parente naturali, non iis,

quos emancipavit, ac tum præteriit adoptivus: nam hi neque Jure civili, neque Prætorio sunt inter liberos, *d. §. 4.* Manente autem adoptione, tanquam essent extranei, a patre naturali institui, aut exheredari non debent. Verum si, eo vivo, emancipentur, prætoris beneficio idem jus habent in familia patris naturalis, quod habent alii emancipati; perinde ac si nunquam in adoptionem dati fuissent, *d. §. 4. L. 4. ff. si tab. test. nullæ ext.*

§. 379. Sed quicquid erat differentiæ in sexu, gradu, & tempore nascendi, sustulit Justinianus in *L. ult. C. de liberis præteritis*: ita ut liberi omnes a parentibus in testamento heredes instituuntur, aut nominatim exheredentur, §. 5. *b. r.* Quoad feminas attinet, novi Juris causa, earum favor est. Levissimæ videntur duæ illæ rationes a Justiniano allatæ in *d. §. 5.*, & quod uterque sexus in hominum procreatione simili naturæ officio fungitur; & quod tam maribus, quam feminis Decemviri legitimas hereditates, & inde Prætor bonorum possessionem dederunt. Verum enimvero discrimen inter suos, & emancipatos stat adhuc. His præteritis, rescinditur testamentum; præteritis

tis illis, est nullum. Et quidem emancipati, & nati ex eorum maribus, quos tamen pater non præcedat, si testator eos aut præterierit, aut inter cæteros exheredaverit, habent a Prætoribus bonorum possessionem contra tabulas, qua testamentum evertunt. Stat etiam discrimen inter jam natos, & postumos. Hi si præteriti sint, agnoscendo, vel succedendo in locum sui heredis, tunc demum testamentum rumpunt; illi si præteriti sint, testamentum initio nullum est. Adoptivos autem non extraneus pater heredes, exheredesque nominatim facere prorsus debet: extraneus præterire potest ex nova Justiniani *L. 10. de adoption.* §. 380. Miles potest præterire, modo non per errorem, liberos, & natos, & postumos, §. 6. *b. t.* Matris, vel per matrem adscendentis valet testamentum, quamvis liberi præteriti sint per errorem, §. 7. *b. t.*: & silentium pro exheredatione habetur; ignorent licet, se liberos habere, *L. 27. §. ult.*, & *L. 28. ff. de inoff. test.*: nam hi illis nec sui heredes sunt, nec unquam fuerunt: necessitas vero instituendi liberos, aut exheredandi ex jure sui heredis descendit. Hac ratio-
ne

ne liberis a matre præteritis non dat prætor bonorum possessionem, uti dat emancipatis, a patre naturali præteritis, *d. §. 3.* Hinc præteriti a matre querelam tantum habent inofficiosi; etiam novissimo Jure. Neque *Nap. 115. cap. 3.* declarat nullum hujusmodi testamentum, uti nonnullis videtur; sed jus non esse exheredandi, nisi ex quadam causa testamento nominatim inserta, cavit in ea Justinianus.

§. 381. Observandum est, liberorum exheredationem pure, non sub conditione faciendam esse, *L. 3. §. 1. ff. de lib. & post.*; certo nimirum consilio: tum faciendam esse a tota hereditate, non de re certa; licet institutio ex certa re fieri queat, *L. 19. cod.*; item ab omni gradu, h. e. institutis, ac substitutis, *L. 3. §. 2. & 3. cod.*; & vitiatur gradus, ubi præteritus est filius: tandem justis ex causis faciendam esse, invaluit. Ita Paulus in *L. 7. de bon. damnat.*; ubi pro certis de causis in Florentino libro legitur *meritis de causis*. Sine causis si filii exheredati forent, jure valebat testamentum; at per querelam inofficiosi expugnabatur, si immerenter se fuisse exclusos pro-

probarent, *L. 5. §. 1. ff. de inoff. test.*,
L. 28. C. cod. Incertæ autem erant cau-
 sæ: & apud Centumviros expendebantur,
Quint. IV. 7. Plin. lib. 4. epist. 8. Val.
Max. VII. 7.

§. 382. At Justinianus exheredationis
 causas ab arbitrio judicis pendere, ac va-
 gas esse, ægre ferens, 14. proposuit
Nov. 115. c. 3., quibus jure parentes u-
 triusque sexus liberos exheredarent; cau-
 sam vero tabulis inferendam edixit. At
 ferme omnes illæ causæ ab vitio ingrati
 animi descendunt: ac proinde postumi
 exheredari prorsus nequeunt, & vix im-
 puberes. Insuper liberi parentes suos, sive
 mares, sive feminas, si turbato mortali-
 tatis ordine hi decesserint, heredes, aut
 exheredes scribere pietatē ipsa adiguntur,
L. 15. ff. de inoff. test. Si vero præte-
 reant, testamentum non est Jure nul-
 lum, sed per inofficiosi querelam re-
 scinditur: nam parentes præterire idem
 est, ac exheredare, *L. 14. cod.* Si filius
 emancipatus patrem præterierit, hic, uti
 manumissor, habet bonorum possessionem
 contra tabulas, *Cujac. Obs. VIII. 23.* Ex-
 heredari autem parentes debent cum elogio,
 sc. testamento inserta quadam ex octo causis

a Justiniano ad eam rem definitis. Idemque Imp. tres causas Nov. 22. c. 47. statuit, si frater, vel soror, turpi instituta persona, exheredari debeat. Disputatur autem, an graviores causæ esse possint præter eas a Just. statutas? Negant Viglius, Connanus, Giphanius, Peretius, alique, ob d. Nov. 115. c. 3. & 4. Rectius, ut videtur, alii affirmant: ex gr., si filius passus sit, ab alio manus parenti inferri; si accusatorem instruxerit, adjuverit. V. Huber. *Prælect. ad b. tit. Inst.*, & Vinn. in pr. de inoff. test.

§. 383. Sufficit autem, dictas personas in legitima instituere. Ea ex civili Jure determinata est, Chiffletius in tract. de portionibus legitimis; sed quando, incompertum sibi esse fatetur Cujacius Obs. II. 21. Fortasse post L. Falcidiam ex Jctorum interpretatione, Schulting. in Paul. sent. lib. 3. tit. 8. §. 3. A Costa in pr. Inst. de inoff. test. Legitima autem, nullo onere est gravanda, L. 27. 32. & 36. C. de inoff. test. Veteri Jure erat quadrans, h. e. quarta quarta pars ejus, quod ab intestato ad liberos pertinuisset, inter omnes dividenda, §. ult. Inst. de inoff. test., L. 8. ff. eod.

At

At humanitate sua Justinianus eam ita adauxit, ut esset triens, h. e. tertia pars hereditatis, si liberi essent quatuor, aut pauciores: semis vero, si quinque, vel plures, Nov. 18. c. 1. Quum vero id statuit Imp. *in omnibus personis, in quibus ab initio antiquæ quartæ ratio de inofficioso lege decreta est*; ait nempe, se augere portionem debitam iis omnibus, qui, ea non relicta, de inofficioso queri possunt; quumque etiam parentes olim quartam inofficiosi ratione habuissent, legitimæ augmentum & in his locum habet: non solum in liberis, uti putat Vinnius in §. 3. *Inst. de inoff. test.* Quin ipsam quartam Falcidiam in liberis, & parentibus institutis, & oneratis præstatione legatorum, aut fideicommissorum, auctam, recte putat Cujacius *ad d. Nov.*: alioquin melior foret conditio exheredatorum, quam institutorum. Idem dicendum de fratribus, sororibusque consanguineis; si turpes personæ instituuntur, censet ibidem Cujacius. Aliud Card. de Luca *in summa de Legitima*. Tandem in ratione ineunda trientis, vel semissis, non computari liberos, parentes, fratres, jure exheredatos, vel præteritos, docent DD. *ex*

L. 1. §. 5. ff. de conjung. cum emanc. lib.,
 & L. 9. §. 2. ff. de lib. & post.

T I T. XIV.

DE HEREDIBUS INSTITUENDIS.

§. 384. **T**Ria in hoc tit. traduntur .
 Primo, quinam institui heredes possunt : secundo in quot partes hereditas dividatur : tertio modus instituendi. Quoad primum, quod internam facit testamenti sollemnitatem, institui heredes possunt & liberi, & servi, *princ. b. 1.* De servis propriis, alienisve multa Tribonianus habet §. 1., 2., & 3. *b. 1.*; & nos supra (§. 138.) quædam diximus : de liberis nihil . Et non erat tamen prætereundum, liberos, ut institui heredes possent, cives esse oportere, non peregrinos, L. 6. §. 2. ff. de her. inst. (licet olim nec omnes cives heredes institui possent, ex, gr. cælibes) : porro nec institui posse in poenam apostatas, L. 3. C. de apostatis, hæreticos, L. 4. & 9. C. de hæretic., Judæorum universitatem, L. 1. C. de Judæis, filios perduellium, L. 5. C. ad L. Jul. majest.; nec adulterum,

rum, adulteramve, *L. 13. de his qua ut indignis*; nec ex incestis nuptiis natos a parentibus suis; neque horum alterum ab altero, *L. 6. C. de incestis nuptiis*. Liberi naturales ex concubina, si legitimi filii supersint, unam unciam ex patris testamento capiunt; octo vero, si soli parentes testatori supersint, *Nov. 89. c. 12*. Ita recessit Justin. a veteri Jure, quo quia concubinatus licita erat conjunctio, naturales filii ex asse scribi heredes poterant, ut reliqui cives. Tum conjux ad secunda transiens vota, non potest plus relinquere conjugii secundo, quam uni ex prioris matrimonii liberis reliquisset, *L. 6. C. de sec. nupt.* Nec princeps ipse litis causa heres recte instituitur, §. *ult. Inst. quib. mod. test. infirm.*

§. 385. Heredum instituendorum nullus definitus est numerus, §. 4. *b. r.* Sed infinitas heredum tanta esse non debet, ut voluntas testatoris exitum habere nequeat. Proinde olim tempore Ulpiani stabat Romæ lex de municipibus, ac civitate herede non instituenda. *Ulp. Fragm. tit. 22. §. 5*. Nulla autem lex extat in contrariam sententiam antiquior Constitutione Leonis Thracis in *L. 12. C. b. r.*

1. Perperam itaque Heinkecius in Vinnium *tit. de legatis* scribit, temporibus Pauli, Ulpiano coævi, heredes fieri potuisse civitates: nam in *L. 122. de leg. 1.* de legato sermo est, non de hereditate.

§. 386. Quod autem *certum consilium debet esse testantis*, *Ulp. Fragm. tit. 22. §. 4.*, id non facit, ne quis possit extraneum etiam ignotum instituere, *L. 11, C. b. 1.*; modo ejus opinio non sit adeo incerta, ut in infinitum vagari videatur, Et meriti loco, ob quod hereditas datur, *L. 9. ff. pro socio*, est quandoque fama virtutis, aut cognationis vinculum. Huc pertinet exemplum testatoris filios fratris peregrinantes, quos nunquam viderat, heredes instituentis. *§. 12. b. 1.*

§. 387. Hereditas, quæ secunda est hujus tituli pars, *plerumque* dividitur in 12. partes, sive uncias, *§. 5. b. 1.*; quarum vocabulis quodvis aliud solidum, & cujusvis rei partes designari mos est. Dixi *plerumque*, præcipue quia potest testator in pauciores, pluresve quam 12. partes bona parti; sed eæ potestate Juris ad assem revocantur, *§. 5. & 7. b. 1.*; quia nemo pro parte testatus, pro parte intestatus decedere potest; ex eo, quia heres fictio-

ne

ne Juris ræpræsentat, ac sustinet defuncti personam: quæ ræpræsentatio ut unius personæ, ita uniformi ratione esse debet. Contra quam regulam nec ipse testator facere potest, *L. 55. de leg. 1.* Paganum vero testatum, ac intestatum decedere, pugnat tantum ex moribus Romanis; quod voce *naturaliter* exprimit Pomponius in *L. 7. de R. J.* Ita alibi, *uti in L. 16. ff. de minor. L. 22. ff. loc.*

§. 388. In *L. 23. C. de legatis*, legato primum uni fundo, tum alteri dimidia fundi, ex æquo fundum dividi oportere cautum est: id tamen obtinet; cum uni relinquitur as, alteri 6. uncia ejusdem assis, quæ demtæ intelliguntur; non vero cum uncia 12. uni dantur, sex alteri generaliter; quæ species est §. 7., & *L. 13. b. 1.* Jam vero si testator totum assem distribuat quibusdam heredibus, alios vero indefinite, seu sine partibus instituat, ii, quibus datæ sunt partes, ex semisse heredes erunt; ii, quibus non sunt datæ, ex altero semisse: nam qui, asse expleto, sine parte est scriptus, in alterum assem venit, §. 6. *b. 1.*, sc. in dupondium; & censetur testator 24. un-

cias hereditatis fecisse. Nec interest, pri-
 mus, medius, an novissimus sine parte
 heres scriptus sit: ea enim pars data in-
 telligitur, quæ vacat. Idem dicas de tri-
 pondio: Si enim testator dupondio distri-
 buto, alium præterea heredem sine parte
 scripserit, jam ad tripondium transisse in-
 telligitur; & qui sine parte scriptus est,
 ad tertium assem venit. Sin partes adfi-
 gnatæ assem excedunt, is, qui sine par-
 te scriptus est, quod dupondio deest, ha-
 bebbit: uti si partes expressæ dupondium
 superant, sine parte scriptus heres habe-
 bit id, quod tripondio deest. Quod si
 testator plures, quam as ferret, fecit par-
 tes, eæ ad 12. revocabuntur, & unicui-
 que scripto heredi, pro hereditaria por-
 tione decrescent, vel accrescent. Obser-
 vandum est, heredem in re certa institu-
 tum, si coheredem habeat, legatarii loco
 esse, *L. 13. C. de her. inst.* Quod si plu-
 res in rebus certis instituti sint, licet hæ
 inæqualis pretii fuerint, singuli æquales
 capiunt hereditatis partes, *L. 9. §. 13. ff. de her. inst.*; & singuli res certas ve-
 luti prælegatas habent, *L. 35. §. 1. ff. eod.*
 Nos fusc egimus de ea re in nostro tra-
 ctatu de prelegatis.

§. 389. Nunc de forma , & modo instituendi , quæ tertia est tituli pars . Scribi heres pure , & sub conditione potest , §. 9. *b. r.* Quin sub pluribus conditionibus conjunctim , vel disjunctim , §. 11. *b. r.* Verum extraneus heres sub omni conditione institui potest; suus tantum sub ea, quæ in ejus potestate est. Neque alias est ratum testamentum , nisi sub non arbitraria institutus, in defectum ejus exheredetur , *L. 21. ff. de cond. instir. , L. 4. C. de instir. , & subtit.* Cum enim filius certo judicio instituendus sit, ejus institutionem fortunæ committere idem est, ac eum præterire, *L. 18. ff. de bon. poss. cont. tab.* Jure veteri id tantum cautum erat de filio suo herede, *L. 4. ff. de her. inst.*; verum ad omnes liberos in potestate extendit Just. §. 5. *I. de exher. lib.* Tum impossibilis conditio remittitur , sc. pro non scripta habetur, in testamento. Ergo & turpis remittitur, *L. 9. ff. eod.* Verum ob hæc conditiones, quæ in testamentis non ex animi sententia præsumuntur appositæ, contractus vitiantur, *L. 3. de O. , & A. ; & DD. ad L. 45. b. r. & ad L. 3. de C. & D.* Nam magis ludere quam

consentire contrahentes intelliguntur. Porro *hereditas ex die, vel ad diem non re-
ste datur, sed vitio temporis sublato, ma-
net institutio, L. 34. h. t., & §. 9. h.
t.* Id accipiendum de die certo: incertus
enim *conditionem in testamento facit, L.
7. de C. & D.*; uti, Titius, cum capere
poterit, vel cum Cajus uxorem duxerit,
heres esto. Plane conditio retrahitur, h.e.
ad initia recurrit, non dies. Hinc si non
auferretur temporis vitium, moreretur
testator partim testatus, partim intesta-
tus, contra regulam Juris, quæ ad spa-
tium quoque temporis pertinet, non ad
bona solummodo, *L. 41. de test. mi-
litis*. Cum vero in contractibus nul-
lus sit locus regulæ prædictæ, non est
dubitandum, iis utiliter adjici tempus
posse, §. 2. *infra de V.O.* Quod si in alte-
rius arbitrio conditio collata fuerit, pro
impleta habetur, si per heredem non ste-
terit, quominus impleatur, *L. 3. & 23. ff.
de C. inst.* Conditio arbitraria negativa non
suspendit, præstita tamen per heredem Mu-
ciana cautione, *L. 7. ff. de C. & D.* Quod si
heres ante eventum conditionis moriatur,
vel alias conditio deficiat, institutio e-
vanescit, & ab intestato hereditas defer-
tur,

tur, L. 8. C. ult. ff. de C. inst. Aliud est in contractibus, §. 4. Inst. de V. O. L. 57. ff. de V. O.

T I T. XV.

DE VULGARI SUBSTITUTIONE.

§. 390. **Q**uia apud Rom. & sacra privata interire nefas erat, & turpissimum, censebatur, si bona post mortem, nullis existentibus heredibus, defuncti nomine venirent, multum intererat, eorum testamenta non destitui. E contrario multis ex causis fieri poterat, ut heredes instituti deficerent. Propterea ne testamenta corruerent, permixtum est testatoribus plures heredum gradus facere, ut primo deficiente, sequentes ordine admitterentur. Id dicunt *Jcti substituere*, tum in heredibus instituendis, tum in legatorum datione. Substitutio autem aut *vulgaris* est, quæ vulgo a quovis testatore, & omnibus heredibus fieri potest; aut *pupillaris*, quæ solis filiis impuberibus a solo patrefam. fit. Aliæ species substitutionis ad alterutram referri commodè possunt. Quia vero sub-

stitutio est secunda institutio, nonnisi testamento, & directis verbis fieri potest . Ex benigna tamen interpretatione usu Fori probata , substitutio facta Codicillis, sustinetur, tanquam fideicommissum; quasi legitimi heredes videantur a testatore rogati , ut hereditatem substituto restituant.

§. 391. Proficiscitur vulgaris ex verbis illis XII. Tab., *uti legasset suæ rei, ita jus esto* . Ejus formula ut plurimum hæc : *si hic heres non erit, ille heres esto, prine. b. s.* Hæc autem conditio æque existit , *si quis noluerit, ac si quis adire non potuerit*, puta quia præmortuus testatori . Uno autem casu expresso, non expressum subaudiri putat Bartolus . Negant alii Interpretes ex L. 101. de C. & D., & L. 10. ff. de lib. & post. At Bartoli opinio, licet legibus contraria, ex testantis voluntate in Foro se commendavit , Stryk. de caus. test. c. 18. Gomez. Resol. 1. 3.

§. 392. Certus graduum numerus lege statutus non est, uti nec primorum heredum . At si quis ob tenuem rem familiarem testamento diffidat, *novissimo loco servum heredem necessarium substitue-*

tuere in subsidium potest , *princ. b. r.*
 Recte ait. Tribon. *novissimo loco* : si enim
 testator servo proprio heredi instituto al-
 lium substituerit , videtur remisisse insti-
 tuto servo necessitatem adeundæ heredi-
 tatis , *arg. L. 12. ff. de C. inst.* ; quæ est
 receptior opinio contra Viglium . Tum
 verba illa *si heres non erit* , si dicantur ,
 de eo , quem testator scit esse alieni juris,
 accipienda , *si neque ipse heres erit* , sui
 juris esse incipiens ante mortem testato-
 ris , *neque alium* , idest dominum , patrem-
 ve , *heredem effecerit* , non definens esse
 alieni juris : Si dicantur de eo , quem
 testator scit patremfamilias esse , accipienda ,
si hereditatem sibi , vel ei ; cujus juri
postea , h. e. post testamentum , sed ante
 testatoris mortem , *subjectus esse , cæperit* ,
non acquisiverit , §. 4. *b. r. L. 40. ff.*
de her. inst. Et hinc si filiusfam. heres
 institutus sit , eique , si heres non erit ,
 substitutus datus fuerit , eo repudiante ,
 substitutus ad hereditatem admittitur , non
 pater , *Vinn. in §. 4. b. r.* Quod si quis
 servum alienum , quem putabat patrem-
 familias , heredem scripserit , eique vul-
 gariter alium substituerit , servo jussu do-
 mini adeunte hereditatem , substitutus in

partem, sc. dimidiam, admittitur, d. §.4.

Atque hoc Tiberius Cæsar in persona Parthenii servi sui constituit: nimirum in re dubia mediam sententiam probavit: neutri enim solidum tuto dare poterat. *Heinecc. in Elementis Jur. Civil. II. 15.*

§. 393. Testator potest scriptis primo gradu heredibus substituere non solum eos, qui sunt extra numerum heredum, sed & heredes ipsos. Atque utroque casu vel unum uni, vel plures pluribus, vel uni plures, vel pluribus unum, §. 1. *h. r.* Tum ipsos heredes invicem substituere. Usus hujus reciprocae substitutionis ante legem Papiam Poppæam vix Romæ erat: nam coheres jure ad crescendi deficientis partem aquirebat; neque mutua substitutione opus erat. At jure ad crescendi ad ærarium locupletandum per L. Papiam sublato, in iis tantum, quæ vivo testatore, aut ante apertas tabulas, aut ante aditam hereditatem deficerent, *Ulp. Fragm. tit. XVII. §. 1.*, mutux heredum substitutiones introductæ sunt, ut ærarium excluderetur a substituto, si heres defecisset. *Heinecc. ad L. Jul., & Pap. Lib. III. cap. 5., & 9.* Sed sublatis caducis, & per omnia jure

re adcreſcendi reſtituto, reciproca ſubſtitutio inutilis ferme eſt. Ubi vero inſtituti heredes invicem ſubſtituuntur, ſubſtitutio *reciproca* Modeſtino dicitur *L. 4. b. 1.*, *mutua* Papiniano *L. 64. de Leg. 2.*, *breviloqua* Doctores; quia poteſt teſtator breviloquio uti, *eos invicem ſubſtituo*: quemadmodum *compendioſa* dicitur, quæ vulgarem, & pupillarem ſubſtitutionem complectitur; uti ſi pater filio impuberi ſubſtituerit ea formula, *quandoque deceſſerit*.

§. 394. Reciprocæ ſubſtitutionis illud proprium eſt, ut par eſſe debeat ſubſtitutorum ratio, & conditio. Ex qua doctrina ſi pater duos filios impuberes invicem ſubſtituerit hoc communi verbo, *eoſque invicem ſubſtituo*, & vulgariter, & pupillariter ſubſtituiſſe intelligitur, ex *D. Pii Conſt.* Contra ſi eorum alter impubes, alter pubes reperiatur, in vulgarem tantum caſum intelligitur ſubſtitutio, uti Severus, & Antoninus reſcripſerunt: quod incongruum videretur in uno duplicem eſſe ſubſtitutionem, in altero ſolam vulgarem, *L. 4. §. 1. ff. de vulg. & pupill.*

§. 395. Si teſtator plures quam duos
ex

ex disparibus partibus heredes scriptos invicem substituerit sine partium mentione, Divus Pius rescripsit, non alias partes substitutioni testatorem tacite inferuisse, quam quæ in institutione expressæ sunt, §. 2. *b. 1.* Male Theophilus hanc speciem proponit exemplo duorum institutorum sibi invicem substitutorum. Cum enim duo sunt, altero deficiente, necesse est, alterum, quod reliquum est, semper, & in solidum habere. Speciem recte fingit Ulpianus in *L. 24. b. 1.* Quod si in hac re aliam testatoris mentem fuisse probetur, *L. 24. ff. b. 1.*, etiam ex conjecturis, uti si testator par onus imposuerit substitutis, *L. 23. ad S.C. Trebell.*, vel si eos substituerit, non sub heredum appellatione, sed propriis nominibus expressis, *arg. L. 4. d. tit.*, viriles attenduntur partes, non hereditariæ.

§. 396. Interdum fit, ut testator heredi substituat coheredem: & huic alium non heredem. Hoc casu, deficientibus heredibus, substitutus admittitur ad *utramque partem sine distinctione*, num coheres substitutus post institutum decedat, an ante, §. 3. *b. 1.*: quod clarius exponit Papinianus in *L. 41. ff. de vulg. & pup.* Perpe-

peram itaque ea verba *sine distinctione* omittit Theophilus. Ergo substitutus substituto etiam censetur substitutus instituto. Atque hac in specie substitutus admittitur jure substitutionis (tacitæ), non jure adcrescendi; *L. 27. ff. de vulg. & pupill.* Nam pars deficiens adcrecere nequit ei, qui heres non extitit. Et jus substitutionis pinguius est jure adcrescendi: adeout substitutus non coheres, datus heredi ex. gr. secundo loco scripto, deficientibus heredibus primo, & secundo loco scriptis, excludat coheredem, quem jure adcrescendi non excluderet.

§. 397. Effectus vulgaris substitutionis est, ut si deficiat heres institutus, substituto locus fiat, excluso instituti herede, ad quem non transmittitur hereditas non adita; nisi ad liberos ex potentia sanguinis, *L. un. §. 5. C. de caducis tollendis, L. un. C. de his, qui ante apertas tab. hereditatem transmittunt.* Ea substitutio autem præcipue evanescit, si substitutus ante institutum moriatur; vel si adita sit ab herede hereditas, *L. 4. & 5. C. de impub. & aliis subst.* Et generaliter substituto locus non est, quamdiu institutus adire potest, *L. 69. ff. de adquir.*

quir. hered.; nisi tamen obæratum servum proprium instituerit, eique hominem liberum substituerit (nam propter L.Æliam Sentiam substitutus instituto præfertur, L. 57. ff. de her. inst.); vel nisi servus sit institutus, qui liber a testatore crederetur, uti modo diximus.

T I T. XVI.

DE PUPILLARI SUBSTITUTIONE.

§. 398. **L**iberis impuberibus, & jam natis, & postumis, §. 4. b. r., posse parentes facere testamentum, *moribus introductum est, princ. b. r.*; h. e. Prudentum interpretatione, qui *τὴν suam* in XII. Tab. ad filiosfamilias produxerunt. Ita impuberum utilitas poscebat; adversus quam facere dicitur, qui pupillarem substitutionem impugnat, L. 42. ff. de acquir. hered. Aliter pupilli, corruptis Romæ moribus, agnatorum suorum insidiis expositi fuissent. Sed dato pupillari substituto, nemo iniquum facinus adgredebatur, cujus emolumentum ad alios perveniebat. Eum autem, cui substituitur, esse impuberem, & in potestate, & primum

num in familia occupare gradum est opus, §. 9. *b. t.* Puberi, aut extraneo heredem dare, militis privilegium est.

§. 399. Pupillaris substitutionis formula hæc est, *filius meus heres mibi esto, & si filius mibi heres non erit, sive si heres erit, & prius moriatur, quam in suam tutelam venerit, h. e. pubes factus sit, tunc Sejus heres esto.* Ecce duo casus; *si heres non erit, & si heres erit, & impubes mortuus fuerit.* Sed vel si quis paterfam. in alterum tantummodo casum substituerit filio impuberi, in utrumque casum substituisse censetur, *L. 4. b. t.* Sane vulgaris substitutio expressa continet tacitam pupillarem: & pupillaris expressa continet tacitam vulgarem, uti recte ex *d. L. 4.* colligunt Interpretum plerique, & decisum olim a Centumviris referunt Cicero *de Orat. I. 39.*, & Quintilianus in specie Coponii testatoris. His præmissis, si filius impubes institutus, vivo patre decedat, sive patri superstes, ejus hereditate abstineat, sit locus vulgari substitutioni, ex qua substitutus admittitur ad paternam hereditatem. Cum enim filius ex Prætoris beneficio paterna se abstinere hereditate, licet retineat nudum

tur, *L. 87. §. 7. ff. ad L. Falcid.*; unde nec legatum, nec fideicommissum ab his relinqui potest, *L. 2. §. 6. de Leg. 3. §. 401.* Sed pater scribere sibi heredem debet: & quidem antea; si non sit unus pupillarium, paternarumque tabularum contextus (ita non discrepat a seipso Ulpianus in *L. 2. §. 4. & 5. de vulg. & pupill. V. Duar. in b.t.*): nam pupillare pars est, & sequela testamenti paterni, §. 5. *b. t.*: unde in pupillari substitutione unum est testamentum, hereditas duplex, §. 4. *b. t.* Vide de hac re Hottomanum. Hinc fit, ut non tantum pupillares tabulæ ab initio non subsistant, si patris testamentum ab initio nullum sit; verum etiam corruant, si illud recte factum, postea infirmetur, §. 5. *b. t.* Ex *Nov. 115. c. 3.* unde *Auth. ex causa C. de lib. præter.* etiamsi paternum testamentum per querelam inofficiosi expugnetur, pupillaris substitutio salva manet, uti & legata, aliaque omnia; præter unam heredis institutionem.

§. 402. Ad hæc in dicta formula unus impubes filius ponitur: sin plures fuerint, potest pater vel singulis substituere, si neminem velit decedere intestatum, vel
ei,

ei, qui novissimus morietur impubes, si malit jus legitimarum hereditatum integrum custodiri inter eos, §. 6. *b. r.*, L. 37. ff. *de vulg. & pupill.*: unde mortuo uno ex filiis, cæteri ab intestato succedunt (immo & mater *ex Nov. 118. c. 2. V. Vinnium in d.* §. 6.): ultimo vero impubere decedente, succedit substitutus.

§. 403. Porro in dicta formula *Sejus heres esto*, exemplum est substitutionis nominatim factæ. Et in hac specie substitutus, veniente casu substitutionis, ad pupilli hereditatem admittitur; licet patri scriptus heres non fuerit; sive scriptus fuerit, & patris hereditatem repudiavit: nisi tamen adfuerit conditio, *si heres eris*, L. 8. & 10. §. 3. ff. *de vulg. & pup.* E contrario potest etiam impuberi substitui generatim, *quisquis mihi heres erit, idem filio meo impuberi heres esto*: quibus verbis vocari ex substitutione, inquit Tribonianus §. 7., *eos, qui & scripti sunt heredes*, h. e. qui extiterunt heredes ex testamento, certoque defuncti iudicio, & *extiterunt* ex institutione, & *pro qua parte heredes facti sunt*. Demum impuberi substitui ultra tempus pubertatis nequit;
in-

intra potest: et si longius tempus exprefsum sit; etiam pubertate substitutio finitur, §. 8. & L. 14. b. 1.; quia jam ea est ætate impubes, ut ipse sibi testamentum condere possit. Filiis ergo puberibus, aut extraneis heredibus institutis, postquam heredes extiterint, substituere nemo potest. Illud permissum est; ut per fideicommissum eos obliget testator ad hereditatem vel totam, vel pro parte alteri restituendam, de qua fideicommissaria, uti vocant, substitutione tit. 23.

§. 404. Verum Justinianus L. 9. C. de impuberum, & aliis substit. concessit parenti utriusque sexus (*humanitas* enim, non jus subtile id suavit) puberi etiam filio, filiaevæ, aliusve liberis perpetuo mentecaptis, substituere, si mentecapti obirent; certas personas, §. 1. b. 1.; idest mentecaptorum liberos sanæ mentis; quibus non existentibus, fratres, quos mallet; hisquo deficientibus, quemlibet. Substitutionem istam barbare *exemplarem* vocant. Ex dictis apparent inter hanc substitutionem; & pupillarem discrimina: Licet vero Justiniani Constitutio de solis liberis amentibus scripta sit, communiter ta-

men Interpretes ad furiosos, atque prodigos, mutos, & surdos, eam porrigere.

§. 405. Postremo ad declinandas hereditarum infidias, hortantur leges (non jubent, quod sæpe fit), pupillarem substitutionem in inferiori testamenti parte scribi: eamque partem *proprio lino, propriaque cera consignare*; atque in priora parte cavere, ne inferiores tabulæ vivo adhuc, & impubere filio aperiantur. Mulierem quamdam partum abegisse, pecunia a secundis heredibus accepta, constat *ex L. 39. ff. de pænis*; & tutorem veneno morti dedisse pupillum, cui substitutus datus fuerat, ex Suetonio in *Galba c. 9.* Observandum est, testamenti tabulas in plures partes dividi posse, & seorsum singulæ obsignari. Unde *prima cera* apud Horat. *Lib. 2. sat. 5. v. 35. V. Salmas. de modo usur. c. 11.*

§. 406. Ex dictis patet, præcipuum pupillaris substitutionis effectum esse, quod substitutus succedit filio impuberi, non patri testatori, *pr. h. r.*: licet una opera etiam bona patris ad filium delata accipiat. Quin pupillaris substitutio expressa ipsam matrem excludit ab omni pu-

pupilli successione ; ut ea nec querelam habeat inofficiosi. Verum pupillaris tacita, quæ expressæ vulgari inest, non valet ad excludendam matrem, licet substitutus fuerit pupilli frater : hæc enim oritur ex præsumptione ; ideoque in benigniorem partem accipienda. Quî tandem expirat pupillaris substitutio, ex dictis nullo negotio erui potest.

T I T. XVII.

QUIBUS MODIS TESTAMENTA INFIRMANTUR.

§. 407. **E**Xposita jam testamentorum condendorum ratione, ad eorum vitia transit Tribon. Generaliter testamentum potest esse nullum, injustum, ruptum, irritum, inofficiosum, & destitutum, siue desertum. At inofficiosum per sententiam judicis rescinditur : uti & illud quo emancipati prætereuntur, per bonorum possessionem contra tabulas. Alia testamentata vi ipsa Juris infirmantur.

§. 408. Nullum dicitur, cum filius fam. præteritus est, vel testamentum alio personarum, voluntatisve vitio labo-

rat: & hoc ab initio non valet, uti & injustum, in quo Juris desunt sollemnia, *L. 88. §. 17. de leg. 2.* Emancipatis vero, & postumis præteritis, testamentum patris initio nullum non est, quia Jure factum, *L. 3. §. 4. ff. de injusto*: sed illi petunt bonorum possessionem; isti rumpunt agnatione. Liberis a matre, vel avo materno præteritis, testamentum valet, sed querela inofficiosi rescinditur. Ruptum dicitur, quod vel posteriore testamento, vel agnatione sui heredis infirmatur. Irritum, quod testatore capite minuto, ratum haberi non potest. Inofficiosum, quod tale judicis sententia per institutam querelam, pronuntiatur. Destitutum denique, hereditate non adita, *princ. b. r., & L. 1. ff. de injusto, rupto &c.*; sive quod heres noluerit hereditatem adire, sive quod non potuerit per mortem, vel conditionem deficientem, *§. 7. Inst. de her. quæ ab intest.*, *L. 9. ff. de lib. & post.*; & res ad causam intestati redit, *pr. b. r. L. 181. ff. de R. J.* Alibi irritum dicitur, sed minus proprie, testamentum, ex illo nemo existit heres, *L. 21. ff. de injusto rupto*. Hoc titulus præcipue agit de rupto, & irrito testamento,

§. 409. Rumpitur itaque testamentum, cum in eodem statu manente testatore, ipsius testamenti jus vitatur, §. 1. *b. t.* Rumpitur testamentum agnatione, aut quasi agnatione sui heredis. Adnascitur nobis suus heres, cum post factum testamentum, filium ex uxore suscipimus, filios naturales per subsequens matrimonium, vel Rescripto Principis legitimamus. Quasi adnasci suus heres nobis dicitur, cum aliquem secundum *L. penult. C. de adopt. 2.* adoptamus; vel cum nepos, qui testamenti tempore suus heres avo non erat, patre remoto, in locum sui heredis avo succedit. Rumpitur etiam, posteriore testamento jure perfecto, §. 2. *b. t.*; licet ex hoc heres non extiterit; & licet clausula derogatoria priori inserta, non fuerit in posteriore specialiter revocata. *Jure*, inquam, *perfecto*: ergo posteriore testamento, quo ex parte certa scriptus est heres, ex §. 5. *supra de her. inst.*, prius etiam ipso Jure tollitur, nisi posteriore sit expressum, velle testatorem, etiam prius valere, §. 3. *b. t.* Posteriore non Jure facto, prius Jure factum non tolli, comprehensum fuit Oratione Imp. Pertinacis, §. 6. *b. t.*: nam eo genere aliquid

diffolvi debet, quo colligatum est, *L. 35. de R. j.* Ita non tollitur, instituto herede in secundo testamento, qui jus capiendi non habebat, *L. 12. ff. de his, quæ ut indignis*, vel si alia de causa posterius testamentum non valeat, ex vicio in tempore, quo conditur; non ex postfacto, & extrinsecus accidente; ex. gr. si testamentum destituatur. Multo minus infirmatur prius testamentum nuda voluntate (licet coram septem testibus expressa, uti putant DD. Nonnulli tamen addunt, hoc modo scriptum testamentum non convelli, sed rite infirmari nuncupativum); si nullo facto firmata sit; ut puta tabularum scriptarum incisione, deletione, cancellatione, aliove facto, quod satis ad contrariam voluntatem probandam fuerit, *d. §. 1. Cautum vero fuit. Honorii, ac Theodosii Constitutione in L. 6. C. Tb. de testam.*, ut testamentum solo decennii lapsu revocatum intelligeretur. Eam abrogavit Justinianus *in L. 27. C. de testam.*, ubi cautum, solo decennio testamentum non tolli, nisi testator coram tribus saltem testibus poenituisse se testamenti sui, affirmaverit. Jure autem singulari posterioribus militum testamentis, utut imperfe-

fectis, rescinduntur priora, quamvis perfecta, *L. 3. de injusto, rupto &c.* Tum inter liberos facta a parentibus utriusque sexus testamenta, licet imperfecta, rumpunt priora, *L. 21. §. 1. C. de testam. §. 410.* Irritum fieri dicitur testamentum; cum is, qui facit testamentum, capite deminutus sit; §. 4. *b. r.*: Nam ut quis recte testetur, duobus temporibus, cum scilicet testatur; & cum moritur, liber, Civis Rom.; & paterfam. esse debet. Sed si sollemnia a Prætoribus statuta habeat, testamentum tuetur Prætor ipse, accommodata heredi scripto bonorum secundum tabulas possessione, §. 5. *b. r.* Verum si quis post factum testamentum se se dederit adrogandum, conceditur dicta bonorum possessio, cum testator sui juris effectus declaraverit Codicillis, aliisque litteris, vel se eodem testamento mori: nam voluntario illo in alienam familiam transitu, videri testatorem testamenti poenituisse; Jcti putant. Sin testator mediam, maximamve capitis deminutionem sit passus, nihil est opus novo facto testatoris restitui: cessat enim dicta ratio. Ad hæc, quod de testamento irrito facto dicitur *in d. §. 5.*, est etiam commune rupto te-

testamento; si aut testator postremas tabulas incidat, ut priores supremas relinqueret; aut si postumus præteritus, *vivo testatore natus decesserit*. Si mortuo testatore natus continuo decedat, cum semel ab intestato factus sit heres, restitui a Prætoris testamentum amplius non potest. Tandem ipse Pertinax Imp. non probat tabulas legitime factas, quibus ipse *litis causa scriptus est heres*; ut sc. translata in Principem lite, adversario incommodetur; nec probat non legitime factas, ubi esset scriptus heres *ob eam causam*, h. e. ideo, ut ipse lucri studio Princeps eas tueretur, §. 7. *b. t.* In eam sententiam sæpe rescripserunt Severus, & Antoninus, uti subdit Tribon., *licet legibus soluti sumus, attamen legibus vivimus*. Concinit Paulus in *L. 23. de leg. 3.*

T I T. XVIII.

DE INOFFICIOSO TESTAMENTO.

§. 411. **I**nofficiosum dicitur testamentum, cui deest debitum, erga liberos, parentes, ac fratres, officium; sive, in quo liberi, parentes, aut fratres immerito exheredati, vel prateriti sunt, *princ. b. t.* Quod vero recte fit, utut inofficiosum, ejus rescindendi causa colorem induci oportuit furoris, & dementiæ testatoris. Quare non ex Constitutionibus, neque ex lege Glicia, est querelæ origo; quia leges colore non indigent: neque ex Prætoris Edicto, quia Prætoriarum actiones, quæ rei persecutionem continent, ultra annum non dantur, *L. 35. de O. & A.* Est igitur ex Jctis, qui latissimam potestatem a Decemviris concessam testatoribus, coangustarunt; & *querelam* verecundo vocabulo introduxerunt; quæ *actio* dicta quoque fuit, postquam juris ordinarii per Constitutiones, esse cœpit.

§. 412. Prima est causa liberorum, si quando parentes sine causa eos *exheredant, vel omittunt*, *princ. b. t.*, ubi *exhe-*

exheredant sine causa referendum est ad omnes parentes : testamentum enim valet ; nec aliud suppetit Juris remedium ; *et omittunt*, referendum ad matrem, aliosque per matrem ascendentes : Igitur liberi, qui sive a patre sine causa exheredati, sive a matre, vel avo materno præteriti (nam horum præteritio, seu silentium ; ut diximus ; vice exheredationis est), inofficiosum possunt dicere testamentum : Liberi hic intelligendi cujuscunque sexus, aut gradus ; tam emancipati, quam in potestate : quin ii, qui nunquam in potestate fuerunt : mater enim in filios potestatem non habet : tam naturales, quam adoptivi ; qui in potestatem adoptantis transierunt ; *ex L. penult. C. de adoptionib.* Excipe impuberem adrogatum, qui quartam habens Divi Pii, nequit de inofficioso queri. Insuper liberi legitimati, & postumi, cum jus succedendi habeant, hi. e. ab intestato alios excludant ; inique exheredati, sive præteriti, de inofficioso recte queruntur : Liberi vero illegitimi ; sive vulgo quæsitii ; sive nati ex concubina, paternum testamentum inofficiosum dicere non possunt : de materno agere possunt. Dicitur vero injuria exhe-

re-

redatus filius, cum privatur successione ob
unam saltem ex 14. causis in Nov. 115.
c. 3. definitis, testamento non expressam.

§. 413. Secunda causa est parentum,
etiam utriusque sexus, qui ad successio-
nem liberorum Jure sive legitimo, sive
honorario, venturi fuissent. Hi a liberis
sive exheredati, sive præteriti, queri pos-
sunt: cum in linea ascendentium, & col-
lateralium exheredatio, & præteritio non
differant. Similiter vero liberi possunt
parentes præterire, vel exheredes scribe-
re, una saltem ex octo causis Nov. 115.
c. 5. expressa. At non constat inter In-
terpretes, an post Nov. 118., qua fra-
tres defuncti una cum patre ad successio-
nem admittuntur, debeant etiam una
admitti ad querelam. Illud ferme com-
pertum videtur, parentum victoriam fra-
tribus quoque prodesse, & re ad causam
intestati deducta, cum parentibus fratres
succedere.

§. 414. Tertia causa est fratrum, &
sororum germanorum, & consanguineo-
rum (non eorum, qui uterini sunt, L.
27. C. b. r.) At hi jus querendi tum
demum habent, cum defunctus turpes
personas heredes scripserit. Quoniam vero

tur-

turpis persona definitur a Constantino in L. 27. C. b. 1., quæ vel turpitudinis vel infamiae, vel levis notæ macula aspergitur, certo meretrices, etiam si postea nupserint, & spurii hac definitione comprehenduntur. At possunt ex tribus causis Nov. 22. c. 47. fratres, etiam turpibus personis institutis recte exheredari, aut præteriri. Ulteriores autem cognati exceptione non competentis querelæ, si agant, excluduntur, §. 1. b. 1. Quid si egerint, & nemine eos repellente, obtinuerint? Testamento rite everso, ad hereditatem jure intestati venient. Cum vero ex Nov. 118. c. 3. fratribus exæquati sint præmortuorum fratrum filii, videtur, hos quoque ad querelam admitti oportere. Novissimum heic locum habent fratres: licet in successione legitima posteriorem olim, quam parentes, causam habuissent: atrocior enim injuria, quæ miserationem auget, parentibus infertur.

§. 415. Qui de inofficioso queritur, testatorem testamenti tempore sanæ mentis non fuisse, tacite affirmat. Ideo querela, tanquam ultimo adjutorio, uti debet: ac si quod aliud suppetat Juris præsidium, ad hoc potius, quam ad que-

querelam coniugendum est, ne defuncto inferatur injuria, §. 2. *b. r. L. ult. C. de lib. præ.* Proinde querela cessat pluribus in speciebus. I. Si nullo aliquo jure ad defuncti bona exheredatus, ut dixi, pervenire potest; puta si ruptum, nullum, irritum; aut injustum probare possit testamentum; ab inofficiosi querela se abstinebit, *L. 8. §. 12. ff. b. r.* II. Si exheredatus, vel præteritus renunciaverit querelæ expresse, vel tacite; nampe si per quinquennium, quod querelæ præscriptum est, *L. 9. b. r.*, post hereditatem aditam tacerit, *L. 16. C. de inoff. test.* III. Si quomodoque testatoris judicium agnoverit, & comprobaverit; ut puta si acceptaverit legatum sibi relictum, §. 3. *b. r.*; suo tamen nomine. Hinc non obtinet id in tutore ex. gr., qui nomine pupilli acceptat, §. 4. *C. 5. b. r.* Hodie postquam placuit Justiniano *Auth. ex causa C. de lib. præter.*, rescisso testamento solum viari institutionem, qui potest de inofficioso agere, si alij legatum petenti ad vocationem; aliamve operam præstiterit, agere etiam potest. IV. Cessat querela; si quis filium bonâ mente exheredaverit, *L. 16. §. 2. de cumat. furios.* V. Si quis

jure

jure militari testatus sit, *L. 8. §. 4. b. r. Nov. 123. c. 19.*; aut filiusfam. de peculio quasi castrensi, *L. ult. §. 1. C. cod.* Sed hoc posterius abrogatum est a Justin. *Nov. 115. c. 4. VI.* Cessat querela ex Jure novissimo *Nov. 115. c. 3., & 4.*, si liberi, vel parentes, heredis nomine honorentur, & institutionis titulo accipiant vel legitimam integram, vel ejus portionem. Nam si minus legitima eis relictum sit, non de inofficioso agunt, sed ejus petunt supplementum. Legitimæ vero quantitas quæ olim fuerit, quæque ex Justiniano Jure, superius dictum est (§. 383.).

T I T. XIX.

DE HEREDUM QUALITATE, E DIFFERENTIA.

§. 416. **C**UM nullo ex dictis vitiis testamenta infirmantur, jam ex iis deferuntur hereditates; ad quarum acquisitionem sola requiritur susceptio. At quia hæc pro varia heredum ratione varia est, ideo de heredum qualitate prius, ac differentia; tum de acquirenda vel omittenda hereditate, hoc titulo agitur.

tur. Heredes sunt aut necessarii, aut sui & necessarii, aut extranei, *princ. b. r.* Heres necessarius dicitur servus a domino institutus; non quia *adire cogitur hereditatem*; nam a morte testatoris protinus est heres, §. 1. *b. r.*; sed quia lex potestate sua talem facit, etiam furiosum, & ignorantem; unde is creditoribus hereditariis obligatur. Famam quidem, pudoremque testatoris ex L. Ælia Sentia suscipit servus; id tamen cum libertate compensat. Suus & necessarius, sive potius suus heres dicitur, qui in potestate morientis est delatæ hereditatis tempore, ac primum in familia occupat gradum, §. 2. *b. r.* Vox *suus* ad ipsum refertur heredem, ex Ictorum loquutione: adeout Hotomanus stultos appellet eos, qui sic loquuntur; *habeo meum heredem* pro *habeo suum heredem*; quam notionem belle Lactantius ita accommodat ad phœnicem; *Ipse sui proles, suus est pater, & suus heres*. Tum suus dicitur necessarius, æque ac servus: nisi quod suo & necessario heredi, cum impuberi, tum puberi, non ei, qui tantum necessarius est, abstipendi se ab hereditate Prætor potestatem facit, ut potius parentis, quam ip-

ip-

ipsius bona a creditoribus possideantur ;
 §. 2. *b. r. L. 8. ff. de acquir. hered.*
 De suis heredibus docte, & copiose Vin-
 tius in §. 2. *b. r.* Præter hos, cæteri he-
 redes voluntarii ; & extranei dicuntur ;
 veluti filii emancipati quoad patrem ;
 omnes quoad matrem ; servus heres a
 domino institutus, & post factum testa-
 mentum manumissus, §. 3. *b. r.* Extra-
 neus autem, siue ipse instituatur heres,
 siue qui in potestate ejus est, debet jus habe-
 re capiendi ex testamento, tempore testa-
 menti, tempore mortis, & tempore de-
 lata hereditatis : neque tempus medium
 inter testamentum, & mortem testatoris,
 aut conditionem institutionis inspicitur.
 In suo herede duo tantum tempora in-
 spiciuntur, testamenti, & mortis : tem-
 pus enim additionis in iis idem est, ac
 mortis tempus, §. 4. *b. r.*
 §. 417. Nunc de Jure deliberandi. De-
 liberare proprium est heredis voluntarii,
 h. e. extranei. Verum postquam benefi-
 cium abstinendi Prætor suo heredi dedit,
 & hic deliberat, *L. 8. de J. delib.* Quo-
 niam vero heres succedit in universum
 jus defuncti, obligatur æri alieno, etiam-
 si hereditas non sit solvendo, *L. 8. de*
action.

action. hered. Proinde ex æquitate Prætor heredi tempus ad deliberandum, si petiisset, concessit; quod utile est etiam iis, quorum spem posset heres cunctando in longum ducere. Tempus hocce, quod olim in judicis potestate erat, certum fecit Justinianus, *L. ult. §. 13. C. de J. delib.*; & a Principe datum, non ultra annum esse jussit; datum a judicibus non ultra 9. menses; nisi brevius tempus testator præscripserit, *L. 72. de acquir. heredis*. Si heres intra præstitutum diem neque adeat, neque pro herede se gerat, Prætor ei denegat actiones, *L. 60. de J. delib.*; & quia hereditati tacite abrenunciat, secundis, aut legitimis heredibus defertur hereditas. Contra, quia non recusavit intra eum diem, omnibus hereditariis oneribus tenetur. Quod si vel extraneus adiit hereditatem, aut repudiavit, vel suus se immiscuit, aut abstinuit, mutare factum non potest, *§. 5. b. r.*; nisi minor sit annis 25., *L. 24. de minor.*, aut nisi sit miles, qui nunquam tenetur supra vires hereditarias, *L. ult. C. cod.*

§. 418. Justinianus heredibus prospexit novo beneficio repertorii, sive inventarii, rerum omnium, quæ in hereditate

Cc

sunt

sunt tempore mortis, rite confecti, de quo *in d. L. ult.*, & *in Nov. 1. cap. 2.*: unde heres intra menses tres, ex quo sibi delatam scit hereditatem, si res præsto sint, h. e. proximæ, intra annum, si sint remotæ, præsentibus tabulario, ac testibus non minus tribus, necnon creditoribus, & legatariis, debet inventarium conficere, & sua manu subscribere; aut facere, ut a tabulario, testibus præsentibus, illud subscribatur. Multa heres ex inventario confecto commoda consequitur. In primis adversus legatarios legis Falcidæ beneficio utitur, *d. L. ult. §. 4.* Dein creditoribus hereditariis in tantum tenentur, quanti hereditas valet, *§. 6. b. r.* Ad hæc creditoribus, qui primi aderunt, recte faciet satis. Denique jure creditoris censetur cum aliis defuncti creditoribus, non confusis, ut olim, actionibus, si quas habebat adversus defunctum, *d. L. ult. §. 9.* Contra si heres legis beneficio non utatur, & neglecto inventario adeat hereditatem, omnia omnino ejus onera subit.

§. 419. Hæc pro securitate cauta sunt tam suorum heredum, quam extraneorum. Quod pertinet ad ipsum actum adeun-

deundi, five ad ipsam acquisitionem, hereditas acquiritur vel ipso Jure a necessariis, ac suis, vel hominis facto ab extraneis. Quare ut plurimum sui dicuntur *existere* heredes, vel *immiscere se hereditati*, non *adire*; nec *repudiare*, sed ab ea *abstinere se*. Tum factum, quo acquirit, & *adit* hereditatem extraneus, est quodvis voluntatis indicium verbis, vel re ipsa editum. Proprie autem *adit*, qui animum suum verbis declarat, §. 7. *b. t.* Qui vero re declarat *pro herede se gerit*, nimirum qui rebus hereditariis, tanquam dominus, utitur, *Ulpian. Fragm. tit. 22. §. 26. L. si is 22. de acquir. hered. L. 2. §. ult. de bon. poss. sec. tab.* (veteres enim dominos *heredes*, dominium *hereditatem* dixere, §. ult. *b. t.* Consonat Triboniano Festus); nisi quid pietatis, vel custodiæ causa faciat; adeo ut animus simul, & factum spectari oporteat. Additionis simplicis, quæ nuda animi manifestatione *sine sollemnibus* expeditur, meminit Constantinus in *L. 1. C. Tb. de legit. hered.*; & spectavit ad veterem *creationem*, *Ulp. d. loco*, quam primus Constantinus ipse in maternis bonis, *L. 1. C. Tb. de matern. bon.*, tum peni-

rus aboluere Arcadius, Honorius, & Theodosius in *L. 17. C. de J. delib.* . Id perperam Heineccius in *Antiq.* negat, Tandem hereditas recusari etiam potest & re, & verbis, *d. §. 7.*

T I T. XX.

D E L E G A T I S.

§. 420. **L**egatum est, *donatio quædam a defuncto relicta, ab herede præstanda*, §. 1. *b. t.* Proprie donationem non esse, patet ex differentiis inter legatum, & donationem, quas exposuimus (§. 344.) : ideo additur *quædam*. Sane totum a testatoris liberalitate proficiscitur; estque titulus mere lucrativus. Definitur etiam *delibatio* (non *delibratio*, ut temere reponit Donellus) *hereditatis, qua testator ex eo, quod universum heredis foret, alicui quid collatum vult*, *L. 116. de leg. 1.* Inutile igitur est legatum sine legatarii emolumento. Proinde si quis legaverit creditori quod ei debet, ita demum valebit legatum, si plus in legato fuerit, quam in debito, §. 14. *b. t.* Idque accidere potest præsertim aut mode,

do, aut tempore, aut conditione, aut loco, *L. 29. ff. cod.*. Similiter *repræsentationis*, sc. solutionis in antecèssum, ratio facit, ut vir uxori dotem utiliter *releget*, sive *præleget*. Hic *prælegare* est creditori ita legare, ut accipiat ante diem. Olim dos in mobilibus constituta reddebatur annua, bima, trima die, h. e. divisis in tres annos æquis portionibus. Hodie redditur intra annum, *L. ult. §. 7. C. de rei ux. act.*. Sed legata dos statim debetur, §. 15. *b. t.*. Sæpe interest, *ex testamento potius agere, quam ex pristina obligatione*, *L. 11. de liberat. leg.* Hinc plenius est legatum dotis etiam in rebus soli constitutæ (quæ statim redderetur), quam de dote actio, §. 15. *b. t.* Ac si dos legata sit, integra solvi debet: neque olim in hac specie erat locus iis retentionibus, quæ fieri poterant propter liberos, propter mores, propter impensas, aut propter res donatas, vel amotas, *V. Ulp. in Fragm.; & ibi Schulz. sing.*

§. 421. Olim quatuor erant legatorum genera, *per vindicationem, per damnationem, sinendi modum, & per præceptionem*, §. 2. *b. t.*, quæ differebant inter se for-

mulis, rebus ipsis, & actionibus. Sed ex Constitutionibus Constantini, ejusque filiorum, *sollemnitates verborum penitus sublata est*, d. §. 2. Et Justinianus in *L. 1. C. comm. de leg.* unam fecit legatorum omnium naturam, deditque pro iis obtinendis tres actiones; h. e. in personam, in rem, & hypothecariam. Quin fideicommissa etiam exæquata sunt legatis, *L. 2. C. eod.*; h. e. quod amplius erat in fideicommissis accessit legatis; quod amplius erat in legatis, id fideicommissis accessit. Tria autem hoc titulo præcipue traduntur; res, quæ legari possunt; personæ, quibus legari potest, & quomodo.

§. 422. Quoad primum attinet, non solum testatoris, heredisve res, sed & aliena legari potest; atque damnatus heres intelligitur, ut rem redimat, eamque det, vel justam æstimationem; quod proprie est legare *rem suam*, §. 4. *b. 1.* Id accipiendum, modo res sit in commercio; & modo sciverit defunctus rem esse alienam; ac legatario, quia is agit, onus incumbit probandi. Verum legato non nocet, si rei commercium non habeat heres, vel testator; nocet si non habeat legatarius; veluti si cui res sua
lege-

legetur , §. 10. *b. r.* : etiam si defierit res legatarii esse, *L. 1. de Reg. Caton.* Multo magis valet legatum rei testatoris, quam hic alienam ; vel legatarii esse , falso putat : nam valet legatum rei, quæ vere est aliena : Ideo non est rem ad Triboniani ratio ; *nam plus valet , quod in veritate est ; quam quod in opinione* , §. 11. *b. r.* Eadem ex ratione valere perget legatum rei ; quæ tempore testamenti testatoris erat ; tum fuit ab eo alienata ; nisi id factum sit animo adimendi legatum ; qui animus ex conjecturis probatur ; nimirum si ex voluntate, non ex necessitate, sit alienata. Hæ tamen conjecturæ probationibus contrariis cedunt, *L. 18. de adim. leg. §. 11. b. r.* Quod si legatarius rei alienæ sibi legatæ dominium adquisierit , vivo testatore , ex causa onerosa , rei pretium condicet ; si ex lucrativa , nihil debetur, §. 6. *b. r. L. 108. de leg. 1.* Hinc si cui fundus alienus legatus sit , & emerit proprietatem , deducto usufructu ; deinde ex lucrativa causa usufructus ad eum pervenit , recte ager , & fundum , h. e. proprietatem fundi , petet, §. 9. *b. r.* Sin ex duorum testamentis eadem res eidem debeat , si rem is

consequutus sit, agere amplius nequit; si æstimationem, potest agere ad rem, *d. §. 6.* Sed ob eandem quantitatem duæ lucrativæ causæ possunt concurrere, *L. 34. de leg. 1.* Legari etiam potest res, quam testator creditori obligaverat, & ab herede luenda est, si eam testator sciebat obligatam esse: nam si nesciebat, legatarius luet, *L. 57. de leg. 1. §. 5. b. r.* Porro quod in rerum natura non est, si speretur futurum, utiliter legatur; veluti fructus, qui in illo fundo nati erunt; aut quod ex illa ancilla nascetur. Et si nihil in rerum natura esse coeperit, nihil debetur: si vero non tantum, quantum formula legati expressum est, legatarius eo, quod natum est, contentus esse debet, *§. 7. b. r. & L. 8. de leg. 2.* Impossibile e contrario nullum est commercium. Insuper incorporales res legari possunt, *§. 21. b. r.* Huc pertinet legatum ejus, quod debetur: id autem si ipsi debitori legetur, *liberationis legatum* dicitur (quod ademptum censetur, si testator post legatum factum, debitum exegerit, *§. 13. b. r.*); si vero tertio cuidam, dicitur legatum *nominis*; *d. §. 3.*; & actionem legatario parit, qua debi-

bitum reperat. Etiam in hac specie, si ipse testator exigat pecuniam, extingui legatum, ait Tribon. §. 22. *cod.* Sed ut in re legata deinde alienata, ita & in debito exacto potest legatarius probare, testatorem legati non pœnituisse, *L. 11. de leg. 3.* Contra potest testator creditori suo, quod debet, legare: qua de re dictum est (§. 420.). Postremo recte legantur facta, *d. §. 21.*

§. 423. Quid si res legata aut intercedit, aut mutata sit? Si res, hoc est certum corpus legatum, fataliter, *Paul. sent. III. 6.*, sive naturali interitu, sive facto alieno perierit, legatario decedit, §. 16. *b. t. L. 18. §. ult. ff. de dolo malo*: non item si perierit facto heredis, quod est dolus, mora, aut culpa etiam levissima: *L. 47. §. 5. & 6. de leg. 1.* At si res legata æque apud legatarium periisset, æquius est, nihil præstare hæredem, qui in mora fuit, *L. 15. §. 3. ff. de reivind.* Quod si res incerta sit, puta homo generatim, aut centum autem, quia genus nunquam perit, nunquam etiam peribit legatum. Mutabitur vero, non peribit res legata, si quid illi vivo, vel mortuo testatore decedat, aut accedat: qua
su-

super re tres sunt Juris regulæ. Prima ; si quid vivo testatore decedat , quod reliquum est debetur , nisi hoc sit accessio ejus , quod intercidit . Quare grege legato , si una ovis supersit , quia pars est , non accessio gregis , debetur , §. 18. *b. r.* : & legato ancillarum cum suis partibus , etiam si ancillæ mortuæ fuerint , partus debebuntur ; quia accessio matrum non sunt . Idem erit , si ordinarii servi cum vicariis legati fuerint , §. 5. *b. r.* ; ac si insula , vel domus legata sit , area legatarii erit , *L. 22. de leg. r.* : Aliud est de usufructu gregis , aut domus relicto , *L. ult. ff. quib. mod. usufr. amitt.* §. 3. *Inst. de usufr.* Ut diximus , tunc debetur id , quod ex mutata re legata superest ; cum primum quid haberi possit , & non consequens ejus , quod decessit : nam si accedat parti , quæ intercidit , & ipsum peribit . Quare si servus cum peculio legatus sit , servo aut mortuo , aut manumisso , aut alienato , peculii quoque legatum cadit : si fundus instructus , vel cum instrumento legetur , fundo alienato , & instrumenti legatum perit , §. 17. *b. r.* Secunda regula est ; si quid mortuo testatore decedat , quod restat legato cedit ,

dit,

dit, quamvis id accessio sit : nam statim a morte testatoris civile dominium rei legatæ legatario acquiritur, *L. 64. ff. de furt.* Unde legato servo cum peculio, si mortuo testatore servus pereat, debetur peculium, §. 20. *b. r. L. 12. de pec. leg.* Tertia est, si quid legato accedat vivo testatore, id legato cedit, §. 19. *b. r.*

§. 424. Sequuntur personæ, quibus legari potest. Et iis potest, quæ possunt ex testamento capere, §. 24. *b. r.* Ante Justin. incertæ personæ nihil poterant ex testamento capere; tum quod certum esse deberet testantis judicium, tum etiam, quod beneficia in ignotos conferre sanus homo non solet, §. 25. *b. r.* Incertam personam definit Tribon., quam incerta opinione animo suo testator subijcit; veluti quicumque filio meo filiam suam in matrimonio collocaverit: quod exemplum est Ulp. *Fragm. tit. 24. §. 18.* Pro incertis personis habebantur quoque municipia, & civitates: quod jus abrogavit Just. Constitutione sua. quam Tribon. memorat §. 27. *b. r.* Postumo alieno, quia inter incertas personas erat, inutiliter quoque legabatur ante Justinianum §. 26. 27. & 28. *b. r.* Quin antiquitus & postu-

stumo suo inutiliter legabatur : nam is , etiam incertus erat . Postea quia placuit , hunc , licet incertum , institui heredem posse , ne agnatione rumperet testamentum , invaluit etiam , ut ei utiliter legaretur . Inutiliter etiam , legatur servo heredis , §. 32. *b. r.* : nam heredi a semetipso legaretur : licet postea servus , vivo testatore , de potestate heredis exeat ; idque ob regulam Catonianam ; quæ tamen ad conditionalia non pertinet : unde valet legatum servo heredis ita relictum , si ex ejus potestate exierit . Contra domino servi heredis scripti , etiam sine conditione , utiliter legatur (uti & a filiofamilias herede patri) ; quia potest fieri , ut servus nondum adita hereditate alienetur , aut manumittatur ; quo casu ad servum hereditas , ad dominum pertinebit legatum , §. 32. , & 33. *b. r.*

§. 425. Demum de modo legandi ; quo primum spectat jus accrescendi , quod in hereditatibus , legatis , fideicommissis singularibus , & donationibus causa mortis locum habet . Est jus , quo pars deficientis acquiritur conjuncto . Res eadem pluribus legari potest oratione conjunctim , & disjunctim , §. 8. *b. r.* Conjunctio est aut

aut re, aut re, & verbis, aut verbis tantum, *L. 142. de V. S.* Postremæ hujus conjunctionis exemplum unum est, *Titio, & Sejo fundum Tusculanum aquis partibus do lego*; quibus verbis res pro indiviso significatur. Conjunctionis effectus est jus accrescendi, si collegatarius deficiat; hoc est si aut spernat legatum, aut vivo testatore decedat, aut alia de causa deficiat, *L. un. C. de caduc. toll.*; uti si in metallum damnatus, deportatusve fuerit, *L. Papia Poppæa Fisco cedebant caduca*; idest quæ mortuo testatore, ante apertas tabulas deficiebant, & *quasi caduca*, quæ deficiebant post testamentum, testatore adhuc vivo. Justinianus caducis, & quasi sublati, *d. tit. C.*, jus vetus accrescendi restituit. Sed non pari ratione in omnibus conjunctis hoc jus procedit. Nam re tantum conjunctus, etiam invitus, & sine onere, quod deficienti collegatario fortasse imminebat, ejus partem acquirit: videtur enim suum magis non deminutum retinere, quam alienum consequi. Conjuncti vero re, & verbis, aut verbis tantum, acquirunt volentes, & cum onere, *L. un. §. 10. & sequ. C. de caduc. toll.*; nam magis ex persona deficientis

vi-

videtur portio deferri: & ita ii possunt eam non admittere, quia & deficientes potuit repudiare: ac si admittant, etiam onus adjunctum subire debent, *arg. L. 177. ff. de R. J.* Quod si plures sint conjuncti diversa conjunctionis specie, conjuncti in parte deficientis conjuncti cæteris præferuntur, quasi inter se conjunctiores: at omnes concurrunt, si disjuncti (sc. verbis) pars deficiat: ita tamen, ut conjuncti re, & verbis, aut verbis tantum, unius personæ vice fungantur, *L. 34. de Leg. 1. L. 89. de Leg. 3. V. Duaren. de J. adcrefc.* Cum autem accrescendi jus necessitas invenerit inter heredes, nec ipse testator in iis hoc jus prohibere potest; *Vinn. ad §. 8. n. 5.*

§. 426. Ad modum pertinet etiam legatum generis, & optionis. Quod dialectici *speciem*, Jæti vocant *genus*: & quod illi *individuum*, hi *speciem* dicunt. *Homo* ex. gr. Jæti est *genus*; *Stichus* *species*. Valet quidem legatum generis. Sed si definitionem a natura habeat, uti *homo*, valet, etiam si nullum in hereditate existat: si nostra destinatione constitutur, uti *domus*, *fundus*, legatum, uti *derisorium*, non valet, si testator nullum reli-

liquerit, §. 22. *b. r.* Verum si res generaliter legata fuerit, nec pessima, nec optima (ex. gr. servus actor, cui conceditæ sunt omnes familiæ rationes) eligenda est. In optionis legato tamen liberum est legatario optimum eligere, §. 23. *b. r.* Et Justiniani Constitutione, quæ in Codice non extat, permissum est legatarii heredi optare, sublata veteri tacita conditione, si legatarius optaret, quæ huic legato inerat. Si plures legatarii optionis, vel unius heredes dissenferint in eligendo, optionis judex est fortuna: ad quam rem digitis quandoque veteres micasse, constat, §. 22. & 23. *b. r.*, *L. ult. 6. Comm. de leg.* Et quæ controversiæ alias dirimi nequeunt, forte dirimi, leges jubent, *L. 14. ff. de judic.* Observandum est, servi optionem inter actus legitimos relatam olim fuisse, *L. 77. ff. de R. J.* Ejus verba vide *Declam. 4.*

§. 427. Tres regulas profert heic Tribonianus. Prima est; si in nomine legatarii, aut heredis erratum sit, & de persona constet, legatum valet. Apud Romanos *prænomen* singulas cujusque familiæ personas designabat; *nomen* universæ
gen-

genti commune erat ; *cognomen* familias cujusque gentis distinguebat ; & quandoque *adgnomen* a facto quodam sumebatur ; ex gr. *P. Cornelius Scipio Africanus*. At si testator in nominibus rerum appellativis erraverit, uti si *vestem* legare vellet, & *suppellectilem* scripserit, placuit, neutram peti posse : alteram enim non dixit ; alteram non intellexit, *L. 4. de leg. 1.* ; nec debet privatorum arbitrio publicus usus loquendi interverti, *L. 7. §. 2. ff. de suppell. leg.*. Secunda ; nec falsa demonstratio nocet, Tertia ; nec nocet falsa causa. Aliud est de causa conditionaliter concepta, ex gr. *Titio, si negotia mea curaverit, fundum do lego*, §. 29. 30., & 31. *b. 1.* Sed causa ad futurum spectans dicitur *modus*.

§. 428. Similiter ad legandi modum tres spectant Juris sententiæ a Justiniano abrogatæ. Prima ; olim ante heredis institutionem nil poterat legari, §. 34. *b. 1.* Altera ; legari non poterat post mortem heredis, legatariive, §. 35. *b. 1.* Tertia ; inutile erat legatum pœnæ nomine. Sane quod amore legatarii, aut fideicommissarii faciendum erat, iniquum censebatur id odio eorum facere. Est autem

tem pœnæ nomine legare, quod coërcendi heredis causa relinquitur, quo magis aliquid faciat, aut non faciat, d. §. 36. Ulpian. Fragm. tit. 21. §. 17.; veluti heres meus, si filiam suam in matrimonium Titio collocaverit, vel si non collocaverit, dato decem aureos Sejo. E. contrario Bynk. de legatis pœnæ nomine, putat, apud Vefores pœnæ nomine legare idem significasse, ac quid relinquere, quo testator heredem cogeret ad quid illicitum, & probrosum faciendum: ac proinde Tribonianum errasse, Justinianum vero nihil novi cavisse, sed uti exceptionem proposuisse, quod Juris antiqui regula erat: tum quia legare, si heres fecerit, aut non fecerit, non aliud est, quam legare sub conditione in arbitrio heredis posita: quod legatum & olim valebat; ac valebant conditiones omnes, quæ a Tribon. heic proponuntur: tum quia Africanus scribit in L. 1. de his quæ pœnæ causa relinquuntur, pœnæ nomine legare, fuisse aliquid in alicujus pœnam illicita, vel probrose dare. Nihilo tamen minus, quæ habet Tribon. ab Ulpiano depromptit. Poena autem a conditione ex testantis voluntate distinguitur, L. 2. ff. eod.: quod ex rerum adjunctis argui-

Dd

tur,

tur, *Donell. ad L. un. C. de his, quæ pœnæ nomine*. Et Ulpianus idem *d. loc.*, *pœnæ causa legatur, ut heres faciat, aut non faciat, non ut legatum pertineat*. Textus Africani videtur a Triboniano interpolatus. Sed nec hereditas olim pœnæ nomine dari poterat. Justin. autem vetus Jus sustulit; ac legata pœnæ nomine relicta, tanquam conditionalia valere jussit, nisi *quæ impossibilia sunt, vel legibus interdicta, aut alias probrosa* testator præceperit; ex. gr. *heres nisi nudus in Foro saltet, decem Seso dato*: nam æquum non esset, heredem ad præstandum legatum obligari, quia probro abstinet, *L. un. C. cod.*

§. 429. Quod attinet ad periculum, & commodum rei legatæ, si legatarius, decesserit post diem legati cedentem, ad heredem suum transfert legatum: sin ante eum diem, legatum penes heredem remanet. Dies legati puri cedit a morte testatoris: conditionalis, conditione existente, *L. un. Cod. de caduc. toll.* At civile dominium rei pure legatæ, a morte testatoris vi Juris legatario acquiritur; naturale in ipsum non transfertur, nisi post aditam hereditatem; quia incipit a possessione. Proinde dominium, seu com-
mo-

modum rei legatæ ante aditam hereditatem; heredis est; post aditam; legatarii. Si vero heres sine causa adire negligat, usuræ, & fructus post moram debentur; quia a die moræ periculum rei legatæ ad eum pertinet, *L. 3. ff. de usuris.*

T I T. XXI.

DE ADEMTIONE, ET TRANSLATIONE
LEGATORUM.

§.430. **P**Otest testator quod uni legavit, adimere verbis, aut factò. Factò ex. gr. si aut scriptum inducat, aut rem legatam, non urgente necessitate, alienet. Verbis sive contrariis; uti *quod Titio legavi, non lego, princ. b. 1.*; sive non contrariis; uti si libertum, cui in priore testamenti parte testator quid legaverat, in postrema scriptura pessimum, & ingratum appellet, *L. 13., & 29. de adim. leg.* Transferri quoque legatum potest. Hoc fieri quatuor modis docet Paulus in *L. 6. eod.*; nempe a persona in personam (prioris legatarii nomine expresso, *L. 33. de leg. 1. Bachov. in §. Inst. b. 1.*); mutata persona, a qua le-

gatum fuit ; mutato ipso legato ; & mutato legandi modo : puta si quod pure legatum erat , sub conditione legetur . Sed primum tantum proponit §. 1. Tribonianus . Tum ademptio , tum translatio , & eodem testamento , & Codicillis fieri potest d. §. 1.

T I T. XXII,

DE LEGE FALCIDIA.

§. 431. **Q**Uum latissima potestate testandi per XII. Tab. concessa plerique abuterentur , ac universum legatis erogarent patrimonium , plerumque destituebatur testamentum . Tantam licentiam primum coërcuit lex Furia (non Caninia), qua cautum , ne quis legati nomine plusquam mille assium caperet, *Ulp. F. iii. 28. §. 7.* Cum vero recte poterat pluribus intra modum hujus legis legari , cautum lege Voconia fuit , ne quis census testator plus cuiquam legaret , quam ad heredes perveniret . Sed neque hoc fuit optimum illius mali remedium . Tandem testamentis quamoptime prospectum Plebiscito , sive lege Falcidia , sub Augusto ,

anno U.C. 714., lata a P. Falcid. Trib. Pleb., *ne minus, quam quartam hereditatis heredes capiant*, L. 1. ad L. Falc. Quod ait Tribonianus, L. Falcidia caveri, ut *sive unus heres institutus sit, si-ve plures, apud eum, eosve pars quarta remaneat*, accipiendum, si legata simpliciter ab omnibus relicta sint. Quod si pluribus scriptis ex certis partibus heredibus, & nominatim ab uno, alterove legatum sit, *placuit* singulis quartam non totius hereditatis, sed suæ partis salvam esse oportere, quasi plures partes ejusdem hereditatis plures hereditates sint. Verum si omnes extiterint heredes, semper in singulis, uti dixi, Falcidia separatim ponitur. Aliter refert num pars exhausta, si-ve onerata, substitutionis, vel accrescendi jure accederet non onerata; an hæc illi. Et priore casu non augentur legata, atque ideo quarta detrahi potest, perinde ac ab ipso, qui defecit, potuisset; posteriore augentur. Ita *placuit*, L. 78. ff. ad L. Falc. L. 1. §. 14. eod. Plane priore casu ex persona deficientis quis obligatur ad legata; posteriore vero suo nomine, §. 87. eod.

§. 432. Quantitas patrimonii, ad quam

Dd 3

ra-

ratio legis Falcidiæ ineunda est, mortis tempore spectatur, quo dici incipit *hereditas*. Ergo si quid ante aditam hereditatem de ea decessit, id damno esse debet heredi, cui tamen liberum est destituere testamentum, cum legatariorum iactura; atque his remanet, ut cum illo paciscantur in portionem. E contrario si quid accessit hereditati, heredi est lucro, §. 2. *b. r.* Interdum quod accedit, deceditque, est lucro, aut damno legatariis. Est lucro si quid post mortem accedit, cujus causa jam suberat tempore mortis ex facto aliquo testatoris. Est damno, si legetur certa species, quæ tum deterior facta est, vel periit sine facto heredis.

§. 433. Quoniam vero bona intelliguntur cujusque, quæ deducto ære alieno *superfunt*, L. 39. §. 1. *de V. S.*, est id in ratione legis Falcidiæ deducendum, §. 3. *b. r.* Atque æs alienum censetur etiam, quod honeste impenditur in funus, ac pro inventario, & aditione hereditatis: necnon pretium fervorum manumissorum. Detrahit etiam heres id, quod sibi defunctus debebat, L. 6. *C. b. r.* Et quia legitima filiis a patre debetur, Facchinæus *Controv. V. 2.* §. 3. putat, eos uti filios, illam detrahe-

here posse ante quartam Falcidiam; quam deinde detrahent, uti heredes. Hæc sententia ex Jure Pontificio c. 16. ff. *de testamentis* in Foro invaluisse videtur. At ex Civili Jure una quarta filio debetur, L. 8. §. 9. *de inoffic. test.* L. 6. C. *ad S.C. Trebell. V. Cujac. obs. VIII. 3. Hostom. quæst. illustr. 43., & Harprecht. diff. de jure deduc. duas quartas.* Insuper a legatis producta est Falcidia ad fideicommissa, L. 5. C. 13. ff. *b. r.*: tum ad mortis causa donationes; itemque ad donationes inter virum, & uxorem morte confirmatas, L. 5. C. 12. C. *b. r.*. Denique multis casibus Falcidia cessat. Ex gr. in dote relegata L. 81. ff. *b. r.*, in legatis ad pias causas, Nov. 131. c. 12.; ac si heres vel sciens, vel ex Juris ignorantia integra præstiterit legata, L. 9. C. *cod.*, a testatore vivente quartam acceperit, L. 56. ff. *cod.* si inventarium non confecerit, L. ult. §. 14. C. *de jur. delib.* Præcipue ex Justiniano Nov. 1. cap. 2. §. 2., unde Auth. *sed cum testator* C. *b. r.*, Falcidiæ detractio nominatim vetari potest: idque contra legis Falcidiæ rationem Imperatori placuit. Ferme iisdem casibus cessat Trebellianica quarta, de qua *tit. seq.*

Dd 4

TIT.

T I T. XXIII.

DE FIDEICOMMISSARIIS HEREDITATIBUS.

§. 434. **F**ideicommissum est id omne ,
 de quo quis suprema defuncti
 voluntate rogatus est, ut daret, vel fa-
 ceret; sc. quod mandatum est fidei here-
 dis: estque vel universale, quando here-
 ditas, vel ejus pars fideicommittendo re-
 linquitur, de quo nunc; vel singulare,
 quando res singulæ relinquuntur, de quo
 seq. tit. Lex Decemviralis in eo, quod
 iterum non redit, arbitrio, permisit *le-
 gare*; id est in modum imperantis dispo-
 nere, quod *lex* facit. Quare si quid te-
 stator heredem facere rogabat ex fidei-
 commisso, id nullius Juris vinculo conti-
 nebatur, §. 1. *b. t.* Et Ulpian. *Fragm.
 tit. 25.* §. 1. verba *civilia*, quæ sunt ad
 modum legis, opponit *deprecativis*, sive
 inflexis; qualia sunt *rogo, peto, mando,
 volo, cupio* &c. Verbum *jubeo* plerumque
 imperii est, quandoque fideicommissi; pe-
 rinde ac *volo*, L. 28. §. 13. *ff. de lib.
 leg.* Testatores per fideicommissa faciebant
 ob-

oblique, quæ facere non poterant directo, sive *recto jure*, §. 2. *b. r.*, tam si heredes instituere vellent, quibus jus non erat capiendi, quam si peregre morientes non poterant testium civium Rom. copiam habere. Hinc cœpere morientes codicillis, sive epistolis, futuros sibi heredes rogare, ut aliquid facerent, *princ. tit. inf. de Codicillis*. Primus Augustus, cujus fidem elegerat Lucius Lentulus, jussit Consulibus auctoritatem suam interponere fideicommissis. Id sub Claudio conversum est in assiduam jurisdictionem; adeout Prætor fideicommissarius crearetur, §. 1. *b. r.* Sed simul cognoscebant etiam Consules, si summa erat Prætoria cognitione major, *Cujac. Obs. XXI. 34.* Procedente tempore licuit per fideicommissum relinqui tantum iis, quibus directo poterat.

§. 435. Hereditas, ejusque pars testamento, codicillisve relinqui per fideicommissum potest. Testamento relinquitur tantum ab herede scripto. Eum sane, cujus fidei committere volumus, heredem instituere debemus: alioqui inutile est testamentum, in quo nemo heres instituitur, §. 2. *b. r.* Codicillis recte relin-

qui-

quitur non tantum ab eo, qui testamento scriptus est heres, sed etiam ab eo, qui successurus est ab intestato, §. 10. *b. 1.*; sive legitimus, sive honorarius sit successor, h. e. sive Jure civili, sive Prætorio ad intestatam hereditatem vocetur. Nec obstat quod scribit Gordianus, *L. 9. C. de fideicom.*, ab eo, qui nihil accepit a defuncto, nihil posse per fideicommissum relinqui: nam qui poterat testamento adimere legitimam hereditatem, & non ademit; videtur reliquisse, *L. 8. de Jur. Codicill.* Ergo postquam Const. Justin. in *L. 2. C. comm. de legat.* sublata est omnis differentia inter legata, & fideicommissa, recte censent Interpretes, etiam legata ab intestato relicta valere, §. 10. *b. 1.* Porro & a fideicommissario fideicommitteri potest, §. 11. *b. 1.* Verum fideicommissa hereditas, non secus ac legatum, fideicommissumve singulare, potest ad diem, vel a die dari. Cum enim qui restituat hereditatem non desinat heres esse, §. 3. *b. 1. L. 88. de hered. instit.*, non est metuendum, ne quis testato, & intestato decedat.

§. 436. Quoniam vero heres, hereditate restituta, pergit heres esse, evenire olim

olim nullo negotio poterat, ut is hereditatem mox restituendam adire recusaret, actiones hereditarias suscepturus. Propterea ad suprema judicia tuenda Sctum Trebellianum factum, est temporibus Neronis, Annæo Seneca, & Trebellio Maximo Cff., quo cautum fuit, ut restituta hereditate, omnes actiones fideicommissario, & in eum darentur, §. 4. b. r. Sed non bene hoc modo fideicommissis consultum. Quod erat optandum, ut heres proposito præmio ad adeundum invitaretur, id temporibus Vespasiani, Pegaso, & Pusione Cff., præstitit Sctum Pegasianum; heredi permissa quartæ partis retentione, exemplo legis Falcidiæ. Unde, quam nos vulgo dicimus *quartam Trebellianicam*, Romani Jcti, *quartam*, vel beneficium *Falcidiæ* dixerunt, L. 47. ad L. Falc. L. 55. ad Trebell. Sed nec satis habuit Senatus sola quarta tueri fideicommissa: nam poterat etiam heres nolle hereditatem adire: quo casu cogi eum a Prætore iussit, hereditatem adire, ac volenti fideicommissario solidam restituere, §. 6. & 7. b. r. Scribit autem Vinnius in d. §. 6., contumaciam pro aditione esse; ne liber homo ad factum compelli videretur.

§. 437. Quo autem omnia, quæ ad Pegasianum pertinent, dilucidius exponantur, tres casus explicandi sunt. Primus; si heres volens restitueret, retenta quarta; & tunc fiduciarius *universa onera hereditaria sustinebat*, & fideicommissarius *legatarii partiarii loco erat*, idest ejus legatarii, cui pars bonorum (melius *hereditaria*) *legabatur*, §. 6. *b. t.*: unde ut lucrum, & damnum divideretur, solebant interponi stipulationes *partis*, & *pro parte*, §. 5. *b. t.* Secundus, si volens restituerit, non retenta quarta; & tunc sustinebat itidem heres onera universa; sed inter eum, & fideicommissarium *emtæ*, & *venditæ hereditatis stipulationes* interponebantur, quo casu fideicommissarius erat loco heredis, §. 3. *b. t.* Tertius casus, si heres imperio Magistratus adiret; & tunc nullis stipulationibus erat opus; atque actiones omnes hereditariæ in fideicommissarium transferebantur; perinde ac si ex Scto Trebelliano restituta hereditas esset, *L. 4. b. t.* Quo sensu *utrumque Sctum concurrere*, scribit Tribonianus.

§. 438. At Justinianus nova Const., quæ non alibi extat, quam in §. 6. *b.*

t.,

1., omnem Pegasiani vim in Trebellianum transtulit, ex eoque solo hereditatem restitui jussit: ita ut heres ex Trebelliano quartam, vel quod quartæ deest, retinear; ex eodem actiones pro rata communicentur: ac si heres adire, & restituere nolit, ex hoc eodem Scto cogatur: & præterea restituta tota hereditate sive sponte, sive Prætoris jussu, omnes actiones in fideicommissarium transeant: unde nullus amplius foret usus stipulationum, quæ ex Pegasiano descendebant. Quod diximus, actiones inter heredem, & fideicommissarium pro rata communicari; id denotat, ut si pars tantum hereditatis restitui jussa sit, pro parte non restituta, actiones apud heredem remaneant; pro restituta, transeant in fideicommissarium. Si tota hereditas, aut integra alicujus heredis portio restituatur, omnes actiones in fideicommissarium transferantur. Si vero dodrans, retenta quarta, ex Scto restituatur, actiones pro dodrante transferuntur, pro quadrante remanent, §. 7. *b. 1.* Quoad hanc actionum translationem, idem jus de instituto in parte hereditatis, §. 8. *b. 1.*: non idem de eo, qui ex re certa scriptus heres, restituere rogatus est heredita-

tatem, ea re præcepta: nam is legatarii loco est, §. 9. *b. t.* Et quia ipse fideicommissarius potest de restituendo fideicommisso, vel ejus parte, rogari, & in hac specie placet, actiones ex Sæto transferri in secundum fideicommissarium: solus vero heres quartam Trebellianicam retinebit, §. 11. *b. t.*

§. 439. Quod si quis relictum sibi dicat fideicommissum hereditatis, vel certæ rei, nec legitimus quinque testium numerus faciat fidem, potest is prius de calumnia juratus, si hoc exigatur, neganti reo deferre jusjurandum. Hinc in gratiam fideicommissi ejus probatio proficiscitur ab ipso reo, qui si jurare recusaverit, præstare fideicommissum cogetur, §. 12. *b. t. ex L. ult. C. de publ. judic.*

T I T. XXIV.

DE SINGULIS REBUS PER FIDEICOMMISSUM RELICTIS . .

§. 440. **P**ostquam Justinianus singularum rerum fideicommissa legatis exæquavit in *L. 2. C. communia de legatis*, quæ de his supra dicta sunt, & de illis

illis intelligenda . Exæquavit nimirum quoad Juris effectum , & prærogativas . Cæterum etiam hodie directis verbis relinquitur legatum , precariis fideicommissum . Nonnulla heic observanda sunt ad legum interpretationem . Et singulare fideicommissum relinqui potest ab herede , a fideicommissario , & a legatario , *quamvis a legatario legari non possit ; princ. b. 1. ;* quæ verba cum Tribonianus fortasse ex Gajo *Inst. II. tit. 7. §. 3.* descripsit , immemor fuit Justinianæ Constitutionis , ex qua legata , & fideicommissa exæquata jam erant . Potest insuper per fideicommissum relinqui non solum res propria , sed & heredis , aut legatarii , aut fideicommissarii , aut cujuslibet alterius ; ita ut res vel redimatur , vel ejus æstimatio præstetur . Nam per fideicommissum non solum reddendi onus injungi potest , sed etiam dandi , *§. 1. b. 1. L. 1. §. 17. ff. ad S. C. Trebell. L. 9. Cod. de fideicommissis .* Libertas quoque per fideicommissum servo & proprio , & alieno dari potest , *§. 2. b. 1. ,* adeo ut alienus servus redimi , & manumitti debeat . Quod si dominus eum vendere nolit (& potest nolle , si nihil ex
fi.

fideicommittentis iudicio perceperit, aliter cogi potest ad vendendum), non deficit fideicommissum, sed servi redimendi expectari debet occasio, *L. 6. C. de fideicommissariis libertat.* In hac enim specie æstimatio præstari non potest. Per fideicommissum vero manumissus non testatoris fit libertus, sed ejus, qui manumissit, §. 2. *h. r. L. 6. C. eod., & L. 10. Cod. de testam. manumiss.* Quod discrimen stat adhuc post exæquationem legatorum, & fideicommissorum; uti & hoc aliud; legata relinqui non possunt, nisi adhibitis quinque testibus, *L. ult. §. ult. C. de J. codicill.*; fideicommissa etiam sine testibus relicta debentur, si probari, vel iusjurandum deferri possit, testatorem alicui præsentis fideicommississe. *L. ult. C. de fideicommissis.*

T I T. XXV.

DE CODICILLIS.

§.441. **C**odicillis, ac voluminis discrimen satis superque apud Philologos compertum est. Codex, sive caudex, quod latinis est lignum, pro tabulis simul junctis usurpabatur, teste Nonio, *quod antiqui plures tabulas conjunctas Codices dicebant; a quo in Tiberi naves Codicarias appellamus*. Tabulas vero dixere veteres non tantum ligneas, sed & marmoreas, eboreas, papyraceas, chærtaceas, membraneas, & quicquid aptam scribendo materiam præstat. Tam Codices, quam volumina, e tabulis conflata erant; sed horum figura cylindrica fuit; illorum figura quadrata, ad instar nostrorum librorum. *Salmas. de modo usur. cap. II., & ad Vopiscum tom. 2. pag. 696. ad 709.* Codicilli vero parvi codices fuerẽ; quod tabellis, & quidem paucioribus constarent. Hoc nomine sæpe veniunt breves epistolæ, quæ dari ad præsentem solent, *Seneca ep. 55., Hotoman. Obs. IV, 1.* Codicillos definit Cujacius, mi-

E e

nus

nus sollemnis voluntas hominis testati, vel intestati, Sane suprema sua judicia testatores, scriptis ad heredes codicillis, seu litteris, olim significarunt. Unde ii (plurali numero ut plurimum dicuntur, L. 148. de V. S.; quandoque etiam singulari, L. 19. ff. de J. Codicill. L. 28. de C. & D.) appellantur *epistolæ*, L. 75. & 77. de leg. 2.; atque cum salutis præfatione concipi solebant, L. 56. ff. de fideicom. libert., L. 37. de leg. 3. V. Pancirol. Lect. I. 29. Postmodum hoc nomen omni extremæ hominum voluntati minus sollemni accommodatum est.

§. 442. Profecto Codicillorum usus invaluit præsertim propter longas peregrinationes. Cum enim facile non esset ob Civium defectum testamenta condere, probandos Codicillos esse, Jæti Augusto responderunt. Sane cum Lucius Lentulus in Africa obiens Codicillos scripsisset, quibus ab Augusto, & filia sua, heredibus jam scriptis in testamento Romæ ordinato, petebat, ut ille aliquid faceret, ac legata quædam solveret, Augustus ex Prudentum consilio Lentuli factum probavit, & Codicillorum scribendorum potestatem omnibus fecit, Deinceps quia Labeo Codicil-

cillos fecit, ji magis magisque admissi
fuere ob auctoritatem tanti Jcti, de quo
Tacitus *Annal.* III. 75., & Gellius *XIII.*
12. Sunt igitur Codicilli in Jure appen-
diculæ, & accessiones testamentorum, ad
quorum exemplum scripti, & nuncupativi
esse possunt: non secus ac testamenta, *L.*
13. *C. de SS. Eccles.*, *L. ult. §. ult.*,
C. de codicill.: eosque is tantum facere
potest, qui testamenti condendi jus ha-
bet, *L. 5. §. 3. ff. de J. Codicill.*

§. 443. Jam vero Codicilli & ab in-
testato fieri possunt, & facto testamento.
Si fiant ab intestato, viribus nituntur
suis, & vicem exhibent testamenti; ut qui-
cumque intestati successor sit, Codicillis
relieta præstare teneatur. Illud in eorum
auctore requiritur, ut cum Codicillos scri-
bat, non habeat animum testamenti con-
ficiendi: aliter ejusmodi scriptum neque
Codicillus erit ob voluntatis defectum;
neque testamentum ob defectum sollem-
nitatis. Nisi tamen auctor adjece-
rit, velle se, eam voluntatem, si jure
testamenti non possit valere, saltem va-
leat vice Codicillorum, aut omni melio-
ri modo: quæ adjectio *Codicillaris clau-
sula* dictitatur. Codicilli autem, con-

dito testamento, quocumque tempore facti, ad testamentum pertinent, ex eoque vires capiunt: ita ut testamento infirmato, & ipsi concidant, *L. 16. ff. de J. Codicillor.* Quocumque, iniquam, tempore: nam sive ante, sive post testamentum fiant, eundem habent valorem. Codicilli quidem ante testamentum confecti ex Papiniani sententia in *L. 5. §. 14. de J. Codicill.* non aliter valerent, quam si speciali voluntate postea confirmarentur. Sed Divi Severus, & Antoninus rescripserunt, eos vires habere, si appareat, testatorem a voluntate, quam Codicillis expresserat, non recessisse, *§. 1. h. t.* Et communis enim sententia est, Codicillos, nisi testamento postea facto revocati probentur, tacite confirmatos intelligi. Vides, Codicillos vel esse testamento confirmatos; vel non confirmatos, *L. 8. ff. de J. Codicil.*; ac illos vel firmatos dici in futurum, si post testamentum fiant, sed inserta testamento formula; si quos Codicillos reliquero, valere volo; vel in præteritum, si Codicillos jam factos testator testamento valere jubeat.

§. 444. Licet Codicilli ob pleniorē rei testamentariæ usum inventi sint, iis

tamen hereditas directo dari non potest. Excipi miles debet. Nam hereditas per institutionem, vel per substitutionem directam dari debet; quod solius est testamenti. Sicuti autem non dari, ita nec per Codicillos adimi hereditas potest, puta iis, qui vel in testamento scripti sunt heredes, vel heredes legitimi sunt. Proinde liberi in Codicillis frustra exheredantur, *L. 14. C. de testam.* Nec conditio heredi in testamento scripto adjici, nec detrahi Codicillis potest; uti nec directa substitutio fieri, quia est secunda institutio. At quod directo non licet, precario, & per fideicommissum in Codicillis facere possumus: rogare nempe heredem, sive scriptum, sive legitimum, ut hereditatem, vel ejus partem alicui restituat: quo facto, hereditas datur ei, cui restitui rogatur; adimitur ei, qui rogatur, §. 2. *b. r.*

§. 445. Testamentum unum esse debet: quia universam continet successionem. Codicillos e contrario non modo plures, pluribus exemplis quis facere potest; sed etiam diversos, & diversarum rerum; & priores posterioribus, nisi contrariis, non tolluntur, §. 2. *b. r. L. 6. ff. de J. Co-*
di-

dicill. Eos etiam nullam desiderare ordinationis sollemnitatem, scribit Tribon. §. *ult.* Quod Jure veteri verum erat, *L. 89. de leg. 2.* At novo Jure non omnino verum. Nam ex Const. Theodosii in *L. ult. §. ult. C. b. t.* quinque testes requiruntur, unum tempus, unus contextus: &, si in scriptis fiat, testium subscriptio. Testes autem etiam feminas esse posse; multi putant ex eo, quia in Codicillis potius ad probationem, quam ad actus sollemnitatem adhiberi videantur, *Heinecc. ad Vinn. §. ult. b. t.* Sed ex DD. opinione immunes ab hac sollemnitate sunt Codicilli testamento confirmati; ex eo, quia quod in his relinquitur, perinde habeatur, ac si in ipso testamento relictum esset; ut proinde ad horum relictorum vim sollemnitas testamenti sufficere debeat. *Vinn. in b. t., & Emmanuel Dunius de J. Codicillorum.*

§. 446. Apponi quoque ipsi testamento solet clausula codicillaris hoc modo; *si testamentum non valebit tanquam testamentum, volo ut valeat jure Codicillorum, L. 41. §. 3. ff. de vulg., & pupill., L. 3. ff. de testam. militis.* Atque ita si testamentum sit imperfectum, he-

heredes ab intestato censentur rogati, ut ex fideicommisso heredibus in testamento scriptis hereditatem restituant, *L. 29. §. 1. ff. qui test. fac. poss.*, modo saltem quique testes testamento subscripserint: aliter nec Codicilli esse censentur. Sed ea clausula inanis erit, si defunctus factionem testamenti non habuerit, aut si voluntatis defectu, aut præteritionis, aut exheredationis filiorum vitiosum fuerit testamentum. Latius in hisce rebus spatia-ri, temporis jam vetant angustiae. Quæ autem veluti in nucleo heic exhibuimus, quæque spatiis exclusi iniquis omisimus, fuscè in nostris Tractatibus persequuti sumus.

605417



ERRATA

CORRIGE.

Pag. 2	duco	ducimus
9	at tutela	& tutela
28	liberatis	libertatis
40	ambages	ambages
83	pendet	pendet
88	Ovid. in <i>metam.</i>	Ovid. in <i>epist.</i>
94	diversitem	diversitatem
120	juris subjecti sunt	juris sunt
126	paper	pater
138	C. 16.	L. 16.
180	§. 202.	§. 226.
232	elementariam	elementariorum
234	gestea	gesta
269	ptum	scriptum
288	jumenta	jumentum
291	mox	modo dictum est
331	Ergo	Atque
336	quarta quarta	quarta
339	expeditionis	militiæ
351	Emancipatos , datoſve	Emancipati , dative
343	Fragm. tit. 10,	Fragm. XX. 10.







